

ЎЛМАС
УМАРБЕКОВ

Қ ис с а



Ўзбекистон ЛКСМ
Марказий Комитети
„Ёш гвардия“
нашириёти
Тошкент—1978

ДАМИР
УСМОНОВНИНГ
ИККИ БАҲОРИ

Ҳамза номидаги республика давлат мукофоти лауреати, Ўзбекистон Ленин комсомоли мукофоти лауреати Үлмас Умарбеков бу асарда партия ходимининг бурчи, жамиятдаги ўрни ҳақида ҳикоя қиласи. Шунингдек ахлоқий-маънавий масалалар ҳақида ҳам фикр юритади.

$$\text{У} \frac{70393 - 277}{356(16) - 78} = 55 - 78$$

© Издательство „Ёш гвардия“ — 1978



1

Район партия конференцияси мўлжалланган вақтда,
кечки олтида тугали. Раислик қилувчи, район ижроия
комитетининг раиси Қудрат Саимович Сөдиқов, ярим
соатлик танаффусдан сўнг бадий ҳаваскорлар ижроси-

да катта концерт берилишини баланд овоз билан эълон қилгач, етти юз кишилик зал «гурр» этиб қўзғалди, орқа қаторларда ҳатто қарсак чалинди. Қарсакларнинг маъноси тушунарли эди. Одамлар пленум одатдагидек чўзилмасдан, белгиланган вақтда тугаганидан мамнун эдилар. Қудрат Саимович икки йил бурун бошидан кечирган гипертоник кризисдан сўнг панжалари чангакдек қотиб қолган чап қўлининг мушти билан ўнг қўлининг кенг, қорамтири кафтига оҳиста урар экан, беихтиёр жилмайиб, эшикка йўл олган президиум аъзоларига қаради. Аммо ҳеч ким унга эътибор бермади, ҳамма тезроқ саҳнадан тушиш тараддуидиа эди. Фақат эшик олдида ўзини уй эгасидек тутиб, ҳаммани самимий ҳурмат билан ўтказиб юбораётган район партия комитетининг иккинчи секретари Козим Бурҳонович Бурҳонов қуюқ қошларини чимириб, унга киноя билан қараб қўйди. Содиқов унинг киноясини тушунмади. Эшикка етганда:

— Қани энди ҳамма мажлислар ҳам шундай ўтса!— деди кўзлари чақнаб.— Одамларни кўрдингизми, Козим Бурҳонович? Бошлари осмонда! Буям катта иш. Биласизми, мен...

— Овқат тайёрми?— уни бўлди Бурҳонов.

— Ҳаммаси тайёр,— деди бирдан ўзгариб Содиқов.

— Юринг, бўлмаса,— Бурҳонов шундай деди-ю, уни кутмасдан ўзи биринчи бўлиб эшикка йўналди.

Қудрат Саимович бошини эгиб, бирпаста совуқ тер босган семиз гарданини артганича унинг кетидан юрди. Овқатланиш мўлжалланган район миқёсидаги мажлислар, икки йилдан бери унинг учун ташвишли масала бўлиб қолган эди. Қим билади, қон босимининг ошиши, қўлининг ишдан чиққанига балки шу ҳам сабаб бўлгандир? Ўшанда ёз эди, пахта энди кўсак туттаган пайт. Мусобақадош областдан меҳмонлар келишди. Кундузи далалярни айланиб, кечқурун районда актив йиғилишини ўтказиш мўлжалланган эди. Бурҳоновнинг таклифига мувофиқ, кечки овқат ижроия комитетининг ҳовлисида

қилинадиган бўлди. Меҳмонлар чарчашиган, кейин ҳеч ким хафа бўлмайди, нега бизнинг колхозга олиб бориш мади деб. Бу таклифга Содиқов дилида рози бўлмаса ҳам, йўқ демади. Ҳар ҳолда колхозда зиёфат тузук бўларди. Менюни келишиб олиб, ходимларга тегишли тоғишириқларни берди-да, меҳмонларга қўшилиб кетди. Йиғилиш яхши ўтди. Меҳмондорчилик ҳам дуруст бошланди. Ижроия комитетининг ҳовлисида танаси тўрт қулоч келадиган иккита чинор бор эди. Шуларнинг тагига жой тайёрланди. Аввал суюқ овқат, кабоб тортилди. Но-мига ичилган бўлди. Ошга келганда меҳмонлар туриш мади, қўзғалишди. Бурҳонов, жуда бўлмаса бир ошамдан еб кетинглар, ҳозир суздирдик, деб қўймади, рози бўлишди, жойларига омонатгина ўтиришди. Аммо ош ҳадеганда келавермади. Меҳмонлар йигирма минутча ўтириб, ўринларидан туришди. Содиқов уялганидан ўзини қаёққа қўйишни билмай қолди. Ошга ҳожат йўқлиги ҳаммага маълум эди. Агар Бурҳонов мажбур қилмаганди, меҳмонлар кеч бўлганига қарамай ош қилинаётганини билишмасди ҳам, яхши суҳбат, яхши зиёфатдан хурсанд бўлиб, йўлга тушишарди. Шундай қилишди ҳам. Улар кетишгач, раёком секретарининг бир оғиз гали Содиқовнинг ўёқ-буёғидан ўтиб кетди. Машинасига ўтираётисб:

— Уларга энди ўзингизни жўннатамиз, меҳмон кутишини ҳам ўрганиб келасиз,— деди Бурҳонов. Содиқов шапалоқ егандек бўлиб кетди. Шу-шу овқатли мажлислардан безилладиган, иложи борича ўзини четга оладиган бўлиб қолди... Аммо бугунги мажлис бошқача гап эди. Бугунги конференцияга битта у эмас, кўпчилик раёком ва ижроком ходимлари ўзини жавобгар ҳисоблаши лозим эди. Ҳамма хўжалик ва ташкилий ишлар ипидан-игнасигача текшириб чиқилган, ҳар бир ишга жиддий мутасадди белгиланган эди. Шунга қарамай, Бурҳоновнинг саволи уни бўшастириб юборди. Чунки кўпдач бери биринчи марта облости партия комитетининг би-

ринчи секретари мажлиста" сўнг овқатга қолмаётган эди. Ишқилиб шарманда Содиқов майда, деди ўзича Содиқов раёнком секретарининг ортида борар экан.

Мажлислар залининг қаршисидаги дам олиш хонасида президиум аъзоларининг деярли ҳаммаси йигилишган, лекин кўп мажлисларда бўлганидек ҳар ким ҳар чеккада эмас, область партия комитетининг биринчи секретари Искандар Гойибович Гойибов борлигидан ҳамма ўз жойини билиб узун дастурхон атрофида сукут сақлаб ўтиришарди. Искандар Гойибович эса дераза ёнидан ўзидан баланд, қотмадан келган, анча ёш, лекин қуюқ сочлариги мошкичири тус олган район партия комитетининг биринчи секретари Дамир Усмоновичга ярим овозда нимадир вазминлик билан уқтирарди. Дамир Усмонович бошини ҳам қилиб, уни дикқат билан тингларди, баъзан нимадир демоқчи бўлиб оғиз жуфтлар, лекин индамай кулиб қўя қоларди.

Аввал Бурҳонов, унинг кетидан Содиқов улар ёнига келишганда, гап тугади. Искандар Гойибович кечирим сўрагандек жилмайди.

— Ўртоқлар, конференция яхши ўтди,— деди столга яқинлашиб, лекин ўтирамади.— Раёнком аъзоларини, унинг секретарларини яна бир бор табриклайман. Дамир Усмонович, Козим Бурҳонович, бугун зарур, фойдали гапларни айтишди, ўртоқлар. Яхшилаб ўрганинглар, смалга ошириш чораларини кўринглар. Афсус, сизлар билан ўтиредмайман.— Искандар Гойибович ўзининг шинқ қорамтири кўзларини ҳаммага бир-бир қадаб чиқди.... Вақт-соати келиб қолар. Ҳаммангизга катта муваффақият. Хайр, йўқ-йўқ, ҳеч ким кузатмасин.

Обком секретарининг сўнгги гапидан сўнг ҳамма жайдан бир-бир қўзғалиб қўйди-ю, эшикка юрмади. Факат Дамир Усмоновичгина обком секретарининг ортидан худди у сингари шахдам қадам ташлаб хонадан чиқиб кетди.

— Қани, ўтириинглар,— деди Бурҳонов эшик ёпилгац, столниг ўнг бошидаги стулга ўтирап экан.

Ҳамма бирин-кетин жойлаша бошлади. Чой, кабоб кўтарган официантлар бирпасда қаёқдандир пайдо бўлишди. Ҳазиломуз гаплар, кулги идиш-товоқларниг тақир-туқурига қўшилиб кетди. Тўрдаги иккита бўш қолган жой қаршисида топшириқ кутиб турган ёш йигит, кабоб тарқатиб бўлингац, Содиқов ёнига келиб, қулоғига нимадир шивирлади. Бурҳонов унинг гапини англади, шекилли, секин, ҳамма эшитадиган қилиб:

— Йўқ, Дамир Усмонович келмайдилар,— деди ва одамларингизни қаранг, шуни ҳам билмайди-я, дегандек Содиқовга қараб қўйди.

...Ташқарида январь энди охирлаётганига қарамай, одамни алдайдиган иссиқ шамол эсарди. Искандар Фойибович зинадан тушаётниб, орқада кимдир шошилиб келаётганини пайқади ва ўгирилди.

— Бошяланг юрманг,— деди у райком секретарига.

— Ҳечқиси йўқ,— жавоб қилди унга етиб Усмонов,— бирпас ўтирсангиз бўларди!

— Келинойингиз бетоб, бормасам бўлмайди.

— Сўраб қўйинг!..

— Раҳмат.

Обкомниг оқ «Волга»си шундай ёnlарига келиб тўхтади. Аммо улар эътибор беришмади. Иккаловининг ҳам бир-бирларига айтадиган гаплари бор эди. Лекин иккалови ҳам гапни нимадан бошлишни билишмасди, тўғриғи қандай бошлишни билишмасди.

— Энди нима учун унинг биринчи бўлмаганини билгандирсиз?— деди ниҳоят Искандар Фойибович.— Уни қувватлайдиганлар бор. Қимлар — биламан. Сиз ҳам.. баъзиларни биласиз. Аҳамият бериш керак эмас. Ҳалқимизда яхши мақол бор: ит ҳурар, карвон ўтар. Ўзингизга пухта бўлинг. Тоймасликка ҳаракат қилинг. Тойдингизми, тамом, устинизга чиқиб олишади.

— Биламан,— хўрсинди Усмонов.— Лекин ҳайронман. Наҳотки, шунча вақтдан бери ҳеч нарсага тушунмайди? Ўзгариб қолгандек туяловуди менга.

— У тушунмайди. Мен уни яхши биламан. Ё... олиб кетайликми сиздан?

Обком секретари Усмоновга маънодор қараб қўйди.

— Йўқ, яна ишлаб кўраман.

— Бу гапингиз маъқул,— Искандар Фойивович унга қўлини узатди.— Сиздан бошқа жавоб кутмаган эдим. Партияга хизмати сингган. Яхши мутахассис. Ишлатинг. Яна бир марта йил якуни билан табриклайман.

— Раҳмат.

Усмонов машина райком майдонидан чиқиб, кўздан гойиб бўлгунча жойида турди. Кейин орқасига қайтди. Ўз кабинетига кўтарилиб қундуз телпагини кийди ва кабинетини қулфлаб, пастга тушди. Концерт бошланибди, шекилли, ичкаридан музыка садолари эшишила бошлиди.

Усмонов пальтосининг ёқаларини кўтариб кўчага чиқди. Зина тагида машинаси турарди. Усмоновни кўриб, шофер йигит кабина чироғини ёқди ва орқа эшикни очиб қўйди.

— Йўқ, Рустам,— деди Усмонов.— Сиз кетаверинг, пиёда бораман.

У катта кўчага чиқди, кейин оҳиста уйи томон юриб кетди. Ярим йўлга борганда, тўхтади. Боргиси келмади уйга. Тўғрироғи, у машинага уйга бормаслик учун жавоб бериб юборган эди. Бугун, айниқса ҳозир, ёлғиз бўлишни, онасининг унга ҳар доим илтижо билан қарайдиган кўзларини кўрмасликни, кўнгил хотиржам, курсандлик пайтларда айтадиган гапларини эшитмасликни истаб қолган эди. Бугун эса онаси шундай гапларни айтиши аниқ эди. Бир йил ичида таниш бўлиб қолган кўчалар орқали у раён марказидан анча четдаги тепаликка кўтарилди.

Бемаврид эсаётган илиқ шамол бу ерда айниқса баҳорни эслатди. Ўтган йили баҳорда худди шундай бўлган эди. Дайди шамол унга ёққан эди. Унга ҳам, Ҳафизага ҳам. Ярим тунгача гаплари адо бўлмай, худди ёшлиқдаги син-гари эринмасдан кийиниб кўчага чиқишган, бир-бирларининг елкаларига қўлларини ташлаб, район марказини бир неча бор айланишган, олам-олам режалар тузишган, ўйсиз студентлардек ғадир-будир дараҳтларга суюниб ўпишишган эди...

Ҳозир бу шамол унга ўша дамларни эслатди. Шунинг учун ҳам қандайдир, ўзи тушуммаган куч уни **бу** ерга, мангуба уйқуга кетган кишилар маконига олиб **келди**. Мұхаббат ва айрилиқ аталмиш бу куч уни энди ҳар қиши, ҳар баҳор шу ерга олиб келади. Қишида алдамчи баҳор исини келтириб, юрагини шодликка тўлдирган дамларни эслаш учун, баҳорда эса йил бўйи вужудини қоплаган зардобни тўкиш учун, таскин учун, нажот учун...

Аммо ҳозир у буларни эсламасди. Билмасди ҳам. Бўйи тенги оқ тош ўрнатилган қабр ёнида турар экан, хаёли Ҳафизада эди. Шундан бўлса керак, олдида тош эмас, Ҳафизани кўргандек эди. Шамол унинг узун қора соchlарини, оқ ҳарир кўйлагини тортқилар, шивирлади: «У тирик, у тирик!» дегандек бўларди. Усмонов сехрли овозга қулоқ солиб анча турди, охири чидолмади, кўнглига ихтиёр берди, худди шамолдек тўлқинланиб, шивирлади:

— Ҳафиза! Нима қилиб кетдинг, Ҳафиза?!

II

Ноябрь кунларининг бирида эрталаб Дамир Усмонов ўз хонасида янги газеталарни кўриб ўтирган эди, ички телефон жиринглаб қолди.

— Усмонов,— деди у газетадан кўз узмай трубкани қулогига тутиб.

— Қалайсиз, ука? Яхшимисиз?— сўради трубкада босиқ овоз.

— Раҳмат,— деди Усмонов ва кимнинг овози эди бу, деган савол яшин тезлигига хаёлидан ўтди. Таниди-ю, сапчиб ўрнидан туриб кетди.— Искандар ака?! Саломалайкум! Ўзингиз яхшимисиз? Эшитаман?!

— Нима қиляпсиз?

— Бўшман.

— Менга кўтарилинг...

— Хўп бўлади.

Усмонов трубкани эҳтиёткорлик билан жойига қўяр экан, юраги гупиллаб уриб кетди. Тинчликмикан? Миясиға келган биринчи савол шу бўлди. Область партия комитетининг биринчи секретари у билан биринчи марта телефонда гаплашаётгани йўқ эди. Обкомга инструктор бўлиб ишга чақирилганидан бери ўтган икки йил ичидагеярли ойда иккича марта кутимаганда телефон қилиб қолар ва кутимаган масала бўйича савол берар эди. Усмонов дастлабки кунлар бунга кўниколмай, анча хижолат чекди. Қейин ўз ишига оид барча масалалар бўйича дафтарчалар тутадиган бўлди. Бундай дафтарчаларни қишлоқ хўжалик бўлимига қандайдир иш билан кирганида бўлим бошлифи, аппаратнинг кекса ходими, Муслим Иноятовда кўрди. Бўлимга район газеталари машина теримининг бориши ҳақида бераётган маълумотларни солиштиргани кирган эди. Муслим ака унинг саволини диққат билан эшилди ва шошилмасдан столнинг чап томонида тахлоглиқ турган турли рангдаги дафтарчалардан бирини олди-да, оҳиста варақлай бошлиди.

— Ҳамма районларда маълумотлар тўғри ва ўз вақтида босилади,— деди у дафтардан бошини кўтармай.— Текширмасангиз ҳам бўлади. Фақат Бодомсойда чатоқ. Мана қарап. Сўнгги ўн кун ичидаги икки марта маълумот

кечикиб берилган. 11 ноябрда ҳам, 16 ноябряда ҳам. «Олга» оқсаб қоляпти. Редакторини мақташарди, билмадим, нима бўлди...

Усмонов бундай аниқ маълумотни ўзи ишлаётган бўлимда, пропаганда ва агитация бўлимида олиши табиий эди. Қишлоқ хўжалик бўлими мудириннинг район газеталари аҳволидан бунчалик яхши хабардор бўлиши уни ҳайрон қолдириди.

— Кечирасиз, бу дафтарларга ҳар куни ёзиб турамизми?

— Ҳар куни. Танишинг. Ҳеч қандай сир йўқ.— Муслим ака дафтарчаларни эҳтиёткорлик билан қўлига олиб, унга узатди.— Партия ходими— постда турган солдат. У ҳар доим — хоҳ тунда бўлсанн, хоҳ кундузи бўлсин, ҳар қандай вазифани бажаришга тайёр бўлиши керак. Мен шундай ҳисоблайман.

Усмонов дафтарчалар билан танишар экан, нима қилиши кераклигини тушунди ва Муслим акадан ниҳоятла миннатдор бўлиб ўз хонасига қайтди. Уша куниёқ, столи устида худди шундай бир қанча рангли дафтарчалар пайдо бўлди.

— Қойил,— деди рўпарасида ўтирадиган ҳамкасби Тешабой Долимов. У ҳам инструктор бўлиб, область газеталари, облрадио ишлари билан шуғулланарди. Чеҳрасидан ҳеч маҳал табассум аримайдиган, балки шу туфайли ёши ҳам номаълум бу одам Усмоновга биринчи иш кунидан бошлабоқ унча ёқмай қолган эди. Унинг ҳар бир ҳаракати, ҳар бир сўзи Усмоновга қандайдир ғайри-табиий, сохта туюларди. Ушанда ҳам Долимовнинг гаплари унга кичоядек сезилди.— Афтидан жуда узоқ ишламоқчига ўхшайсиз аппаратда...— Долимов тирсаклари билан столга ёнбошлаб, илжайди.— Лекин Сизни узоқ училашмайди. Мени айтди дерсиз!..

— Нега?— ҳайрон бўлиб сўради Усмонов.

— Чунки...— Долимов эшикка қаради, унинг ёпиқ-

лигига ишонч ҳосил қилгач, деди:— Чунки биринчининг сизга муносабати яхши.

Усмонов қизариб кетганини сезди. У бу ҳақда ўйла-маган, бундай ўйлашга асоси ҳам йўқ эди. Пединституг-да ишлаб, кейинчалик аспирантурада ўқиб юрган йиллари Фойивони бир-икки марта институт умумий мажлисларида, илмий конференцияларда кўрган, кўпчилик қатори сўрашган эди. Отаси билан ишлашганини эшигтан эди, холос. Тўғри, обком аппаратида ишлашни Искандар Фойивовичнинг ўзи таклиф қилди. «Партияга олимлар ҳам хизмат қилсин», деди ҳазиллашиб. Бўлган гап шу. Нимага асосланиб Долимов бундай деди? Шу ҳақда ўйлар экан, Долимовнинг гапига савол билан жавоб қайтарди:

— Қаердан билдингиз?

— Ўзингиз қаранг, тўрт йилдан бери ишлайман аппа-ратда, бир марта ҳам менга телефон қилганлари йўқ. Сизга бўлса устма-уст телефон!..

Долимовнинг бу гапи унинг кулгисини қистатди ва айни вақтда ғашини келтирди. Лекин муносабатини бил-дирмаслик учун уни юпатишга қарор қилди.

— Демак ишингиз жойида экан. Савол тудирмасдан ишлар экансиз.

— Сиз шундай ўйлайсизми?— Шошиб сўради Доли-мов соддадиллик билан.

Усмонов «ҳа» дегандек бошини қимирлатди. У шу билан гап тамом деб ўйлаган эди. Аммо у кутгандек бўл-мади. Долимов деразага қараб, ниманидир мулоҳаза қи-лар экан, бирдан томдан тараша тушгандек деди:

— Бари бир биринчининг муносабати сизга бошқача. Сиз... азоб чекканлардансиз. Отангиз...

— Ўртоқ Долимов!— Усмоновнинг жаҳли чиқиб кет-ди.— Менинг ўтмишим, айниқса, отамнинг сизга ҳеч қан-дай даҳли йўқ. Бу ҳақда мутлақо гапирмасликни масла-ҳат бераман. Муносабат масаласига келсак, яхшиси

ҳам, ёмони ҳам ҳамма жойда одамнинг ишига қараб бўлади.

— Албатта, албатта!— ранги оқариб, деди Долимов.— Мен ҳам худди шу фикрдаман, тўғри тушинтиrolмаганга ўхшайман фақат... мени кечиринг...

Усмонов индамай хонадан чиқиб кетди. Шу воқеадан бери улар рўпарама-рўпара ўтиришларига қарамай, фақат иш юзасидангина бир-бирлари билан гаплашадиган бўлишди. Усмоновга, аслида камгап бўлгани учун бу жуда қўл келди ва ўзидан-ўзи секретарлар, айниқса, Биринчи телефон қилса, уялиб қизариши йўқолди. Шундай бўлса ҳам, беихтиёр рўпарасига қараб қўйди. Долимов ҳали келмаган эди.

Биринчи нима сабабдан йўқлаётган экан? Усмонов ҳар эҳтимолга қарши сўнгги ҳафтада қилган ишларини хаёлидан ўtkазиб чиқди. Иш плани бўйича ҳеч қандай ташвиш йўқ эди. Фақат иккита хатга жавоб ёзилмаган. Биттаси «Олға» газетасидаги хатолар ҳақида ғазаб билан ёзилган пенсионер хати, иккинчси шеърлари кўп йиллардан бери босилмай ётган маҳаллий шоирнинг шикояти. Иккала хатга ҳам жавоб қилишнинг муддати ҳали тугамаган. Бошқа нима бўлиши мумкин.

Усмонов шу хаёл билан чарм муқовали, хотини туғилган кунига совға қилган ҳаворанг чўнтак дафтарини қўлига олиб хонадан чиқди.

Искандар Фойибовичнинг қабулхонасига қўтарилганда, котиба аёл, Валентина Ивановна, уни кўриб, мулоҳим жилмайди.

— Салом, Дамир Усмонович. Киринг, сизни кутяптилар.

Искандар Фойибович тўрдаги кенг, турли қофозлар, китоблар тартиб билан терилган ёзув столи ёнида эмас, одатдагидек кабинетининг биқинидаги узун, бюро ўтказиладиган стол ёнида қандайдир қарорни ўқиб ўтиради. Усмонов қофознинг устидаги ёзувдан дарров таниди. Бу — Марказий Комитетнинг қарори эди. Шу жойга,

Ҷезув столи ёнидан телефонларнинг баъзилари ва селектор кеътириб қўйилган эди. Усмонов ҳар гал шу кабинетга кирганида, унинг назарида бурчакда турган қадимий соатнинг бир меъёрдаги оғир «чик-чиқи» фақат шу кабинетга хос бўлган осойишталини янада кучайтиради.

— Салом,— деди Усмонов ичкарига кириб эшикни оҳиста ёпар экан.

— Келинг.

Искандар Фойибович қарордан бошини кўтариб унга қаради. Усмонов унинг олдига етиб боргунча, ўрнидан туриб қўлинни узатди, кўзларида илиқ табассум пайдо бўлди.

— Қалайсиз, ука?

Усмонов беихтиёр жилмайди. Область партия комитети биринчи секретарининг унга шундай «ука» деб мурожаат қилиши юрагини чексиз меҳр билан қалқитиб юборди. Шу илиқ муносабатга лойиқ жавоб қайтариш ниятида самимийлик билан деди:

— Раҳмат, яхши.

Искандар Фойибович ўз жойига ўтирас экан, ёнидаги стулга ишора қилди. Усмонов ўтирди.

— Бугун нима ишлар билан бандсиз?

— Деярли ишнам йўқ,— деди ҳозиржавоблик билан **Усмонов**.

Шундай деди-ю, бемаъни жавобидан ўзи уялиб кетди. Искандар Фойибович мийигида кулиб қўйди.

— Бодомсойга бориб келсан, нима дейсиз?

— Хўп,— деди ўзини босиб олиб Усмонов.

— Жўда яхши. Бўлмаса, мен беш минутдан кейин тушаман.

Усмонов ўз хонасига қайтаётганида, Долимов келган **эди**. У саломлашишини ҳам унутиб, сўради:

— Тинчликми?

— Тинчлик,— деди Усмонов,— Бодомсойга кетяпмиз.

Долимовнинг истеҳзо ёйила бошлаган қорамтири, зорси юзи қотиб қолди.

Усмонов обкомдан чиққанда бўлим бошлиғи Нодирхон Солиевни огоҳлантиргани эсиға тушди-ю, хижолат бўлди. Қайта киришга эса журъат этмади, Искандар Фоййирович кутиб қолиши мумкин эди. Долимов албаттә кириб айтади бошлиққа, буни у биларди. Лекин ўзининг айтгани мутлақо бошқа гап эди. Нодирхон Солиев ниҳоятда пунктуал ва нозик одам эди. У ҳаммадан ҳар бир ишни аниқ ва ўз вақтида бажаришни қаттиқ талаб этар, ўзи ҳам шунга амал қиласарди. «Биз пропагандистлар ҳаммадан олдинда юришимиз керак,— дер эди у.— Биз гўё компас. Бизга қараб одамлар нима қилишни, қаёққа боришни билишлари керак. Агар шу даражага кўтарила олмасак, бизнинг ҳожатимиз йўқ». У тайёрлаган ҳужжатлар — справка, қарор, лойиҳалар, ҳар доим обкомда сезиларли воқеа бўларди. Унинг ҳужжатларидағи кучли мантиқ, содда, тушунарли, аниқ тил ҳамманинг ҳавасини келтиради. Муслим Иноятовдек кўп йиллардан бери обком аппаратидаги ишлаб келаётган Нодирхон Солиев буни биларди ва шунинг учун ҳам ўз ходимларидан ҳужжатларнинг равшан ва ўқимишли бўлишини талаб қиласарди. Ҳаттоқи хатларга ёзилган жавобларни ҳам ўзи кўриб чиқар, тузатар, уларга ҳам қандайдир аниқлик ва соддалик киритишга интиларди. Тузатиб бўлиб, қофоздан мамнун ҳолда бошини кўтараркан, дер эди:

— Хатга эҳтиёт бўлиш керак. Хат одамнинг дили. Дилни эса, бир сўз билан ранжитиб қўйиш мумкин.

Усмонов шундай одамнинг қўлида ишлатганидан хурсанд эди. Қани энди ҳамма идораларда обком аппаратидаги тартиб, ишчанлик, Муслим ака ёки Солиев сингари одамлар бўлса, хаёл қиласарди у баъзан, ҳеч шубҳасиз йигирма, ўттиз йил илгарилаб кетарадик. Муслим ака ўз ишида турли хил дафтарчалар, ёзувларига асосланса,

Солиев хотирлаш қобилиятига кўпроқ ишониб ишларди. Баъзан юз, юз эллик йўллик цитаталар, муҳим қарорларнинг пунктларини ёддан келтириб, ҳаммани ҳайратга соларди. Лекин Усмоновнинг назарида, шундай бағри кенг, сахий, ўта маданиятли одамнинг баъзи камчиликлари бор эди: ҳамма ишни ўзи қилгиси, жуда бўлмагандага ҳамкорликда бажаргиси келарди. Бу эса ходимларнинг ташаббусини чекларди. Кейин у ҳеч кимнинг уни ҳатлаб ўтиб, раҳбарларга мурожаат қилишига йўл қўймасди. Усмонов биринчи камчиликда унинг ёнини олмаса ҳам, иккинчисида уни ҳақ деб биларди. Ҳамма ишда темир интизом, тартиб бўлиши керак. Агар шунга риоя қилинmasa, одам ўзининг ҳам, бошлигининг ҳам обрўйини тўкиб қўйиши мумкин. Шунинг учун ҳам Усмонов ҳар гал, раҳбарлар берган топшириқларидан уни хабардор қилишни ўзининг вазифаси, деб биларди. Нодирхон Солиев уни диққат билан эшитгач:

— Жуда яхши,— дер эди самимийлик билан.— Агар менинг ёрдамим керак бўлса тортинмай киринг.

Баъзидаги кимларга мурожаат қилишни, қайси адабиётлардан фойдаланишни шошилмасдан айтиб берарди.

Усмонов жуда бўлмаса фойедан телефон қилиб қўймоқчи бўлиб, ичкарига йўл олган эди, зинада Искандар Фойибовични кўриб қолиб, тўхтади. Унинг ортидан Нодирхон Солиевнинг ўзи тушиб келаётган эди. Усмонов у билан сўрашиб, қаёққа кетаётганини айтиш учун оғиз жуфтлаган эди, Солиев уни тўхтатди.

— Биламан. Муваффақият тилайман.

Унинг сўнгги гапини Усмонов тушунмади. Искандар Фойибович эса Солиевга қараб кулиб қўйди.

Кўп ўтмай «Волга» текис, кенг йўлда қушдек енгил учиб кетди.

Ҳосилдан бўшаб, кўкрагига шамол теккан кузги далалярда ажойиб файз бор. Дов-дарахт, ўт-ўлан худди ер каби олтин тус олади. Қаналлар, ариқларда айқириб оқаётган сувлар кумушдек тоза, тиниқ. Ёз киргунча энди

уларга ҳеч ким тегмайди, йўлини тўсмайди. Олис-олисларда шудгор қилаётган тракторларнинг гуриллаши, ялпиз исига қўшилиб димоқقا урилган ҳайдалган ер хиди, тиник, мовий осмонни тўлдириб, гала-гала учаетган кўчманчи қушларнинг ташвишли овозлари умрнинг яна бир йили кетганини дала йўлида айниқса равшан эсга туширади, дилни ўкситади, шу билан бирга янги орзулар, умидлар билан вужудингни тўлдиради.

Куз манзарасига маҳлиё бўлиб, Усмонов йўлнинг ярми босиб қўйилганини сезмади. Искандар Фойивович ҳам ўз хаёллари билан банд эди. Усмонов бир неча марта қандай иш билан кетишаётганини сўрамоқчи бўлди-ю, Фойивовнинг ўйчан қиёфасини кўриб, саволи дилида қолди.

Бодомсойга буриладиган йўлга келишганда, Искандар Фойивович ўзи гап бошлади:

— Районни яхши биласизми?

— Яхши эмас-у, ҳар ҳолда биламан,— тортиниб жавоб берди Усмонов.

— Район катта, хўжалиги кўп тармоқли...— Искандар Фойивович бир оз жим қолди, кейин қўшиб қўйди:— Сўнгги йилларда оқсаб қолди. Қирқقا зўрға етяпти пахтаси. Қўшнилар ўзиб кетишиди. Пахтада ҳам, чорвада ҳам.

У яна хаёлга чўмди. Сийраклашиб қолган оппоқ сочларидан кескин фарқ қиласидиган қуюқ қора қошлигини чимирганича йўлга кўзларини қадаб анчагача сукут қилди. Кейин бирдан Усмоновга кутмаган саволни берди:

— Отангизни эслайсизми? Неча ёшда эдингиз?

Искандар Фойивович қачонлигини сўрамади. Бусиз ҳам Усмонов отасидан неча ёшда ажраганини яхши биларди.

— Ёш эдим жуда, бешга энди кирувдим,— деди у отасининг қиёфасини эслашга интилиб.— Эс-эс биламан.

У тўғри гапирди. Яхши билмас эди отасини. Кўпроқ эшитган эди. Онасидан, қариндошларидан, отасининг

тирик қолган ўртоқларидан. Ҳаммадан яхши гап әшигъ-
ган эди. Искандар Фойибович нима дер экан? У ҳаяжон
 билан обком секретарига ўғирилди.

— Ёш экансиз,— деди Искандар Фойибович.— Отан-
гизни мен биламан. Ажойиб одам эди. Чинакам комму-
нист эди. Институтни тамомлаб келиб, у кишининг қўли-
да бир йил ишлаганман. Агроном бўлиб. Кейин ўзлари
 мени партия мактабига жўнатганлар. Шундан кейин
 кўрганим йўқ. Ўша пайтда Бодомсойда атиги учта
 колхоз бор эди. Энг каттаси Усмон ака раислик қилган
 «Қизил Октябрь» эди. Газеталардан номи туҷумасди
 ўшанда.

Искандар Фойибович жимиб қолди. Яна қошларин
 чимириб йўлга тикилди. Усмонов унинг фикрини бўлиб,
 гапга тутгиси келмади. Отаси ҳақида ҳозиргина эшигъга-
 ни унинг қалбини чексиз ғурур билан тўлдириб юборган,
 бошқа гапнинг ҳожати йўқ эди.

Отасини у сўнгги марта куз тунларидан бирид: кўр-
 ган эди. Уйқу аралаш у қандайдир товушларни эшигъди
 уйда. Нимадир тарақлади. Аммо у парво қилмади. Отасининг уйга келиш-кетишида тайин йўқ эди. Кечаси ҳам,
 кундузи ҳам уй одамлардан бўшамас эди. Бирдан у ни-
 мадандир чўчиб уйғонди. Қўзларини ишқалай-ишқалай
 очганда, олдида отаси турарди. Эгнида ҳар кунги уэун
 қундуз ёқалик қора пальтоси, сақичдек қора соchlари
 силлиқ қилиб орқага таралган. Қўлида қундуз тел-
 паги.

— Уйготиб юбордимми?— сўради у юмшоқ жилма-
 йиб. Дамир индамади.

Шунда отаси уни даст кўтариб бағрига босди-да,
 гўё муҳим бир сирии айтгандек:

— Мен келгунча ойингни хафа қилма, яхши ўқи,—
 деди шивирлаб.

Аммо у қайтиб келмади. Отасини эслатадиган аниқ
 бир воқеа шу эди. Қўп ўтмай она-бала шаҳарга кўчиб
 кетишиди. Колхоз идорасининг ёнидаги уйларига эса

район прокурори кўчнуб кирди. Кўп ўтмай у шаҳарга кетди. Уй негадир буздирилиб, ўрнига арпа экилди.

Урушдан кейинги йили Ўсмон ака оқланди. Аммо қайтиб келмади. Үнинг қамалиши ва йўқ бўлиб кетиши қандайдир даҳшатли туҳмат ва душманлик оқибати эди. Қим душман, нима сабабдан туҳмат уюштирилди, Ўсмонов қанча ҳаракат қилмасин, унга қанчалик ёрдам беришмасин, аниқлай олмади. Кейин вақт вақтлигини қилди. Йиллар ўтиши билан яра эскиди, оғир йўқотишга у ҳам, онаси ҳам кўнишиб кетишиди.

Олисда уйлар кўринди.

— Райкомгами? — сўради шу пайтгача чурқ этмай келган шофёр.

— Носир аканикига,— деди Искандар Фойивович ва Ўсмоновга қаради.— Танийсизми?

— Эшитганман,— деди Ўсмонов.

— Яхши одам. Яхши раҳбар. Бечора касалга чалиниб қолди. Кўриб чиқайларлик-а, нима дейсиз?

Ўсмонов бош қимиirlатди.

Кўп ўтмай машина район марказидан иккى километрча наридаги кўк дарвоза олдида тўхтади.

— Қани, юринг.

Искандар Фойивович машинадан тушди.

Бодомсой район партия комитетининг собиқ биринчи секретари Носир Пўлатов ҳовлида ток қирқаётган эди. Меҳмоцларни кўриб:

— Саида! — деб қичқирди-да, дарвоза томон юрди.—

Искандар Фойивович?! Келинг, келинг! Саломалай-кум!..

— Салом!— Искандар Фойивович ўзидек миқти, елкадор Пўлатовни маҳкам қучоқлади.— Отдексиз-ку?! Ө ишдан бездингизми?

Пўлатов хаҳолаб кулиб юборди.

— Танишинг,— деди Искандар Фойивович уни қўйиб юборар экан, Ўсмоновга ишора қилиб.— Ўсмонов, обком инструктори.

— Яхшимисиз, ука,— Пўлатов бир чеккада ийманиб турган Усмонов билан илиқ кўришди, қўлини қўйиб юбормай ичкарига бошлади.— Қани, юринглар.

Уйдан ўрта ёшли, тўладан келган аёл чиқди.

— Саида, қара, ким келди?!— деди Пўлатов гуурп билан унга.

Аёл унинг ўртоғи эканини Усмонов тушунди. Унга яна обқом секретарининг бу оила билан яқинлиги, балки қадрдёнлиги ҳам маълум бўлди. Искандар Фойибович аёл билан сўрашар экан, ўзини худди ўз уйидагидек эркин тутар, икки гапининг бирида ҳазил қилиб, иккаловини кулдиради.

Дастурхон ёзиғлиқ хонага кириб ўтиришганда, Саида опа ҳаммага чой қўйиб узатди-да, «мен ҳозир», деганича чиқиб кетди. У кетиши билан Искандар Фойибович жиддий оҳангда сўради:

— Ҳўш, соғлиқ қалай?

Пўлатов бир оз ўйланиб қолди-да, оҳиста деди:

— Чатоқ.

Хонага сукунат чўқди. Анчагача ҳеч ким бу жимликини бузмади. Ниҳоят Искандар Фойибович бошини кўтарди.

— Мен, қайтармикансиз деган умидда эдим...

— Йўқ,— қатъий равишда жавоб қилди Пўлатов,— вақтида кетдим. Бизнинг ишда яримта одам ишлолмайди. Уялтириб қўйишим мумкин эди.

— Майли, ўзингизга қаранг бўлмаса. Бизга жуда кераксиз.— Искандар Фойибович Пўлатовнинг пиёлани зўрга ушлаб турган рангсиз қўлини қисиб қўйди.

— Раҳмат.

— Бу йигитни танимадингиз-а?

— Йўқ.

Пўлатов Усмоновга ғамгин қараб қўйди. Ё Усмоновга шундай туюлди.

— «Қизил Октябрь» колхозининг биринчи раиси, машҳур Усмон ака эсингиздами?

— Ҳа-ҳа, бўлди-бўлди, эсладим,— Пўлатов жонланниб кетди.

— Ӯша кишининг ўғиллари бу йигит.

— Баракалла!— Пўлатов ўрнидан туриб Искандар Фойивичнинг сўнгги гапларидан қип-қизариб кетган Усмонов билан қайтадан сўрашди.—Табриклайман. Мартабангиз баланд бўлсин...

— Раҳмат,— деди Усмонов уялиб жойига ўтирад экан.

Саида опанинг илтимосини қайтара олмай, тушлик овқатни шу ерда қилишди. Искандар Фойивич яна районнинг ҳозирги аҳволидан куюниб гап очди. Унинг таъбирича район илгариги довруни билан яшамоқда эди. Мұхим участкаларда аҳвол танг, илфор хўжаликлар билан қолоқлар орасидаги тафовут ниҳоятда катта, ўрта хўжаликларнинг ўсиши эса сезиларли эмас эди. Албатта бу камчиликлар четдан қараганда унча билинмасди ҳозир. Аммо икки-уч йилдан кейин-чи? Шу аҳволда кетилаверилса, район ҳамма кўрсаткичлар бўйича оқсаб қолиши турган гап эди. Искандар Фойивич райкомнинг баъзи нотўғри қарорларини эслади. Экиш кампаниясини кечиктириб юбориб, терим пайтида мактаб болаларини ишга чиқарган колхоз раисларига райком панжа орасидан қараётганидан хафа бўлди. Биринчи секретарь вазифасини бажариб турган Козим Бурҳонов ўзига эрк бериб юбориб, фақат номдор хўжалик раҳбарларини қўллаш билан овора. Улар нима деса шуни қиласди. Бунинг сабабини яхши биламиз, деди кесатиб Искандар Фойивич. Пўлатов унинг гапларига қўшилди. Унинг фикрича алмашлаб экишга мутлақо эътибор берилмай қўйган, янги ерлар очиш, қишлоқ қурилиши ҳам деярли тўхтаб қолган эди.

Улар райкомга келишганда, кун пешиндан оққан эди. Искандар Фойивич ёшларга хос эпчиллик билан иккита баҳайбат чинор орасига қурилган икки қаватли райком биносининг иккинчи қаватига қўтарилиб, қабулхонага

кирди. Секретарь қиз уни таниб, дарҳол биринчи секретарь кабинетининг эшигини очди.

— Қозим Бурҳонович йўқлар,— деди у шошиб.— Ҳозир «Ғалаба» колхозида бўлишлари керак. Сизлар ўтириб туринглар, мен ҳозир чақираман.

— Ҳожати йўқ,— деди Искандар Фойибович.— Алиев-чи? У киши қаерда?

— Водхозга кетган эдилар яқинда. Бугун уларда ҳисбот мажлиси.

— Яхши.— Искандар Фойибович бир оз ўйланиб деди:— Қозим Бурҳонович келганларида айтинг, биз йўл устида кирдик. Ҳозир «Правда»га борамиз. У ердан «Шарқ юлдузи»га ўтамиз. Бизни қидиришмасин.

— Хўп бўлади,— ҳозиржавоблик билан деди секретарь қиз.

Уша куни Усмонов уйига одатдагидан анча кеч қайтиди. Улар иккита эмас, бешта колхозда бўлишди. Шудгорнинг кетиши билан қизиқиши, фермаларга боришиди. Искандар Фойибович ишларнинг боришидан умуман кўнгли тўлган бўлса ҳам, нимадир дилини ғаш қиласарди. Шаҳарга кириб келишаётгандагина Усмонов бу ғашликнинг сабабини билди.

— Ҳамма иш ўз инерцияси билан кетяпти. Районда янгилик, ташаббус етишмаяпти,— деди куюниб Искандар Фойибович.— Шалтоқ хўжалик, шалтоқ одам йўқ. Шалтоқ раҳбар бор. Колхозлар энди тузила бошлаганда одамларнинг савияси паст эди, тушунтириш билан бирга шошмасдан, эринмасдан, баъзан бақирғаш, ҳатто маъмурий чоралар кўриш ҳам зиён қилмас эди. Ҳозир давр бошқача. Одамлар маълумотли. Техника юксак. Бақириш билан, уриш-сўкиш билан ҳеч нарса қилиб бўлмайди. Планни бажариш бурч эканлигини ҳамма билади ҳозир.Faқат қандай бажариш керак? Ана шуни ўргатиш керак. Талаб қилиш осон, амалга ошириши қийин...

Искандар Фойибович йўқ деганига қарамай, Усмоновни уйигача олиб келиб қўйди.

Ҳафиза эрининг уйга қайтиши обкомда ишлай бошлаганидан бери тайинсиз бўлиб қолганига кўниккан бўлса ҳам, хавотир олиб ўтирган эди. Эшикни ҳовлиқиб очаркан, унинг кўзлари чақнаб, қандайдир ҳаяжон билан келганини кўриб, тинчили. Усмонов ичкарига кириб пешонасидан ўпди.

— Хавотир олдингми?

— Йўқ,— жилмайди Ҳафиза.— Тинчликми ишқилиб?

— Тинчлик. Бодомсойда бўлдик,— тўлқинланиб гапира бошлади Усмонов.— Биласанми ким билан? Искандар Гойнович билан! Тилла одам экан! Ана билим! Ана мия! Бутун областни беш панжасидек билади. Ҳозирини ҳам! Келажагини ҳам!

— Касблари агроном деяётган эдингиз-ку...

— Агроном?!— киноя қилди Усмонов.— Академик! Агрономия академиги!

— Қорнингиз очгандир роса?— унинг гапини бўлди ошхонага йўл олиб Ҳафиза.

-- Менга овқат керак эмас,— Усмонов ётоқхонадан уй кийимини кийиб чиқиб, хотинини бағрига босди.— Сен кераксан!

Ҳафиза кулиб уни четлатди.

— Қўйиб юборинг, қийналиб кетади!!!

Усмонов дарҳол қўйиб юборди. Ҳафиза ҳомиладор эканлиги хаёлидан кўтарилиган эди.

— Сезяпти дейсанми?

— Сезганда қандоқ. Беш ойдан кейин тирқ этганини билади.

Усмонов ёш боладек чўккалади-да, хотинининг қорнига қулоғини тутди.

— Ҳеч нарса эшитмаяпман.

Ҳафиза хахолаб кулиб юборди.

— Туринг, келиб қоладилар!

Усмонов шошиб ўрнидан турди.

— Айтгандек, кўринмайдилар?

— Холамларникига кетдилар. Тўй келар экан бугун. Келмайдилар.

Усмонов тинчib радио қулоғини буради-да, диванга чўзилди.

— Ростдан овқат емайсизми?— сўради Ҳафиза яна ошхонага йўл олиб.

— Ростдан. Чой ичаман.

Радиода кечки концерт бўлаётган эди. Аммо музика садолари ҳам, ашулачининг ёқимли овози ҳам Усмоновнинг қулоғига кирмади. У ҳамон бугунги сафари таъсирида эди. Искандар Фойибовичга бу сафар ҳар кунги оддий ишдек туюлган бўлса, Усмоновнинг жуда кўп нарсага кўзини очган, партия ходимининг иши нақадар оғир, машақатли, айни вақтда шарафли эканини яна бир бор кўрсатган эди. Обком аппаратидаги икки ярим йиллик хизмати давомида у кўп марта, тўғри қилдимми институтдан кетиб, деган савол устида ўйлаган, лекин кўнгилни хотиржам қиласидиган аниқ жавоб топмаган эди. У ёшлигидан тарихни яхши кўрарди. Айниқса қадимги ва ўрта аср тарихларини. Спарта, Қарфаген ҳаёти, қадимий Византияning афсонавий солномаси, муқаддас Йерусалим учун бўлган қонли жанглар, фиръавилар ва уларнинг кўкўпар қабрлари, сўғдларнинг Александр Македонский аскарлари билан олиб борган курашлари, хуллас, эртакдек туюлган олис ўтмиш уни қизиқтирилар, шу ўтмишга бутун ҳаётини бағишлиашни орзу қиласиди. Бу орзу мактабни тамомлагандага ҳам уни тарк этмади ва у область марказидаги педагогика институтининг тарих факультетига ўқишга кирди. Студентлик йиллари кўхна тарихга қизиқиши янада кучайди. Ўрта Осиё ҳалқларининг янги эрадан аввалги ҳаёти ҳақида бир қанча илмий ишлар ёзди. Учинчи курсни битириб, каникулга чиққанда, машҳур тарихчи, археолог Пугаченкова партиясига қўшилиб, Сурхондарёдаги Далварзинтепани қазишда иштирок этди. Унинг кандидатлик диссертацияси ҳам ўша даврлардаги сўғдлар ҳаётидан эди. Обкомга ишга чақи-

рилди. Икки марта йўқ деди. Учинчи марта Искандар Фойивичнинг ўзи таклиф қилди. Йўқ деёлмади. Обком аппаратидаги иш ҳам жуда қизиқ эди. Ҳар куни турли хил одамлар билан, турли хил вазифалар... Булар ҳам тарих эди, аммо ҳозирги тарих, энди ёзилаётган, нима муҳим, нима номуҳим — ажратиш ҳали қийин бўлган тарих эди. Шунинг учун обком ишларига бор файрати, ақли билан берилиб кетди. Ишларнинг эса охири йўқ эди. Шунинг учун ҳам баъзан дилида шубҳа туғиларди. Буни ҳеч ким, ҳатто хотини ҳам шу кунгача сезгани йўқ. Қизиқиши қизиқиши-у, аммо ҳозирги ишининг нақадар масъулиятли, муҳимлигини у бугун билди ва шу ишга таклиф қилинганидан хурсанд бўлди. Кучи, ақли, билими бор экан, у энди ўзини шу ишга бағищлади. Одамларни ўйлаш, уларнинг ғамини ейиш, бугунини кечагисидан, эртасини бугунидан тўқ, фаровон қилишдан шарафли иш борми?!

Чойнак кўтариб, Ҳафиза кирганда унинг хаёли бўлindi.

— Юрагим сезиб турибди,— Ҳафиза хаёли паришон ҳолда эрига чой узатди.— Қандайдир ўзгариш бўлади.

— Албатта!— шошиб унга қўшилди Усмонов.— Қизимиз ё ўғлимиз бўлади яқинда!

— Йўқ, мен бошқа нарсани айтяпман,— деди Ҳафиза эрининг ёнига ўтириб.

— Нимани?— тушунмай сўради Усмонов.

— Назаримда ишингизда ўзгариш бўлади,— деди жиддий оҳангда Ҳафиза.— Юрагим ҳеч адашмайди. Аввал ҳам шунақа бўлган эди.

— Фолбин бўлиб кет-э,— кулди Усмонов.— Ишим яхши. Ҳеч қаёққа кетмайман.

У бу гапни комил ишонч билан Ҳафизага эмас, ўзига нисбатан айтди.

Ҳафиза ҳақ эди. Эртасига эрталаб Усмонов ишга келганда, одамлар у билан одатдагидан бошқача, илиқ кўришишди. У эътибор бермади. Хонасига кирганида, Долимов қўлларини ёзиг унинг қархисига юрди.

— Табриклаймиз, Дамир Усмонович! Парвозингиз бундан ҳам баланд бўлсин!

— Нима гап ўзи? Қанақа парвоз?— Усмонов унинг қучоғидан чиқишига ҳаракат қиласар экан, ҳеч нарсага тушумай, сўради:

Долимов кўрсаткич бармоғини унинг кўз олдида ўйнатиб айёrona кулди:

— Э, яшириб бўпсиз?! Биламиз!..

— Нимани?— яна ҳайрон бўлди Усмонов.

Шу пайт унинг столи устидаги телефон жиринглади. Усмонов трубкани олиб қулоғига тутди.

— Усмонов...

Трубкадан Валентина Ивановнанинг таниш қўнғирдоқ овози эшитилди.

— Дамир Усмонович! Сизни ўртоқ Фойибов сўраяптилар.

— Ҳозир.

Усмонов ёзув дафтарчасини олди-да, шошиб хонадан чиқиб кетди.

— Яшириб нима қиласар экан? Товба!..— Орқасидан тўнғиллади Долимов.

Искандар Фойибович узун стол ёнидаги ўз жойида Нодирхон Солиев билан гаплашиб ўтиради.

— Келинг, келинг ука,— деди Усмоновни кўриб ва ўрнидан туриб унга қўлинини узатди.— Яхшимисиз? Ўтиринг.

Усмонов Нодирхон Солиевич билан бош қимирлатиб кўришди. Қўл бериш учун столни айланиб ўтиш керак эди.

— Кечака, қалай Бодомсой сизга ёқдими? — жилмайиб сўради Искандар Фойибович.

— Яхши район,— тортиниб жавоб берди Усмонов.

— Узингиз туғилган район бўлади-ю; ёмон бўладими? — ҳазил қилди Искандар Фойибович кулиб.

Нодирхон Солиев ҳам унга қўшилиб кулди. Усмонов қизариб ерга қаради.

— Бодомсой яхши район,— бирдан жиддийлашди Искандар Фойибович: — Ери мўл, қанчадан қанча янги срлар очиш мумкин, суви етарли. Тори бор, қир, адири... Энг муҳими меҳнаткаш халқи бор. Баҳорда сел келиб, ёзда қурғоқчилик кучайиб, пахтанинг ярмидан кўпи қайта экилган, ҳосил чўзилиб кетган йилларда ориз очмай, даладан қайтмай меҳнат қилган бодомсойликлар. Эркаклар ҳам, аёллар ҳам. Ҳеч қандай оғир ишдан қайтишмайди улар: Ардоқлаш керак уларни, қадрлаш кеरак... — Искандар Фойибовичнинг юзига яна табассум югуруди: — Утган йили бир зоотехник билан гаплашиб қолдим. Ёш йигит: Бир йил бўлган экан институтни битирганига. «Максим Горький» колхозидан. — Искандар Фойибович Солиевга ўғирилди: — Эсингиздами, нонвой бўларди Назирқул aka деган. Тўй қиладиганларнинг кўни уни вақтига қараб тўй кунини белгилашарди.

— Виставнага ҳам юборган эдик унинг нонларини, — қўшиб қўйди Солиев:

— Ҳа баракалла. Ана ўшанинг ўғли. Раҳматли ўтган йили қазо қилган экан, билмай қолибман. Ҳўш, ана шу йигитдан районда ҳеч кимга тинчлик йўқ. Эчки боқиши керак, дейди. Қўйлар боролмайдиган жойларга тоғда ўчки боради, дейди. Кейин эчкининг жуни авиация саноатида жуда керак нарса экан. Иккичуҷа йилдан кейин фойданинг тагида қолиб кетамиз, дейди. Раис қарши экан. Ҳатто сўкиб ҳам берибди.

— Ҳайитвой акадан кутса бўлади буни, — деди кулиб Солиев.

— Такага куни қолибди, деб, ҳамма мендан кулади,

дебди.— Искандар Фойибович ҳам Солиевга қўшилиб кулди.— Лекин гап раисда эмас, гап ҳалиги йигитда. Кўрдингизми, мана шундай жонкуяр одамлар кўп Бодомсойда. Фақат уларни ўз ҳолига қўйиб қўймаслик керак. Техника ҳам етарли районда. Хуллас, Бодомсой оёқ-қа туриб олган мустаҳкам район. Биз, бюро аъзолари маслаҳатлашиб, сизни шу районга ишга юборишга қарор қилдик.

Усмонов бўшашиб, юраги орқасига тортиб кетди.

Искандар Фойибович унга эътибор бермай, гапида давом этди:

— Аппаратда ишлаб анча тажриба орттирдингиз. Одамлар билан ишлашни энди биласиз. Партия ишини ҳам ўргандингиз. Район партия комитети биринчи секретарининг елкасига юклangan вазифа қанчалик маъсумиятли, оғир ва шарафли эканини тушунтириб ўтирумайман. Биласиз. Нима дейсиз?

Усмонов ўйланиб қолди. Бундай таклифни у хаёлига ҳам келтирмаган эди. Бутун бир районнинг партия раҳбари бўлиш — бу жуда катта иш, қўлидан келармикан? Шарманда бўлиб қолмасмикин? Шуларни мулоҳаза қилиб:

— Ишонч учун раҳмат, Искандар Фойибович,— деди у секин.— Аммо эплолмасам керак? Уялтириб қўяман сизларни, ўзим ҳам уялиб қоламан.

— Обком сизга ёрдам беради,— қатъий равишда деди Искандар Фойибович.— Ҳар куни, ҳар бир масалада. Райкомнинг ўзида ҳам тажрибали ўртоқлар кўп. Қараб туришмайди. Демак, келишдик?

Усмонов бир оз ўйланиб турди, кейин дадил бошини кўтарди:

— Келишдик.

Искандар Фойибович ўрнидан қўзғалди.

— Эртага Бодомсойда партконференция. Бирга борамиз.

У, гап тамом дегандек, Усмоновга қўлини узатди.

Усмонов бирдан елкасига ағдарилган юқдан ўзини зўрға тутиб, кабинетдан чиқди. Нима қилиш керак? У ўз хонасига ҳозир киргиси келмади. Долимовнинг сохта кулги ёпишган башарасини кўргиси, кулгисидек сохта гапларини эшитгиси йўқ эди. Уйга ҳам боришини истамади. Ҳафиза аввало ҳайрон бўлади, эрта қайтишининг сабабларини суриштиради. Усмонов обком бюроси, райпарктонференция ўтмагунча ҳеч кимга, ҳатто хотинига ҳам ҳеч нима айтмаслик кераклигини биларди.

Зинадан оҳиста биринчи қаватга тушар экан, ёнидан Нодирхон Солнев ўтиб қолди:

— Табриклайман. Чин юракдан.

Усмонов жавоб қайтишга улгурмади, зўрма-зўраки жилмайди. Одамларнинг нима учун бугун у билан бошқача кўришганларини у энди фаҳмлаган эди. Қаёқдан билишди экан?

Кўчага чиққанида соат ўн бўлган эди. Ҳали эрта. Қаёққа борса экан? У қаёқадир бориши, тўсатдан юз берган ўзгаришни ҳазм қилиши, қандайдир режалар тузиб олиши ва ниҳоят, ўзига келиши керак эди. Ҳаёлидан курсдош дўсти, область газетасининг редактор ўринбосари Исмоилжон Аҳмедов ўтди. У билан учрашишга аҳд қилди-ю, аммо тезда айниди. Исмоилжон ҳозир албатта ўз идорасида эди, агар биронта районга кетиб қолмаган бўлса. Лекин бориб нимани гаплашади? Масала ҳал бўлган бўлса, ундан нима маслаҳат олади? Бунинг устига у обкомда ишлай бошлаганидан бери ораларидағи муносабатда қандайдир расмийлик пайдо бўлган эди. Ҳар бир нарсани очиқ-ойдин гапирадиган, ҳазилкаш, латифаларнинг кони, шунинг учун бўлса керак, семириб, қорин қўйган, ёшидан анча катта кўринадиган Исмоилжон у билан учрашганда ўзини чегаралаб гаплашарди. Бир куни ҳатто Усмоновнинг жаҳли чиқди.

— Мен билан бунча энди дипломатлик қилмасанг? Очиқ гапиравер!

Исмоилжон кулди:

— Мен-ку, очиқ галиравераман. Сенга қийин бўлади. Обком ходимисан. Сен билан тенг гаплашсам, шундай одамлар борки, булар ўртоқ, шунинг учун ҳам Усмонов газета камчиликларини яшириб келади, деган гап тарқатишади. Сенга доғ туширишни истамайман.

Усмонов дўстидан ичидан миннатдор бўлди. Аммо ўз гапидан қайтмади:

— Барн бир, плгаригидек гаплашавер. Сенинг «Усмонович»нинг ҳеч кўниколмаяпман.

— Ҳечқиси йўқ. Бу ёшликтан. Кўникиб кетасан.

Лекин Усмонов кўниколмади, Исмоилжон эса ўз билганидан қолмади. Балки шундандир, Усмоновнинг меҳри унга янада ошди ва ҳозир у билан учрашишга ошиққани табиний эди. Бугун дам олиш куни бўлганида, албатта борарди. Ҳеч нарса айтмасди, йўқ, турли ҳазил-ҳузил гаплар билан дитини тинчтиб қайтарди. Редакцияда эса бундай қалиб бўлмайди.

Катта кўчадан ботаника боғи томон борар экан, Усмоновнинг эсига обкомга чишга ўтган дастлабки кунларда Исмоилжоннинг отаси айтган гаплар тушди. Аҳмаджон aka умрини педагогикага багишилаган кекса зиёлилардан эди. Ўнинг таржималарида рус ва жаҳон адабиёти классикларининг бир қанча асарлари ўтизиничи йиллардаёқ нашр этилган, баъзилари ҳамон мактаб ўқув-программаларида кўреатилиб келарди. Ёшлигига ўзи ҳам шеърлар, кичик-кичик пьесалар ёзган, қаҳратон қини совуқларига бердош бериб гуллаган бойчечак ҳақидаги қандайдир бир шеъри куйга солиниб, кўп йиллар радионинг «Пионер эрталиги»да айттилиб келар эди. Шу одам Исмоилжонларнида ўтиришганда:

— Дамиржон, ўғлим, сиз кўп ташвиш чекманг. Одам эплолмайдиган иш йўқ,— деган эди.— Партия аппаратида ишлаетганингиздан қувонинг. Партия аппарати фақат раҳбар идора эмас, жуда катта илм ўчоги, ҳалқ ишига, партия ишига содиқ кадрлар етиштирадиган муқаддас

даргоҳ. Ҳозирги ишнингиз кейинги катта ишларнингиз олдиаги биринчи қадам... трамплин бўлса ажаб эмас.

Усмонов шу гапларни эслар экан, юраги тўлқинланиб кетди. Албатта қандайдир ўзгариш бўлишини у биларди, лекин ўзгариш бунчалик тез келишини ва бундай катта бўлишини у кутмаган эди. Искандар Фойивовичнинг гаплари яна ёдига тушди-ю, кўнгли бўшашиб кетди. Райкомининг биринчи секретари!.. Бу амалга мансуб обрў уни ҳозир мутлақо қизиқтираётганий йўқ эди. Уни ўйлатиб қўйган нарса — шу амал доираси, салмоғи ва мураккаблити эди. Райкомни огоҳ қилмай, Искандар Фойивович уни бутун Бодомсой билан юзаки бўлса ҳам таништириб келганининг боисини у энди тушунди. Искандар Фойивович унинг чўчиб кетишмини истамади, айни вақтда қўйнини пуч ёнғоққа ҳам тўлдирмади. Бор нарсани кўрсатди, бор гапни айтди. Энди наебат унга эди. Бор гайрати, идроки, билимнин ишга солиб, унга ишонгандарининг ишончинини оқлаши керак.

Усмонов шундай ўйлади-ю, вужудини ваҳм босаётганини севди ва ўзидан хафа бўлиб кетди, болалишида юз берган бир ҳодиса дилидан ўтди. Тўртмиг, беит ёшда эди. Бекинмачоқ ўйнаб юриб сой лабидаги шохлари тарвакайлаб кетган кекса ёнғоқ устига яширинди. Оқшом пайти эди. Болалар уни топишолмади. Кеч кириб, қоронғи тушди. Дамир ўртоқлари уни унугашганини, ёлғиз қолганини сезиб, йиғлаб юборди. Катталардан кимдир уни эшишиб, ёнғоқ устидан олиб тушди, ҳазил аралаш униди:

— Енғоқчикиб нима қиласардинг?! Ажина чалиб кетади-ку? ... Миг қийшайиб қолса, майлим?

Ўша куни тушига ажиналар кирди. Биттаси бошига, биттаси юзига ёнишиб, оғзини қийшайтиришди. Дамир додлаб уйғониб кетди. Югуриб бориб чироқни ёқди-да, сўнага қаради. Йўқ, оғзи жойида. Севиниш ўринига, хўрлиги келиб увиллаб йиғлаб юборди. Қулогига:

— Бола қўрқиби! Болани қўрқитишибди! — деган овозлар эшитилди.

Кимдир маслаҳат берди:

— Чумчукнинг юрагини ичириш керак!

Бундай пайтда холис хизмат қиласиганлар кўпайиб қолади. Дамирнинг Тўхтасин деган амакиваччаси бўларди. Қишлоқда унинг шўхлигидан безор бўлмаган хона-дон йўқ эди. Мўйлаби ниш уриб қолганига қарамай, гоҳ бузоқнинг думига чеълак бойлаб, бутун қишлоқнинг тўзонини чиқарар, гоҳ сойдан илон тутиб келиб, овқат маҳали дастурхон устига қўйиб юборарди. Отаси бир марта ҳатто сўрига боғлаб роса калтаклаган эди. Шу Тўхтасинга жон кирди ўшанда. Орқасидан бир гала бола чумчуқ қидиришга тушиб кетди. Дамир ёш эмасми, ўзи ҳан уларнинг кетидан югурди. Бирпасда бештacha чумчуқ тутиб келишди. Кимдир чўрт-чўрт уларнинг калласини узди. Дамир кўзларини чирт юмиб, соққадек-соққадек иккита юракни ютди. Қўрқоқликдан тезроқ қутулишни истаб, учинчисига қўл чўзди-ю, ютолмади. Қейинчалик эсини танигуңча чумчуқ кўрса кўнгли айнийдиган бўлиб юрди. Бу-ку майли, ўртоқларининг олдида изза бўлганини айтмайсизми?! Баъзилар ҳатто «юраги йўқ» деб чақирадиган ҳам бўлишди. Биринчи бўлиб албатта Тўхтасин унга шундай лақаб қўйди. Урушдан юборган сўнгги хатида у шуни эслаган, Дамирдан кечирим сўрагандек бўлган эди.

Шу воқеа ёдидан ўтар экан, Усмонов ўзини олис болалигидаги сингари баланд дарахт устида ҳис қилди. Ўшанда у қўрқувдан чумчуқ юраги ютиб қутулган эди. Наҳотки ҳозир чораси топилмаса? У ўзига шундай савол берди-да, анча тинчиди. Биринчидан, юрагини босган ваҳм қўрқувдан эмас, бошига тушган масъулиятдан эди. Иккинчидан, у ёлғиз эмас эди. Унинг ёшида, ундан ҳам ёшроқ колхоз раислари,райком секретарлари бор. Ишлаб юришибди-ку улар. Нега у ишломас экан?

У шу қарорга келиб, кўнгли ёришди. Ботаника бояғига етай деганда, орқасига қайтди. Қиласиган ишлари кўп эди. Хатларга жавоб бериш керак. Бугунги газета-

ларни кўргани йўқ. Газеталар хаёлига келиши билан «Олға» — Бодомсой район газетаси эсига тушди. Энди бу газетани бошқатдан варақлаб чиқиши керак. Районга боргўнча шундай қилади. Камида бир йиллигини кўриб чиқади. Районни билиш учун бу жуда зарур эди.

Шу ниятлар билан ўз хонасига кирганда, Долимов ҳазил қилди:

— Хайрлашмай кетиб қолдингизми дебман, Дамир Усмонович!

Усмонов индамай жойига ўтирди. Қўпол ҳазилга аввал жавоб бергиси келмади. Кейин ўзини тутолмай:

— Ўртоқ Долимов, сизга битта маслаҳатим бор,— деди.— Ҳеч маҳал пойгадан олдин от чоптирманг. Ўзингизга жабр бўлади.

Долимов қизариб кетди. Гапга оғиз жуфтлади-ю, индамади. Ҳар ҳолда энди унинг олдида тенгқури эмас, район партия комитетининг биринчи секретари ўтиради.

...Бодомсой район коммунистларининг конференцияси кечга яқин тугади. Конференцияда янги йил планлари кўриб чиқилди. Коммунистлар пахта бўйича пландагидан ташқари ўн минг тонна эмас, ўн беш минг тонна қўшимча ҳосил кўтаришга аҳд қилдилар. Чорва қишлоғини яхшилаш масалалари бўйича ҳам тегишли қарор қабул қилдилар. Бир оғиздан ҳамма Искандар Фойивични қўллаб, янги йилда қишлоқ хўжалик ишларига мактаб ўқувчиларини жалб қилмасликка ваъда берди.

Дамир Усмонов конференциядан уйига янги вазифада қайтди. Ҳафиза уни кўриши билан қучофига отилди.

— Айтувдим-у, сизга, бир ўзгариш бўлади деб! Рост эканми гапим?

Усмонов кулиб, унинг пешонасидан ўпди. Ошхонадан қўлларини пешбандига артганича онаси чиқди.

— Боламдан айланай! Бир кунда ўзини олдирибди-кўйибди!— У шундай деб ўғлининг кўксига бошини қўйди.— Майли, мартабанг ишқилиб, бундан ҳам баланд бўлсин. Исмонлжон кутиб ўтирибди сени.

— Қани? — шошиб сўради Усмонов.

— Мен шу ердаман! — меҳмонхонадан Исмоилжоннинг бўгиқ овози эшитилди, кейин йўлакда ўзи кўринди.— Табриклайман.

Икки ўртоқ қучоқлашиб кўришиши.

— Хўш, нима дейсан? — сўради меҳмонхонага киришгач Усмонов.

— Яша, дейман, ўғлим! —Faфур Гуломнинг шеъри билан жавоб қилди Исмоилжон.

Иккалови кулиб юборишди.

— Йўқ, ҳазилсиз!..

— Шундай бўлиши керак эди...— деди Исмоил жонини.

— Билармидинг?

— Йўқ, билмасдим, лекин тахмин қилардим. Областдек обрўйинг яхши эди.

— Йўғ-э?.. — ишонқирамай сўради Усмонов.

— Рост. Аппаратдагилар ҳам, районларда ҳам сен ҳақингда доним яхши гапиришарди. Бу албатта изсиз ҳолмайди.

— Бодомсойга муносабатинг ёмон эди, энди кунора биттадан хабар босиб турмасанг, каллангни оламан!— дўйқ қилди Усмонов.

Исмоилжон кулди.

— Аввал ўзингдан бошлаймиз. Райком секретари аввало халқни ўз программаси билан танишириши керак. Ана ундан кейин хабарлар босилаверади. Хабар устига хабар, қарабензки, бир йилда ўттиз беш минг хабар босилиб кетибди Бодомсойдан.

— Ўтиргилар,— таклиф қилди Ҳафиза.— Сизни кутавеъниб Исмоилжоннинг ҳам қоринлари очиб кетди.

— Бу гапингиз тўғри. Тушдан бери ҳеч нарса еганим йўқ,— деди Исмоилжон.

— Ичамизми қиттак? — сўради Усмонов.— Нима ичамиз?

— Сув бўлмаса конъяк-да.

Усмонов овқат келишини кутмасдан кичкниң қадақ-
ларга қоњъак қўйди.

— Қани, олдик бўлмаса!..

Исмоилжон қадақни семиз қўлига тутиб:

— Йигит бўлдик, энди чўпчак болалик қилмишла-
ри...— деб бошлади.

Усмонов машҳур бу шеърни эслаб, давомини айтди:

— Энди бизнинг бошда, дўстим, бу дунё ташвиш-
лари!

Улар алламаҳалгача гаплашиб ўтиришди. Исмоил-
жон кетгач, Ҳафиза ўрин солаётib, сўради:

— Спитамен нима бўлади энди?

— Спитаменми?..— Ўйланиб қолди Усмонов.— Спи-
тамен ўзига ўхшаган довюрак йигитлари, оқсоқол мас-
лаҳатгўйлари билан Искандар Зулқарнайн қуршовинч
ёриб чиқиб, Мароқанд томон йўл олди. Бир неча мағлу-
биятига қарамай, сўғдлар уни қабул қилишлари ва ма-
дад беришларига ишончи комил эди...

— Мен буни эмас, диссертациянгизни сўраяпман,—
деди жиддий оҳангда Ҳафиза.

Усмонов ўзини эшиitmaganlikka солиб, ўрнига ётди-
да, кўзларини юмди. «Спитамен...— хаёлидан ўтказди
у.— Одамларни ўзига эргаштириш, ўз foясига бўйсунди-
риш учун қанчалик куч, маҳорат керак. Шунчалик куч
ва маҳорат менда бормикан?»

Бу савол Бодомсойда бўлганидан бери унинг миясини
пармалаб келарди. Лекин қанча ўйламасин, ўзи жавоб
беролмаслигини яхши биларди.

V

Усмонов Бодомсойдаги биринчи иш кунига пухта
тайёрланди. Қиладиган ишларини ҳатто соатма-соат
белгилаб чиқди. Аввало райком ходимлари билан тани-

шади. Ҳар бир бўлимнинг қилаётган ишини кўради, ке-йин конференция қарори, маъruzага чиққанларнинг сўзларини яна бир бор ўқиб чиқади. Райкомнинг иш плани, бюрга қўйиладиган масалалар, уларни ким тайёрлаётгани билан бафуржга танишади ва шунга қараб, хўжаликларга бориш тартибини мўлжаллаб чиқади. Бир иш куни учун бу масалалар етарли эди. Режасидан мамнун бўлиб, Усмонов кўчага чиқди.

Район ижроия комитетининг раиси Қудрат Содиқовнинг олтинчи совхознинг янги коттежларидан бирига кўчиб келиш ҳақидаги таклифиға қарамай, Усмонов район меҳмонхонасидағи икки хоналик номерга жойлашган эди. Унинг назарида ҳар томонлама шу ер қулай ва райкомнинг биқинида эди. Коттежга келганда, совхоз ишчилари учун қурилган уйга тайёрга айёрдек кириб олишни эп кўрмади. Ҳозирча меҳмонхонада туради. Унинг қарорига Ҳафиза ҳам, онаси ҳам қўшилишди. Усмоновнинг тинчлиги улар учун ҳар қандай шароитдан муҳим эди. Бунинг устига масаланинг яна бир нозик томони бор эди. Мастура опанинг ўттиз йилдан сўнг, эридан бевақт ажраган жойга бориши, ярасини янгилаши ниҳоятда оғир эди. Бу ҳақда оғиз очишига Усмонов ботинмади. Аяси эса ўзича ҳеч нарса демади. Бу масалада ҳам Усмоновнинг умиди туғилажак қақалоқда эди. Бола бутун губорларни ювиб юбориши мумкин эди.

Райком биносига етганда юраги яна бир тўлқинланиб кетди. Аммо бу тўлқинланиш катта бир довон ошишга тайёр турган одамнинг тўлқинланиши эди. У муздек ҳаводан симириб чуқур нафас олди-да, енгил қадам ташлаб зинадан кўтарила бошлади. Энди узоқ йиллар ўз уйидек қадрдон бўлиб қоладиган, ҳозирча кўнизиш қийин бўлган бу бинонинг иккинчи қаватига кўтарилиганда, тун бўйи мижжа қоқмай тузиб чиққан режалари барбод бўлди. Райком секретари сифатидаги биринчи иш куни кутилмаган воқеадан бошланди.

Қабулхонада тўзғиган соchlари устидан омонатгина

рўмол боғлаб олган барваста бир аёл қўлларини пахса қилиб секретарь қизга ўшқирапди:

— Мен сенга мелисани кўрсатиб қўяман! Ўзингни мелисага юбориш керак, такасалтанг! Мени эримнимас! Шим кийиб олиб, маслаҳат берадиган бўб қолдингизми энди, зорманда!..

— Нима гап ўзи?— Ҳайрон бўлиб сўради Усмонов.

Секретарь қиз йиғламоқдан бери бўлиб унга юзланди:

— Манави аёл.., Уйларида жанжал бўлган экан. Аёл уни гапиргани қўймади.

— Вой, тўтиқуш! Ҳали «манави аёл» бўлиб қолдими сенга? Эллик йилдан бери Салтанатман! Бешик тўйингга бош-оёқ сарпо қилиб борганман-а, яшшамагур!..

— Секин, секин, қарғамасдан гапиринг,— деди Усмонов.

— Мени қарғашимни эшитмабсиз ҳали! Шуям қарғаш бўлдими?!

Усмонов унга эътибор бермай, секретарь қиздан сўради:

— Хўш? Нима бўлди?

— Уйларида жанжал бўлган экан...— ўпкаси тўлиб гапирди секретарь қиз.— Уртоқлари билан... Милицияга боринг десам, мени уришяптилар. Секретарлар керак, дейдилар. Козим Бурҳонович ҳали келганлари йўқ. Илгари қабул қилган эдилар.

— Баҳорда,— қўшиб қўйди аёл.— Ўшандан бери уйим жаннат эди. Бир кунда дўзах бўлди-қўйди!

— Қани ичкарига киринг,— таклиф қилди Усмонов фамилияси ёзиб қўйилган эшикни очиб: «Қачон улгурishiди экан?» Хаёлидан ўтди унинг ичкарига кирап экан.

— Дамир Усмонович, ҳозир Козим Бурҳонович ўзлари келиб қоладилар, сиз...

Усмонов секретарь қизнинг нима демоқчи эканини тушунди.

— Ҳечқиси йўқ.

— Сен аралашма! — дўқ қилди аёл.

— Қани, ўтириг опа!

Усмонов эшик орқасида турган илгакка пальто, телвагини илиб, анчагина узун кабинет тўридаги ёзув столини айланаб ўтди-да, буралма креслога ўтириди.

— Эрталабдан ниманинг жанжалини қилиб ўтириб-сиз, Салтанат опа?

У жилмайиб аёлга боқди. Аёл унинг исмини айтиб мурожаат қилганиданми ё кабинетнинг салобати босдиши, бирдан уялиб, келинчаклардек бошини эгди.

— Йўқ, ўртоқ... секретарь. Ўлибманни жанжал қилиб? Малоҳатхон девор қўшним. Шунчаки ҳазиллашдимда... Ўзингиз эсон-омонмисиз?

Усмонов ўзини зўрга кулгидан тийди:

— Раҳмат. Хўш, келинг?

— Мен... — аёл тутилиб қолди. — Мен арзимаган бир илтимос билан келдим. Илгарилариам келиб турардим. Барака топсинлар, ўртоқ Бурҳонов жуда яхши қабул қизардилар. Бугунам шу илтимос билан келганман. Эртароқ кепқопман. Малоҳатхон синглим билан гаплашиб туриб, озгина нервничит қилдим,— аёл уялган бўлиб, рўмолининг учи билан даҳанини беркитди.— Баъзи-баъзидан шунаقا, озгина нервничит қилиб турман. Илгари дунёни сел олса ҳам тўпуғимга чақмасди. Поччангиз списалис бўлдилар-у, шу касалга чалиниб қолдим.

— Нима бўлдилар? — тушунмади Усмонов.

— Списалис!

Усмонов «бу нима деганингиз?» деб сўрамоқчи эди, аёлнинг ўзи изоҳ берди.

— Машина тузатадила. Ҳар хил машиналарни. Ҳалиги ҳўқиз сурати солинганидан тортиб, инвалит машинағача. Илгари туппа-тузук эдила. Грузовой ҳайдаб юрадила. Уч йил бурун машина тузатадиган идора очилиб, шундай бозорнинг орқасида, шунга списалис қилиб өзқиришиди. Шундан бери, ўртоқ секретарь, азобдаман. Машинаси бузуқлар ҳам кўп экан. Тиним йўқ. Уйдаям

очирит. Шунданми дейман, ўзгариб қолдила. **Ичадила.** Кўчада етмагандек, уйга олиб келиб ичадила. **Қаладопка** шишага тўлиб кетди. Ичала, келиб ётсала майли эди. Болалани тинч қўймайдила. Менгаям... тегишадила. Барака топтур ўртоқ Бурҳонов кўп яхшилик қилдила. Кабинетларидага рўпараларига ўтқизиб қўйиб, роса изза қилдила. Гапига қулоқ соладила. Бир ойдан кейин яна боягидек... Ичволиб, ҳеч кимга тинчлик бермайдила. Ке-ча ўёқ-буёғимдан ўтиб кетди. Қенжамиз, Юсуфбек, худди дадасига ўхшаб, машина жинниси. Кеча ўқишдан икки олиб келибди. Бингтамас иккиси, мен сизга айтсан. Хамир ёйиб шуни уришиб турсам, келиб қолдила қийшайиб. Бир чақиримдан биламан ичганларини. Ичволосала, яхши кўрган битта ашуалари бор, оёқ етгунча кетгайман деган. Тиллари айланмаса ҳам, шуни айтганилари айтган. Шуни айтиб кириб келиб қолдила. Тағин чўнтакларигаям битта шишани солиб олибдила, оғзи чиқиб турибди. Мендан бекитмоқчи бўлиб, ёnlариминан юриб келяптила. Аввал тишимни-тишимга қўйдим. Ке-йин бўлмади. Списалис бўсалаям, мени кўкрагимдан келалла. Утирган жойимда, қўлимдаги ўқлоги билан сонларига бир урувдим, чўнтакларидағи шиша чил-чил бўлиб синди, мўрт эканда, шимлариям бирпасда жиққа ҳўл бўлди, сийиб қўйган боладай. «Их» деб, чўнтаклари-га қўл солувдила, қўлларини шиша тилиб кетди. Ана бўлди тўполон, бўлди тўполон!.. Сан кимни урдинг-а?! Сан кимни қонини тўқдинг-а?! Сан списалисси қонини тўқдинг! Кимсан ўзинг? Битта шпингалетсан!— деб шердек ташландила устимга. Қочдим. Ҳовлини айлантириб қувдила. Менга бу алам қилмайди, ўртоқ секретарь, қув-сала қувибтила, ўзимни эrim... Шпингалет деганларига чидолмайман. Бешта болани катта қилиб, энди шунаقا ном орттиридимми? Йигладим, кечасиминан йиглаб чиқдим. Мени бу ҳақоратдан халос қилинг, ўртоқ секретарь... Малоҳат бўлса мелисага боринг, дейди. Эсимни ебманми бориб?! Мелиса гаплашиб ўтирамиди, шатта

қамайди! У кишини гапминан тарбия қилиш керак, қамбас.

Үртоқ Бурҳонов икки-уч марта гаплашдила, минг раҳмат, бўлканондай бўб қолувдила ўшандан кейин. Ҳозир яна айнидила... Мен сизга айтсан, ўртоқ секретарь, сизнинг ҳам мартабангиз ўртоқ Бурҳоновдай бўлсин, поччангиз...

— Фамилиянгиз нима?— уни бўлди Усмонов аёлнинг дардига тушуниб. «Поччаси»нинг қиёфасини ҳам ҳатто кўз олдига келтириди.

— Фамилиям Пармонова,— ҳозиржавоблик билан деди аёл.— Эллик иккига кирдим. Ўн олтинчи яслада сменний ошпазман. Бир боринг, ўртоқ секретарь. Мен қилган овқат болалардан сира ортиб қолмайди. Болаларниям ўзи қўғирчоқдай қилиб қўйганмиз. Ота-оналари бирам хурсанд, бирам хурсанд!..

— Албатта бораман,— ваъда қилди Усмонов.— Эрингизнинг фамилияси-чи?

— Вой мен у кишининг фамилияларидаман. Ўзимми, қизлик фамилиям... хах... нима эди?.. Шодмонқулова!— ғурур билан айтди аёл.

— Исмлари-чи?

— Поччангизними?

— Ҳа... Сизнинг исмингизни биламан.

— Полвонқул ака.

Усмонов яна кулиб юборай деди. Қичкинагина эридан шикоят қилиб келган забардаст аёл қандайдир меҳр ва ҳурмат билан эрининг исмини тилга олган эди.

— Гаплашасизми?— умид билан сўради аёл.

— Албатта. Сиз бораверинг,— деди ўрнидан туриб Усмонов.— Аммо, Сиз ҳам, опа, қаттиққўл бўлманг. Ўзингиз айтгандай, яхши гап билан...

— Вой, қаттиққўл бўлиб, қаёққа борибман, айланай. Кечаги урганим, холос!..

— Хўп, хайр.

Аёл гавдасига ярашмаган уятчанлик билан тисарилиб чиқиб кетди.

«Устахонага бориб келиш керак,— хаёлидан ўтказди Усмонов.— Қандай одам экан бу «списалис»?

У беихтиёр аёлнинг Бурҳонов ҳақида гапларини хотирлади. «Бурҳоновдек мартабангиз баланд бўлсин», деди у. Демак, Бурҳоновни районда ҳурмат қилишади. Бу албатта табиий. Кўп йиллардан бери шу районда ишлайди. Ҳамма уни танийди. У шундай ўйлар экан, дилини жиндак сиёҳ қилган бир воқеани эслади. Конференцияда икки киши унияг номзодига қарши овоз берган эди. Ӯша куни ҳеч ким, унинг ўзи ҳам бунга эътибор бермади. Лекин Искандар Фойивович билан қайтаётib, ўйла шуни дилидан ўтказди. Кимлар бўлиши мумкин бу икки киши? Нима учун уни ўчиришди? Уни билмаганилариданми? Қасдданми? Ёки шунчаки, унинг кайфиятини бузиш учунми? Агар ўнданай бўлса, бу ёш болаликку! Бундан ташқари, иккалови келишиб ўчиришдими, ё бир-бирларидан бехабарми? Бу саволларга жавоб бериш қийин эди. Ҳа, Бурҳонов даражасига етиш учун у ҳали кўп иш қилиши керак эди. Энг муҳими у одамларни ўзига ишонтириши керак. Ишонтиришнинг бирдан-бир йўли — яхши ишлаш, тинимсиз, юрак билан, файрат билан ишлаш.

— Дамир Усмонович, кечирасиз,— селектордан қабулхона секретари Малоҳатнинг овози эшитилди,— кўк трубкани олинг. «Максим Горький»дан телефон қилишяпти.

Усмонов у айтган телефон трубкасини олди.

— Эшитаман!..

— Дамир Усмонович,— трубкадан өркак кишининг бўғиқ овози келди.— Сизни Қурбонов, партком секретари безовта қиляпти.

— Қулоғим сизда!..

— Кечирасиз, Дамир Усмонович, биринчи иш кунингизда хунук хабар билан мурожаат қиляпмиз..

— Гапираверниг! — деди Усмонов трубканинг жим бўлиб қолганини кўриб.

— Гап шундаки... Бир тракторчимиз... Яхшивой Эргашев... Ҳозиргина тракторнинг остида қолди.

Усмонов ўрнидан туриб кетди.

— Кандай қилиб? Нега?

— Жар Ҷоғасини бугун азондан бери ҳайдаётган эди, трактор ботиб кетиб ағдарилган, ўзи остида қолган.

— Тирикми?

— Тортиб олганимизда нафаси бор эди шекилли... Ҳозир касалхонада. Тузукроқ қарашармикан, деб телефон қиляпман. Олтита боласи бор... Ҳаммаси қиз...

— Қайси касалхонада?

— Районнинг ўзида.

— Мен ҳозир суриштираман,— деди Усмонов.— Лозим бўлган ҳамма чорани кўрамиз.

— Раҳмат, Дамир Усмоновчи, яна бир марта кечиринг.

Усмонов трубкани қўйиб, секретарни чақирди.

— Мени касалхонанинг бош врачи билан улаанг!

Усмонов шундай деди-ю, секретарнинг жавобини кутмасдан кабинетдан чиқди. У касалхонага бориб келишга қарор қилган эди.

Тракторчининг аҳволи оғир эди. Жарга қулаган трактор гусеницалари билан кўкрагини эзиб юборган ва бош врач ўзи уни операция қилаётган эди.

— Иигирма минутча бўлди,— деди ҳамшира.

— Умид борми?

— Билмадим. Кўп қон кетган. Матлаб ака яхши хирурглар. Умид ўша кишида.

Усмонов операция тугашини кутиб, бош врач кабинетига кирди ва Муслим Инсятовнинг телефонини терди.

— Муслим ака, саломалайкум. Усмоновман. Бир тракторчимиз тракторнинг тагида қолибди. Ҳозир операция қилишяпти. Тажрибали бир хирург билан тераввевт керак. Ёрдам берсангиз.

Муслим ака ҳозироқ жўнатишни ваъда қилиб, тракторчининг кимлигини сўради.

— Эргашев, Яхшибой Эргашев.

— Биламан,— деди Муслим ака.— «Максим Горький»дан. У жуда донгдор тракторчи-ку! Нима қилибди?

— Ҳали аниқ билмайман,— деди Усмонов.— Бориб келганимдан кейин телефон қиласан.

Муслим ака ниҳоятда ачиниб, трубкани қўйди. Шу прайт касалхона ҳовлисида аёл кишининг йигиси эшитилди. «Хотини бўлса керак,— хаёлидан ўтказди Усмонов.— Ишқилиб ўлмасин-да...»

У аёлни овутиш ниятида ҳовлига чиқди. Лекин аёлнинг олдига боришга дожат йўқ эди. Бир гуруҳ кишилар уни ўраб олишган, ҳар ким ҳар чеккадан ўзи билганича уни юпатар эли. Бурҳонов ҳам шу ерда эди. Усмоновни кўриб, қаршисига юрди.

— Сизни шу ерда дейиши,— деди қўл узатиб у.— Қалай аҳволи?

Усмонов билганларини ва областдан врачлар чақирганини айтиб берди.

— Яхши қилибсиз,— уни қувватлади Бурҳонов.— Оиласига жабр бўлади сақлаб қолмасак!..

— Нима бўлибди ўзи? Хабарингиз борми?— сўради Усмонов.

Бурҳонов жавоб бермай, аёлни ўраб турган одамлар томон ўгирилди.

— Султонов! Бу ёққа келинг!

Одамлар орасидан ёши элликлардан ошган, шопмўйлов, тўладан келган бир киши чиқди. Усмонов таниди. «Максим Горький» номидаги колхознинг раиси ғоди у. Султонов дўлписини олиб, буғ кўтарилиб турган силлиқ бошини, семиз гарданини арта-арта улар ёнига келди. Рангি қув учган, юз-қўзидан тер қуярди.

— Нима бўлибди ўзи?— Уни Усмонов билан кўришгани қўймай, сўради Бурҳонов.

Шундай бўлса ҳам у Бурҳоновни айланиб ўтиб пўр- силдоқ қўлини Усмоновга узатди.

— Қумариққа етмасдан жарлик бор,— у кўпроқ Усмоновга қараб гапирди.— Беш-олти метр келади чуқурулиги. Ўи биринчи бригада чегараси шу жар. Ҳар йили шунинг ёқасидаги ер бекор қолиб кетарди. Бу йил ҳайдамоқчи эдик. Мен ёшларга ишонмай, Яхшивой бора қолсин, девдим. Тунов кунги ёмғирдан ер қуримабди чофи, трактор тойиб кетган. Яхшивой сакраб тушиб қолса бўларди. Сакрамабди. Тракторни аяган. Ҳеч бало қилмасди тракторга! Нобуд бўлиб кетмайдими менга деса?! Ўзи омон қилса бўлди эди. Нима бўлсаям палакат-да...

Султонов яна сув бўлиб кетган рўмолнчали билан пешонаси аралаш юз-кўзини артди ва менда бошқа ишингиз йўқми, дегандек Усмоновга қаради. Усмонов жавоб бермади. Унга масала равшан эди. Ерга хасислик қилган раисни у тушунган ва айни вақтда ундан жаҳли чиққан эди.

— Бўлмаса кириб чиқай?— сўради Султонов.

— Ҷоринг, боринг,— рухсат берди Усмонов ва ўзи ҳам унинг кетидан ичкарига йўл олди.

Операция ярим соатдан кейин тугади. Ҳориган бош врач операция кийимларини ечар экан:

— Ишониш қийин. Кўкрак қафаси қаттиқ эзилган, учта қавурғаси синиб, жигарига кирган,— деди.— Тағин кўрамиз. Бақувват одам экан, балки...

У гапини давом эттирмади. Халати чўнтағидан сигарет олиб тутатди-да, дераза ёнига бориб, форточекани очди ва бирдан Усмоновга ўгирилди.

— Ўртоқ Усмонов! «Максим Горький»да бунақа фожеалар бўлиб туради. Ўтган йили омборга ўт тушиб, уч киши куйган эди. Ҳайтовур тирик қолишиди. Қайси бир йили ҳам кимнингдир бармоғини ўроқ қирқиб кетган эди. Тўғрими, Ҳайитбой ака?

Султонов жавоб бермай, бош қимиirlатиб қўйди,

— Бошқа колхозларда-чи?— сўради Усмонов.

— Бошқаларда ҳам учраб туради,— энсаси қотиб гапирди бош врач,— касалликларнинг олдини олиш ўрнига, биз қўпинча шунаقا фожеалар билан шуғулланамиз.

Усмонов кутилмаган вазифа олдидан чиқиб қолганини билди. Демак, районда техника хавфсизлиги, умуман, техника назоратига яхши эътибор берилмаган экан. Буни тузатиш керак. Барча хўжаликларни текшириб чиқиш керак.

Усмонов шундай ўйлаб ўрнидан турди.

— Мен сизга ёрдам бўлсин деб, областдан врачлар чақирдим,— деди у бош врачга.— Ҳозир келиб қолиша керак. Хабар бериб турасиз-да.

— Яхши.

— Козим Бурҳонович, мен ўша жарликка бориб келаман.

Бурҳонов, зарурмикан, дегандек унга қаради. Усмонов уни тушунди-ю, жавоб қилмади. Султонов унинг орқасидан чиқди.

— Сиз шу ерда бўлинг,— уни тўхтатди Усмонов.

Ўзини йўқотиб қўйган раис эътиroz билдирумай, орқасига қайтди.

...Жарликка пиёда боришга тўғри келди. Юпқа музқоплаган шудгор ёқалаб, трактор ағдарилган жойга етишганда, кун тиккага келган, аммо тафти билинмас, рангпар сидирга булувлар орқасида пишмаган нондек сарғайиб турарди. Тўнкарилиб ётган тракторнинг атрофидаги кишилар уларни кўриб, йўл беришди. Қораҷадан келган ёш йигит Усмонов қаршисига юрди.

— Ассалому алайкум. Эрталаб мен телефон қилувдим Сизга. Қобуловман.

Усмонов унга қўлини узатди.

— Тракторчингизни операция қилишди. Аҳволи оғир, Қандай ағдарилибди? Текширдиларингми?

— Ҳа. Акт ҳам тузиб қўйдик.

Район милиция бўлимининг бошлиғи ва инспектори
ҳам шу ерда экан.

— Бу жойда трактор экан-ку, ҳўқиз ҳам қайилол-
майди,— деди инспектор.— Трактор бурилаётганда ағ-
дарилган...

Бу Усмоновга ҳам равшан эди. Шудгор қилингандар
билан жарликнинг ёмғир ювиб, тийғончиқ қилиб қўйган
лаби орасидаги масофа нари борса, бир ярим қулоч ке-
ларди. Шу кичкина жойни деб одамнинг нобуд бўлишига
йўл қўйиш ақл бовар қилмайдиган фаросатсизлик
эди.

— Улчаганимисизлар, қанча чиқади шу ер?— сўради
у партком секретаридан.

— Икки гектар,— деди Қобулов.— Тегилмаса ҳам
бўларди ёу жойга. Чўлга яна бир зўр берсак, икки
гектар эмас, икки юз гектар ҳам ўзлаштириш мумкин
эди.

— Нега шуни айтмадингиз?

Қобулов ийманиб қолди. Афтидан бу ҳақда гап бўл-
ган эди.

— Кучли ер эди-да,— деди охири хижолат билан
ердан бошини кўтармай.— Қамида элликтадан ҳосил бе-
рарди.

Усмоновнинг жаҳли чиқди.

— Сизлар учун одам икки гектарлик ердан хор экан-
да? Яхшибой аканиг ўзи сизга чўлдан юз гектар ҳайдаб
берарди. Қачондан бери парткомлик қиляпсиз?

— Биринчи йил,— ёш боладек ҳозиржавоблик билан
деди Қобулов.— Бригадир эдим. Қўйишмай, бу йил
партком қилиб сайлаши.

Усмонов уларнинг сұхбатини диққат билан эшишиб
туришганини сезиб, нотўғри иш қидганини фаҳмлади.
Партком секретарини одамлар олдида бундай имтиҳон
қилиш керак эмас эди. Машина томон йўл олар экан,
хатосини тузатиш мақсадида у билан илиқ хайр-
лашди.

Бундан ташқарн у Усмоновга ёкиб қолган эди. Оғир, бамаъни. Гапларидан колхознинг бутун икир-чикирини билади. Ерилиб айтишга эса истиҳола қилади. Биринчидан, улар ҳали таниш эмас. Иккинчидан, ҳар ҳолда раисга ҳурмати баланд эди. Афтидан раиснинг таклифи билан у партком секретари бўлган. Шунинг учун ҳам ҳали қанот ёза олган эмас, бунга имконияти ҳам йўқ. Раис йўл қўймайди.

У шу хаёллар билан борар экан, катта йўл ёқасида қандайдир аёлнинг чамадон устида бошини қўллари орасига олиб ўтирганини кўриб қолди.

— Тўхтатинг,— буюрди у шофёрга.

Машина шундай аёлнинг ёнида тўхтади. Аёл эътибор бермади. Усмонов машинадан тушиб, уннинг олдига сорди.

— Қаёққа кетяпсиз, опа?

Аёл бошини кўтарди. У йирик қора кўзлари жиққа ёшга тўлган ёш қиз эди.

— Кечирасиз,— уялиб деди Усмонов.— Билмай қолдим...

— Ҳечқиси йўқ,— ҳорғин жавоб қилди аёл ва ўрнидан турди.— Хола десангиз ҳам менга энди бари бир. Кетяпман...

— Қаёққа?

— Тошкентга. Уйимга.

— Районгача олиб кетишым мумкин,— таклиф қилди Усмонов.

— Агар оғирлик қилмаса...

— Ўтиринг!

Улар анчагача жим боришиди. Қиз йигламас, аммо қизарган кўзларини ўқтин-ўқтин артиб, хўрсиниб қўяди.

— Нимадан хафа бўлдингиз?— ниҳоят сўради Усмонов.

Қиз «сизга нима» дегандек унга энсаси қотиб қарадида, юмшади:

— Ўзимдан. Ўзим ҳаммасига айборман. Институтда олиб қолишмоқчи эди, кўнмовдим. Керагим йўқ экан, билмабман!..

У ўзини тутолмай, йиглаб юборди. Усмонов нима қилишини билмай қолди. Унинг ёшлигидан аёл кишининг йифисига тоқати йўқ эди. Уй жанжалсиз бўлмайди, Ҳафиза арзимаган нарсадан кўзёши қилиб қолса, ўзини қаёқча уришни, нима қилишни билмасди. Ҳафиза-ку, ўз одами, хотини, бегона аёл билан қандай гаплашади?

— Ўзингизни босинг, йиғи одамни қаритади.

Усмонов шундай деди-ю, аҳмоқона гап қилганидан ўзи уялиб кетди. Орқани қўрсатадиган кабина ичидаги ойнадан шофёрнинг кулиб қўйганини кўриб, қизариб кетганини сезди.

— Поччамлар билан уришиб қолган бўлсалар керак,— уни хижолатликдан қутқармоқчи бўлиб, луқма ташлади шофёр.

Қиз жилмайиб кўзларини артди.

— Почча йўқлар...

— Ишда хафа қилишдими?— сўради Усмонов.

Қиз бошини қимирлатди ва яхши одамларни учратгандек, тарихини тўлқинлана-тўлқинлана гапириб берди. Тарихи узун эмас эди. Агроном экан. Институтни битиргач, ўз хоҳиши билан районга жўнабди. Бодомсойдан уни «Шарқ Юлдузи» колхозига юборишибди. Ҳамма ташвишлари колхозга келгандан кейин бошланибди. Аввал ҳамма, айниқса, раис ундан хурсанд бўлибди. Кейинчалик раис билан алоқалари бузилиб қолибди.

— Пахтадан бошқа нарсани ўйламайдилар,— деди куйиниб қиз.— Пахта, пахта, пахта!.. Тушларига ҳам пахта кириб чиқса керак. Тўғри, колхоз пахтачилик колхози. Буни мен тушунаман. Лекин одам фақат пахта билан тирикми? Беш панжа баравар эмас. Одамлар ҳам шундай. Ҳамманинг ўзига яраша қизиқиши бор. Лекин у киши ҳаммани пахта билан ўлчайдилар. Ўқишига юбориш

ҳам пахта билан. Ҳатто курортга борадиганларни қанча пахта беришига қараб юборадилар. Хўш, у ветеринар бўлса-чи? Ё кутубхоначи бўлса-чи? Бунақаларнинг ҳоливой. Шунинг учун ҳам колхозда ёшлар қолмаяпти. Ҳамма кетиб қоляпти, шаҳарга, районга. Жуда бўлмаса совхозга ишга ўтиб кетишяпти. Теплица қурмоқчи бўлдик. Қўшни колхозда бор. Бундан ташқари, эшитганмисиз, Тошкентдаги Орджоникидзе районида бир агроном бор. Доиғи бутун иттифоққа кетган. Бу киши эшитмаганлар. Ё ўзларини эшитмаганликка соладилар. Шу одам қишидаям қовун-тарвуз етиштиради, памидор, бодрингни-ку кети узилмайди. Нега биз шундай қилолмаймиз? Агар қишидаям пахта етиштириш йўлини топсаларинг, майли, неча гектар десаларинг теплица қилиб бераман, дейдилар. Тарвуз-қовундан оғиз очмаларинг. Тарвуз-қовун меъданни сусайтиармиш. Қишида тарвуз ейдиганлар ёзда қўзиво ўтарвуздан олиб қўйишиксинмиш. Ана сизга колхоз раисининг савияси! Бунақада ишлаб бўладими?!

— Шикоят қилмадингизми? — сўради Усмонов.

— Кимга? — ҳайрон бўлди қиз.

— Масалан... парткомга.

Қиз аччиқ кулди.

— Партиком секретари қайнилари. Гаҳ, десалар қўлларига қўнади.

— Унчалик эмасдир? — Тусмоллаб сўради Усмонов.

— Умуман, яхши йигит. Райкомга бориш керак, деб қулогимга айтди.

— Нега бормадингиз?

— Нима қиласман бориб? У кишининг ўзи райком аъзоси. Қейин ўртоқ Бурҳонов у кишини жуда ҳурмат қиласдилар. Гапим гаплигича қолиб кетади. Янги секретарь келибдилар деб эшитдим. У киши балки тушунармиди?.. Энди бунинг аҳамияти йўқ.

— Нега?

— Кетяпман.

— Қўрқибсиз-да?

Қиз жаҳл билан Усмоновга ўғирилди.

— Мен бир йил ишладим. Сиз бир кун менинг ўрнимда ишлаб кўринг.

— Бўлти,— рози бўлди кулиб Усмонов.— Бир кун ўрнингизда ишлайман. Фақат бир шартим бор. Бугуноқ көлхозга қайтинг...

— Пўк,— қатъйн равишда деди қиз.

— Бўлмаса бугун районда қолинг. Эрталаб ижалализ «Шарқ Юлдузи»га борамиз. Энди бунга кўнарсиз. Гап битта бўлади.

— Узингиз ким бўласиз?— сўради қиз кўнгандек бўлиб.

— Райкомнинг янги секретари.

— Вой!..— қиз уялиб юзини қўллари орасида яширди.

Уни хижолатдан қутқарниш учун Усмонов қўлини чўзди.

— Танишиб қўяйлик. Усмонов.

— Холида,— қиз қип-қизарип унинг кафтига кичкина, иссиқ қўлни кўйди.

Райком биноси олдида Усмонов машинани тўхтатди:

— Бу кишини меҳмонхонага олиб боринг,— деди шоферга ва қизга ўғирилди.— Келишдик-а? Бирга борамиз колхозингизга.

Қиз бирпасда шодлик қоплаган кўзларини унга тикиб, бошини қимиirlатди.

Райкомда Усмонов қабулхонага кириши билан тракторчининг аҳволини сўради. Малоҳат, касалхона бош врачи телефон қилганини, тракторчи ўзига келиб, кўзини очганини айтди. Усмонов кўнгли жойига тушиб, кабинетига кирди. Энди режаларини амалга оширса бўларди. Биринчи қиласидан иши—конференция материалларини кўздан кечириб чиқиш эди. Буни тунга қолдирса бўлади. Меҳмонхона тинч. Бунинг устига Бодомсой ҳали унга янги жой, бегонадек эди. Бегона жойда эса у ухлолмасди. Ҳозир бўлимларнинг иш плани билан танишиш керак. Шу ниятда у селектор тугмасини босди.

...Усмонов ўша куни ярим кечада меҳмонхонага қайтиди. Кимдир меҳрибончилик қилиб олиб келиб қўйган өлтиндек сап-сариқ ошдан уч-тўрт қошиқ шошиб еди-да, уйига телефон қилди.

— Ҳафиза? Ухловдингми?

— Йўқ, ховотир олиб ўтирибмиз аямлар билан,— деди Ҳафиза.— Жуда кўп телефон қилдик. Тополмадик. Тинчмисиз?

— Ҳа. Чақалоқ қалай?

Ҳафиза кулди.

— Катта бўляпти. Дамир ака?

— Лаббай!

— Мен бораман Бодомсойга.

— Эсингни едингми?

— Тинч бўлишимни истайсизми, айниқса шу аҳволда?

— Ҳа.

— Демак, бораман. Район тугруқхонасида битта меш туғифманми?! Қайтанга яхши бўлади.

— Нега?— тушунмади Усмонов.

— Негамас, унга,— деди Ҳафиза.— Дала ҳавоси... Соғлом бўлади.

Усмонов кулди.

— Эртага гаплашамиз, хўпми?

— Хўп. Овқатланиш эсингиздан чиқмадими? Нима едингиз?

Усмонов қандайдир овқатларнинг номини айтиб, хотинини тинчиди ва хайрли тун тилаб трубкани қўйди. Қаравотга чўзилиши билан кўзларини уйқу босди. Туш кўрди. Бир гуруҳ одамлар билан тобут кўтариб кетаётган эмиш. Тобутла ўзи ётган эмиш. Чўчиб уйғониб кетди. Эсига яна тракторчи фожиаси тушди.

V1

Ўша куни, кечқурун, Усмонов райкомда навбатчилик қилиб, конференция материаллари билан танишиб ўтирган пайт, Қозим Бурҳоновнинг жимжимадор баланд дар-

возаси олдига «ГАЗ-69» машинаси келиб тұхтади. Тұладан келган одам шошиб машинадан тушиб, атрофга аланглаб қаради. Сийрак чироқлардан нимқоронғи бүлиб турған күча жимжит, ҳеч ким күрінмаётгандығына ишонч ҳосил қылғач:

— Кетавер,— деди шофёрға ва дарвоза устуны билан үй девори орасида бегона күзга билинмай осилиб турған ингичка симни олиб, эшик зиҳига жойлаб уни очди. Қоронғи йўлакда занжирининг шарақлагани ва катта итнинг ириллагани эшилди.

— Олапар!— деди секин тўла одам йўлакка қадам қўяр экан.— Танимадингми?!

Ит тинчиди. Пешайвонли уйнинг ҳовлига қараган бир хонасида чироқ ёниқ эди.

— Козим Бурҳонович!— паст овозда чақирди тўла одам ва жавобни кутмасдан айвонга кўтарилиди. Ичкаридан гулдор халат кийган ўрта ёшли бир аёл чиқди.

— Қелинг, Ҳайитвой ака,— деди у ва меҳмоннинг счиб улгурган пальтосига қўл чўэди.— Жуда эзилиб кетдингиз-а, бугун?

— Ҳа энди, шунақаси ҳам бўлар экан.

Ҳайитвой ака таклифни кутмасдан ичкарига кирди.

Бурҳонов қўлида қандайдир қалин китоб, диванда ёнбошлаб ўтиради. Қизил ёғочдан ясалган кенг, шерпанжа оёқлари остига китоблар қўйилган ёзув столида янги очилган арман конъяги, пахта нусха тақсимчада юпқа қирқилган лимон турарди.

Султоновни кўриб, у жойидан қўзғалди, аммо турмади.

— Қелинг.

— Сизни кўрмасам юрагим ёрилиб кетадигандек бўлди, келдим.

— Қўрқдингизми?— истеҳзо билан сўради Бурҳонов.

Султонов диванга ўтириб, шошмасдан кителининг қўйин чўнтагидан янги чуст дўпписини олди, уни ёйиб, тиззасига бир урди-да, силлиқ бошига бостириб кийди.

— Султонов унча-мунчага қўрқадиганлардан эмас, Козим Бурҳонович! Султоновни қўрқитадиган ҳали она-сининг қорнида! Яхши тракторчи эди. Герой қилмоқчи эдим...

— Нега эди дейсиз?— сўради Бурҳонов.

— Врач умуртқа суяги эзилиб кетибди. Тирик қолсаям, ишга ярамайди, деяпти,— деди «уф» тортиб Султонов.

Хонага оёқ учida юриб, бояги аёл, Бурҳоновнинг хотини кирди-да, ҳеч нарса демай, битта қадаҳ, пахта нусха тақсимчада қази қўйиб, яна оёқ учida чиқиб кетди.

— Олинг. Босади.— Бурҳонов қадаҳларга конъяк қўйди. Ишиб бўлишгач, лимон паррагини шима туриб сўради:— Оиласи нима деяпти?

— Жавр бўлди оиласига!— Бошини қимирлатди Султонов.— Олти бола. Тағин ҳаммаси қиз. Энг каттаси ўн еттида. Қузга бориб тўй қилмоқчи эди.— У ўзининг қадаҳига тўлдириб қўйди, оғзига олиб борди-ю, негадир кўнгли тортмай, стол устига қўйди.— Оиласи нима дерди? Ҳозир йифи билан овора. Аммо...

— Нима аммо?

— Милиция ишни бузмаса бўлди. Қун бўйи балнисада бўлиб, Маъмуржон билан гаплашолганим йўқ. Ҳайдарали бирга эди уминан. Лекин, ҳар ҳолда...

— Ҳайдарали ким?— уни бўлди Бурҳонов.

— Парткомим. Эсли бола.

— Бўлди, танидим,— деди Бурҳонов ва тўлатилган қадаҳни Султоновга узатди.— Милицияни ўйламанг, Ҳайитбой ака. Маъмуржон билан ўзим гаплашиб қўйман.

— Гапчувалашмасин дейман-да.

Султонов шундай деб қадаҳдан бир ҳўплади-да, жоийга қўйди.

Уни ташвишга солган нарса тракторчининг фожиасидан кўра, шу нарса атрофидаги гап-сўз эди. Албатта ҳар қандай фитна — оғир, одамни куйдирали, эзади, аммо фожиалар ҳақидаги гаплар бундан ҳам баттар куйдира-

ди, эзади. Султонов шундай ўйларди. Чунки одамлар ҳар хил, улар тарқатадиган гаплар ҳам ҳар хил. Биринчи галда айбни ҳамма раҳбарларга қўяди. Ҳар қандай раҳбардан айб топиш осон. Вақтида айтмаган, вақтида қилмаган!. Ҳамма балога раҳбар балогардон. Албатта ўша арзимас ерга тегилмаса бўларди. Ўша ердан олинадиган ҳосил колхозни осмонга кўтариб юбормасди. Лекин катта хўжаликда тийиннинг ҳам аҳамияти бор. У ёқда шунча ер қолиб кетса, бу ёқда шунча ер қолиб кетса, хўжалик нима бўлади? Шу ният билан у Яхшивойга ҳайда деди. Тагин ёш-ялангга, кечагина трактор минган болаларга айтгани йўқ. Колхознинг энг уста, энг илғор тракторчисига айтди. Султонов шундай ўйлар экан, ўзини овутаётганини фаҳмлади. Аслида эса, фожиадан бир кун олдин Яхшивой Эргашевга, бригадирга нима дегани яхши эсида эди. Аввало уларни уришди.

— Қачон гапга кирасанлар сенлар?— деди у бригада ерларини айланиб юришганда.— Ўтган йилинам гапирган эдим, баҳордаям гапирдим шу жой бўш қолмасин деб. Эртагаёқ ҳайдалсин! Қечқурун келиб ўзим кўраман!

Бригадир бир нарса демоқчи бўлиб оғиз жуфтлаган эди, жеркиб берди:

— Гап битта! Шундай етилиб ётибди бу ер. Камида элликтадан ҳосил оласанлар.

— Бу жойнинг ҳосили нима бўларди? Одам қўрқади, Ҳайитвой ака,— гапга аралашди Яхшивой.

— И-я! Яхшивой! Тилинг чиқиб қолибдими? Сени ким айтади старший механизатор деб, шу жойдан қўрқсанг?! Бер менга тракторингни! Ўзим ҳайдайман. Икки гектар-а? Икки гектар жой кўчада ётибдими?

Иккалови ҳам аниқ эшитган бу гапни. Эшитмаса, гира-ширада ўша ерни ҳайдашга тушармиди?! Бригадирдан унинг кўнгли тўқ эди. Ўзи ўстириб одам қилган. Мусавой. Яхшивой нима-ю, у нима? Барис бир. Иккаловининг оғзидан икки кунида ҳам икки оғиз гап чиқмайди. Балиқнинг ўзи. Одамлар бекорга уни Муса соқов дейиш-

магаи. Шунга қарамай, Султонов иотинч эди. **Одам бамисоли** бир тилсим. Қалитини бурасанг, сири очилади. Тегишли идораларда уни гапиртириб қўйишлари мумкин эди. Бирдан-бир чўчигани шу. Муса бўлган гапни айтиб қўйса, бечора раиснинг гали билан ўлиб кетибди, деган овоза тарқарди. Султонов ана шу овозадан ташвишда эди. Бу эса обрўга тегади. Йигирма йилдан бери раислик қилиб, обрў йўқотиш нималигини у яхши биларди. Имиджимида жазоланса — майли (яхши бир ҳайфсан олишига кўзи етарди,) мажлис-пажлисга қўйиб юбориша борми, сариқ чақа ҳам ундан обрўли бўлиб қолади.

Султонов шу тахминлар ташвиши билан кеч бўлиб қолганига қарамай кўп йиллик суюнчиғи ва ҳамдарди Бурҳоновнинг уйига келган эди.

— Гап чувалмайди,— уни тинчтди Бурҳонов.— Ҳалиги... тракторчининг оиласини рози қилинг. Бола-чақасидан хабардор бўлиб туринг...

— Бўлмасам-чи!— ишонч билан деди Султонов.— Каттасини ўзим узатаман. Ўқишига киритиб қўяман!

— Шуларни айтинг-да,— маслаҳат берди Бурҳонов.— Аммо бўш келманг. Бўш келсангиз, айби бор экан, деган гап чиқади.

— Отангизга раҳмат,— Султоновнинг кўнгли бир оз ёришди.

— Кейин бунчалик эзилманг,— гапида давом этди Бурҳонов.— Ҳар бир одамнинг ўз калласи бўлиши керак. Сиз шу жарликни чопинг депсиз, билиб чопсин-да. Агардарилгин, дебсизми унга. Ўзи ўйлаши керак. Албатта яхши иш бўлмади. Беш-олти йил энди докладдан докладга кўчиб юрамиз. Сиз ҳам, район ҳам. Ҳечқиси йўқ. Им бўлган жойда, ташвиш ҳам бўлади.

Султонов шу ёққа келар экан, кўнгли таскин топадиган гапларни эшитишини биларди. Шунинг учун у ҳозиро курсанд бўлди ва айни пайтда дилидан ўкинч билан: «Нега энди Бурҳоновнинг ўзини биринчи қилишмади?»— деган гап ўтди.

Чин кўнгилдан у шундай бўлишини истаган ва конференцияни орзиқиб кутган эди. Сайлор маҳалида икки киши Усмоновга қарши овоз берди. Биттаси у эди. Иккинчи одам ким экан? Султонов беихтиёр Бурҳоновга қараб қўйди. У анчайин ҳорғин, қовоқлари шишган, ўзини бирмунча олдириб қўйгандек кўриниб кетди кўзига. «Бунинг ҳам дарди кучли.—Хаёлидан ўтказди Султонов.—Эзилмасинми? Ҳамма уни яқинда биринчи бўлади деб юрган эди. Нимада хато қилиб қўйди экан? Ишнинг кўзини билади. Гапга уста. Билими ҳам жойида. Нимада хато қилди экан? Кимга ёқмади экан?» Шу жавоб топиши қийин бўлган саволлар хаёлидан ўтар экан, Бурҳоновга нисбатан меҳри товланиб кетди, нима биландир унинг кўнглини кўтармоқчи бўлди ва эсига шофёри топиб келган гап келди.

— Миш-мишларни эшитдингизми?—деди дўпписини қўлига олиб.

— Йўқ, қандай миш-миш?

Султонов хонада ҳеч ким йўқлигини билса ҳам, атрофига қараб қўйди.

— Янгимиз шўхроққа ўхшайди.

— Ҳа?—гап ким ҳақида кетаётганини тушунди Бурҳонов.

— Меҳмонхонага ёш-ёш қизлар серқатнов бўлиб қолишиганиш.

— Йўғ-э?—ҳайрон бўлди Бурҳонов.

— Рост. Бугун биттаси куппа-кундузи райкомнинг машинасида келибди. Кўлида чемодан. Бир алламбалоси эмиш.

Бурҳонов кулиб юборди.

— Бу гапни менга айтдингиз, бошқа бирорвга айта кўрманг.

— Эсимни ебманми!—саддалик билан уни тушумай деди Султонов.

— Ўша чемодани билан куппа-кундузи кириб келган қиз «Шарқ юлдузи»нинг агрономи. Ўртоқ Усмонов

йўлда кўриб қолиб, машиналарида олиб келибдилар.

— Йўғ-э?

— Омон бўлинг,— деди Бурҳонов киноя билан.— Сотиволди ака билан уришиб қолиб шаҳарга кетаётган экан. Шофёргизга ким айтибди?

— Бир таниши.

— Товба! Одамлар ҳам қизиқ,— куйиниб гапирди Бурҳонов.— Чолни кўрса бувам дейишавераркан-да!..

— Мен ҳам ҳайрон бўлдим,— деди Султонов хатосини тузатишга интилиб.— Бир кун ишламасдан...

— Усмонов ундей одам эмас!— чўрт кесди уни Бурҳонов.— Шофёргизни уришиб қўйинг, бундай туҳмат гапларни тарқатмасин.

Султонов бошини эгди. Лекин Бурҳоновни «мишмиш» ўйлантириб қўйганини сезди, нимадан сезди, билмайди. Лекин аниқ сезди ва миасидан ялт этиб, иккинчи ўзи, деган фикр ўтди. Нега бу қарорга келди — бўни ҳам билмайди. Бурҳоновнинг башарасидаги ҳар бир чизик унга таниш бўлганидан, нимадир уни шу қарорга, шундай ўйга олиб келган эди. Ҳа, Усмоновга қарши овоз берган иккинчи одам ҳеч шубҳасиз у эди. Лекин нега атиги иккалолвари қарши бўлишди? Бурҳоновни очиқ-ойдин истаганлар кўп эди. Масалан, Сотиволди ака Мұхаммаджонов, водхоз... Озмиди, Бурҳоновнинг атрофида гирдикапалак бўлиб юрганлар!..

— Усмонов яхши одамдир,— анчадан сўнг яна гап бошлади Султонов.— Ёмон бўлса юборишармиди?! Лекин... Сиз бўлганингиз яхши эди. Районни беш панжандиздек биласиз, одамларни ҳам...

Бурҳонов индамади.

— Аммо сайлов дуруст ўтди,— гапида давом этди Султонов.— Сизга юз поиз, Алиевга юз поиз овоз. Усмоновга атиги иккита қарши. Яхши ўтди сайлов. Умуман, конференция яхши ўтди. Искандар Фойивович хурсанд бўлиб кетдилар назаримда.

— Бизда конференциялар ўзи яхши ўтади,— деди Бурҳонов ўйчан кўзларини қоронғи деразага қадаб.— Фақат мен унга қарши овоз берганларга тушунмайман. Нима фойда ортиришади? Иккита овоз нимани ҳал қи-ларди? Жиндак кайфни бузади, холос. Одамнинг қан-дайлигини иш кўрсатади. Бир кун ҳам ишламаган одамга қарши овоз берниш — бемаънилик.

Султонов Бурҳоновнинг пухта одамлигини яхши биларди. Аммо бунчалик эҳтиёткорлигини энди кўриши эди. Шунинг учун нима дейишими билмай, соатига қаради. Вақт алламаҳал бўлиб қолган эди. У ўрнидан турди.

— Борай энди.

Бурҳонов қаршилик қилмади. Султоновнинг келиши унинг бузуқ кайфини баттар бузиб юборган эди. Ҳаммаси конференциядан бошланди. Бу мажлисга у катта умил боғлаган, уни орзиқиб кутган эди. Аммо у ўйлаганча бўлиб чиқмади. Райкомнинг олти йиллик иккинчи секретари иккинчилигича қолди. Икки кундан бери уни иккиси нарса қийнаб келарди. Биринчиси — нега у ўз жойида қолди, тўғрироғи, уни ўз жойида қолдиришди? «Юқори-ларда» унинг номзоди муҳокама қилинган ва унинг эши-тишича, маъқулланган эди. Нега бирдан бундай ўзгариш юз берди? Искандар Фойибовичнинг Усмоновни районга олиб келгани, Носир Пўлатовникида бўлишгани, кейин усиз беш-олтнга хўжаликни айланишганини эшитганида юраги бир «шув» этиб кетган эди. Лекин мулоҳаза қилиб, ўзини тинчитган эди. Икки йилча ишлаган инструкторга бутун бир районни топшириш камдан-кам бўладиган во-кеа эди. Одатда бундай одамлар районга юорилади-ю, лекин биринчи қилиб эмас. Унинг хаёлига Алиев келди. Носир Пўлатов билан биргаликда ўзи уни мактаб директорлигидан идеология секретарлигига ўтган конференцияда кўтаришган эди. Еш, сергайрат, бунинг устига адабиётчи. Районнинг маданий-оқартув, сиёсий ишларини яхши йўлга қўйниб юборади, деб ўйлашган эди. Алиев иш-

та астөйдил киришди. Биринчи йили анча-мунча ишлар қилди: бадиий ҳаваскорликни йўлга қўйди, сиёсий ўқув тартибга тушди, қишлоқлардаги кинотеатрлар тузук ишлай бошлади. Пўлатов бўшагач, унинг ишидан ҳам птур кетди. Бурҳонов шуни ўйлади. Обком ҳойнаҳой Усмоновни шу ўринга мўлжаллаётган бўлса керак, деб тахмим қилди. Райижроком раиси Содиқов ҳам дилидан ўтди. Кейинги пайтларда у анча касалманд бўлиб қолган эди. Обком албатта буни билади. Балки шунинг ўрнигадир?— мулоҳаза қилди Бурҳонов ва конференциягача дилининг бир чети ғаш бўлса ҳам, бепарвороқ юрди. Конференция ва актив йиғилиши унинг руҳини тушириб юборди. Нега уни жойида қолдириши? Нима хато қилиб қўйди? Уни икки кундан бери қийнаб келаётган иккинчи нарса ана шу эди. Хатоси нимада? Аммо у қанча ўйламасин, ўйнинг тагига етолмади. Носир Пўлатович кетганидан берм ўтган саккиз ой ичидаги район барча масалада, у ўйлаган масалаларда, юқори идораларни қийнаб қўйгани йўқ. Пахта дуруст бўлди. План ҳам, мажбурият ҳам бажарилиди. Чорвачилик ривожланса ривожландики, орқага кетгани йўқ. Қурилиш ёмон эмас, қурилишларнинг даражаси, сонини ҳисобга олганда, бошқа районлардан қолишмайди. Албатта, камчиликлар йўқ эмас, аммо уларнинг кўпчилиги илгаридан давом этиб келаётган кўп йиллик камчиликлар, Бурҳоновнинг бевосита уларга алоқаси йўқ. Алоқаси бор, лекин шахсан жавобгар эмае. У қайта-қайта саккиз ой ичидаги обком ва шахсан Гойибов берган топшириқларни эслаб чиқди. Ҳаммаси бажарилган эди уларнинг. Нимада хато қилди? Нимали эплолмади? У шундай ўйлар экан, Гойибовдан, обком аппаратидагилардан ранжиди. «Ана одамнинг қадри,— ўксинди у.— Елкангнинг яғири чиққунча тиним билмай ишласанг, уйни, дамни билмасанг-да, сени кўришмаса!.. Сен билан ҳисоблашишмаса!.. Кечагина бурнини тортиб юрган болани тепангта қўйинб қўйишса?!.»

У Усмоновни биринчи кўрнишидаёқ ёқтирмай қолгай

эди. Келишган, қора кўз, қора қош, ёш бўлишига қарамай, соchlарига оқ оралаб, бусиз ҳам жиддий қиёфасига жиддийлик, савлат бағишилаган Усмонов унга ёшлигини эслатган эди. У ҳам йигирма йил бурун худди шундай, қора қош, қора кўз, чакка соchlарига жиндек оқ тушган, келишган йигит эди. Олий партия мактабини битириб келиб, обкомда бирданига бўлим бошлиғи бўлиб ишлай бошлади. Йил ўтмай, уни Шодлик районига юбориши. Иккинчи қилиб. Яхши ишлади. Эл оғзига тушди. Ўщанда у биринчи бўлиб ишлашни хаёлига ҳам келтиргани йўқ эди. Бу орзу кейинчалик пайдо бўлди. Бирдан, кутилмаганда пайдо бўлди. Пайдо бўлди-ю, руҳини кўтармади. У ҳали ёшлигини, вақти келиб албатта уни бирон районга биринчи секретарь қилиб юборишларини биларди. Ҳар ҳолда шундай бўлишига ишонарди. Йиллар ўтди. Уни бир қанча районларга юбориши. Аммо иккинчи секретарликдан кўтарилимади. Уни унтушишмаган эди, уни билишарди, ҳатто у ўйлагандан ҳам яхши билишарди. Узоқ йиллар ўрганишган эди. Унинг савиясини ҳам, билимини ҳам, имкониятларини ҳам. Шунинг учун унга тегишимасди, мустақиллик беришни лозим топишмасди. Охирги марта, Усмонов номзодида тўхталишдан олдин обком раҳбарлари бу масалага қайтишган, чуқур ва узоқ мулоҳазадан сўнг, кўпчилик уни рад этган эди. Бундан у албатта бехабар эди. У ўзидан жиддий бир хато тополмай, яна Усмоновга қайтди. Унга ра什ки келди. Уни, гарчи ўз ихтиёри билан бўлмаса ҳам тайёрга айёрликда айблади ва беихтиёр Султонов айтган «миш-миш» эсига тушди. Султонов ҳақ эди. «Миш-миш» уни қизиқтириб қўйган эди. Узоқ йиллик тажрибадан у бир нарсани яхши биларди. Раҳбар одам, айниқса, партия ходими ўз ишида камчиликларга йўл қўйиши мумкин, бу камчиликлар, хатолар кечирилар ҳам. Аммо уч нарсада уни ҳеч ким аямасди, кечирмасди. Биринчиси ичкилик, иккинчиси порахўрлик, учинчиси хотинбозлик... Усмонов ҳали иш бошлама-сидан шулардан бирига — қиёфасига мос келадиганига

ишониш мумкин бўладиганига илинган эди. Миш-миш керакли йўлга солинса, у анчагина ташвиш тортиши мумкин эди.

Миясига ялт этиб келган фикрдан равшан тортиб, Бурҳонов ёзув столи ёнига ўтириди-да, қўлига доим ишлатадиган қизил сиёҳли авторучкасини олди. Аммо айниди, ручкасини қўйиб, қора қалам олди. Шу пайт ташқарида хўроz қичқирди. Бурҳонов деразадан қаради. Ҳали тун, дераза қора духоба тортилгандек қоронги эди. Хўроz яна қичқирди. Бу гал бўғилиб, узоқ қичқирди.

— Ҳали эрта... — деди ўзича Бурҳонов. — Ҳали эрта!..

У шундай деб қўлидаги қаламни оппоқ қоғоз устига шарақ этиб ташлади.

VII

Усмонов меҳмонхонадан чиқаётганда эшик олдида ўтирган қоровул чолдан бошқа ҳеч ким йўқ, ҳали барвақт эди. Осмон тиниқ, бир парча булут ҳам кўринмасди. Асфальт қўчани тарақлатиб, тойбеда ортган икки отли арава ўтиб кетди. Усмонов муздек ҳаводан шимириб, рајком томон йўл олди. Унинг бугунги ишлари ҳам деярли кўзда тутилмаган ишлар эди. Лекин у барп бир план тузиб олади ва уни бажаришга ҳаракат қиласди. Биринчи қиладиган иши — агроном қизни колхозга қайтариш эди. Ўзи олиб боради уни. Баҳонада колхоз билан танишади. Энди унинг ҳаёти шундай — бир иш иккинчисига уланиб кетаверади, бир ишдан иккинчиси чиқаверади. Муҳими, Искандар Фойибович айтганидек, зарурни ажратиб олиш ва иложи борича одамларнинг ўзига мустақиллик бериш.

Райком биноси олдида кимdir чордана қуриб ўтираради. Афтидан анча бўлган шекилли келганига, телпагининг қулоқларини тушириб, әнгагидан боғлаб олган, иккала қўли қора чопонининг енгларига суқуғлиқ. Қалин

чиинор шохлари орасидан тусиб турган қуёш нурларидан зинада алланарсалар ярақлаб турарди. Ўсмонов ҳайрон бўлиб, райком биносига яқинлашганда, бу ялтироқ нарсалар турли-туман тақинчоқлар эканини кўрди. Чордана қуриб ўтирган одам эса кекса чол эди.

— Ассалому алайкум, ота.

Чол эринибгина бошини қимирлатди, лекин унга қарамади.

— Булар нима, ота?

— Кўриб турибсан-ку, ўғлим, сўраб нима қиласан?— пўнгиллади чол.

— Сотиладими?— Усмонов бутун диққати тақинчоқларда бўлгани учун чоннинг гапларига эътибор бермади.

Тақинчоқлар чиндан ҳам антиқа эди. Қўнғиз, ўргимчак нусха тўғнағичлар, капалак сурат тилларанг тароқ, оқ, қизил, зангори кўзли турли шакллардаги узуклар, думини найза қилиб, заҳрини сочишга тайёр турган илон билагузук ва Усмонов кўрмаган, билмаган кумуш, жез, тилларанг аллақандай буюмлар...

— Сотиладими, деяпман,— Усмонов илон билагузукни қўлига олиб кўраркан, қайтадан сўради.

— Сотгани бозор бор, ука,— пўнгиллади яна чол.

— Бор, ўйлингдан қолма. Мани ишим бор.

— Менга айтинг, балки ёрдамим тегар?— деди Усмонов ҳамон билагузукдан кўзини узолмай.

Чол унга ўгирилди-да, оёғидан бошигача синчиклаб қараб чиқди.

— Тузукми?

— Тузук бўлганда қандай! Жуда чиройли!— деди Усмонов кўзлари чақнаб. Тақинчоқлар унга қадим ўтмишини, Далварзин тепа археологик қазилмаларини эслатган эди.— Қимники булар? Қаердан топдингиз?

— Топдингиз?— ҳайрон бўлди чол.— Ўзимники! Ўзим ясаганман ҳаммасини.

— Заргармисиз?— сўради Усмонов.

— Заргарман. Отамам заргар бўлган. Отамми отаси-
ям. Отамам, бувамам бирёғи Қарши, бирёғи Туркистонга
донги кистган усталар эди. Дардисари ман чиқдим. Бур-
ҳононни кутиб ўтирибман...

— Нега?

Чол ёш йигитлардек сапчиб ўрнидан турди.

— Испикулонмишман! Эшитдингми, испикулон! **Ман**,
Мамашариф заргар қариганимда испикулон бўб қолиб-
ман! Обихис келиб уйимни печатлаб кетди кеча. **Мөл-**
мулкимни мусодара қилиб, ўзимни райондан ҳайдашар-
миш. Бурҳонов шунаقا буйруқ бериди. Ҳов, ука! **Ҳали**
мани ҳайдайдиган туғилгани йўқ. Мани Бурҳонов, оби-
хис билмаса, Маскоп билади. **Мана!**

Чол қўйнидан юпқа бир тугунни олиб, қалтироқ **қўл**-
лари билан уни ечди. Қандайдир титилиб кетган **хатлар**,
машинкада ёзилган қофозлар орасидан эски бир газета
парчасини олиб, Усмоновга узатди.

— **Ўқи!** Маскопдан кеп-кетган эди бир аёл. Уша ёэ-
ган. Кейин ўз қўли билан манга юборган!..

Газета парчаси «Советская культура»нинг кичкина
бир устуни эди. «Народный умелец» деб сарлавҳа қўйил-
ган хабарда халқ ичидан чиқсан моҳир заргар **Мамаша-**
риф ота Қодиров ясаган зеб-зийнат асбоблари мақтал-
ган, бу асбоблар ҳар қандай санъат музейини безаши
мумкинлиги айтилган эди.

— Тошканддаям билишади мани. Тамарахонумни
эшитганмисан? Уша ўзи келиб тиллақош ясаттириб кетди.
Тиливизорда ўйнади ўшани тақиб. Шундоғ одамлага **ке-**
райман-у, ўзим туғилиб ўсган Бодомсоғга керай бўмай
қолдимми энди?

— Тинчланинг, ота,— юпатди уни Усмонов.— Сизни
ҳеч ким ҳайдамайди. Қани, юринг.

— Қаёқقا? Ман Бурҳоновни кўрмасам бўмайди.

— Кўрасиз. Ҳозир келади ў киши. Йиғиштиринг нар-
саларингизни.

Усмонов шундай деб, тақинчоқларни ўзи ўрай бошла-

ди. У ниҳоятда катта бойлик ва баҳосиз санъат устидан чиқиб қолганидан хурсанд эди. Агар шароит яратиб берилса, бу қўли гул одам ажойиб ишлар қилиши мумкин.

— Шогирдлардан борми? — сўради Усмонов кабинетига кўтарилишар экан.

— Бор. Қамириим! — чоннинг овозида дард эшитилди. — Шогирд дейсан, мани ўзимни йўқ қилишмоқчи-ку, шогирд қайдай?! Қани энди шогирд бўлса! Мани неччи кунлигим қолди — худо билади. Ўзимминан кўмилиб кетадиганга ўхшайди ҳунарим. Бир неча марта ижроқумга бордим, райсабизга бордим.

— Сабезга нега бордингиз?

— Қаёқقا борай? Мелисагами?! — яна зарда билан гапириди чол. — Содиқов, ота, ман бунақа нарсаларни тушунмайман, ўртоқ Бурҳоновга бир учранг, деди охирги марта. Хўп дедим. Уч-тўрт қатнаб тутдим. Тутдим-у, балога қолдим. Мани индамай эшитиб, тилпон қилди. Бу қандоғ гап, деди. Районда, шундай биқинизда тиллафуруш чиқиб қопди, билмайсиз, деди. Тилпонни қўйиб, боринг деди, сизминан шуғулланишади, деди. Кетдим, ҳа энди, бир гап бўларкан деб. Эртасига билсам, милисага тилпон қилганакан Бурҳонов. Уйни ағдар-тўнтар қилиб юборишди. Ҳой-ҳой деганимизча қолавердик чол-кампир. Бор темир-терсакларни олиб кетишиди тиллами деб. Тилла бўлса нима қипти? Тилладанам кўп нарсала ясайман. Тамарахонимга ўз тилласидан шунақанги зирақ ясаб берганманки, ҳалиги Маскоплик аёл кўриб, қойил қолиб кетти. Тамарахонумам хурсанд бўлди. Юз сўм ошиқча бериб кетди. Қампиримгаям, ўзимгаям махси-калиш қилиб олдим. Мана, ҳалиям кийиб юрибман. Ҳали обкелиб беришмади ўша темир-терсаклани. Ичida яхши туморла, тиллақошла бор эди қизла тақадиган. Конписк... конпискаса қилишармиш. Сенлани ўзийни шунақа қиласман дедим.

Усмонов кабинетига кириб Содиқовнинг телефонини терди.

— Қудрат Саидович? Салом. Усмоновман. Сиз заргар қария Мамашариф ота Қодирөв иши билаң танишмисиз? Спекулянт? Текширилганми? Сиздан илтимос. Бобойга тегилмасин. Уйда устахонасини печатлаб кетишибди. Очдириб беринг. Лаббай? Қозим Бурҳонович? У киши билан ўзим гаплашаман. Англашилмовчилик бўлибди. Ўз ҳолига солиб қўйилса, албатта савдогарчилик қиласида. Яшаш керак-ку?! Мамашариф ота ҳозир олдингизга борадилар. Хўп. Кейин нима қилиш кераклигини ўйлаб кўрамиз. Ҳа, айтгандай... баъзи нарсаларини олиб кетишган экан. Қайтариб беришсин. Жавобгарлигини мен бўйнимга оламан. Қелишдик.

— Ўғлим, кимсан... кимсиз? — кўзлари ёшланиб сўради чол.

— Шу ерда ишлайман,— Усмонов отага жилмайиб қаради.— Сиздан илтимос, ота. Шогирд топинг. Биттамас. Бешта, ўнта. Ҳунарингизни ёшлар ҳам ўргансин.

— Топаман! Шунақангি шогирдла тайёрлайки, манданам ўтиб кетишин!

Чол ўзида ийӯқ хурсанд эди.

— Ҳозир ижроқумга боринг. Ўртоқ Содиковга киринг.

— Ҳўп бўлади, ўғлим. Умрингиздан барака топинг!

— Хайр, ота.

Чол шошиб эшикка йўл олди. Аммо кабинетдан чиқаётib, тўхтади.

— Ўғлим!. Бу Бурҳонов кейин тўполон қилмасмикан?

— У кишига ўзим айтиб қўяман. Тинч ишлайверинг.

Чол яна бир бор қуллуқ қилиб чиқиб кетди.

Коридорда оёқ товушлари, йўтал, кулги эшитилди. Райкомда иш куни бошланган эди. Биринчи бўлиб, кабинетга Малоҳат кирди.

— Салом, Дамир Усмонович! Чой қилиб берайми?

Усмонов ҳеч нарса тотинмаган эди. Шунинг учун сезгир қизнинг таклифига рози бўлди.

— Кейин мени «Шарқ юлдузи» билан уланг,

— Ҳўп бўлади.

Малоҳат чиқиб кетаётганида, Усмонов уни тўхтатди.

— Малоҳатхон. Ўртоқларга айтинг. Ҳар куни эрталаб менга об-ҳаво маълумоти билан район газетасини беришсин. «Олғазми?

— Ҳа.— Малоҳат қизариб бошини эгди.— Об-ҳаво маълумоти вақтида келади. Ўзим олиб кириб бераман. Лекин... газета ҳар доим ҳам эрталаб чиқмайди. Баъзан тушга яқин чиқади. Бугун ҳам кеч чиқса керак.

— Нега?— ҳайрон бўлди Усмонов.

— Козим Бурҳонович вақтлари бўлмай, жуда кеч кўриб бердилар материалларни.

— Козим Бурҳонович газета материалларини кўриб чиқадиларми?— баттар ҳайрон бўлди Усмонов.

— Ҳа. Ҳар доим. Кўриб, қўл қўйиб берадилар. Шундан кейин типографияга элтиб беришади. Баҳордан... Март ойидан бери шунаقا.

— Нега?

— Саккизинчи март сонида катта сиёсий хато кетиб қолган газетада.

— Қандай хато?

Малоҳат ентил йўталиб олди-да, худди ёддан шеър ўқигандек, овозини баланд қилиб гапира кетди:

— Халқаро хотин-қизлар байрами куни «Олға» газетаси ўзининг сиёсий кўрлигини кўрсатиб, район хотин-қизларининг фидокорона меҳнатлари билан жаҳон хотин-қизлари ҳаракатига қўшаётган ҳиссалари ҳақида ажойиб, жонли лавҳалар, очерклар, хабарлар бериш ўрнига айрим хотин-қизларни танқид қилиб, фельетон босган. Фельетон муҳокама қилиниб, нотўғри топилди. Унинг автори, газета редакторига нисбатан жиддий чоралар кўрилди.

«Райкомнинг қароридан бўлса керак бу гаплар»— фарз қилди Усмонов секретарь қизни эшиштаркан.

— Ўзингиз ўқиганмисиз ўша фельетонни?

— Бўлмасам-чи! Жуда яхши фельетон эди!— Малоҳат «вой» деб оғзини қўллари билан беркитди.

Усмонов кулиб юборди.

— Хўш, нимаси яхши, нима ҳақда? Гапираверинг, қўрқманг.

— Кечирасиз, Дамир Усмонович, мен... фельетоннинг таддими айтувдим яхши деб. Материалнинг ўзинимас.

— Мен ҳам шундай тушундим,— уни тинчиди Усмонов.— Хўш, гапиринг.

— Фельетон катта, бир бет эди. Ясан-тусанга берилган, ҳеч қаерда ишламайдиган хотинлар танқид қилинган эди унда.

— Райондаги хотин-қизаларми?

— Ҳа, ҳаммаси тағин фамилияси билан. Кўпроқ-раҳбарларнинг хотинлари.., қизлари... Вой, ўшанда росајам тўполон бўлиб кетди, Дамир Усмонович. Ҳамма газета қидирган!.. Газета йўқ!. Бир соатда тарқалиб кетган газета. Қозим Бурҳоновичнинг шунақанги жаҳллари чиқди, шунақанги хафа бўлдилар!. Уша куниёқ бюро чақириб, редакторни бўшатиб юбормоқчи эдилар, йўқ, стро-гий виговор билан қолдиришиди.

— Ким ёзган фельетонни?

— Газета ходими. Щеърлар, ҳикоялар ҳам ёзиб юради. Мирҳайдар Барат. Ёш ҳали. Заочний ўқийди Тошкентдаги пединститутда. Жудаям билагон йигит. Бюроға уни ҳам чақиришиди. Бу ёқса чиқиб, бари бир тўғри ёзганман, дейди. Ушандан бери биттаям фельетон чиққани йўқ газетада. Мен бораверайми?

— Боринг.

Усмонов ўйланиб қолди. Муслим аканинг газета ҳақидаги гаплари эсига тушди. «Шуғулланиш керак экан,— деб дилидан ўтказди у.— Зудлик билан, шу кунлардаёқ, Райкомнинг эса газетанинг ҳар бир материали билан танишиб чиқиншини бекор қилиш керак. Акс ҳолда редакциянинг нима ҳожати бор? Райком газета тематик плани билан танишиши, бюро тасдиғидан ўтказиб, унинг бажарилишини текшириб бориши керак. Баъзи бош мақолаларни кўриб бериш мумкин, ҳамма материалларни эмас».

У Бурҳоновнинг қаттиққўл, сержаҳл одамлигини эшитган эди. Искандар Ғойибович билан Носир Пўлатов ҳам буни айтишган, уни огоҳлантиришган эди. Носир Пўлатов унинг Бодомсойга келишини билмаса ҳам, обком инструктори сифатида Бурҳонов характерига оид нарсаларни билиб қўйганингиз яхши, деган эди. Бу одам билан разведкага бориш хавфли, мен бормас эдим, деди ҳазил аралаш. «Наҳотки ишлашолмасак?— ўйлади Усмонов.— Дастребаки кунларданоқ иккита масалада тўқнаш келяпмиз. Кейин нима бўлар экан?»

Телефон жиринглади. Трубкадан Сотиволди Полвоннинг овози эштилди.

— Саломалайкум, ўртоқ Усмонов. Эшитаман.

Усмоновга машҳур колхоз раиси, Социалистик Мехнат Қаҳрамони, кекса пахтакорнинг овози дағалроқ, соvuқроқ туюлди. Гап нимадалигини у фаҳмлади. Шунинг учун иложи борича юмшоқ, унинг обрўйини ўрнига қўйиб, гаплашишга қарор қилди.

— Қалайсиз, Сотиволди ака? Табриклайман, шудгорни тугатибсиз!.

— Раҳмат.

— Бир сизни кўрмоқчи эдим. Аммо кеча имконият бўлмади. Борсам, ҳалал бермайманми бугун?

— Бемалол. Қачон?

Усмонов соатига қаради.

— Бир соатдан кейин.

— Бўпти. Кутаман.

Сотиволди ака трубкани қўйди. Ҳа, бу одамлар билан ишлаш осон эмас эди. Улар айтганларини қилишга ўрганиб қолишган. Усмонов қисқа вақт ичиде Бодомсойда «кўп йиллик раҳбарлар», «машҳур»ларнинг ҳақ-хуқуқи баланд, алоҳида бир тоифадек эканликларини сезди. Зеҳнили одамга ҳатто партконференцияда буни пайқаш қийин эмас эди. Улар доим бирга әдилар, бирга овқатланишарди, бирга дам олишарди, ҳатто президиумда ҳам ёима-ён ўтиришарди. Ҳеч шубҳасиз, Қозим Бурҳонони

вич улар билан бирга эди. Қолганлар, ўрта колхозлар, деярли ҳамма совхозларнинг раҳбарлари алоҳида эдилар. Ёшлар айниқса четда эди. Улар ўзларини худди бөгонадек ҳис қилишар, иложи борича тезроқ ўз уйларига кетишга ошиқардилар. Икромов номидаги совхознинг директори ёши Усмоновга тенг келадиган қорачадан қолган йигит Жўра Муқимов эса конференция давомида соатидан кўз узмади. Конференция тугаши билан эшикка отилди. Йскандар Фойибович уни чақирмаганда, ўша заҳотиёқ совхозига жўнаб қолиши турган гап эди. Усмонов у ҳақда эшитган эди. Институтни тамомлаб, Бодомсойга келганда, уни шу совхозга агроном қилиб жўнатишган. Йил ўтмай, ўзи бир қолоқ бригадани сўраб олган. Қисқа вақт ичидаги номи бутун областга тарқалди. Қирқ беш центнергача кўтарди ҳосилдорликни ўз бригадасида. Но-сири Пўлатов унинг ёшлиги, истиқболи борлигини назарда тутиб, райкомга инструктор қилиб олди. Икки йилча ишлади райкомда. Яхши ишлади, лекин Пўлатовнинг зўри билан ишлади. Иложи борича идорада ўтирас, бирон баҳона топиб далага жўнар, ҳафталаబ олис колхозларда, бригадаларда қолиб кетарди. Лекин қаерга бормасин, ўзидан бир яхши из қолдириб қайтарди. Пўлатов уни бўлим бошлиғи қилмоқчи, кейинчалик секретарликка ҳам тавсия этмоқчи эди. Оёғини тираб туриб олди. Истаган колхоз ё совхозларнинг жўнатинглар, менинг жойим ўша ёқда, деди. Ўша кезлари Икромов номидаги совхоз директори кандидатлик диссертациясини ёқлаб, илмий ишга ўтиб кетиш ниятида юрган эди. Пўлатов унга рухсат бермаётган эди. Министрлик аралашгач, Пўлатов кўнди ва директорликка Жўра Муқимовни тавсия этди. Уч йилдан бери Муқимов совхозга раҳбарлик қилиб келарди. Аммо номи чиқмасди. Илгари газеталар саҳифаларидан тушмайдиган совхоз анча жимиб қолган эди. Ҳамма кўрсаткичлар бўйича планни бажарар, лекин катта бир силжиш йўқ эди. Унинг баъзи бир ишларни ҳақида ғалати гаплар ҳам юради.

Шуларниг ҳаммасидан хабардор бўлган Искандар Ғойибович у билан гаплашишни юрагига тугиб қўйган, конференция тугаши билан эшикка отилганини кўриб, озгина ранжиган ҳам эди.

— Ҳа, мунча шошилмасанг уйга?— сўради уни қўлтиғидан олиб.

Муқимов уялинқираб жилмайди:

— Ўйгамас, фермага боришим керак эди.

Искандар Ғойибович «фермага» дейиши билан унинг ҳақида юрган ғалати гаплардан бирини эслади.

— Ҳар қаердан от сотиб олаётган эмишсан, нима, совхозни ўзгартирмоқчимисан? Одамларингни Ростовда кўришибди. От чоптириб юришганмиш кўчада.

— Ўзбекларам эски чавандоз. От минишса ёмонми? Тағин яхши отларни, қорабайир, будённий, ахалтекинларни?..— ҳазиллашди Муқимов.

— Шунинг учун ҳам от сотиб оляпман дегин ҳар қаёқдан? Қанчага борди ҳозир?

— Кўп эмас. Унта бўлди. Лекин бутун республикага мақтанса бўладиган отлар!

— Бу яхши. Ниятинг нима? Тушунтири.

— Хўп. Республикада бир қанча от спорти мактаблари бор. Областдаям битта бор. Шундайми?

— Хўш?

— Киностудия, телестудиялар бор. Шундайми?

Искандар Ғойибович ҳа, деб бошини қимирлатди, лекин Муқимовнинг гапини нимага олиб келаётганини англамади. Студияларни, спорт мактабларини совхозга нима алоқаси бор?

— Биттаям кино йўқки, унда от қатнашмасин. Жуда бўлмаса босмачиларнинг тагида от бўлади. Босмачилар қатнашмаган кино, ўзингиз биласиз, деярли йўқ. Ҳар йили камида шунаقا битта фильм чиқади. Шундайми?

— Хўш? Буни сенга нима алоқаси бор?

— Бевосита алоқаси бор,— ишонч билан жавоб қилди Муқимов.— Шу киноларнинг ҳаммасига, спорт мак-

табларига яхши отлар керак. Яхни отлар кам. Етишмайди. Мен етиштириб бермоқчиман. Ҳисоблаб чиқдик, уңилда бутун харажатлар ўзини оқлаб, тенг баравар фойда келтирап экан. Яна бир ниятим бор. Қимизчилик фирмаси тузмоқчиман. Бутун районга, областгаям қимиз етиштириб берамиз. Буям фойда. Тўғри эмасми?

Искандар Фойибович жавоб бермади. У ўйланиб қолгағ эди. Қани энди ҳамма хўжалик раҳбарлари ана шундай ташаббус билан ишлашса?! Пулни пулга чақишиш Осмондаги юлдузни уриб туширишмасин, оёқларини ўлчаб босишса, бўлди. Шунинг ўзида ҳам миллион-миллион ҳалқ пули тежаларди.

— Райком биладим?— сўради Искандар Фойибович.

— Райком... Ўртоқ Бурҳонов фақат планли ишларни ёқтирадилар...— Муқимовнинг овозида ўкинч бор эди.— Энди қайдам?.. Янги секретарь...

Муқимов гапини давом эттирамади. Искандар Фойибович хайрлашгани қўл чўзар экан, унга маслаҳат берди:

— Усмоновга айтиб бер. Мен билан гаплашганингни ҳам.

Муқимов миннатдор оҳангда хайрлашди. Искандар Фойибович Усмоновга шу сухбатни гапириб берган, Муқимовга ўҳшаганларни рағбатлантиришни айтган эди. Усмонов энг аввало шуларга таяниши, шулар орқали режаларини амалга ошириши маъқул эди. Ўзини «тутиб» олгач, баъзи ишларни йўлга қўйгач, «машҳур»лар ҳам унга қўшилишлари турган гап. Биттасини тўғри йўлга тушириб олса, бўлди, қолганлари албатта унга эргашадилар. Муқимов билан бир учрашиш керак, уни режалари билан танишиш керак. У шуни ўйлаб, ўрнидан турганида, Бурҳонов кириб келди.

— Кетаётганимидингиз?— у Усмоновга қўл бериб, сўради.

— «Шарқ юлдузи»га бориб келмоқчиман,— Усмонов жойига ўтириб, рўпарасидаги креслони кўрсатди.— Ўтиринг.

Бурҳонов ўтиарар экан, истеҳзо билан қулди.

— Агроном қиз шикоят қилдими?

Усмонов ялт этиб унга қаради. «Бу одам бехабар иш бўйқа ўхшайди районда,— хаёлидан ўтди яшин тезлигига.— Балки раис айтгандир?» Аммо сўрашни лозим топмади.

— Ҳа. Яраштириб қўймоқчиман. Анча билимдон агрономга ўхшайди. Бунақалар районда қанча кўп бўлса, шунча яхши.

— Тўғри,— қўшилди унга Бурҳонов.— Ўтган йили шу масалада Госплантга мурожаат қилган эдик. Агрономлар ҳам керак, зоотехниклар ҳам. Қурувчилар етишмайди. Инженерлар. Лекин...— Бурҳоновнинг буғдойранг, текис юзи ташвишли тус олди.— Мени тўғри тушунинг, бекор қиляпсиз шу ишни...

— Нега?

— Сотиволди ака ўз сўзидан қайтадиган одам эмас. Уялиб қолишингизни истамасдим.

Усмонов иккиланиб қолди. Чиндан ҳам шундай бўлса-чи? Дарров гап тарқайди районда: «Янги секретарь сўзини ўтказолмабди!» Хўш, нима бўпти тарқаса? Ишда нималар бўлмайди! Кейин, чумчуқдан қўрқкан одам тариқ экмайди.

— Майли,— деди Усмонов шу фикрга келиб.— Борайчи. Агар раис ҳақ бўлса, агрономга бошқа бир иш топиб берармиз. Сиздан бир илтимос, Козим Бурҳонович...

— Хўш?— Бурҳонов бошини кўтарди.

— «Максим Горький»даги фожия изсиз қолмаслиги керак. Навбатдаги бюргора шуни алоҳида масала қилиб кирилатмиз. Шуни сиз тайёрлассангиз...

— Ҳа, бу фожия яхши бўлмади. Врачлар уни энди яримта бўлиб қолади, дейишяпти.— Бурҳоновнинг юзида яна ташвиш излари пайдо бўлди. У катта бошини лиқиллатиб, столга кўзларини тикди.— Гап-сўз майли-ку, бечоранинг оиласига қийин бўлди. Олти қизи бор экан. Ҳаммаси ёш тағин... Мен Ҳайитбой акага айтдим, ёрдам бе-

риб туради оиласига. У кишининг ўзи ҳам эзилиб юрибди. Мен ҳам шу фикрдаман, Дамир Усмонович. Бюорога қўйиш керак, токи ҳаммага ўрнак бўлсин, ҳамма бир ҳушишер тортиб қўйсин.

— Бу, масаланинг бир томони. Иккинчидан, айбордларни қаттиқ жазолаш керак. Бўлмаса гап гаплигича қолиб кетади.

Бурҳонов бошини кўтарди.

— Билишимча, бу одий баҳтсиз ҳодиса, Дамир Усмонович. Қандай айборлар бўлиши мумкин? Огоҳлантиришимиз мумкин, қандайдир чоралар кўришимиз мумкин, ҳатто зарур. Лекин жазолаб бўлмайди, ҳаққимис ўйқ. Мени тўғри тушунинг...

— Юридик жиҳатдан балки шундайдир,— рози бўлди Усмонов негадир жаҳли чиқаётганини сезиб.— Аммо индамай қўлини қовуштириб турган, гарчи ўша жойни ҳайдаш хавфлилигини билса ҳам! Хўп, бу масалани бюро ҳал қиласди.— Усмонов гап тамом дегандек ўрнидан турди. Бошини орқасига ташлаб индамай чиқиб кетаётган Бурҳонов билан ёнма-ён эшикка етганда тўхтади.— Айтгандек, районимизда ажойиб уста бор экан. Заргар. У билан танишиб қолдим. Қўли гул одам. Унинг нарсалари билан ҳар қандай музей фаҳрланса бўлади. Қудрат Саидовичга айтдим. Ёрдам беради. Сиз кўрганмисиз унинг нарсаларини?..

— Эшитганман. Лекин...

— Бир кўринг!— маслаҳат берди Усмонов чин кўнгилдан.— Қойил қоласиз! Келинойимларга кўрсатинг! Мен ҳам бир нарса олмоқчиман.

Бурҳонов индамай, уни ўтказиб юборди ва қабулхонанинг ўнг томонидаги кабинетига кириб, юмшоқ креслога ўзини оҳиста ташлади. Унинг кайфияти бузилган эди. Усмонов иккала маслаҳатини ҳам инобатга олмади. Биринчисида, албаатта қулоқ солмай, хато қиласди. Полвоновни қайриш осон эмас. «Максим Горький»даги ҳодисада

бўлса, у ҳақ. Айбдор бор. Айбдор очиқ кўриниб турибди. Нега ўзим айтмадим шуни? Унинг айтишини кутдим. Бурҳонов шундай ўйлаб ўзидан ранжиди. уни ранжитган яна бир нарса Усмонов кеча тайинлаган навбатчилик эди. Наҳотки шу арзимаган нарса унинг хәлига келмади? Унинг ўзи ҳам шу навбатчиликни аллақачон жорий қилиши мумкин эди-ку?!

Бурҳонов сигарет олиб чекди. Оғзидан ҳалқа-ҳалқа бўлиб чиқсан кулранг тутунга тикилар экан, яна ўзидан жаҳли чиқди. «Бошланди,— деди ичиди у.— Лекин... бузоқнинг юргургани сомонхонагача. Бурҳонов осонликча бўйин эгадиганлардан эмас!..»

У нимадир эсига тушиб, шахдам ўрнидан турди-да, столини айланниб ўтиб, селектор тугмасини босди:

— Малоҳат, Султоновни топ. Ернинг тагида бўлса ҳам.

VIII

Усмонов зинадан тушар экан, заргар чолни ўйларди. «Пугаченковага кўрсатиш керак унинг нарсаларини,— ўзича қарор қилди у.—Далварzin тепада топилган тақинчоқлардан қолишмайди. Албатта булар янги. Қандайдир ҳозирги давр аломатлари ҳам бор. Лекин бари бир қадимийлик нафаси сезилиб турибди. Афтидан одамлар ҳали билишмайди яхши. Фақат Тамарахонум, Мукаррама Турғунбоевалар тушунишибди. Ҳафизага биронтасини олиш керак. Айниқса, илон сурат билагузукни».

У шундай хаёл билан райком биносидан чиқди. Зинапоя ёнидаги скамейкада агроном қиз билан райком шофёри уни кутиб ўтиришарди.

— Салом,— сўрашди улар билан Усмонов.— Хўш, Холидахон, қалай ётиб турдингиз? Қетдикми?

— Қетдик,— деди уялинқираб Холида.— Дамир Ус-

монөвич, кета мен ортиқча гаплар қиллим. Жаҳл устида... Кечирасиз.

— Ўша гапларни раиенинг ўзига ҳам қайтарасив.

— Вой! Унда колхоздан чинакам кетишимта түғри келади.

Холида кулди. Унинг кулгисида нимадир Ҳафиззани эслатди. Қизғиши ёноқларидаги нўхотдек кулгичларми, ё гилюс пўстлоғидек қорамтири, тўла лабларининг иккала четидаги қылдек ингичка чизиқларми, у англаб ололмади, Ҳафиза ялт этиб, бирров кўрингандек бўлиб кетди. Усмонов сесканиб қўйди-да, машинага йўл олди.

— Кетдик.

Машина қўзғалганда Усмонов ўзига келган, бутун хаёли район ишларига, газетага, ҳозиргина кабинетида Бурҳонов билан бўлган сұхбатга кўчган эди. У бир нарсани Бурҳоновга атайин айтмади. Район газетасининг ахволини. Бурҳонов ўрнатган тартиб, унинг фикрича бутунлай нотўғри эди. Шуни у айтмади. Айтишга у ҳали тайёр эмас эди. Шунинг учун қайтишда албатта редакцияга киришни, Исмоилжон билан маслаҳатлашишни мўлжаллаб қўйди.

Улар катта йўлдан колхоз кўчасига бурилишганда, икки томонда ипга тортилган мунчиқдек текис, бир хилда солинган қизил томли уйлар кўринди.

— Қишлоқ шунақа яқинми йўлга? — беихтиёр сўради Усмонов.

— Бу янги қишлоқ,— деди Холида.— Тўрт-бешта хонадон кўчиди келган, холос. Мен ҳам шу ерда турман. Уйлари бирам яхши! — Холида Усмоновга ўгирилиб, қизқиши билан гапира бошлади. — Ҳаммаси бир хил. Уч уй, бир айвон. Олти сотихдан олдида ери бор. Баҳорда ҳамма уйларнинг олдига чинор экдик бутун колхоз бўлиб. Бир-икки йилдан кейин шунақаям чиройли жой бўлиб кетадики, бу ер!.. Мактаб, клуб... Водопровод ўтган, факат ҳали газ келганича йўқ. Баллонли газ ёқамиз.

— Қанча уй битган ҳозир?

— Қирқтадан ошди. Ширмонсойдагиларнинг ҳаммасини Сотиволди ака шу ёққа кўчирмоқчилар. Ўшанда бутун колхоз яхлит бир жойда бўлади. Қорасув ўз жойида қолади. **Фақат номи ўзгаради.** Иккала қишлоқ қўшилиб, «Шарқ Юлдузи» бўлади...

Усмонов хурсанд бўлиб кетди. Полвоновнинг ишбильармонлигига қойил қолди. «Максим Горький»да ҳам шундай қилиш керак, албатта шундай қилиш керак!— деди дилида у.— Агар шундай планлари бўлмаса, олиб келиб кўрсатиш керак».

Машина уйларга яқинлашди. Фундаментлари баланд, кенг айвонли, қип-қизил пишиқ фиштдан кўтарилган уйлар Усмоновнинг ҳавасини келтириди.

— Тўхтатинг,— илтимос қилди у шофёрдан.— Биттасини кириб кўрайлик.

Шофёр машинани йўлга яқин бир уйнинг олдида тўхтатди. Усмонов қум сепилган ингичка йўлкадан айвонга кўтарилди. Уй бугуноқ кўчиб кирса бўладиган ҳолда эди. Чорси ҳовлининг бурчагига ошхона ҳам солинган, ҳатто-ки тандир ўрнатилиб, ёқиб кўрилган эди. Қимдир, болалардан бўлса керак, айвоннинг ёғоч устунларидан бирига «M+C» деб, бўр билан ёзиб қўйибди. Усмонов кулди. Уй бўм-бўш эмас, аллақачондан бери одамлар турадигандек бўлиб кетди бу ёзувдан.

— Бу уй **Машрабхонники**,— тушунтириди Холида.— Тракторчи қизимиз бор, ажойиб. Қузда узатамиз. Сотиволди ака тўйни шу янги уйда қилдирмоқчилар.

— Яхши,— деди Усмонов ҳамон завқини босолмай.— Ҳамма уйлар ҳам шунаقا, тайёрми?

— Ҳаммаси.

— Нега кўчирилмайди бўлмаса одамлар? Янги уйларга тезроқ кириб олишгани яхшимасми?

— Билмадим,— елкаларини қисди Холида. — Сотиволди акани тушуниш қийин.

«Тушуниш қийин бўлса ҳам унга қойил қолиш ке-

рак,— хаёлидан ўтказди Усмонов.— Боплабди. Ёйиш керак буни. Бутун районга ёйиш керак».

— Нима, у кишининг қандайdir планлари бор, дейсизми?

— Ким билади, бўлиши мумкин. У кишининг планларини ўзларидан бошқа ҳеч ким билмайди. Лоп этиб «ундай қилиш керак» деб қоладилар одамни хуноб қилиб. Лекин айтганлари доим тўғри бўлади. Қишлоқда биттаям тўй у кишининг мўлжалисиз бўлмайди. Бир одам касал ҳам бўлмайди у кишини мўлжалисиз.

Усмонов кулди.

— Рост!— Холида қошларини чимирди.— Сан беш кун, сан уч кун ётасан, дейдилар врач бу ёқда қолиб. Баъзан тўй қилиш хаёлида бўлмаган одамга, тўй қиласан, бир ҳафта срок, деб қоладилар бечорани куйдиріб.

— Қиладими?

— Қилмайчи! Қани, сўзларидан чиқиб кўрсин-чи! Бир йилгача гап қиладилар. Миясини қоқиб қўлнига берадилар ҳар мажлисда. Ҳалиги Машрабхоннинг тўйинга ҳали йил бор... Лекин кунигача белгилаб қўйганлар. Йигирманчи октябрь, шанба куни. Тўй албатта ўша куни бўлади. Бир кун ҳам олдинмас, бир кун ҳам кейинмас. Айтгандай, келинг. Бизда тўй яхши бўлади. Сотиволди аканинг ўзлари бошқарадилар. Бирам артист бўлиб кетадилар, қойил қоласиз!..

— Раҳмат. Албатта келаман,— ваъда қилди Усмонов.

— Шунинг учун бу уйларга яна кимлар, қачон кўчиб келишини фақат у кишининг ўзлари биладилар. Дамир Усмонович!

— Эшитаман?— Кўчага йўл олган Усмонов тўхтаб, Холида га ўғирилди.

— Мен қолсам. Чамадоним билан идорага кириб боришни истамайман. Уйим мана!

Холида қўлини чўзиб, иккинчи қатордаги уйлардан бирини кўрсатди.

— Орқангиздан этиб бораман дарров.

Усмонов рози бўлди.

Машина колхознинг икки қаватли, янги оқланган идораси олдида тўхтаганда, ичкаридан Полвонов чиқиб келди. Унинг қиёфаси Усмоновга кўпдан таниш эди. Қотмадан келган, новча. Ҳамма эски раислар қатори оёғида этик, бошида жиягининг жиндак попуги чиққан чуст дўппи. Катта, бургут тумшуқ бурни остида текис қирқилган, қўнғиздек мўйлов... Бўйи ҳаммадан баландлигига кўни-киб қолганидан, йирик, мўғулча кўзлари ерга қадалган... Полвоновни билмаган одам, уни биринчи кўрганида, уму-ман, унга кўнинкунча, ундан чўчириди. Чунки бир-бирига тулашиб кетган бароқ қошлари уни доимо жаҳл устида тургандек кўрсатарди.

Ҳозир ҳам у машина қаршисига йирик қадам ташлаб келар экан, қовоғидан қор ёғилиб тургандек эди. Бу унинг қиёфасига тааллуқлимни ё чиндан ҳам жаҳли чиқиб турибдими, аниқлаш қийин эди.

Усмонов машинадан тушиб, унинг қаршисига юрди.

— Кутдириб қўймадимми? Саломалайкум!

— Қелинг, ўртоқ Усмонов,— вазминлик билан сўрашди Полвонов.— Айтган вақтингизда келдингиз. Кутиб қолганимиз йўқ. Қани!..

У бир қадам четга ўтиб, Усмоновга йўл берди.

— Правление аъзоларини йиғмадим. Тағин...

— Йўқ, йўқ. Үзингиз билан гаплашсак бўлди.— Усмонов идора томон юрар экан, раиснинг овозидаги расмийликни йўқотишга интилди...— Янги қишлоқни кўриб келяпман йўлда. Боплабсизлар, Сотиволди ака! Қишлоқ экан-ку, шаҳаргаям ҳусн бу уйлар!

— Ҳа энди, қўлдан келганича... Бошладик-ку, тугатолмаяпмиз...— камтарлик билан жавоб қилди Полвонов.

— Барп бир яхши! Ҳамма колхозда ҳам шундай қилиш керак.

Полвонов индамади. Улар олдинма-кейин раиснинг кабинетига киринди.

Эшикка қадам қўйиши билан Усмоновнинг димоғига туп этиб аччиқ атир ҳиди урилди. У аксириб юбормаслиги ба бу билан раисни уялтириб қўймаслик учун, бирпвс очиқ эшик олдидаги турди. Ҳона чорси, кенг ва ниҳоятда тартибли эди. Тўрдаги ёзув столи олдидаги иккита суюнчиғи оқ ёпинчиқ ёпилган кресло. Уларнинг ўртасидан эшиккача қизил йўл гилам тортилиб, ортиқчаси остига буқлаб қўйилган. Хонанинг учала томонида бир-бирига зинҷ қилиб текис терилган стуллар туради. Полвонон әшик ёнида гиламни кантларига мой ёпишган этиклари билан босмаслик учун уни ҳатлаб ўтиб, тахта полдан креслолар ёнига борди-да, беихтиёр кафти билан стол устини сидириб, қўлига қаради. Чанг юқмади.

— Марҳамат.

Усмонов иккинчи креслога яқинлашар экан, беихтиёр ёзув столи устидаги сиёҳи тўла сиёҳдонга, унинг ёнидаги бир даста оппоқ қофозга кўзи тушди. Шу нарсалардан, кабинетдаги тартибдан, бу хонада одам кам бўлиши, деярли бўлмаслиги, раиснинг ниҳоятда озода одамлиги Силиниб туради. Полвонон креслога эмас, девор тагилаги стуллардан бирига омонатгина ўтирди. У ўтириши Силан, ёш бир йигит чой олиб кирди. У ҳам раис сингаги и гиламни ҳатлаб ўтди.

— Ўртоқ Усмонов,— деди Полвонон.— Танишиб қўйинг, колхоз комсомолининг бошлиғи Абдуманноп Хижиров.

Йигит уялинқираб жилмайди, чойнакни эҳтиёткорлик Силан раис ёнидаги стулга қўйиб, Усмоновга қўлини чўзди.

— Жуда яхши,— деди Усмонов туриб, у билан кўришар экан.— Ёшлар кўпми колхозда?

— Комсомол аъзолари юз йигирма битта,— ўйланнисдан жавоб берди йигит.— Ҳозир яна ўн кишини тай-Сралаяпмиз.

— Янги уйлардан қанчаси ёшларга мўлжалланган? Йигит раисга кўз қирини ташлаб, жилмайди:

— Янги қишлоқ асли бизники, ярмидан кўпи ёшларга. Анифи, йигирма саккизта уй.

У «тўғрими» дегандек, раисга қаради. Раис вазмни бош қўмирлатиб қўйди. Йигит яна «қандай саволингиз бор» дегандек Усмоновга қараб бирпас турди-да, у индамагач, чой қўйиб узатди. Кейин чойнакни раиснинг олдинга оҳиста суриб қўйиб, чиқиб кетди.

Йигит Усмоновга жуда ёқиб қолди. У шуни айтганда, Полвоновнинг чеҳраси бир оз ёришгандек бўлди.

— Яхши йигит. Ҳушёр, эслик. Сиртдан ўқияпти институтда. Оиланинг каттаси шу. Отаси тўртта бола билан онасини ташлаб, бир артистнинг кетидан кетиб қолгизн. Ҳаммаси шунинг қарамоғида. Ўргатяпман секин-секин. Колхоз энди шуларники-да...

Усмонов йўлда Полвонов билан бўладиган гапини хаёлидан ўтказиб, агроном қизнинг ҳимоясига анча-мунча далиллар тайёрлаб, гапни нимадан бошлишни ҳам ўйлаб қўйган эди. «Ёшларни нега хафа қиляпсиз?» демоқчи ва бу гапини тушунса ҳазилга, тушумаса чинга олмоқчи эди. Аммо у билан учрашиб, ўйлаб қўйган гаплари ҳаммаси бекор эканини англади. Бу, кўпни кўрган, ниҳоятда серташвиш, умрини колхозга бағишлаган одам жиддий бир сабабсиз бирорини хафа қилиши мумкин эмас эди. Буни у тушунди-ю, гапнинг қисқаси ва ростини айтиб қўя қолди:

— Агрономингизни олиб келдим, Сотиволди ака...

— Чакки қипсиз,— деди кулимсираб Полвонов.

— Нега?

— Бир ҳафталардан кейин ўзи қайтиб келарди. Уям менга ўхшаган ер жинниси. Ёш бўлса ҳам ернинг тилини билади. Ерсиз туролмайди. Шаҳарда эс-хуши жойига тушиб қайтиб келарди.— Полвонов пиёлаларга янги чой қўйиб, ўйланиб қолди.— Ерни билади-ю, лекин унга ҳали хўжайин эмас. Ерга эгалик қилиш тажрибамидан кела-ди. У ҳали буни тушунгани йўқ. Чумчуқча ўхшаб, шоҳдан-шоҳга сакраб юрибди. Режалари кўп, лекин биттаси-

даям қўнич топгани йўқ. Ер буни ёмон кўради. Шаттами ўзи?

Усмонов:— Билмадим, балки шу ердадир,— деди. Полвонов яна гиламни босмасликка ҳаракат қилиб, кабинетдан чиқди. Очиқ эшикдан унинг йўғон овози эшилтиди:

— Нима қилиб турибсан батта? Қабулхонада бирон нарса сўраб келганлар ё гуноҳ қилиб қўйганлар туроди ийманиб.

Кўп ўтмай кабинетга Полвонов ва унинг кетидан қипқизарган Холида кириб келди-да, эшик тагиҷаги стулга ўтирди. Полвонов унга чой қуйиб узатди.

— Ҳали нонуштаем қилмагандирсан?

Холида индамай бошини эгди.

— Тошкандаги Зайниддиновнинг колхозида қишдаям тарвуз бор, памилдори, бодринг... Кўк пиёзнинг ҳам кети узилмайди...— Полвонов полга кўзини қадаб, оҳиста ган бошлади.— Шаҳарга яқин колхозда бу яхши. Бу керак... Шаҳар илиги бўшашган пайтда сабзавотни тилладан афзал кўради. Колхозга бу пойда. Тумордек ердан филдек даромад қиласди.

Усмонов уни тинглар экан, тиззалари устидаги йирик, жигарранг қўлларидан кўзини узолмасди. Кўкиш илон изи томирлари бўртиб чиқсан, панжалари паншҳадек узун бу қўллар умри меҳнатда ўтган деҳқоннинг қўллари эди. Чап бошмалдогининг қорамтири тирноги (пичноқ ё ўроқ кесиб кетган бўлса керак) чиғаноқдек буралиб чиқиб, қоқ белидан терига тиравиб қолган, ҳар қимирлаганида, кўтарилиб пачоқ беш тийинлик пулни эслатарди. Унга қараб туриб, Усмонов, ёши ўтиб қолган, аммо ҳали шу қўлларидек метин бу одамнинг қўш ҳайдаган батракликдан тортиб, катта хўжаликнинг бошлиқли гигача босиб ўтган мاشаққатли йўлини кўргандек бўлиб кетди ва у билан ёнма-ён ўтирганидан фурур қилди, отаси эсига тушди. Ким билади, балки отаси ҳам шундайми? Шундай қарирмиди? Қўллари шундай дағал, юзи

офтобдан, дала шамоли, чангдан қовжираған бўларми-ди? Қандай бўлмасин, мана шундай ўтиrsa, омон бўлса унга шунинг ўзи кифоя эди. Полвоновда нимадир, кўз-ларидаги ўйчанликми, овозидаги қатъийликми, отасига жуда ўхшаш эди.

— Бизам парник қилишимиз мумкин,— гапида давом этди Полвонов.— Зайниддиновнидаи икки ҳисса каттароғиниям. Тарвузам бўлади, лимон, памилдориям. Ўкроп, петрушкяям. Қимга сотамиз? Колхозчига қиммат. Шаҳар олис. Икки ой қишида янги памилдори емасдан, қоқисиди сса колхозчи ўлиб қолмайди. Бунинг ўринига пахтани кўгайтирайлик, уй солайлик, сут-қатиқни кўпайтирайлик. Колхозчининг уйида бир кун лимон бўлмаса, жин урмайди, гўшт аримасин. Ҳар ҳафта қази солиб турсин...

— Теплицаям керак,— деди Холида ердан бошини кўтармай.

Шу пайтгача ҳеч кимга мурожаат қилмай, ўзича гавирган Полвонов унга ўгирилди.

— Керак. Ҳозир эмас. Санда сабр йўқ, Холида! Дехқон ҳамма ишга баравар ёпишмайди. Аввал ер чопади, ариқ олади, кейин экади. Колхоз санминан манинг томорқамиз эмас. Ҳамма нарсани вақт-соати бор. Бор энди, кечаги ишларинг чала. Қирда ҳам сани кутиб туришибди. Қолган гапни кейин гаплашамиз.

Холида Усмоновга «кўрдингизми» дегандек бир қараб қўйди-да, индамай чиқиб кетди.

Усмонов уларнинг муносабатлари масалаєнга яна қайтгиси келмади. Холида колхозда қолди. Полвоновнинг ўзи уни олиб қолди. Яна нима лозим? У шундай ўйлаб, дала айланишни таклиф қилди. Полвонов миннатдор еҳангда унга қараб, ўрнидан турди.

— Менам шуни сўрамоқчи бўлиб турувдим, Дамир Усмонович, нима гаи бўлса очиқ ҳавода гаплашайлик!..

Сотиевлди ака «ГАЗ-69» машинаенни ўзи бошқарыб борар экан, қишлоқдан чиқишганда, деди:

— Саидмурод Ишимов деган бир ҹұпонимиз бор. Ҳозир шатта, құрада. Тоққа ҳозирланяпты. Құзилатишин тугатиб, тоққа чиқиб кетади. Шунга вაъда берган эдим бораман деб. Хүп десангиз, олиб борардим?..

— Майли,— деди Усмонов.

Унга ҳозир қаёққа бориши масин, бари бир эди. «Шарқ юлдузи»да у кам бўлғаш, одамларини деярли билмасди. Катта, бой колхоз ёки қолоқ, камбағал колхоз тилга тез тушади. Шу хўжаликларда келди-кетди ҳам кўп бўлади. Биринчисига мақташ учун, бошқаларга ўрнақ қилиш учун, ўрганиш учун келади одамлар. Иккинчисига танқид қилиш учун, ўрганиш учун ҳам, камчиликларни бартараф қилишни ўрганиши учун... Урта хўжаликлар эса тилга кам олинади. Мақтовга кам илинади улар, танқид ҳам эшиг-майди. Лекин бундай хўжаликлардан раҳбарларнинг доим кўнгли тўқ бўлади. Чунки уларда ҳамма иш режали, оқсанш ийўқ. Бундай хўжаликларда халқ ҳам яхши яшайди, ҳеч маҳал ҳеч нарсадан узилиш бўлмайди. Бундай хўжаликларнинг бошлиқлари ғалати бир тоифа одамлар. Улар кўпинча эътибордан четда бўладилар. Бу уларни хафа қилмайди. Аксинча, улар ўзлари кўпинча четроқда бўлишни истайдилар. Бу билан улар саломатликдан, вақтдан ютадилар, хўжаликлари алғов-далғов бўлмайди. Нимани режалаб қўйған бўлсалар, шуни хотиржамлик билам амалга оширадилар. Натижада йиғ яқуни ҳамма тармоқлар бўйича кўнгилдагидек бўлади. Район ҳам хурсанд, колхоз ҳам. Мўлжалланган ҳар бир янгилик илғор хўжаликларда бўладиган шовқин-суронсиз рӯёбга чиқади, тўғрироғи янгилик рӯёбга чиқиб бўлганидан сўнг маълум бўлади. Бундай хўжаликлар ҳар бир районда бор. Уларни раҳбарлар ҳам, оддий халқ ҳам

яҳши кўради. Яҳши кўради-ю, лекин оғзини тўллатиб мақтамайди. Бунга ҳожат ҳам бўлмайди. Хўжалик раҳбарларининг ўзлари ҳам буни исташмайди. Полвонов келганидан бери (бунга ўттиз йилдан ошган эди) «Шарқ юлдузи» колхози ана шундай мақтовга кам илинадиган, лекин мутлақо таққид қилинмайдиган, ўзига тўқ хўжаликлардан бирига айланиб қолган эди. Кўшни колхозлар сингари у гуркираб ўсмади, аммо бирон йил чўқмади ҳам. Бутун колхоз янги супурилган ҳовлини эслатарди.

Кўпгина илгор колхозларнинг раислари Полвоновни ҳуши кўришмас, аммо дилларида унга ҳавасларни келарди. Чунки районда ҳам, областда ҳам кўп қарорлар шу илгор колхозлар тажрибаси асосида тайёрланар, бу эса фақат қолоқ, ўрта хўжаликларга эмас, илфорларнинг ўзларига биринчи галда ортиқча вазифалар юкларди. Қарорларнинг бажарилишини текшириш ҳам илфорларнинг ўзларидан бошланарди. Полвонов бир чеккада томошабиндек тураверарди. Аммо четдан қараганда шундай эди. Аслинда ҳамма қарорларнинг бажарилиши шу «ўрта» ҳисобланган хўжаликларда яҳши бўларди. Шунинг учун бўлса керак. Полвонов раислар ўртасида «файласуф» деган лақаб олган ва шундай лақаби борлигини биларди-ю, ўз одатича ўзини билмаганга соларди. Бир йили баҳор чўзилиб кетди. Бодомсой тошиб, экинларни сув босди. Жуда кўп хўжаликларда униб чиққан чигит нобуд бўлди. Қайта экишга тўғри келди. Баъзи хўжаликларда, ҳатто илфорларда ҳам, уруғ қолмаган эди. Областдан сўрашга мажбур бўлинди. Лекин Полвонов сўрагани йўқ. Сўраш у ёқда турсин, қўшниларига берди. Албатта қарзга. Ушанда Бурҳонов ундан хафа бўлди. Кўп раислар ўша кезлари райкомга серқатнов бўлиб қолишган, Полвонов эса қорасини кўрсатмас эди. Бурҳоновнинг ўзи унга телефон қилди.

— Ҳа, кўринмайсиз, ўртоқ Полвонов?!— жаҳли чиқса расмий мурожаат қиласади.— Сизга уруғ керакмасми дейман? Е сиз томонда дўл ёғмадими?

— Ёғди,— ҳар доимгидек лўнда қилиб жавоб берди Полвонов.— Қанча қайта экишимизни маълум қилганмиз.

— Нега уруғ сўрамайсиз бўлмаса? Ёрайком ўзи олиб бориб берсинми?— киноя қилди Бурҳонов.

— Уруғ ўзимизда етарли,— вазминлик билан деди Полвонов.— Ҳисоб-китоб қилсан, сўрашга ҳожат йўқ экан. Ортиқчаси ҳам бор.

— Қанча?— дарҳол жаҳлдан тушиб сўради Бурҳонов.

— Икки юз кило. Тошкент — 2 дан.

— Яшанг!— деб юборди хурсанд бўлиб Бурҳонов, кэйин бир йифилишда уни «пухта раҳбарлардан» деб мақтади. Полвоновнинг пухталигини ҳамма биларди. Баъзан колхоз раислари буни ўzlари синаб кўрган эдилар. Бир воқеа ҳатто афсона бўлиб кетган эди: «Правда» колхозининг тоғли ерларида ўт ўрилмай келарди илгари. Буни Полвонов билиб қолиб, арzon-гаровга сотиб олган, одам юбориб ўрдириб келган эди. Ӯша йили қиши қаттиқ бўлиб, узоқ вақт тоғда қор эrimаган. Иилқи оч қолган. «Правда»нинг раиси ўзи сотган ўтни ўзи ўн баравар қимматига Полвоновдан сотиб олган.

Бурҳоновнинг мақтови сабаб бўлдими, халқ ичида юрган афсоналарми ё қозондаги овқат ниҳоят чўмичга циқдими, сўнгги беш йил ичида «Шарқ юлдузи» машҳур колхозлар қаторида саналар, уч йил бурун эса Полвонов қаҳрамон, деган юксак унвонга сазовор бўлган эди.

Усмонов Полвонов ҳақида кўп эшитган эди, аммо мана шундай ёнма-ён ўтириб суҳбатлашмаган, яқиндан кўрмаган, кўрса ҳам унинг қандай одамлигини билмаган ва бунга қизиқмаган эди. Бугунги биринчи учрашув, Холидага айтгэн гаплари, чайир қиёфаси унга ёққан, дилида мәҳр қўзғатган эди. Полвоновдек одамbekорга бир иш қилмаслигини билган Усмонов сўради:

— Тинчликми ўзи?

— Тинчлик,— хотиржамлик билан жавоб қилди Полвонов.— Кўпдан бери кўришганимиз йўқ. Ўзича, иши бўлмаса келмайди. Яхши одам, яхши чўпон...— Полво-

нов ўйланиб қолди, кейин қуюқ қошларини чимириб деди--- Яхши чўпон-у, омади келмади-келмади...

— Нега?— ҳайрон бўлди Усмонов.

— Бе! йилдан бери ҳар йили геройликка қўямиз -- ўтмайди. Фахрий ёрлиқ билан қолаверади. Ундан паст кўрсаткичларга эга бўлганлар аллақачон герой бўлиб кетишган. Бунинг битта медали ҳам йўқ.

— Сабабини суриштиргингизми?— қизиқиб сўради Усмонов.

— Суриштиридим,— Полвонов жимиб қолди. Олдинда экскаватор кўринди. Полвонов ўнга яқинлашганда; машинани тўхтатди.— Энди кетяпсанми?— деди зарда билан рулда ўтирган ўспиринга.

Йигит жилмайди.

— Қайтяпман. Қазиб бўлдим. Энди Мамад акага кетяпман.

— Баракалла,— деди Полвонов ва машинага газ берди.— Суюнбой тракторчининг ўғли. Яхши йигит. Яқинда армиядан қайтди. Кузда уйлантирамиз.— У бирпас ўя хаёли билан банд бўлди-да, кейин Усмоновга қараб қўйди.— Суриштиридим. Фойдаси йўқقا ўхшайди. Дамир Усмонович, айтинг менга, сизн тарихчи деб эшиздим, уруш тугаганига ўттиз йил бўлиб қолди. Нима учун урушнинг баъзи томонлари ҳамон очилмай келади? Нима учун урушда нима яхши бўлди-ю, нима ёмон бўлди— очиқ-оидин айтилмайди?

— Нимани назарда тутяпсиз?

— Масалан, асир бўлганларни,— деди Полвонов.— Тўғри, асирда бўлганларнинг ҳаммасини оқлаб бўлмайди. Бу масалада менинг фикрим қатъий. Жонини сақлаш учун асир тушган одам — сотқин, хоин. Уни кечириб бўлмайди. Лекин шундай одамлар борки; улар тасодифан асирга тушиб қолган. Масалан Ишимов Сайдмурод. Жанг пайти граната портлаб, тупроқ остида қолган. Ҳушига келса атрофига немислар. Уйига қораҳат келгани. Жаноза очишган. Сайдмурод асирдан қочиб, партизан-

лик қылган. Ўгославияда. Уруш тугағандан кейин уйига қириб келган. Шу одамни «асирда бўлғаисан» деб, қачон-гача камситамиз? Қаҳрамон-ку, у ахир?! Ё нотўғрими гапим?

Усмонов жавоб бермади. У бу ҳақда ўйламаган, аниқ-роғи, шундай масалага дуч келмаган эди. Лекин Полвоновнинг Сайдмурод Ишимов ҳақидаги ҳикояси унга отасини эслатиб юборди. У бир гуруҳ реабилитация қилингани одамларни биларди. Отаси билан баробар, ёки ундан кейин олиб кетилгандардан, Баъзилар уруш йиллариёқ озод қилиниб, фронтга жўнатилган эди. Урушдан омон қайтиб, ҳозир яхши ишлаб юрганлар ҳам бор эди улар орасида. Баъзилар кейинчалик бутунлай оқлашиб, аввалги ишларига тикланган эди. Шуларни бир-бир кўз олдидан ўтказар экан, отасини ҳам улар қато-рида тирик кўргиси келиб кетди. Жуда бўлмаганда урушда ҳалок бўлғандарни ҳам яхши эди, хаёлидан ўт-казди у, Ишимовнинг фожиаси бошларига тушганида эса у ўзини баҳтли ҳисобларди.

— Фарзандлари борми? — беихтиёр сўради Усмонов.

— Сайдмуродними? Битта ўғли бор эди... — деди Пол-вонов. — Икки йил бўлди, ҳалок бўлди. Армияда. Чега-рачи эди.

Усмонов нима дейишини билмай, бошини эгди. Яна отаси эсига тушди. Агар Ишимовнинг ўрнида отаси бўл-ганда, у чиндан ҳам ўзини баҳтли ҳисобларди. Чунки унинг асирикка тасодифан тушишига, асирикда ҳам душманга қарши жон-жаҳди билан курашишига ишонарди. Шундай экан, нега Ишимовга ишонмаслик керак? Тўғри, унинг гувоҳи йўқ. Лекин одамнинг ҳар бир ишига гувоҳ талаб қилинадиган бўлса, унда ҳаётда силжиш бў-лармиди?! Умуман, кимга ишониб бўларди?.. Тўғри, асирик жиддий масала. Хонилар, номардлар ҳам урушдан сўнг гувоҳ йўқлигидан фойдаланиб, ўзларини қаҳра-мон қилиб кўрсатишган. Юзта номарднинг ичидан битта мардни топиш қийин. Лекин бегуноҳ одам умр бўйи жабр

тортиб ўтиши мумкин эмас-ку? Шу фикрлар хаёлидан ўтар экан, студентлик пайтидаги бир воқеа ёдига тушди. Тўртинчи курсни битиришаётганда, кимдир каникулда Европа бўйлаб саёҳатга кетаётганини айтди. Талабгорлар бўлса, комсомол комитетига мурожаат қўлсин, иккита бўш ўрин бор, деди. Муҳаммад Мирзаев деган бир йигит бор эди Усмоновлар группасида. Қам gap, одамо-вироқ. Аммо яхши ўқирди. Шу йигит, мен борардиму лекин рухсат беришмайди, деб қолди. Ҳамма унга ўғирилди. Отам асира бўлган, тушунтириди у. Сен аввал ҳужжатларни топшир, кейин биласан рухсат тегиш-тег-маслигини, маслаҳат бериши ҳар чеккадан. Рухсат беришиди. Ҳатто ҳеч қандай гап-сўз, текшириш ҳам бўлгани йўқ.

Усмонов шу воқеани эслаб, шундай бўлиши ҳам мумкин-ку, деб ўйлади-да, сўради:

— Ҷалки ҳужжатлар тўғри тўлғазилмагандир?

— Бе!..— қўлини силтади Полвонов.— Минг марта-лаб текширилган ҳужжатлар. Ўзим текширганман. Охиргисини ўзим тўлатганман. Ўртоқ Бурҳоновга боргандা тақقا тўхтайди, нари ўтмайди. Ўтган йили ҳам шундай бўлди.

— Қозим Бурҳонович нима дейдилар?

— Мен сизга айтган гап-да!.. Пленда бўлган... Плендан у нима душман бўлиб қайтибдими? Гуноҳи борлар ҳам у ёқдан мулла бўлиб, товбасига таяниб қайтади, шунақалар бор. Саидмуроднинг айби йўқ. Ҳамма гапига ишонаман. Икки ўлимдан омон чиққан одам ёлғон гапирмайди. Ҳали ўзингиз кўрасиз, башараси ўзи айтиб турибди, унинг қанақа одамлигини!..

— Ҳа, гаплашиш керак,— рози бўлди Усмонов.

Бу иш билан албатта шуғулланиш керак эди. Шунча йилдан бери азоб чекиб келаётган одамга осойишталиқ бериш лозим. Бегуноҳ азоб чекиши, осойишталиқ нималигини эса Усмонов яхши биларди. Отаси бўла туриб етимликада ўсиш, эшикма-эшик, идорама-идора юриб онаси-

нинг тўккан кўзёшлари, ҳалигача қабри номаълум отаси хотираси, унинг дардида, соғинчида уйқусиз ўтган қанчадан-қанча тунлар ҳозир унинг юрагини яна тўлқинлантириб юборди, ҳам одам сифатида, ҳам расмий иши юзасидан у Ишимов воқеаси билан шуғулланишга аҳд қилди.

— Ҳарбий комиссар биладим ч?

— Билади,— деди Полвонов.— Лекин у нима қила оларди? Ҳарбий томондан Сайдмуроднинг ҳужжатлари тоза. Бир-икки марта Югославияга юбормоқчи бўлдик собиқ партизанларга қўшиб. Сайдмурод унамади. Эски ярани янгилаб нима қиласман, дебди. Мен ҳам мажбур қилмадим шундан кейин. Одам ачинади унга, Дамир Усмонович. Ўғли ҳалок бўлгандан бери анча каловлаб қолди. Лекин билдирамайди. Иш билан ўзини овутади. Иши бўлса ҳар қандай мақтовга арзирилик. Сиздан яширадиган жойи йўқ, ўзингиз ҳам билсангиз керак, баъзи хўжаликларда қаҳрамонлар тайёрланади. Хўжалик обрўси учун балки бу керакдир. Аммо Сайдмуродники чин. Ҳақиқий Меҳнат Қаҳрамоқи у! Йилда бир шаҳарга тушиб чиқади. Қолган пайт қирда, тоғда, қўйларнинг ичиди. Шундай одамнинг қадрига етмасак, кимнинг қадрига етамиш? Унинг атрофидагилар, ёшлар нима дейди? Мени кечиринг, Дамир Усмонович, биринчи келишингиз учун оғир бўлди бу гаплар. Кейинроқ айтиб берсам бўларди...

— Ҳечқиси йўқ,— уни юпатди Усмонов.— Яхши қилдингиз шу гапларни айтиб. Бундан кейин муносабатимиз шундай очиқ бўлса, ишимиз яхши бўлади. Сайдмурод ака иши билан шуғулланаман. Қўлимдан келганича сизнинг таклифингизни ўтказишга ҳаракат қиласман. Тўғри айтдингиз, бунақа одамларнинг қадрига етмасак, кейинчалик ишлаш қийин бўлади, одамларнинг ишончини йўқотамиш.

Кафтдек адр устида иккита ўтов кўринди.

— Қелиб қолдик шекилли?— сўради Усмонов.

— Қелдик,— деди Полвонов.— Сайдмуроднинг қўраси шу. Ким келди экан? Машина кўриняпти...

Иўлга яқин ўтоб ёнида антенинчи микроавтобус туарди.

— Э, бўлди,— эсләди Полвонов.— Тошкентдан келишган. Телевидениедан.

Ўтов олдида беш-олти киши хомуш, ўйланиб туршиарди. Ранснинг машинасини кўриб, ўрта бўйли, қора-чадан келган, кўк жинси шим ва шундай кўк жинси куртка кийган оқсоч йигит улар қаршиисига юрди. Полвонов уни таниди ва машинадан тушиб илиқ сўрашди, Усмонов билан таништириди.

— Хўш, қалайсиз, ука? Ишлар битяптими?— сўради Полвонов.

— Умуман битди,— деди оқсоч йигит ва истеҳзо билан кулди.— Битта кадр қолди. Сайдмурод aka унамаятилар... Жиндек жоҳиллик қилятилар...

— Нега? Нима кадр?— ҳайрон бўлиб сўради Полвонов.— Ўзи қани Сайдмуроднинг?

— Ўтовадалар,— деди киноя билан оқсоч йигит.— Икки соат бўлди, чиқмаятилар. Кадр, биласизми, қандай кадр? Символ. Асарнинг асосий фояси. Мағзи.— Оқсоч йигит тўхтади. Беихтиёр Усмонов, Полвонов ҳам тўхтаб, унга ўгирилиши.— Тасаввур қилинг. Эрта тонг. Қуёшнинг нимранг шуълалари тоғ чўққилари оша ерга тушяпти. Белоён далада энди иш бошланяпти. Аммо чўпон учун ин аллақачон бошланган. У беҳисоб қўй подзарини ҳайдаб қуёш қаршиисига, тонг қаршиисига юряпти. Тасаввур қилдингизми?

— Яхши, яхши,— деди унга маҳлиё бўлиб қолган Полвонов.

— Ана шу кадр,— гапида давом этди оқсоч йигит.— Фильмнинг ҳам боши, ҳам охири бўлиши керак. Сценарий шундай ёзилган.

— Нега унамаяити Сайдмурод?— сўради Полвонов.

— Арзимаган бир нарса деб...— яна кинояли илжайди оқсоч йигит. Усмоновга у ёқмади. Ўзини тутнишими, ё

чўпонни менсимай гапиришими, ҳар ҳолда ёқмади ва ундан юзини ўгирди. Беихтиёр кўзи унинг шериклари тушди. Уларнинг ҳаммаси худди оқсоч йигитга ўхшаб кийинишган, баъзилари соқол қўйтган, баъзиларининг соchlари елкаларига тушиб турарди. Айтидан уларнинг ичида ёши улуғи оқсоч йигит эди, қолганлари ҳаммаси ёш, эндиғина мактабни битиришган бўлса керак, балки битиришмаган ҳамдир. Усмонов уларга қараб, бир нарса бўлганга ўхшайди, деб кўнглидан ўтказди. Ҳаммалари бир жойда гуж бўлиб, билмасдан гуноҳ қилиб қўйган, аммо гуноҳларининг қандайлигини тушунгган болалардек бошларини қуи солиб туришар, баъзи-баъзида ер остидан Полвоновга қараб қўйишарди.— Арзимаган бир нарса деб,— қайтарди гапини оқсоч йигит.— Биласизми?..

Лекин унинг гапи өғзида қолди.

— Ёлғон.— Ўтовдан худди Полвонов сингари новча, чайир, ёши элликлардан оштан бир одам ҳовлиқиб чиқди. Бу Сайдмурод Ишимов эди. Усмонов дарров фахмлади.— Ёлғон.— Қайтарди яна Ишимов.— Арзимаган нарса бўлса, сенлар билан гиди-биди қилиб ўтирасдим!

«Ана кўрдингизми? Гапим тўғри эканми?»— дегандек оқсоч йигит Усмоновга қараб қўйди. Усмонов ўзини пайкамаганликка солди.

— Ассалому алайкум!— Ишимов Полвонов билан сўрашди ва Усмоновга юзланди.

Усмонов унинг тарашадек қаттиқ ва ғадир-бутир қўлини олиб сўрашар экан, қўли титраётганини сезди, нима бу одамни ранжитган экан?— деган савол яна хаёлидан ўтди.

— Нима бўлди? Тинчликми ўзи, Сайдмурод?— Сўради Полвонов.

— Тинчлик қаёқда?— зўрга ўзини босиб деди Ишимов.— Кўктойни отиб қўйиниди булар. Нима қилардингиз шуларни менга юбориб, Сотиволди ака? Қиносини бoshимга ураманми? Итсиз қолдим-ку, энди!..

— Қачон? Нега отишди? — Ҳеч нарсага тушунмай сўради Полвонов.

— Негалигини мен қайдан билай?! Боя шартта отишди-қўйишиди. Мен аҳмоқ тағин ўзим қўшотаримни олиб чиқиб бердим-а! Билганимда олдимга солиб қувлардим ҳаммасини! — Ишимов оқсоқ йигитни кўрсатди. — Бу имоқилди. Мана шу режиссёр! Ҳов анави соқоллиги, ана бекиниб турибди, бекинма, ҳей, чиқ бақقا! Ана ўша соқоллиги отди-қўйди! Қинога керак эмиш! Осдим кино-йингни шунаقا қилиб олинадиган бўлса! Юсуфалига йигирмата қўйга бермаган эдим бу итни! Киночимас булар, фашистнинг ўзи!

— Үзингизни босиб гапиринг, Саидмурод aka! Бекорга ҳақорат қиляпсиз бизни! — деди зарда билан режиссёр. — Санъат қурбон талаб қиласди. Йтингиз ўлди, зато сиз тарихда қолдингиз. Буни тушуниш керак!

— Мен итсиз қолдим. Сен буни тушунасанми, калла?

— Үзингни бос, Саидмурод, — гапга аралашди Полвонов. — Меҳмонлар билан бундай гаплашиб бўлмайди.

— Нима бўлди ўзи? — сўради Усмонов режиссёрган. — Нима учун санъатга қурбон керак бўлиб қолди?

— Ҳозир ҳаммасини айтиб берамац, — деди режиссёр ҳозиржавоблик билан жанжал жиддий тус олаётганини сезиб. — Фақат сиз, ўртоқ Ишимов, гапга аралашмай туринг. Бундан уч кун бурун Сотиволди акам, агар бизнинг колхоз ҳақида эшиттириш қилмоқчи бўлсанглар ажойиб бир чўпонимиз бор, шуни суратга олинглар, деб илтимос қилдилар. Шу кишининг илтимоси билан уч кундан бери шу ердамиз. Ишимов билан танишиш жараёнида у киши ҳақида ҳужжатли фильм қилиш нияти пайдо бўлиб қолди. Ишлари яхши экан. Элликдан ортиқ бўри отган эканлар. Бу кишини қўйлар ичида ҳам суратга олдик, ўтовда ҳам. Қўйинг-чи, ҳамма ишлари кинолентага тушди. Бир эпизод қолди. Уни бугун эрталаб олдик. Эпизод шундай. Тонг, Саидмурод aka ҳали уйқудалар. Бирдан ит ҳурди,

қўйлар қўрқув билан маърай бошлайди. Саидмурод ака сапчиб ўринларидан турадилар. Қўлларида қўшотор милтиқлари. Подага бўри ҳужум қилибди. Сценарий бўйича, сценарийни мен ўзим ёздим, битта бўрини у киши отадилар, қолганлари қочиб кетади. Шу эпизодни бугуя олдик. Эпизод Саидмурод аканинг ўзларига ҳам маъқул бўлди.

— Маъқул бўлмай кетсин!—деди куйиниб Ишимов.— Бунаقا итни қаердан топаман? Мен чўпонмас, Кўктой чўпон эди!

— Мен гапириб бўлай,— уни тўхтатди режиссёр.— Чиндан ҳам итлари яхши ит эди. Минг афсус. Хўш... Эпизод демак, ўзларига маъқул бўлди. Аммо бўрини қаердан топамиз? Зоопаркдан олиб келишимиз мумкин эди, лекин бунга вақт керак. Менинг бошқа ишларим бор. Кўктой олисдан бўрига ўхшаб кетар экан. Бўри ўрнида ундан фойдаланишга қарор қилдик. Албатта бундан Саидмурод ака бехабар эдилар. Хабардор бўлганларида рози бўлмасдилар. Кўриб турибсиз... Менимча эпизод реал чиқди. Крупний планда мағлубиятга учраган бўри... яъни итнинг ўлаётганини суратга олишга муваффақ бўлдик. Санъат ишонтириши керак. Бўлмаса у санъат эмас. Ит ўлди, аммо биз, бунга мен аминман, яхши фильмга, реалистик фильмга эга бўлдик.

— Демак, тўғри қилдим, деб ҳисоблайсиэмн?— сўрали Усмонов.

— Шубҳасиз, ўртоқ Усмонов!— деди ишонч билан режиссёр.— Масалан, немис документалистлари Чилида бўлиб, қора полковникларнинг кирдикорларини...

— Ҳа, кўрдик телевизорда,— деди Усмонов уни бўлиб.— Лекин уларни шаронт мажбур қилган эди, сизни эса...

Усмонов у билан баҳслашини фойдасизлигини унинг шишадек ялтироқ, ҳаракатсиз кўзларига қўзи тушиб сезди ва гапни бошқа ёқقا бурди:

— Қачон кўрамиз фильмни?

— Кузда. Кузда экранга чиқади. Бугун охирги калпакни олиб кетсак...

— Бўлди! — уни тўхтатди Ишимов, — кинога тушадиган аҳмоқ йўқ. Йиғиштириш ашқол-дашқолларингни. Жўна. Мен оми бир одамман, ўртоқ Усмонов. Лекин қурбон берриб кино қиласидиган бўлсақ, бу кинони кимга кераги бор? Мен энди бу кинони қандай кўраман? Кўз ўнгимдан итим кетмайди! Одамларнинг кўзига қандай қарайман? Айтишмайдими, кинога тушаман деб, итини ўлдирган одам шу деб!

— Яхши ит эди, — деди ачиниб Полвонов. — Қозогистондан, бир чўпон ошнасидан олиб келувди. Бунаقا ит кам бўлади, Дамир Усмонович. Ҳар қандай бўрини тикка оларди. Ука, шу ўлдирмасдан илож йўқмиди?

— Бор эди! — қичқирди жаҳл билан бир чеккада гуж бўлиб турган режиссёр ёрдамчиларидан бири. — Ўлаётганини кўрсатиш шартмас эди! Бўри ҳақидамас-ку, фильм, чўпон ҳақида.

Режиссёр йигитлар томони бир ўқрайиб қаради-да, яна кинояли илжайди.

— Кечирасизлар уни, ёш, ҳали ҳақиқий санъат нималигини билмайди. Демак, Сайдмурод ака, тушмайсиз бошқа?

— Тушмайман! — деди ўжарлик билан Ишимов.

Режиссёр афсус, дегандек елкаларини қисиб, Усмоновга қаради.

— Балки сиз кўндирарсиз, Сотиволди ака?

— Бу одамнинг гапи битта. Энди кўнмайди, — деди Полвонов.

— Кетдик! — қичқирди режиссёр йигитларга ва Полвоновга қўлини узатди, — Хайр. Фильм яхши бўлади. Кўрасиз. Ўзим олиб келаман.

Кўп ўтмай, микроавтобус жўнади. Ўтов олди бирдан сув қўйгандек жимжит бўлиб қолди. Ишимов аламдан ва шундай катта меҳмонлар келган пайти юз берган жанжалдан, бу жанжалга сабабчи ўзи эканидан уялиб,

бошнин кўтаролмай туради. Қани энди ер ёрилса-ю, ерга кириб кетса! Лекин унинг ҳолатини Усмонов ҳам, раис ҳам тушунишган эди. Агар Ишимовнинг ўрнида бошқа одамини суратга олишганда, Полвонов режиссёрни шу қилимиши учун иккинчи колхозга келмайдиган қилиб қўярди. Боя уни эшитиб туриб, хаёлига шу фикр келди. Аммо унинг режаси шу қарорни амалга оширишдан устун чиқди. У нима бўлса ҳам Ишимовни элга танитиши ва шу йўл билан унинг атрофида яхши гапларни кўпайтиришни юрагига туғиб қўйган эди. Итга одам албатта ачинади. Яхши, полвон ит эди. Лекин ўз режасини амалга ошириш учун у итнинг ўлимига рози эди. Ишқилиб Ишимов ҳақида яхши бир эшиттириш бўлса бўлди. Фильм бўлса ундан ҳам яхши. Шунинг учун ҳам у дилида ғазаби қўзаб турса ҳам ўзини босди, иложи борича юмшоқлик билан режиссёрни жўнатди. Бу эпчил одам унга кўпдан бери таниш эди. Ўн йилча муқаддам пахта байрамида Тошкентга тушганида ундан интервью олган ва кечқурун «Тошкент» меҳмонхонасида унинг номерида ўтириб, эшиттиришни кўришган эди. Шунда Полвонов уни колхозга таклиф қилди. Режиссёр келди. Уч-тўртта оғайниси билан ўйнаб кетди. Шу-шу Бодомсойдан эшиттириш қилинадиган бўлса, у «Шарқ юлдузи»га келиб кетарди. Полвонов уни хурсанд қилиб жўнатарди. Ўтган йили келганида, унга Ишимов ҳақида гапириб берди. Шуни бир эшиттириш қилинг, деб сўради. Унутмаган экан, уч кун бурун келди. Шу жиҳатдан Полвоновнинг унинг олдида тили қисиқ эди.

Усмонов унинг режиссёр билан анча юмшоқ гаплашганига ҳайрон бўлди аввал, аммо йўлдаги Ишимов ҳақидаги ҳикоясини эслаб, уни тушунди. Ўзи эса режиссёрининг ишига, унинг гапларига қойил қолмади, аксинча, ундан жаҳли чиқди. Бундай одамлар ҳақиқий санъатдан широқ эканликларини ва бу, сочига бевақт оқ тушган (балки бу оддий касалликдир?) режиссёр ҳеч маҳал чинакам фильм яратолмаслигини у биларди. Бу ҳам майли.

Санъатдаги ҳамма одамлар ҳақиқий санъаткор бўлавермайди. Лекин бу оқсоч режиссёр унинг олдида санъатга қарши иш қилған эди. Бу эса даҳшат.

— Хафа бўлманг, Сайдмурод ака,— деди у Ишимовнинг елкасига қўлини қўйиб.— Менинг ҳам Қозоғистонда танишларим кўп. Яхши бир ит топармиз ҳаммамиз бир бўлиб...

Унинг бу гапи узоқ давом этган ноқулай жимликни кўтариб юборди.

— Албатта топамиз!— унга қўшилди Полвонов.

Ишимов уялинқираб бошини кўтарди.

— Мени кечиринглар. Бир оз қизишиб кетдим.

— Сиз ҳақсиз,— унга далда берди Усмонов.

Ишимов ростданми, дегандек Полвоновга қаради.

— Ҳақсиз,— қайтарди Усмонов.— Чўпон учун ит дўстдай, инидай гап.

— Ҳа-да, ўртоқ Усмонов!— Жонланиб кетди Ишимов.— Шуни билмаганига хунобман. Тағин режиссёрмиш! Қани ичкарига юринглар! Заб келибсизлар-да!..

Ишимов кўнгли анча кўтарилиб, меҳмонларни ўтовга бошлади.

— Ҳализамон қўй сўйган эдим, қайнаб ётибди... Қайнаналаринг сўйган экан... Қани, ўтирглар. Келингиз.. Замира кечқурин қишлоқка тушиб кетган жиянларини олиб чиққани. Қўйлар таранг тортилиб турибди... Эртанидин қўл-қўлга тегмай қолади...

— Мўлжал қандай?— сўради Усмонов.

— Юз қирқдан бўлар насиб қилса...

Полвонов, айтмадимми, дегандек Усмоновга қаради.

X

Ўша куни улар кун ботганда қишлоқقا қайтишди. Сайдмурод Ишимов Сотиволди ака айтганича бор, мақтovга лойиқ одам экан. Усмонов уни яхши кўриб қолди.

Усмонов ҳам унга маъқул келди шекилли, жуда очишлиб, бошидан ўтганларнинг ҳаммасини гапириб берди. 43-йилнинг ёзида Белгород остонасида асир тушиб қолган экан. Ишимов взводи мудофаада экан. Оғир жанг пайти у чап қўли, қулоғидан яраланибди. Аммо жангдан чиқмабди. Иккинчи мудофаа линиясига ўтиш ҳақида бўйруқни у олмабди. Немис танклари устидан ўтиб кетибди. Ўқ-дорисиз қолган Ишимов траншеяга тушган немисларга қарши белкурак билан олишган. Ҳатто иккитасини ўлдирган ҳам. Лекин ёнида граната портлаб, ҳушидан кетган. Ўзига келса, бош-қўли боғланган, ўрмон ичиде ётибди. Шундай қилиб у ярим йилча асирида юрган. Уни тўппа-тўғри Германияга олиб кетишган. Кейин асиirlарнинг ичидан қўл-оёғи бутунларни Югославияга жўна-тишган. Шу ердан у ниҳоят қочишга муваффақ бўлган. Партизанларга қўшилган. Македонияда, Черногорияда жанг қилган. Охири Италияда бўлган. Интернационал партизан бригадасида Римни озод қилишда қатнашган. «Черный Миша» лақаби остида қўпорувчилар отрядини бошқарган. Рим папаси Иннокентий қўрққаниданми, қаҳрамонлигига қойил қолганиданми, Ватикан ичиде унинг отряди шарафига зиёфат берган. 1946 йилнинг баҳорида юртига қайтган. Интербригада бошлиғи хайрлаша туриб, унга ўз тўппончасини ҳадя қилган. Чиройли ёзуви билан. Мудофаа министрлиги қошидаги музсіда сақланади, дейишади. Лекин буни Ишимов аниқ билмайди. Қомандирининг фамилиясини билади. Антонов — Ристич. Ҳозир генерал-лейтенант эмиш. Ўтган йили бир гурӯҳ югослав ҳарбий хизматчилари составида Москвага келиб кетибди. Ишимов газетада ўқибди.

Усмоновга шу маълумотларнинг ўзи кифоя эди. У Ишимовга ҳеч нарса ваъда қилгани йўқ. Лекин унинг иши билан шуғулланиш фикрида қишлоққа қайтиди.

Колхоз идораси олдида у Полвонов билан хайрлашди.
— Мени хурсанд қилдингиз,— деди у.— Ҳажойиб одам

билин таништирдингиз. Унинг тақдирига бефарқ қараб бўлмайди.

— Мен ҳам бир гапни сизга айтмоқчи эдим,— деди ийманиб Полвонов.— Фақат тўғри тушунинг мени. Отанизни билар эдим. У киши мени, олти класс маълумоти бор йигитни бухгалтерлар курсига мажбур қилиб жўнатган эдилар. Буни мен унутмайман. У киши умуман ҳаммага яхшилик қилган эдилар. Ҳаёт ўзи шу. Фақат яхшилик унутилмайди. Унтиб бўлмайди ҳам. Бодомсойга келганингиздан хурсандман. Ишингизга барака, Дамир Усмонович.

Усмонов юраги севинч ва ғууррга тўлиб, Полвоновниг қўлини қисди.

— Раҳмат.

Райком машинасида у қишлоқдан чиқар экан, Холида хаёлидан ўтди. Сотиволди акани яхши билмас экан, ўйларди у, билса иккалови жуда яхши ишлаб кетарди. «Хозир уйига келганмикин», беихтиёр сўради ўзидан у, лекин саволидан ўзи уялиб кетди. Қелган бўлса нима? Хотинига нимасидир ўҳшаб кетади бу қизнинг. Ҳафиза нима қилаётган экан ҳозир? Телефон қилмоқчи бўлиб турган бўлса керак унга. Тунов куни Ҳафиза: «Сизга қийин бўлди», деди. У жавоб бермади. Қийинликка қийин. Катта бир районга жавобгар бўлиб қолди. Жавобгар одамнинг ҳаёти ҳеч маҳал тинч бўлган эмас. Лекин бугун у яхши одамлар билан учрашди. Полвонов, Холида, Ишимов... Бу одамлар билан унга қийин бўлмайди. Бундайлар эса оз ылас. Фақат у ҳаммаси билан танишиб олиши керак. Дарди нимада, қувончи нимада — билиши керак ва қўлидан келганча уларга ёрдам қилиши зарур. Шунда районни кўтариш осон бўлади, одамларнинг ўзи кўтариб юборади.

Райкомда навбатчи — қишлоқ хўжалик бўлимининг мудири Назир Каримовдан бошқа ҳеч ким йўқ эди. Усмонов тенги бу йигитни яхшигина агрономлик қилиб турган жойидан Бурҳонов олиб келган эди. Ҳайитвой ака-

нинг колхозидан. Усмонов уни кўрди-ю, нега кетди экан колхоздан, суриштиришим керак, деган фикр хаёлидан ўтди.

— Тинчликми?

— Тинчлик, Дамир Усмонович,— Каримов унинг келишини кутмаганиданми, қабулхонани тутунга тўлдириб чеккан, стол устида турли қофозлар қалашиб ётарди. У ҳатто сигарет қолдиқларига тўлган кулдонни тўкишга ҳам улгурмаган эди.

— Нима қилаётувдингиз?— сўради Усмонов қофозларга ишора қилиб.— Ҳалақит бермадимми?

— Иўқ, мутлақо!— деди шошиб Каримов ва бир қофозни эпчиллик билан кулдон устига суриб қўйди.— Була... шунчаки қофозлар. Студентликдан қолган...

Афтидан унинг айтгиси йўқ эди. Усмонов ўз кабинетига кириб блокнотини қўйиб чиқди.

— Бирон топшириқ борми, Дамир Усмонович?— сўради Каримов.

— Иўқ, ишингизни қиласверинг.— Усмонов шундай деб эшик олдида тўхтади.— Ишимов деган чўпонни биласизми? Сайдмурод Ишимов.

— «Шарқ юлдузи»данми? Биламан.

— Шу одамнинг ҳужжатларини эртага менга кўрсатинг.

— Хўп бўлади. Ҳаммаси менда турибди.

— Яхши. Хайр. Мен меҳмонхонада бўламан.

— Айтгандай, Дамир Усмонович.— Зинада унга етиб олиб деди Каримов.— Сизни бир аёл сўради.

— Аёл?

— Ҳа, қабул қилган экансиз. Сиздан жуда хурсанд:

— Ким экан?

— Фармонова. Афтидан у ҳозир ҳам кутиб ўтирибди сизни меҳмонхонада. Зарур ишим бор дейди. Менга айтмади.

Усмонов эслади. Бу «спесалис»нинг хотини эди. Яна

ниман бўлган экан? У шундай ўйлади-ю, ваъдасининг устидан чиқмаганидан уялиб кетди.

Меҳмонхона олдида машинадан тушаркан, эшик ёнида қўлларини узун жакетининг енгига суқиб турган барваста аёл — Фармоновани кўрди.

Аёл оғзини катта очиб, жилмайганича унинг қаршиисига бир қадам ташлади-да, уялган бўлиб тўхтади.

— Ассалому алайкум, ўртоқ Усмонов!.. Сизни кеч келади деятишувди, эрта келарқансиз-ку?..

— Салом, келинг. Нега райкомда кутмадингиз? — нимадандир барваста аёлнинг фалати, эрта баҳорга тўғри келмайдиган, тушунтириб бўлмайдиган кийимиданми, ё меҳмонхона олдида аёл киши билан учрашганиданми хижолат тортиб сўради Усмонов.

— Райкомда энди қиласидиган ишим йўқ, ўртоқ Усмонов. Мингдан минг раҳмат,— деди кўзлари чақнаб аёл.— Уша сизга учрашганимдан баққа куёвпоччангиз бинойи-дек бўлдила-қолдилар. Соатдай бориб соатдай қайтадила ишдан. Ичиш қаёқда? Зелдирискийням ичмайдиган бўлиб қолдила, ер юткур ароқ у ёқда турсин! Ҳамма ишни уйда ўзлари қиласидила. Ҳатто, ўртоқ секретарь, ўринниям менга солдирмайдила. Ўзлари соладила. Худди кеча тушган келиндай бўлиб қолдим.

— Яхши, жуда хурсандман,— деди Усмонов.— Ҳатоларига тувиунибдилар-да!

— Тушунгандаги қандоқ, ўртоқ Усмонов! Икки гапнинг бирида лаббай, деб турадила. Тунов куни овқатланаб ўтириб, аччиққина мастава қиласидим, хотин бир нарсанни мени, ўша ўқлоги билан урганингизда тушундим, эрни эр қиласидиган ҳам, ер қиласидиган ҳам хотин экан, буни сира унумтмайман. Ҳар қандоқ списалис ҳам буни билиши керак, дедила, овқатни ичолмай ўйланиб кетдила. Раҳимм келди, ўртоқ Усмонов. Ўғлимининг тўйида асраб қўйганим бор эди, қўйиб бердим ўзим. Ана, айтмадимми дедила, эрни эр қиласидиган хотин. Молодес, дедила.

— Яхши, жуда яхши,— гапни қисқа қилишга интилиб, уни бўлди Усмонов.— Хўш, мени нега кутяпсиз?

— Сизнimi? Илтимосиминан кутиб ўтирибман, ўртоқ Усмонов.

— Хўш?

— Энди ҳеч қанақа чора кўрмасангиз поччангизга. Шуни ўзи етади.

— Хўп бўлади, опа,— ваъда қилди Усмонов.— Тинч бораверинг.

— Раҳмат, мингдан минг раҳмат ўртоқ Усмонов!..

— Хўш!

— Келинпошшасиз қийналяпсиз, биламан,— деди аёл.— Озгина манти қилиб келувдим. Хонангизда. Дарров еб олинг. Ошхонанинг овқати овқатми?!

Усмонов кулиб юборди. Мана, пора ҳам олдим, ўйлади ўзича у. Лекин бу «пора» софдил, содда аёлнинг соф қўли билан чин юракдан, опалик, одамийлик меҳри билан узатилган «пора» эди. Ҳафизага буни албатта айтиб бериш керак. Хурсанд бўлади. Қандай ажойиб одамлар бор, яхши гап уларнинг кўнглини төғдек кўтаради, қувватига қувват қўшади, меҳрини булоқ қиласди.

У аёл билан эски қадрдонлардек хайрлашиб, номерцига кўтарилиди. Шу ондаёқ, телефон жиринглади. Бу Ҳафиза эди.

Улар анча гаплашишди. Усмонов бугун қаерларда бўлганини, кимлар билан учрашганини тўлиб-тошиб гапириб берди. Ҳа, у хурсанд. Бодомсойга келганидан, ажо-йиб одамлар билан танишгани, танишаётганидан хурсанд. Албатта Ҳафизасиз зерикяпти. Лекин бу вақтинчалик гап. Уй олишлари бидан турмушлари яна изига тушади. Улар доим бирга булишади. Йўқ, у чақалоқни унугтаги йўқ. Унугтиб бўлармиди. Қиз! Йўқ, ўғил бўлади, ўғил. Кош-кўзи Ҳафизага ўҳшаган бўлади. Ақли ҳам, юраги ҳам. Қиз бўлса ҳам майли. Ишқилиб чақалоқ бўлса бўлди. Қорни тўқ. Нима еди? Қундузи... ҳа, кундузи таандир кабоб еди. Қирда. Ишимов ўтовида. Ҳозир манти

еялти. Худди Ҳафиза тайёрлайдиган мантининг ўзи. Қимқилиб олиб келди? Иўқ, ўрта ёшли бир аёл. Богчанинг ғашпази. Усмоновга тўртта келади. Жуда хушчақчақ, содда аёл. Ҳафизани у билан албатта таништиради... Ҳа, ёртага яна гаплашишади. Ўзи телефон қилади.

Усмонов шу заҳотиёқ Исмоилжон билан гаплашмоқчи бўлди, кейин бафуржа овқатланади. Исмоилжон уйда ёкан. Ўзи трубкани олди.

— Дамир? Дамир Усмонович?

— Тўғри галиравер,— кулди Усмонов.— Меҳмонхона-даман. Ҳеч ким йўқ ёнимда. Хўш, ўртоқ редактор ўринбосари, Бодомсойга область газетасида қачон кенгроқ жой берилади?

Исмоилжон ҳам қулди.

— Яқинда. Яқинда тўла бир саҳифа уюштирамиз. Мен сарлавҳа топиб қўйдим.

— Хўш?

— Ўртоқ Усмонов, Бодомсойни қаёққа бошлаб кетяпсиз? Қалай дурустми?

— Дуруст,— деди Усмонов ўртоғининг ҳазилини тушишиб, кейин жиддий оҳангда гапирди.— Исмоил, ёрдаминг керак. «Шарқ юлдузи»да бир чўпон бор. Саидмурод Ишимов деган. Эшитганмисан? Иўқ. Шу одам, саҳифа деяпсан-ку, қатор саҳифаларга арзиди. Ўзинг келмайсанми? Яхши ёзасан, менга ёқади сенинг ёзишинг. Катта бир асарга айланиб кетиши мумкин бу одамнинг тақдиди. Мен ҳайратда қолдим. Келасанми? Қачон келасан?

— Уч-тўрт кун ичида,— деди Исмоилжон.

— Кутаман. Ёзib қўй. Саидмурод Ишимов. Кутаман.

— Менга қара, Дамир,— сўради гапининг охирида Исмоил.— Анави... Тракторчи фожиаси нима билан тугади? Султонов индамай кетаверадими? Шикоят бор колхоздан.

— Индинга бюро,— деди Усмонов.

Исмоил уни тушунди.

Эрталаб у райкомга келганида, хомуш турган Қобуловни кўрди.

— Ҳа, Ҳайдарали? Қелинг.

Усмонов уни ўз кабинетига бошлади. Қобулов кечаси билан ухламай чиққанини, эрталаб эса ионушта ҳам қилимай, шу ёққа йўл олганини айтди.

— Нима бўлди? Тинчликми? — сўради Усмонов хавотир олиб.

— Тинчликка-ку, тинчлик-а! — Қобулов нимадан гап бошлишини билмай тутилиб-тутилиб жавоб берди. — Билласизми, Дамир Усмонович... Кеча... кеча партия мажлиси ўтказдик. Очиқ партия мажлиси. Ундан аввал бюро қилдик. Бюрога Ҳайитвой ака кирмадилар. Ишим кўп, деб қаёққадир кетиб қолдилар. Жуда узоқ, жуда жиддий бюро бўлди. Бюро аъзолари кўп нарсаларин ташлашди. Техника хавфсизлиги чатоқлигини... Ёшларнинг колхоздан кетиб қолаётганини... Баъзи бригадаларда ўзбошимчалик кучайиб кетгани... Қўйинг-чи, жуда яхши бюро бўлди. Кейин чуқур ўйлаб, раисга, менга ҳайфсан эълон қилишга қарор қилдик ҳаммамиз. Мусавой ака, бригадир, мениям жазолаш керак девди, бюро унамади. Менам унамадим. Унда мутлақо айб йўқ. Қайтанга раисниям, Яхшивойдиям у қайтармоқчи бўлган эди. Шу жой жуда зарур бўлса, кунлар юришиб кетганда, ўзимиз омоч билан чопиб оламиз, деган эди. Уни жазоламадик. Мана шу қарор.

Қабулов чўнтағидан тўрт буклоғлиқ қўлда ёзилган қофозни олиб, Усмоновга узатди. Бюро қарори анчагина содда, орфографик хатолар билан ёзилган бўлса ҳам, фикр аниқ, жазо сабаблари тўғри белгиланган эди.

— Яхши қарор қабул қилибсизлар-ку, — деди Усмонов уни ўқиб бўлиб.

— Яхшиликка-ку, яхши-я, лекин ўтмай қолди бу қа-
рор,— күйиниб деди Қобулов.

— Нега?

Қобулов бўлган воқеани батафсил айтиб берди. Бюро қарорини эшитиб, Султоновнинг қаттиқ жаҳли чиқиби. Қобуловни ҳузурига чақириб роса уришибди.

— Қанақа одамсан ёзи? Партком ҳам ўзини-ёзи жа-
золайдими?! Тағин раис билан бирга! Бу аҳмақона қа-
рор. Менга хайфсан берадиган одам йўқ колхозда! Учир
бу қарорингни. Халқнинг ўртасига олиб чиқадиган бўл-
санг, сен билан бирга ишламайман!

Султоновнинг албатта ҳақ жойи бор эди. Партком секретарига фақат юқори партия органларигина жазо беришлари мумкин эди. Лекин Қобулов ва бюро аъзо-
лари раиснинг жазосини енгиллатиш ниятида шу қарор-
га келган эдилар. Қачонгacha энди раис доим айбловчи
бўлади?

Қобулов раиснинг дўқига, илтимосига (Қобулов кўна-
вермагач, Ҳайитвой ака унга ялинибди ҳам) қарамай,
қарорни мажлисга қўйибди. Мажлис ҳам, худди бюрга
ўхшаб узоқ чўзилибди. Умуман яхши ўтибди мажлис.
Лекин қарорга келганда, овоз етмабди уни қабул қилиш-
га. Бунинг устига мажлисга Яхшивой Эргашевнинг хоти-
ни келиб, агар Ҳайитвой акани жазолайдиган бўлсалар-
инг, розимасман сизлардан, деб одамларнинг кўнглини
юмшатиб юборибди. Хуллас, бюро қарори ўтмабди. Ях-
шивой ёзи айбдор, эҳтиёт бўлиши керак эди, деган қарор
қабул қилинибди.

Усмонов ўйланиб қолди. Қобуловга, ёш, тажрибасиз йигитга Султонов билан беллашиш осон эмас эди. Лекин Усмонов унинг ўз фикрида қатъий туриб, бюро қарорини мажлисга қўйдирганидан хурсанд бўлди. Қобулов шунга эришибди. Бу эса Султоновдек одам олдида мақтовга арзигулик иш эди. Тракторчининг хотинидан ҳам хафа бўлишга ўрин йўқ эди. Эрининг у энди анчагача ишлол-
маслигини билади, нима учун у шу шароитда раисга қар-

ши чиқиши керак? Бўлар иш бўлди. Раис билан жанжаллашиб нима қилади? Бундан ташқари одамлар кўпинча ўч олишни истамайдилар.

— Дамир Усмонович! — унинг хаёлини бўлди селектордан Малоҳатнинг овози.— Касалхонадан сизни сўрашаётни.

— Эшитаман.— Усмонов трубкага қулоқ солди.— Салом.

Гапираётган касалхона бош врачи эди.

— Дамир Усмонович! «Максим Горький» колхозидан келтирилган тракторчи... Яхшивой Эргашев ҳозир вафот этди.

Трубка жимиб қолди. Усмонов бўшашиб, анчагача нима дейишини билмай турди. Ниҳоят сўради.

— Нечага кирган экан?

— Ўттиз учга.

«Ёш экан», хаёлидан ўтказди Усмонов.

— Хўп, мен ҳозир бораман,— у трубкани қўйди.

— Эшитдингизми? Эргашев вафот этибди...

Қобулов унга тикилганча қотиб қолди...

Касалхонага келишганда, уларнинг биринчи кўргая одами — Эргашевнинг хотини бўлди. Қисқа вақт ичидан озиги, муштдек бўлиб қолган бу аёл, иякларига қўлларини тираб касалхонага кираверишдаги скамейкада ўтиради.

У на Усмоновнинг, на Қобуловнинг саломига алик олди, кўзларини ерга қадаганча жойидан қимирламади. Афтидан уларни эшитмади ҳам, кўрмади ҳам. Юпқа, кўқимтири лаблари билинар-билинмас нималарни дидир шивирларди. Балки бу шивирлаш эмас, бутун вужудини қоплаган, кутилмагандаги бошига тушган оғир дард асорати — титроқ эди.

Ичкаридан бош врач чиқди.

— Ҳеч иложи бўлмади,— деди у.— Жигар ишдан чиқкан экан. Кон юришмай қолди.

— Колхозга хабар қилдингизми? — сўради Усмонов.

— Ҳа, сиздан кейин телефон қилдим. Ҳозир ўртоқ Султонов келадилар.

Усмонов Ҳайдаралига аёлни кўрсатди.

— Ўзингиз олиб кетинг ҳозир.

У райкомга кетаётганда, Султоновнинг «Волга»си чийиллаб келиб касалхона олдида тўхтади. Усмонов машинадан тушмади. Йўлда яқинда кўрган туши эсига келди: тумонат одам. Тобут, Эргашевнинг тобутини кўтарганлар орасида у ҳам бор. Бир маҳал тобутда у пайдо бўлибди, тобутнинг орқасида эса қора тўн кийган Эргашев келаётган эмиш.

Усмонов сесканиб, бошини кўтарди. Улар райкомга етиб келишган эди.

— Бугун чиқаришса керак. Борамизми? — деб сўради шоффер.

Усмонов ҳа, дея бош қимиirlатди.

Қабинетига кириши билан у селектордан Бурҳоновни чақириди.

— Козим Бурҳонович! Эртага бирога ҳамма хўжалик раҳбарларини таклиф қилиш керак. Ҳеч ким қолмасин.

— Хўп бўлади,— деди ҳозиржавоблик билан Бурҳонов.

Ўша куни Усмонов мижжа қоқмади. Назарида кун бўйи ишида ҳам тайин бўлмади. Бодомсойнинг этагида қурилаётган насос станциясини бориб кўрди. «Олға»нинг сўнгги уч ойлик сонлари билан танишди. Район марказидаги кутубхонага кириб, район ва район ижроия комитети аппаратидаги ходимларнинг сўнгги икки йил давомидаги ўқиган китоблари рўйхати билан танишди. «Максим Горький» колхозига бориб, Эргашевнинг кўмиш маросимида қатишади. Султонов қанча илтимос қилмасин, колхоз идорасига кирмади. Кирса, албатта оғир гаплар бўлишини биларди. Бугун шу оғир гапларни қилгиси келмади. Қоронги тушганда ҳаммадан сўнг навбатчи билан хайрлашиб, райкомдан чиқди.

Бодомсойга келганидан бери биринчи марта Ҳафизага

телефон қилмади, кўнгли ғаш, Ҳафизани хурсанд қиладиган гап топиши қийин эди. Уйқу келавермагач, ярим кечада ўрнидан туриб, Тацитнинг китобини варақлай бошлади. Бу китобни у жуда яхши кўрарди. Бир неча марта ўқиб чиққан, ҳатто Ўрта Осиёга, Эронга тегишли жойларини конспект қилиб олган бўлса ҳам, уни қўлдан қўймас, олисроқ жойга кетганида ўзи билан олиб кетарди. Бодомсойга жўнаётган куни ҳам, биринчи бўлиб, шу китобни чамадонига солган эди. Бу китоб ўзининг объектив тасвири билангина эмас, услуги, фактларга ниҳоятда бойлиги, равон тили билан ҳам унга маъқул тушиб қолган. Уни ўқир экан, ўзини узоқ ўтмиш воқеалари ичидагис қиласарди. Аниқ бир мақсадсиз уни очганида, Сенеканинг олдига Центурион келган саҳифага кўзи тушди. Мана у мармар устунлар орасидан ўтиб, Сенека рўпарасида пайдо бўлди. Кекса файласуф унинг келишини билар ва дилида бу учрашувга ҳозирлик кўриб қўйган эди. Ҳокимият вакили белидаги узун, сопи фил суюгидан ишланган ханжарини чиқариб унга узатди. Чорси ёзув столи устидаги шам нурида ханжарнинг ўткир тифи ялтираб кетди. Сенека уни олмади. Бутун умрини ҳозирги ҳокимнинг тарбиясига сарфлаган ва ундан на халқ учун, на давлат учун наф кўрмаган олим, ҳалқни очликка, давлатни инқизотга олиб келган, ўз ҳузур-ҳаловатини ўйлаган, фаҳшдан бош кўтартмаган одамнинг қуролини қўлига олишдан нафратланди. У ўлади, аммо ўз қуролидан ўлади. Сенека ҳар доимгидек хотиржамлик билан ўрнидан турди:

— Неронга айт, унинг буйруғи бажарилади.

У шундай деб, вазмин қадамлар билан ўз хонасига кетди. Унинг ортидан хотини ҳам йўл олди.

Усмоновни ҳар доим шу жойга келганда, Сенеканинг оғирлиги, иродаси ҳайратга соларди. Кекса файласуф ўз ўлими билан Рим салтанатини, бутун тарихни ларзага солган эди, уни ўлимга ҳукм қилган Нерон эсле йигирма асирдан бери инсоният қаргишини эшитиб келарди. Ус-

монов шундай ўйлар экан, Центурионнинг қайтишини кутиб ўтирган Неронни кўргандай бўлиб кетди. У ўзини қаёққа қўйишни билмас, тиқ этган товуш уни чўчи-тарди. У нимага, кимга қарши қўл кўтартганини биларди. Лекин бошқа чораси йўқ эди. У шу қадар кўп жиноят, шу қадар кўп разилликлар қилган эдики, унга халқ севган, виждони пок одамнинг ёнида бўлиши бутун ҳаётини заҳарлаш билан баробар эди. Ё Сенека, ё у! Бошқача бўлиши мумкин эмас.

Центурион жуда кеч қайтди.

— Чол узоқ жон берди,—деди у,— Ханжарингни рад өтди.

— Қандай ўлди?— жаҳл билан сўради император.

— Ҳаммомда ўз ханжари билан томирларини қирқди. Хотини ҳам шундай қилди.

— Униси нега?..— ҳайрон бўлди Нерон.

Центурион жавоб бермади. Сенека ўз ўлими билан ҳам ундан, Нерондан ғолиб келган эди...

Усмонов ўзини мажбур қилиб, китобни ёпди. Тонг оқара бошлаган эди. Бугунги кун ҳам кечагидек оғир бўлишини у биларди.

Райком бюроси белгиланган вақтда бошланди. Аввал Усмоновнинг кабинетига хўжалик раҳбарлари олдинмакейин кириб келишди. Йўлакда кутиб турмасликни Усмонов ўзи улардан илтимос қилди.

Улар орасида фақат Султонов йўқ эди. Қейин Содиков билан район прокурори келди. Ўнга роса бир минут қолганда, қизил, семиз папкасини қўлтиқлаб Бурҳонов кирди. У ишга вақтида келган бўлса ҳам Усмонов билан кириб, ё селектор орқали сўрашмади, бюорода кўриладиган масалалардан биронтаси ҳақида гаплашмади. Усмонов бунга муҳтоjлик сезиб, ўзича чақирмади. Лекин Бодомсойга келганидан бери Бурҳоновнинг ўз хоҳиши билан унинг олдига кирмаслиги, сўрашмаслигини пайқаган эди. Сир бой бермай ўзи унинг кабинетига кириб, уч-тўрт марта сўрашиб чиқди. Бурҳонов ё уйи тушунма-

ди, ё жўрттага мустақил эканлигини аппарат ходимларига кўрсатиш учун муносабатини ўзгартирмади. Усмонов бунга эътибор берган бўлса ҳам, кулиб қўя қолди. «Нега энди бундай қиласди? Нима ортдиради бу билан?»— деди ўзича куюниб.

Ҳозир ҳам Бурҳонов у билан ҳамманинг олдида, ма-на худди сизлардек мен ҳам бу кабинетга энди киряп-ман, дегандек қўл узатиб сўрашди-да, ёзув столининг ўнг биқининга ўтирди. Усмонов бенхтиёр Сенекани эслади. «Албатта у бундай икир-чикирлардан юқори бўлган,— деди хаёлан ўзича,— бўлмаса файласуф бўлмас эди...»

Қип-қизил юзидағи терни артиб Султонов кириб келди.

— Кечирасизлар!..— деди у ҳеч кимга қарамай ва эшик ёнидаги стулга омонатгина ўтирди.

Хонага жимлик тушди. Бюро аъзолари кун тартиби билан таниш бўлсалар ҳам, Усмонов таклиф қилингандар учун ўқиб берди. Биринчи масала партияга қабуя қилингандарни тасдиқлаш эди. Улар тўрт киши эди. Йикки ишчи, бири насос станциясидан, бири совхоздан, бири сут соғувчи қиз — «Правда» колхозидан, тўртнинчи одам район газетаси ходими, ёш шоир Мирҳайдар Баратов эди. Тўрталови ҳам бюро аъзоларида яхши таас-сурот қолдирди. Деярли савол беришмади. Усмонов фақат ёш шоирга савол берди. Савол берди-ю, уни қий-наб қўйганини кўриб ачинди.

— Нега газета кеч чиқади?— сўради у.

Шоир қизариб кетди, қўлларини ишқалаб, нимадир демоқчи бўлди, лекин айттолмади. Усмонов сабабијни билишини, уялиб айттолмаётганини кўрди-да, гапни бошқа ёққа бурди.

— «Шарқ юлдузи»га бориб турасизми?

— Кўп бораман,— деди жонланиб Баратов.

— Сайдмурод Ишимов деган чўпонни биласизми?

— Эшигтганман.

— Шу одам билан бир учрашинг,— маслаҳат берди Усмонов.— Уруш ветерани у. Яхши чўпон. Балки чиройли бир нарса ёзарсиз.

— Хўп бўлади!— суюниб жавоб берди Баратов.— Бугуноқ бораман.

Бюро аъзолари кулиб юбориши.

— Иккинчи масалага ўтамиз,— деди Усмонов ёш шоирни табриклаб чиқариб юборгач.— Сўз ўртоқ Бурҳоновга.

— Мен гапни қисқа қиласман,— шундай деб Бурҳонов ўрнидан турди.— «Максим Горький колхозидаги всёеани ҳаммаларинг эшитган бўлсаларинг керак, бир тракторчи, Яхшивой Эргашев, трактори ағанаб, остида қолган эди. Кеча вафот этди. Кўмиб келдик. Бу фавқулодда ҳодиса.

У Султоновга қаради. Султонов, тўғри, дегандек бошини қимирилатди.

— Бундай ўлим билан тугаган ҳодисага район партия ташкилоти, бюро бефарқ қарай олмайди. Мен шахсан бу масалачи Дамир Усмоновичнинг таклифлари билан бюро муҳокамасига қўйилганини ва бу муҳокамага дэлрли ҳамма хўжалик раҳбарлари чақирилганини маъқуллайман. Биз бугун шу ҳодисадан жiddий хуолоса чиқармоғимиз керак. Нима бўлган ўзи? Колхоз правлениеси кўп йиллардан бери ўзлаштирилмай келаётган жарлик ёқасини... шундайми, Ҳайитбой Султонович?— Султонов ундан кўзини узмай, бошини қимирилатди.— Жарлик ёқасини ўзлаштиришга қарор қилган. Бу яхши гап. Лекин ўзлаштиришда меҳнат хавфсизлиги қондалари бузилган, яъни, ернинг тийфончиқ эканлиги эътиборга олинмаган. Правление ҳам, колхоз партия ташкилоти ҳам, тракторчининг ўзи ҳам бунга аҳамият беринимаган. Бўлмаса, тракторчи тажрибали, эпчил йигитлардан эди, ҳеч бўлмаганда унинг ўзи эҳтиёт чораларини кўриши керак эди. Кўрмаган. Ернинг қалтислигини билиб, Ҳайитбой ака ёш одамга эмас, юқорида айт-

ганимдек, тажрибали Яхшивой Эргашевга буюрган ҳайдашни. Аммо бу гап билан мен раисни оқламоқчи эмасман. Раис айбдор. Партия ташкилоти ҳам. «Максим Горький» колхозида меңнат ва техника хавфсизлиги масалалари яхши йўлга қўйилмаган. Мен шунинг учун уларни айбдор ҳисоблайман. Менинчада бу масалаларга бошқа хўжаликларда ҳам эътибор кам. Менинг, Дамир Усмонович, таклифим бор. Обрули бир комиссия тузиб, ҳамма хўжаликларни ўрганиб чиқиш керак. Тракторчи Эргашев фожиасига келганда, мен ўртоқ Султоновни сгоҳлантиришини таклиф қиласман. Чунки фожианинг ўзи бу одам учун, колхоз учун етарли жазо.

Бурҳонов жойига ўтириди. Унинг гапи Усмоновга ёқмади. У тўғри гапирган эди, жазо масаласида ҳам тахминан у ҳақ эди. Ўлим катта жазо. Лекин Бурҳонов сийпалаб, иложи борича фожиани юмшатиб, айбни кўпроқ хавфсизлик қоидаларига риоя қиласликка яқинлаштириб гапирган эди. Султоновнинг жоҳиллиги, унинг буйруғи билан фожиа юз бергани четда қолиб кетди, бу ҳақда ҳаттохи у оғиз очмади. Усмонов шуларни хаётидан ўтказар экан, ўзи музокарани бошлаб бермоқчи бўлди, лескин фикридан қайтди.

— Ким гапиради?

Құдрат Саимович сўз олди.

— Қозим Бурҳонович тўғри айтдилар,— деди у.— Бугун биз бу хунук ҳодисадан жиддий хulosса чиқарип олишимиз керак. Районда, колхозларда ҳар хил воқеалар бўлиб туради. Бундан ўн йилча муқаддам «Ойбек» колхозида бўлса керак, бир аравакаш пичан ортиб келаётib, араванинг устидан қулаб тушган эди. Эътибор бермадик, ўзи ҳам ҳеч қаёққа ариза ёзмади, шу одам мана ўн йилдан бери ёстиқдан бош кўтармайди. Қим айбдор бунга? Албатта, биринчи галда ўзи. Лекин биз одамларга ғамхўрликни баъзан иш деб унугиб қўйяпмиз. Бирор шу аравакашга нега бунча ортасан, яхшиси яна бир қатна-қўй, демаган. Тракторчига ҳам жарнинг

ёқаси бу, эҳтиёт бўл, дейдиган одам бўлмаган Эшитишмча, ҳатто, мажбур қилингган. Сиз мажбур қилгансиз, Ҳайитвой Султонович! Бориб кўрдим, у жойда техника қоидасига эътибор бергандা ҳам ағдарилиб кетиш ҳеч гап эмас. Кейин арзимаган, ховучдек жой экан. Шунга трактор солишига мутлақо ҳожат йўқ эди Дамир Усмонович, — Содиқов Усмоновга мурожаат қилди.— Мен ўртоқ Бурҳоновнинг таклифига қарши эмасман. Гап қандай жазо олишда эмас, уни тушунишда Агарда Ҳайитвой Султонович қандай фалокат юз берганини тушунмасалар, баъзи одатларини ташламасалар, яна жиддий фожиалар юз бериши мумкин.

— Нега тушунмас эканман?— деди ёш боладек лабларини чўччайтириб Султонов.— Тушуниб турибман. Яхши бўлмади. Лекин бир нарсага тушунмаяпман. Энди нима, ҳеч нарса буюрма, деяпсизми? Унда раиснинг нима кераги бор колхозда?

— Ана кўрдингизми?— деди Содиқов Усмоновга.— Буюринг, ўртоқ Султонов, буюринг. Лекин ўйлаб буюринг. Одам ўлмайдиган қилиб буюринг.

— Ким одам ўлдирибди?— Султонов ўрнидан туриб кетди.— Мени қотил деяпсизми ҳали? Умримда чумчуқ ўлдирган одаммасман. Оғзингизга қараб галиринг, ўртоқ Содиқов.

— Бўлди,— уни тўхтатди Усмонов.— Бюрова ўтирганингизни унутманг, Ҳайитбой Султонович.

Султонов ғазабдан яна бирпаста тер босган пешонасини артиб жойинга ўтирди.

Содиқовдан сўнг, район прокурори Виктор Иванович Соколов сўвлади. Усмонов бу одамни кўпдан бери биларди. Носир Пўлатов, Сотиволди Полвоновлар тенги бу одам асли шу ерли бўлиб, Бодомсойни, унинг одамларини беш қўлдек биларди. Уруш бошланиши билан кўнгилли бўлиб фронтга кетган, Берлингача борган, қайтиб келиб, узоқ вақт республика прокуратурасида ишлаган, бундан саккизми, тўққиз йил муқаддам ўз ик-

тиёри билан Бодомсойга қайтиб келган эди. Область, республика газеталарида тез-тез унинг ахлоқ, тарбия масалаларига оид мақолалари чиқиб турарди. Республика адлия ишларининг тарихидан ёзилган ва ўқув юртларида кенг қўлланиладиган китоби ҳам бор эди.

Усмонов у билан биринчи марта заргар Мамашариф ота иши муносабати билан гаплашди. Виктор Иванович уни тўла қувватлади. Ўшандан бери Усмонов у билан энди учрашаётган эди. Диққат билан уни эшитар экан, щундай одам билан ишлаётганидан хурсанд бўлди. Алоҳида бир учрашишни дилига туғиб қўйди.

— Мени кечиринг, Ҳайтбой Султонович,— деди гапининг охирида Виктор Иванович.— Юридик жиҳатдан сизда мутлақо гуноҳ йўқ. Лекин сиз айбордосиз. Уни сиз мажбур қилгансиз. Буни кечириб бўлмайди. Қудрат Содиқовичдан бекорга хафа бўляпсиз. Сизнинг буйруғингиз туфайли одам ҳалок бўлди. Буйруқда ҳам буйруқ бор. Мен Козим Бурҳоновичнинг таклифига қўшилмайман. Жазо айбга қараб берилиши керак. Одам ўлими билан тугаган фожиа айбордига огоҳлантириш енгил жазо. Мен учёт қофозига ёзиш шарти билан ҳайфсан эълон қилишни таклиф қиласман.

Бюро тушгача давом этди. Деярли ҳамма бюро аъзолари гапиришди.

— Гапирасизми?— сўради шундан кейин Усмонович Султоновдан.

У зўрга ўрнидан турди.

— Бундай бўлишини кутмаган эдим,— деди у ердан бошини кўтармай. Унинг овози қалтиради.— Қим уни ўлсин дебди? Яхши йигит эди. Мехнаткаш. Қамтар. Қаҳрамон қиласман, деб юрувдим. Қаҳрамон бўларди. Менга осон дейсизларми? Болаларини кўрсам юрагим ачийди, ўзимни сўкаман. Ӯша жойга зиқналик қиласман имадилар, дедилар.. Йўқ тушуниб турибман. Лекин унинг ўзи ҳам эҳтиёт бўлиши керак эди-да!.. Емон ниятда

юбормаган эдим уни ўшаёқقا. Тағин юзтанинг ичидан уни танлаб юборган эдим!

Султонов гапим тамом, дегандек Усмоновга бир қараб қўйди-да, жойига ўтирди. Унинг бу қарашида Усмонов, ўз қилмишидан афсусланишдан кўра, марҳумга, унинг оиласига ачиниш пайқади. Гапида ҳам кўпроқ шунга аҳамият берди.

Хонага жимлик тушди. Ҳамма Усмоновнинг гапини кутиб туарди. Усмонов эса қўлидаги авторучкасини ўйнаганича, ўйга чўмган эди. Унинг назарида Содиқов ҳақ. Султонов қанча эзилмасин, фожианинг моҳиятига тушуммаган эди. У Бурҳонов каби тўғри гапирди, лекин бари бир унинг гапида одамга ҳурмат, унга ғамхўрлик сезилмади. Унинг учун бу фожиа бахтсиз ҳодиса эди, холос.

— Кеча Эргашевнинг хотинини кўрдим қасалхонада,— Усмонов шундай деб ўрнидан турди.— Биринчи куни, эрини олиб келишганда ҳам кўрган эдим. Биринчи куни ҳам, кеча ҳам унинг юзига қаролмадим. Уялдим қарагани. Мен урушда бўлмаганман. Лекин қайси бир қўмондоннинг китобида, жангдан сўнг солдатини йўқотган командирнинг йиғлаганини ўқиганман.

— Тўғри!— деди кимдир. Усмонов кимлигига эътибор бермади. Гали тўғрилигини биларди. Адашмаса, Маршал Коневнинг эсдаликларида ўқиган эди шу воқсани.

— Урушдаки шундай экан, тинчлик пайти яхши командир била туриб солдатини ўлимга юбормайди,— гапида давом этди Усмонов.— Буйруқсиз ҳеч қандай иш ғилиб бўлмайди. Бу тўғри. Лекин буйруқ кўр-кўронা берилмаслиги керак. Буйруғингизнинг бажарилишига кўзингиз етмаса, маслаҳат қилиш керак. Үртоқ Султонов, сиз ҳеч кимга қулоқ солмагансиз. Маслаҳат қилмагансиз. Эргашев, бригадир хавфларини айтишганда жеркиб бергансиз. Ўзбошимчалик, жоҳиллик оқибатда нимага олиб келгани ҳаммага маълум. Одам ўлди! Буни тушу-

ниш керак. Сиз ҳали ҳам тушунганингиз йўқ. Агар одамларга муносабатингизни ўзгартирмасангиз, ишлашингиз, колхозга, катта колхозга раҳбарлик қилишингиз қийин бўлади. Бизнинг ҳам сиз билан ишлашимиз қийин бўлади. Қозим Бурҳонович яхши таклиф киритдилар. Райком қошида комиссия тузиб, районда меҳнат ва техника хавфсизлиги қайси аҳволдалигини текширамиз. Бугунги бурио қарорини эса ҳамма хўжаликларга юборамиз. «Максим Горький» колхозидаги фожиа бошқа ҳеч қаерда, «Максим Горький»нинг ўзида ҳам қайтарилимагина керак. Таклифларни овозга қўяман. Биринчи таклиф «Максим Горький» колхозининг раиси ўртоқ Султоновни меҳнат ва техника хавфсизлиги қоидаларини бузганилиги, бу эса оқибатда одам ҳалокатига олиб келганлиги учун огоҳлантириш эди. Ким шу таклифга қўшилади?

Биринчи бўлиб Бурҳонов қўл кўтарди. «Ўз таклифидан овозга қўйдирмасдан воз кечиши мумкин эди»,— деди ўзича Усмонов.

Бурҳоновдан сўнг, район маориф бўлимининг мудири қўл кўтарди. Бу одамни Усмонов ҳали яхши билмас эди. Бир-икки марта кўрган эди мажлисларда. Эшлишича, узоқ йиллардан бери ишларди районда. Лекин қандай ишларди? Буни Усмонов ҳали билмас эди. Усмонов унга қаради-ю, ижирғаниб кетди.

Унинг иккала кўзи Бурҳоновда эди.

Бошқа ҳеч ким биринчи таклиф учун овоз бермади. Султоновга учёт қофозига ёзиш шарти билан ҳайфсан эълон қилинди.

Бюргора қўйилган ҳамма масалалар ўйланган, мўлжаллангандек ўтди. Лекин Усмоновнинг негадир кўнгли хижил эди. У кечгача бунинг сабабини билолмади. Кечга яқин олдига Бурҳонов кирди. У анчагина ланж эди.

— Менда ишнингиз йўқми?— сўради у.

— Йўқ. Нима эди?— Усмонов ўрнидан туриб унинг ёнига борди.

— Бир оз бошим оғриб турибди. Ётсам дейман.

— Боринг, боринг,— деди Усмонов.

Бурҳонов чиқиб кетди. У кетиши билан Усмоновнинг фикрлари ойдинлашди. Бурҳоновнинг бюродаги гаплари уни хуноб қилган эди. Султонов билан уларнинг яқинлигини эшигтан эди. Лекин наҳотки бу яқинлик шунчалик ишга путур етказадиган, партия органининг обрўйи, шаънига доғ туширадиган даражада бўлса?! Бугунги бюрга кўпчилик хўжалик раҳбарлари чақирилганини ҳисобга олганда, очиқдан-очиқ Султоновнинг ёнини олиб районнинг иккинчи секретари хатога йўл қўйган эди. Буни у тушунганимикан? Тушумаса, тушунармикан?

Усмонов Бурҳонов билан ёлғиз гаплашишини юрагига туғиб қўйди. Бир нарса унга аниқ эди. Бурҳонов у ўйлаганча содда эмас, тажрибали, кўпни биладиган мураккаб одам эди. Нияти нима унинг? Кимдан хафа? Нега? Нима учун аслида қаҳри қаттиқ одам ўзини бунчалик «одампарвар» қилиб кўрсатяпти?

XII

Бодомсойга баҳор эрта келди. Анчадан бери ҳаво илиқ турганлиги, ерга қор кам тушганлигидан қир, адирлар усти кўкат билан қопланиб кетганлиги сезилмади. Баҳор келганлиги эртаги ўрникнинг тўлиб турган куртаклари бирдан бодроқдек очилиб кетганлигидан билинди аввал. Шошқалоқ дехқонни алдайдиган, дангасани эса куйдирадиган дамлар бошланди.

Районнинг кенгайтирилган партия хўжалик активи йиғилишига Искандар Фёйибович ўзи қатнашди. Усмонов ундан кўнглида миннатдор бўлди. Чунки бу актив унинг янги вазифадаги биринчи йирик мажлиси эди. Қўзилатишнинг бориши ҳақида иккни-уч хўжаликнинг ҳисоботи тингланди. Бу масалада районнинг аҳволи ёмон

эмас эди. План бажарилиши аниқ. Сўзга чиққанлар орасида Ҳайитвой Султонов ҳам бўлди. «Максим Горький»чилар мажбуриятдагидан ташқари яна минг тонна пахта теришга аҳд қилишганини айтди.

Залда қарсак кўтарилиб кетди.

Султонов қойил қилдимми, дегандек ўзи ҳам бирпас минбар олдида қарсак чалиб турди.

Усмонов Султоновнинг гапини чин юракдан севиниб олқишилади. Минг тонна қўшимча пахта бериш катта иш эди. У яна бир марта Ҳайитвой аканинг ишбилар-мөнлигига, пухта раислардан эканлигига, райондагина эмас, республикада ҳам бекорга катта обрўга эга эмаслигига ишонди. Унинг ҳар бир катта йиғинга биронта янгилик билан боришини эшитган эди, бугун эса ўзи гувоҳ бўлди. Аммо кўнглининг қаериладир ранжиди. Шундай зарур, қимматли таклифи бор экан, бир оғиз райкомни йиғилишдан олдин хабардор қилса, бўлмасмиди? Нима учун йиғилишни пойлади? Яна обрў орттириш учунми? Агар у райкомни хабардор қилганида, бошқа хўжалик раҳбарларига ҳам мажбуриятларингни ўйлаб кўрларинг, дейиларди. Район ҳам қурултойдагига қўшимча мажбурият оларди. Минг тонна қўшимча пахта яхши гап, зарур гап, лекин бу ваъда обрўталаб одамнинг ваъдаси. Ёрайонга айтганмикун у? Масалан, Бурҳоновга? Иккаловларининг оралари яхши. Султонов райкомга келганда аввал Бурҳоновнинг кабинетига киради. Агар айтган бўлса, Бурҳонов бугун катта хатога йўл қўйди. Албатта бошқа хўжаликларининг ҳам қўшимча мажбуриятларини чамалаб чиқиш керак эди, районнинг мажбуриятини ҳам.

Султонов минбардан тушаётганда, Искандар Фойибович баланд овозда Усмоновдан сўради:

— Хўш, район-чи? Районнинг мўлжали қандай?—
У шундай деб жилмайди.

Залга жимлик чўкди. Ву савол ҳаммани ўйлатиб қўйган эди. Усмонов ҳам ўйланиб қолган, тўғрироғи, у бу

саволга тайёр эмас эди. Султонов ўз таклифи билан кўпчиликни, шу жумладан уни ҳам ноқулай аҳволга солиб қўйгандан у яна ранжиди.

Жимлик узоқ чўзилдими, ё Усмоновга ёрдам бергиси келдими, Бурҳонов салмоқ билан деди:

— Искандар Фойибович!.. Мўлжалимиз олти минг. Ундан ҳам ошса керак...

— Биринчি секретарь нима дейди?— сўради яна Искандар Фойибович.

Усмонов оҳиста ўрнидан турди. Бутун зал унга тикилиб қолган эди. У ҳозир, Козим Бурҳонович тўғри айтдилар, мўлжалимиз шу, дейиши мумкин эди. Кўпчилик шу жавобни кутган ҳам эди. Аммо Усмонов бундай демади. У ўзининг дилидаги гапини айтиши керак эди. Чунки Бурҳоновнинг жавоби у билан, райком билан, биронта хўжалик раҳбари билан келишилмаган жавоб эди, катта тажрибага эга бўлган одамнинг шахсий мўлжали эди. Усмоновнинг назарида обком секретари ҳам, актив ҳам бундай жавобга муҳтож эмас эди. Улар аниқ жавобни кутишарди.

— Ҳайитвой ака яхши таклиф билан чиқдилар,— деди у.— Минг тонна катта гап. Лекин бу ҳали ваъда. Райондаги деярли ҳамма хўжаликларнинг дилларида шундай ваъда бор. Мен бунга аминман.

Залда «тўғри, тўғри!» деган овозлар эши билди.

— Районнинг ҳам мўлжали бор. Ҳозир айтиш қийин. Аниқ гапни, Искандар Фойибович, биз сизга чигитни экиб бўлиб айтамиз. Ишонишингиз мумкин, бодомсойликлар мажбуриятларини қайтадан кўриб чиқадилар.

Гулдурос қарсак кўтарилиб кетди. Усмонов беихтиёр Искандар Фойибовичга қаради. Обком секретарининг очиқ чеҳраси, кулиб турган кўзлари жавобдан мамнун эканлигини билдириб турарди.

Активдан сўнг, Искандар Фойибович жўнаётиб, ҳазил қилди.

— Дамир Усмонович, сиздан яхши партия ходими

чиқишига ишонардим. Билмас эканман, яхшигина дипломат ҳам экансиз...

Усмонов қизарип кетди.

— Тўғри жавоб қилдингиз. Султоновнинг ташаббу-
сидан райком хабардормиди?

— Йўқ.

— Шундай бўлса керак, деб ўйловдим. Ташаббус
яхши нарса, лекин уни бошқариш керак. Актив яхши
ўтди. Табриклайман. Лекин, бир нарсанни айтиб қўйяй.
Штамп пайдо бўлиб қоляпти активларимизда. Бодом-
сойда ҳам шундай. Ким сўзга чиқиши маълум, ҳатто
нимадейниши ҳам маълум. Охириг маслаҳат. Нега сиз-
га ажратилган уйга кўчмаяпсиз? Районнинг биринчи
секретари районга меҳмон эмас. Районнинг отаси, оила
бошлиғи. У меҳмонхонада туриши яхши эмас. Келиш-
дикми?

Усмонов бош иргади. Искандар Фойибович жўнаб
кетди. Аммо анчагача Усмонов жойидан қўзғалмай қол-
ди. Қанчадан-қанча ишларни у ҳали билмас экан, қан-
ча нарсанни у ҳали ўрганиши, мушоҳада қилиши керак
экан. Бодомсойга келишга розилик бериб, у тўғри қил-
дими? Бу савол яна унинг хаёлидан ўтди ва чуқур ўйга
толди. Лекин қанча ўйламасин, чекинишга энди ўрин йўқ
эди. Қай юз билан эплолмаяпман, мени бўшатинглар
дейди? Искандар Фойибовичга, унга катта ишонч билан
қараган одамга шу гапни қандай айтади? Одамлар ни-
ма дейди? Партия иши сизга ўйинчоқми, демайдими?
Онаси, Ҳафиза, нима дейди? Албатта Ҳафизанинг нима
дэйишини таҳминан биларди. Яхши бўлди, шундан ҳам
ўтишингиз керак эди, ўтдингиз. Энди тинчгина Спита-
менингиз билан шуғулланасиз, дейди. Лекин бари бир
дилида унинг ожизлик қилганидан ўксинади. У ўксинма-
са ҳам, Усмонов шундай ўйлайди. Онаси эса албатта
уни уришади. Ким хато қилмабди, дейди. Ҳозир олдин-
ги замон эмас, арзимаган нарсага одамларни олиб бо-
риб келадиган. Ношукур бўлмасдан, қийинчиликларга

чида б, билмаганингни уялмасдан сўраб ишлашинг ке-
рак. Отанг тирик бўлганда шундай маслаҳат берарди,
дейди. Исмоилжон ҳам ундан хафа бўлади. Хуллас,
ҳамма, уни ҳурмат қиласиганларнинг ҳаммаси унинг
қароридан ҳайрон бўлишади ва афсусланишади. Уни
ёмон кўрадиган, унга ҳасад қиласиганлар-чи? Уларнинг
боши осмонга етади. Масалан, Долимов. У чапак чала-
ди. Мана обком эркасининг аҳволи, деб кулади. Йўқ,
чекинишга энди ўрин йўқ. У ишлаши керак. Тунни тун,
кунни кун демай, ишлаши керак. Тажриба иш билан
келади. Бунинг устига, нега энди хато қилиб қўйдим, деб
бунчалик эзилиши, қатъий қарорга келиши керак? Иш
бор жойда хато бор, дейишади-ку ахир? Ким бирданига
ҳам тажрибали, ҳам ақлли, ҳамма ишни ипидан игнаси-
гача биладиган секретарь бўлиши мумкин? Шундайлар
бор, йўқ эмас. Хўп, Усмонов шундайлардан эмас. Нима
бўлибди? Вақт ўтиши билан у кўп нарсанинг тагига ета-
ди, маълумоти ортади, районни яхши билиб олади. Ана
ўшанда ҳам, тўрт-беш йил ўтгандан кейин ҳам арзима-
ган нарсаларда хато қиласиган бўлса, бўшаб кетиш қи-
йин эмас. Қасби бор, яхши касб, ўзи севадиган касб —
ўқитувчилигини қиласаверади...

Район ижроия комитетининг раиси Қудрат Содиқов
унинг хаёлни бўлди. Усмонов унинг анчадан бери тур-
ганлигини сезмаган эди.

— Дамир Усмонович... кечирасиз... Бугун энди... ян-
ги уйга кўчмасангиз бўлмайди... Искандар Фойибович
уришиб кетдилар.

— Ҳа, ҳа... — деди ўз хаёлларидан бўшашга интилиб
Усмонов. — Кўчиш керак. Ӯша уйми?

Бу саволни Содиқов ўзича тушунди.

— Бошқа уй ҳам бор, халқ контроли раиси турган
эди. Яхши уй. Лекин озгина ремонт талаб қиласиди. Ўртоқ
^{*Бурҳоновнинг ёнларида.}

— Йўқ, йўқ, Ӯша уйнинг ўзи бўлаверади.

— Бўлмаса айтаман, ҳозироқ мәҳмонхонадаги нар-
саларингизни олиб ўтишсин.

Усмонов бош қимирлатди, аммо унинг охирги гапини
эшифтмади, хаёлига бир фикр келган эди.

— Құдрат Саймович, бир маслаҳат бор... Бугунги
активдан кейин яна мажлис чақириш назаримда тўғри
келмайди, айниқса шу кунларда. Қўшимча мажбурият
масаласини ҳар бир хўжаликнинг ўзига бориб ҳал қилас-
сан, нима дейсиз?

— Жуда яхши,— уни қувватлади Содиқов.— Мен
ҳам шу фикрни юрагимга туғиб қўйган эдим. Бу ерда
гаплашиш бир бошқа, хўжаликларнинг ўзида бир бош-
қа. Жавобгарлик кучаяди.— Райкомнинг биринчи сек-
ретари у билан тенг туриб, маслаҳатлашаётганиданми,
ё ўзида Усмоновга нисбатан яқинлик сездими, доимо бир
чеккада камтарлик қилиб турадиган Құдрат Саймович
очилиб кетди.— Кўп раислар билан гаплашдим, жаво-
бингиздан хурсанд.

Усмонов ростданми, дегандек унга тикилиб қаради.
Искандар Фойибовичнинг жавобингиз тўғри дегани,
уни ранжитмаслик, кўпчилик олдида обрўйини тўкмас-
лик учун айтилган гапдек туюлган эди ва у чиндан ҳам
тўғри жавоб қилганлигини ўзи билса ҳам, бошқаларнинг
қувватлашини истарди. Содиқов уни тушунди, шекилли,
қўзини олиб қочмади.

— Гаплашганларимнинг ҳаммаси хурсанд,— қайтар-
ди у.— Ҳозир эрта аниқ гапни айтишга. Ҳозирги гап қу-
руқ ваъдабозлик. Ҳайитвой aka ваъдага сахий одам. Ке-
йин, яхши билади, ҳозирги ваъда хатга тушмайди,
жавобгарлиги йўқ. Қўрамиз қани, бир ойдан кейин нима
дер экан...

Усмоновнинг кўнгли анча ёришди. Буни сезган Соди-
қов яна кўчиш масаласига қайтди:

— Юкларни олиб ўтаверишсин бўлмаса, а? Меним-
ча Ҳафиза Раҳимовнага уй ёқади. Ёруғ, офтобга қараб
тушган...

— Демак, уй исполком ихтиёридаги уй? — сўради Усмонов.

У бу саволни биринчи марта бераётгани йўқ эди. Район марказидан бир километрча ичкариликда, тинч, боши берк кўча ичидағи кичкина ҳовли, бу уйни бориб кўрганда ҳам, лекин негадир кўчмай, меҳмонхонада турганда ҳам бу саволни берган эди. Буни фақат унгагина маълум бўлган сабаблари бор эди. Биринчи сабаби — унинг характеристи, одатига хос сабаб эди: у тутилган нарсаларни олишни ёмон кўрарди. Студентлик йиллари онаси унга кийим-бошни арzonроқ бўлгани учун комиссиян магазинлардан оларди. Ўнинчи синфдамиди, қиши қаттиқ келди. Унинг эса фуражкадан бошқа бошига киядиган ҳеч нарсаси йўқ эди. Онаси бор пулинни йиғиб қундуз телпак олиб келди. Керакмас, деганига қўймади. Телпак расмана телпак эди. Лекин Усмонов уни қўлига олиши билан нафталин аралаш аччиқ тер ҳиди «гуп» этиб димоғига урилди. У ижирганиб кўзларини юмди. Телпакнинг эгаси яхши одам эмас эди унинг тасаввўнида. Яхши одамда бундай ҳид бўлмайди. У шундай ўйлади-ю, телпакни киймади. Лекин кўнгил айнитадиган ўша аччиқ ҳид узоқ йиллар димоғида қолди. Шу-шу тутилган нарсани у киймайдиган бўлди, онаси ҳам шундай нарсаларни олишдан воз кечди. Унинг назарида эски уй ҳам бирорвонинг устидан ечилган кийимдек эди. Бодомсойда шунинг учун у эски уйга киргиси йўқ эди. Бир кунмас бир кун у албатта ўзи янги уй қуради ёки биронта шаҳарга кўчмоқчи бўлган одам билан алмашади. Аммо ҳозирча Искандар Гойибовичнинг сўзини иккита қилмаслик керак эди. Қудрат Саимовичнинг ишонтиришича, уй ҳеч кимдан тортиб олинган эмас, эгаси шаҳарга ишга ўтган, уй ижроия комитет ихтиёридаги уй, кўчмасликка ҳеч қандай сабаб йўқ эди.

Қудрат Саимович илгари айтганларини яна бир марта тасдиқлади:

— Куздан берін бүш турибди. Исполкомнинг қарори билан сизга берилган. Қалити менда. Истасангиз қарори кўрсатишим мумкин...

— Ҳожати йўқ,— деди Усмонов.— Бўпти. Бугуноқ кўчиб кираман.

Бу гап билан у оғир юқдан халос бўлган одамдек ўз кабинетига кўтарилди.

Кун энди пешиндан оғган. Далада ҳам, райкомда ҳам иш қизгин эди. Усмоновни ҳам талайгина қоғозлар, илтимослар, қанчадан қанча ҳал қилиниши лозим бўлган масалалар кутиб турарди. Демак, бешгача стол устида йиғилиб қолган қоғозларни кўриб чиқиши, тасдиқлаши, иш юзасидан келган ва қабулхонани тўлдириб турган одамлар билан гаплашиши керак эди.

Биринчи қоғозни қўлига олиши билан уй ҳам, ҳозиргина уни жиддий мулоҳазаларга олиб борган хаёллар ҳам унутилиб кетди. Иш уни ҳамма иккиланишлардан халос этди. Биринчи қўлига олган қоғоз — 1919 йилдан берি партия аъзоси, шахсий пенсионердан унинг номига ёзилган хат эди. Хат узундан узоқ бўлиб, асосан гражданлар уруши даврида Бодомсойда бўлган воқеалар ёзилган эди. Хат муаллифи шу воқеаларнинг актив қатнашчиси бўлиб, инқилоб арбобларидан М. В. Фрунзе, И. Охунбобоев, В. М. Қуйбишев ва бошқалар билан учрашган, шу одамлар бир неча марта унинг уйида бўлишган эди. Хатда ёзилишича, хат эгасида кўпгина тарихий суратлар ва қоғозлар бор. Муаллиф шу ҳужжатларнинг тақдирига қайғуриб, уйини музейга айлантиришин таклиф этган эди. Бу таклиф билан у кўп марта, кўп жойларга мурожаат қилган, лекин жавоб олган эмас. «Сизни асли тарихчисиз, деб эшитдим,— деб ёзилган эди хатда. Усмонов кулиб қўйди. Ўзига аён бўлмаган нарса ҳалқ ичидаги аллақачон ёйилиб кетган эди.— Шунинг учун мени яхши тушунарсиз, деб ўйлайман. Бир-икки йиллик умрим қолди. Қимматли ҳужжатлар мендан кейин йўқолиб кетишидан қўрқаман».

Усмонов хатни ўқиб бўлиб, яна бир марта адресига қаради: Бодомзор кўча, уй номери ўттиз бир. Абдували Иноғамов. «Бориб келиш керак экан,— хаёлидан ўтказди.— Чиндан ҳам қимматли ҳужжатлар бўлиши мумкин».

Иккинчи қоғоз — Сайдмурод Ишимовнинг ҳужжатлари эди. Автобиографияси. Мукофотга тақдим этилган қоғозлари. Улар кўп эди. Биринчиси 1972 йили тўлатилган, зиҳлари ҳатто сарфайиб кетган эди. Колхоз берган характеристикалар ҳам шу аҳволда эди. Лекин ҳеч қайси характеристикада райкомнинг имзоси йўқ эди. Мукофотга тақдим этилган номзодлар кўриб чиқилаётганда, бу ҳужжатлар четда қолаверган, шу идорадан юқорига кўтарилмаган...

Усмонов селектор тугмасини босди.

Козим Бурҳонович, мумкин бўлса бир минутга... кириб кетсангиз...

У шундай деди-ю, шошилаётганини сезди. Исмоилжоннинг келишини, унинг Ишимов ҳақидаги материали газетада чиқишини кутиши керак эди. Бир ҳисобда Бурҳоновни чақириб тўғри қилди. Масаланинг ойдинлашгани яхши. Кейин, нима учун албатта материал чиқишини кутиш керак? Райкомнинг сўзига ким ишонмайди?

— Эшитаман.

Бурҳонов шундай деб эшикдаҳ кирди-да, ёзув столи ёнидаги креслога ўтирди. Унинг бутун вужудида, ҳарачатида, семиз қўлинин стол устига қўйиб, калта бармоқлари билан оҳиста стол чертишида хотиржамлик, ўзиға ишонч сезилиб турарди.

— Сиздан бир нарсани сўрамоқчи эдим...— худди шундай хотиржамлик билан деди Усмонов.— Манави ҳужжатлар нега тақдим этилмаган?

— Нима экан булар?

Бурҳонов қошларини чимириб, бошини кўтарди-да, ҳужжатларга қаради. Усмонов уларни узатди.

— Анча йифилиб қолибди...

— Бу Ишимовнинг ҳужжатлари-ку? — қофозларни варақлар экан, деди Бурҳонов.— Ҳа, Сайдмурод Ишимов. «Шарқ юлдузи»нинг чўпони. Шикоят қилишидими?

Бурҳонов лабининг бир чети билан жилмайди.

— Йўқ, «Шарқ юлдузи»га борганимда ўзим билдим. Бунинг аҳамияти йўқ,— деди Усмонов.— Гап шундаки, тўрт йилдан бери унга қофозлар тўлатилади, лекин райкомдан нарига ўтмайди.

— Тўғри,— Бурҳонов ҳужжатларни Усмоновнинг олдига қўйди.— Ишимовни мукофотга тақдим этиб бўлмайди. Сотиволди Польвонов уни ҳатто қаҳрамон қилмоқчи бўлиб юрибди.

— Нега тақдим қилиб бўлмайди?— сўради Усмонов.— Иши яхши. Ҳар қандай мукофотга арзиди.

— Иши яхши. Лекин мукофотга тақдим этиб бўлмайди. Райком бунга қарши.

— Нега?— ўзини худди Бурҳоновдек оғир тутишга интилиб сўради Усмонов.

— Ишимов узоқ йиллар асирида бўлган.

— Хўш, нима бўпти?

Бурҳонов ҳайрон бўлиб унга қаради.

— Менинча шунинг ўзи кифоя.

— Райком аъзоларининг ҳаммаси шу фикрдами?

— Ҳозир аниқ айттолмайман, лекин бу масала бюроға қўйилган. Масалан, ўртоқ Султонов шу фикрда. Прокурор шу фикрда эди.

— Асирида унинг нима қилганини биласизми?

— Сотиволди аканинг гапига қараганда, жуда кўп қаҳрамонликлар қилганниш. Лекин бу гап, миш-миш, Дамир Усмонович. Райком мини-мишларга қараб иш тутолмайди.

— Райком одамларнинг тақдирига ҳам бефарқ қаромайди! Унинг тақдири билан шуғулланади, тойса

қўлидан тортади, гуноҳ қилса гуноҳига яраша жазолайди... Лекин унинг тақдири ёзилган ҳужжатларни сарғайтириб ўтирумайди!

Усмонов бу гапларни ёниб, аммо ташқи осойишталигини йўқотмай гапирди.

— Бунга фақат унинг ўзи айбдор,— ҳамон хотиржамлигини йўқотмай деди Бурҳонов.— Асирга ўзи тушмаса, бирор унинг қўлидан тортибдими?!

— Урушда нималар бўлмайди, Козим Бурҳонович. Тўғри, ўз хоҳиши билан асир тушган хонилар бўлган. Бир сиқим она тупроғига зор бўлиб юрибди баъзилар ҳали ҳам. Лекин Ишимовни мен шу қаторга қўшолмайман. У соғ одам. Башарааси айтиб турибди.

— Мени тўғри тушунинг, Дамир Усмонович,— илжайди Бурҳонов.— Мен ҳам унга ачинаман. Меҳнаткаш одам, илғор чўпонлардан, қолаверса аллақачон қаҳрамон бўлган чўпонлардан қолишадиган жойи йўқ. Лекин у ёқларда нима қилганини биз билмаймиз. Биронта гувоҳ, биронта далил йўқ.

«Ҳа, бу одам билан гаплашиш қийин,— хаёлидан ўтказди Усмонов.— У фақат қофоз билан иш қилади, қофозга ишонади...»

— Ўйига қора хат келган, қаҳрамонларча ҳалок бўлди, деб. Бу далил эмасми?

— Уруш пайти қора хатлар жуда кўп келган,— аввалгилик сокин инжиқлик билан деди Бурҳонов.— Битта ундан эмас. Лекин қора хат эгаларининг кўпчилиги чиндан ҳам ҳалок бўлишган, ё кўп ўтмай ўзлари хат ёзишган, ё кириб келишган уруш тугаши билан. Баъзи оғир ярадорлардан ҳам ўлди, деб хат келган. Асирга тушиб кетгани деярли бўлмаган. Асирга тушганлар ҳақида одатда бедарак йўқолди, деган хатлар келган. Бу одам, Ишимов, уруш тугагандан анча кейин қайтиб келди. Буларнинг фарқи бор. Омон қайтиб келибди, яхши. Ишлайверсин. Меҳнат билан гуноҳини ювсин. Ёниғлиқ қозон ёниғлиқ қолаверсин, дейиш, ўтмишни унутиш тўғри эмас.

Тагин ҳам биз унга яхшилик қилдик, тегмадик, суритирмадик. Шунинг ўзи халқининг, давлат, партияниңг унга қилган ҳиммати. Агар буни тушуммаган бўлса, мен яқинда «Шарқ юлдузи»га бормоқчиман, тушунтириб қўяман.

— Ҳожати йўқ,— деди бўшашиб Усмонов. Уннинг кўз олдидан отасини олиб кетгани келган одамлар ўтди. Уларнинг башарадари эсида йўқ. Қоронги эди, уйқу аралаш уларга эътибор бермаган эди, бутун диққати уни бағрига босган отасида эди.— Ҳожати йўқ, Қозим Бурҳонович. Бу одамнинг иши билан сиз энди шуғулланмайсиз. Мен ўзим шуғулланаман. Бу одамнинг соғлигига, асирикда бизга қарши биронта иш қилмаганига, аксинча фақат юртини ўйлаб иш тутганига аминман. Билмадим, хабарингиз борми, йўқми, Зиямат Ҳусанов деган бир одам ҳақида фильм чиқди.

— Йўқ,— деди Бурҳонов.

— Мен телевизорда кўрдим. Курскда асир тушган. Оғир жангда, қўл жангда. Уйига қаҳрамонларча ҳалок бўлди, деб хабар келган. Асирикдан қочган. Болгар партизанлари отрядида немисларга қарши курашган. Урушдан кейин уйига қайтган. Шу одамга давлатимиз, партияниң Совет Иттифоқи Қаҳрамони деган увон берди яқинда. Сиз бўшсиз, Қозим Бурҳонович...

Бурҳонов индамай чиқиб кетди. Усмонов анчагача ўзига келолмай ўтиарди.

Шу одам билан у ишлаши керак. Бир йилмас, икки йилмас, узоқ йиллар. Қийин бўлади, лекин ишлаши керак. Қизиқ, битта Ишимовнинг ҳужжатларини олиб қолганимикан у? Ё бошқа «куйган»лар ҳам бўлганимикан? Текшириб кўриш керак. Бу одам ўз хоҳиши билан нима қилса қилган. Райком номидан, партия номидан!..

Усмонов шу хаёллар билан ўтиарар экан, нима учун обком уни, Бурҳоновни биринчи секретарликка тавсия қилмаганини англади. Демак, уннинг қандайлигини яхши билишади. Бу одамга эрк бериш хавфли. У доим назо-

ратда бўлиши керак. Усмонов учун бу қўшимча ташвиш эди. Районда Бурҳоновни фақат у назорат қилиши мумкин. Бошқанинг на танқидини, на маслаҳатини у инобатга олади. Усмоновга ҳам унинг қулоқ солиши қийин бўлади. Лекин мажбур қилиши керак. Қоғозни, фактлағни яхши кўрадими, қоғоз билан, фактлар билан уни енгиш керак. Лозим бўлса ўз мавқеъини ишга солиш керак. Унинг Бурҳонов устидан биринчи ғалабаси — Ишимов иши бўлади. Демак шу иш билан жиддий шуғулланishi керак...

Селектордан қабулхона секретарининг овози эшилтилди:

— Дамир Усмонович, шахсий масалалар бўйича одамларни қабул қиласизми? Соат беш бўлди.

— Ҳа, қабул қиласиз.

— Беш киши. Биринчи Носир Пўлатович кирмоқчилар.

— Чақиринг.

Усм нов шундай дели-ю, ўзи ўрнидан туриб, эшикка йўл олчи.

— Нега энди кирмай турибсиз, Носир Пўлатович? Ассалому алайкум! Қиравермайсизми?

— Ҳамма қатори, Дамир Усмонович. Яхшимисиз!

Улар эски қадрдонлардек кўришишди.

— Шахсий масала билан келганман.

— Қани, ичкарига!

Усмонов қўлида ҳасса бўлса ҳам, унга таянмай қабулхона ўртасида турган Пўлатовни қўлтиғидан олиб, кабинетига бошлади.

— Соғлиғингиз қалай? Кўринишингиз жуда яхши, Носир Пўлатович!

— Раҳмат, тузукман.

Улар мажлис столи қаршисидаги диванга ўтиришиди.

— Назаримда ҳеч қандай касалдан асорат қолма-

ди,— деди Пўлатов.— Баъзи баъзида фақат бош оғриб туради. Бу ҳам ўтиб кетса керак.

— Ўтиб кетади,— далда берди Усмонов.

— Хўш, ўзингиз қалайсиз?— сўради Пўлатов унга синчиклаб тикилиб.

— Раҳмат, секин-секин...— жилмайди Усмонов.

— Секин-секинмас, яхши кетяпти ишингиз! Район телеграфи яхши ишлайди. Ҳар бир қадамингиздан одамлар хабардор. Жумладан, мен ҳам. «Максим Горький»-даги тракторчининг ишига аралашиб тўғри қилгансиз. Одамларда бу яхши таассурот қолдирди. Мамашариф отанинг ҳам ҳожатини чиқариб яхши иш қилдингиз. Одамлар бунаقا ишларни унутмайди.

Усмонов хурсанд бўлиб кетди. Носир Пўлатовичнинг самимий гапираётганини у биларди. Фақат шунча вақтдан бери ўзи бориб уни кўрмаганидан хафа бўлди. Бормоқчи эди, кўп нарсаларни у билан маслаҳатлашмоқчи эди, аммо негадир тортиниб турарди. Пўлатовнинг очиқ чеҳрасини, самимий, худди ўз акаси, яқин кишиси сифатида гаплашаётганини кўриб, бормаганига ачинди.

— Раҳмат, Носир Пўлатович,— деди у миннатдор оҳангда.— Қўлимдан келганича районни, одамларни ўрганишга ҳаракат қиляпман. Лекин назаримда ҳеч нарсанинг уддасидан чиқолмаяпман ҳали.

— Ўзингизга шундай туюлаётгандир,— уни бўлди Пўлатов.— Шамол бўлмаса дараҳтнинг учи қимирамайди. Улгурган ишларингиз халққа маълум. Халқ ўзининг холосасини чиқариб бўлган. Сизнинг келганингиздан хурсанд. Мен ҳам хурсандман.

— Раҳмат, Носир Пўлатович,— деди яна миннатдор оҳангда Усмонов.— Мен ҳам шу ерга келганимдан хурсандман. Ишончларингни оқлашга ҳаракат қиласман қўлимдан келганича. Кўп нарсалар ҳали менга қоронғи. Бормоқчи эдим олдингизга маслаҳат қилгани...

— Бемалол,— деди Пўлатов.— Йстаган пайтингиз хизматингиздаман. Ҳозир мен ўзим маслаҳатга келдим.

— Эшитаман,— деди Усмонов.

— Анчадан бери бир орзум бор эди,— гапида давом этди Пўлатов.— «Максим Горький» колхозининг қирга туташ ерлари кўп йиллардан бери бекор ётибди. Сув чиқмайди у томонга, экин қилиш қийин. Райкомдалик пайтимда Султоновга кўп айтдим, шу жойларни ўзластириб, боғ қиласайлик деб. Хўп, хўп, деди-ю, қилмади. Унинг бунаقا ишларга тоқати йўқ. Унга тайёр колхозни қўшиб берсангиз йўқ демайди, янги ер очишга тоқати йўқ. Шу орзу ҳалиям мени қийнаб келади. Мана энди тузукман, бунинг устига бўшман. Агар хўп десангиз, шу жойни беш-ўнта йигит билан ўзим чиқиб очсан. Бир эсадалик бўлиб қоларди. Тўрт-беш йилда ажойиб боғ пайдо бўларди. Кейинчалик ёнига кичкина бир консерва заводи қуриш мумкин. Беш юз, олти юз гектар ер очса бўлади ўша томонда. Росмана бир мевачилик совхозининг ери. Совхознинг номини ҳам топиб қўйганман: Бодомсой! Райком шунга розилик берса, шу кунларданоқ иш бошлаб юбориш мумкин. Талабгорлар топилади.

Усмонов ўйланиб қолди. Собиқ секретарь жуда яхши таклиф билан келган эди. Аммо у эплай олармикан? Соғман деяпти, лекин касали борлигини у яхши биларди, Искандар Фойивович айтган эди.

— Биламан, бу таклифга қаршилар ҳам бор, райкомнинг ўзида ҳам,— унинг мулоҳазаларини сезгандек деди Пўлатов.— Касалманд одам дейишади, шундай совхозга ҳожат борми, дейишади. Қалтабинлар шундай дейди. Менинг соғлиғим масаласига келгандা, гап бошлаб юборишда! Бунга жуда катта соғлиқ керак эмас. Кейин ким давом эттирса эттираверсин. Бошлаб олсак бўлди. Бу масала,— Пўлатов жилмайди,— уйда келин-ойингиз билан келишилган. У ўзи ҳам бормоқчи. Чайла қуриб, ёшлигимизни қўмсаб, ишламоқчимиз эр-хотин. Нима дедингиз, Дамир Усмонович?

Пўлатов шундай деб Усмоновга тикилди. Усмоноғ ҳам унга завқ билан қарап экан, ўзини тутолмай деди:

— Сизга ҳавасим келади, Носир Пўлатович! Орзу-
ингизни бирга амалга оширамиз!

Усмонов Бодомсойга келганидан бери, бунчалик хур-
санд бўлмаган эди. Унинг фаолиятида янги, фақат унга
алоқадор ишлар бошланмоқда эди. Бу ишларнинг бит-
таси Пўлатовнинг таклифи эди. Совхоз ташкил этилади.
Бунга у жон-жаҳди билан киришади, Пўлатовга бор им-
кониятларни яратиб беради. «Бодомсой» совхози!.. Яхши
ўйлабди Носир Пўлатович. Эски гвардияда ҳали гап
кўп. Ким билади, районда балки юрагида очилмай тур-
ган режалари бор одамлар кўпдир? Имкониятлари бўл-
магандир уларни очишга, балки қулоқ соладиган одам
бўлмагандир?

Усмонов шундай ўйлар экан, ҳалигина хатини ўқи-
ган кекса пенсионер эсига тушди. Албатта у билан Ўс-
моновнинг ўзи учрашиши керак. Шу кунлардаёқ уч-
рашади. Бундай одамлар азиз, табаррук бўлиб қолди
ҳозир. Ўша бўронли даврни бошидан кечирғанлар бар-
моқ билан санарли. Қанчасининг тарихи, қанчасининг
билими ўзи билан кетди экан қабрга?..

Усмонов сўнгги одамни қабул қилиб, энди кетмоқчи
бўлиб турганида, райкомнинг идеология бўйича секре-
тари Холёр Алиев кириб келди.

— Менинг ҳам шахсий ишим бор эди, Дамир Усмо-
нович, қабул қиласизми?— деди у ийманиб.

— Марҳамат, келинг Холёр Алиевич.

Усмонов у билан эрталаб кўришган бўлса ҳам қў-
лини узатди ва диванга ўтирас экан, ёнидан жой қўр-
сатди.

— Тинчликми?

— Тинчлик,— уялинқираб жилмайди Алиев.— Да-
мир Усмонович... Кўпдан бери сизни холи учратмоқчи
эдим... Сиз мени тушунасиз, деб ўйлайман. Мен, Дамир
Усмонович, кўп ўйладим. Назаримда... эски ишимга
қайтганим маъқул....

— Нега?— беихтиёр сўради Усмонов.

— Афтидан менга оғирлик қиляпты бу иш...

Алиев жимиб қолди. Усмонов бундай қарорни ундан кутмаган эди. Қамтар, камган бу одам доимо биронта иш билан банд бўлар, Усмонов уни чақирганда, кўпинча ё мактабда, ё биронта клубда бўлар эди. Биринчи иш куни «Максим Горький» номидаги колхозда юз берган фожиани кўриб, текширгани борганида колхознинг ҳашаматли клубини кўриб, Алиев билан гаплашишни, умуман, райондаги маданий-оқартув ишларининг бориши билан танишишни кўнглига туғиб қўйган эди. Лекин гаплашолмади. Икки йилдан бери меҳнат отпускасига чиқмаган Алиев санаторийга кетди. Қайтиб келгач, Усмоновнинг вақти бўлмади. Ҳозир Алиевнинг гапини эшитар экан, у гаплашмаганига ачинди. Гап эса кўп эди. Сиёсий ўқиш, агитация ва пропаганда, маданий оқартув ишларида камчиликлар яққол кўзга ташланиб туради. Усмонов комплекс бир бригада тузиб, шу ишларни текшириш ва бюорода муҳокама қилишни юрагига туғиб қўйган. Экиш тугаши билан шу режасини амалга оширмоқчи эди. Бунга бошқа бир сабаб ҳам бор эди. Райком тузган ва обкомда тасдиқланган йиллик планда сиёсий ва маданий ишлар етарли даражада ўрин олган бўлса ҳам, конкрет ва муҳим масалалар кам эди. Буни у албатта план тасдиқланиб бўлгандан кейин билди, шунинг учун ҳам Алиев билан, бўлимлар билан бафуржга гаплашмоқчи ва планга жиддий ўзгаришлар киритмоқчи эди. Нега Алиев бундай қарорга келди? Наҳотки камчиликлар уни чўчитган бўлса? Ё бошқа сабаблар ғормикин? Усмонов унинг икки йилдан ортиқ райкомда ишлётганини биларди. Ўрта мактаб директорлигидан шу ишга таклиф қилинган эди. Кўпчилик унинг ҳақида яхши фикрда эди. Ҳар ҳолда Усмонов биронта ёмон гапни ёшитгани йўқ. Сўнгги партконференцияда у юз процент овоз олди. Шу фактнинг ўзи ҳам унинг районда катта обрўга эга эканлигидан далолат берарди. Нима бўлди экан?

— Менга оғир ботди бу галингиз...— деди ниҳоят **Усмонов** унинг бошини эгганича жим ўтирганини кўриб.

Алиев бошини кўтарди.

— Шундай ўйларсиз деб қўрқувдим. Йўқ, қарорими ни сизга мутлақо алоқаси йўқ.

— Биламан,— деди Усмонов.— Лекин бари бир оғир ботди. Мен янги одамман. Янги одамга одатда ҳамма кўмаклашади. Мен кўмак сўраётганим йўқ. Ҳар бир одам тинч ўз иши билан шуғулланса, шунинг ўзи катта кўмак.

— Тўғри, Дамир Усмонович. Мен ҳам шу фикрдаман. Шунинг учун ҳам шу қарорга келдим. Сезиб турибман, кўнгилдагидек ишломаямман.

— Бирор ҳалақит беряптими?

Алиев ялт этиб унга қаради.

— Нима десам бўлади?.. Йўқ, райком секретарига ким районда ҳалақит берарди? Афтидан айб ўзимда. Ўзим ишимни йўлга сололмаямман. Мактабда ҳамма нарса менга аён эди. Эрталик иш ўёқда турсин, бир ойдан кейин нима қилишимни ҳам билардим. Ҳозир бундай эмас. Қандайдир майда, хўжаликларнинг, жойларнинг ўзида ҳал бўлиб кетадиган ишлар билан шуғулланниб юрибман. Катта, жиддий ишлар қолиб кетяпти. Бир мисол айтай сизга.— Алиев оғир хўрсинди, лабларнинг устида пайдо бўлган майда тер томчиларини артди. Тошкент телевидениеси «Марҳабо, талантлар» деган колхозлараро мусобақа уюштириди. Бизнинг район қишида ўтди. Иккинчи мукофот олди. Бу яхши. Районда яхши, истеъоддли музикачилар, ашулачи, раққосалар бор. Мусобақага бутун район тайёргарлик кўрди. Бу ҳам яхши. Ёмони шундаки, биз мусобақага қатнашиб, биронта ўрин олиш учун тайёрландик, бадиий ҳаваскорликни ҳамма хўжаликларда яхши йўлга қўйиш учун эмас. Мақсад — мусобақада голиб чиқиш учун кураш бўлди. «Максим Горький» колхозининг бадиий ҳаваскорлари, деб бутун райондаги истеъоддли ёшлиарни йиғдик, ки-

йинтирдик, ўқитдик, ўзимизнинг одамларга ишонмасдан, Тошкентдан ўқитувчилар чақирдик. Республиkaning кўзга кўринган композиторларига ялиниб янги ашуулар ёздиридик. Мусобақа ўтди, диплом чўнтакка тушди. Яна эски ҳаммом, эски тос... Кўпгина колхозда тўлиқ бир ансабль йўқ. Ҳатто «Максим Горький»нинг ўзида ҳам. Клубларда яна пилла қуритяпмиз, фалла йнгяпмиз, худди омборлар қуриб қолгандай... Бу, Дамир Усмонович, битта мисол. Мактаб ўқувчиларини дала ишларига жалб қилмаслик ҳақида қарор чиқди. Аммо биз бажармаяпмиз бу қарорни. Мактабларда ўқиш сифати пасайиб кетяпти. Ўтган йили бизнинг районда ўрта баҳо етмиш процентни ташкил этди. Областда энг паст кўрсатгич бу!

— Шу масалаларни бюрога қўйғанмидингиз? — сўради Усмонов.

— Сизгача қўйғанман, бюронинг қарорлари ҳам бор. Аммо бажаришга келгандай... — Алиев қўлларини ёзди. — Ҳамма тўғри дейди, бажармайди. Шундай одамлардан бир-иккитасининг ҳисоботини бюрога қўяй десам, кўнишмайди.

Усмонов ким кўнмаслигини англади. Албатта бу Коим Бурҳоновичнинг иши эди.

— Илгарироқ шундай очиқ гаплашмаганимизга афсусланаман, — деди Усмонов. — Сиз айтмадингиз, йўқ эдингиз, мен эса тайёр эмас эдим. Айтган гапларингиз тўғри. Қамчиликлар кўп, қиласидиган ишларимиз ҳам. Қарорингизни мен билдим, бошқа ҳеч ким билмасин. Менимча биз яхши ишлашиб кетамиз. Қелишдикми?

Усмонов шундай деб, Алиевга қўлинни узатди.

— Қани, ташланг!

Алиев ўрнидан туриб, унинг қўлинни қисди.

— Мен шикоят қилмоқчи эмас эдим...

— Биламан. Назаримда биз кўп масалада ҳамфирмиз. Шунинг учун энди қийналмасангиз керак. Мен ҳам қийналмайман. Лекин сизсиз бир ой қийналдим!..

Усмонов кулди.

— Эшиздим,— деди Алиев. У юшаган, ҳозиргина бутун қиёфасини қоплаган хафақонликдан асар ҳам қолмаган эди.— Анча иш қилиб қўйибсиз, Дамир Усмонович. «Максим Горький»нинг парторги маданият бошқармаси билан колхоз клубининг йиллик планини тузапти. Буни эшитишибди шекилли, кўп колхозларда ҳозир тўполон. Шу планнинг нусхасини сўраб юришибди. Улар ҳам тузишмоқчи. Кутубхонада стенд тайёрлашяпти. Энг яхши китобхон ким-у, энг ёмони ким районда, деган.

Улар анчагача гаплашиб ўтиришди. Қоронги тушганини сөзишмади. Усмонов куюниб заргар чол — Мамашариф отанинг қиссасини айтиб берди.

— Бундай усталар кам, деярли йўқ. Бодомсойда шундай одам борлигидан фахрланишимиз керак.

— Қудрат Саимович айтдилар,— деди Алиев.— Исполком устахона очиб беришга қарор қилибди. Ўнта шогирд тайёрлашга ҳам рухсат берилибди.

— Кўрдингизми? Қиладиган ишларимиз кўп. Сиз бўлсангиз, кетаман, дейсиз.

Алиев бошини эгди.

— Ишлаймиз, Дамир Усмонович. Мен ўзимни мана энди секретарь деб ҳис қила бошладим. Ишлаймиз!

Усмонов ўзи тенги, бу камсуқум, сочига бевақт оқ оралаган, худди Пўлатов сингари очиқ чеҳрали одамга меҳр билан боқди.

XIII

— Янги уйга борамиزمи?— сўради шофёр у машинага ўтирганда. Унинг гапида савол аломатидан кўра тасдиқ кўпроқ сезилиб турарди.

Усмонов буни пайқади ва жилмайиб бош қимирлатди. Шофёр халқи қизиқ, хаёлидан ўтказди у, ҳамма нарсани ҳаммадан олдин билади, камдан-кам адашади.

Хойнаҳој бир неча марта бориб келгандир янги уйга? Усмонов бу эпчил, серғайрат йигитдан Бодомсойга келганидан бери нима учун шофёрлик қилаётганини сўра-моқчи бўларди-ю, ийманарди. Хизматдан қайтиб келганидан бери раёном гаражида ишларди. Ҳозир ҳам сўра-моқчи бўлди-ю, оғзидан мутлақо бошқа гап чиқди.

— Рустамжон, меҳмонхонада ҳеч нарсамиз қолмадими?

— Ҳеч нарса! — ҳозиржавоблик билан деди шофёр. — Ҳаммасини олдик.

У шундай деб, Усмоновга ғалати қараб қўйди. Аммо Усмонов буни кўрмади.

«Мана энди ҳақиқий Бодомсойлик бўлдик... — Ҳаёлидан ўтказди Усмонов. — Уйимиз бор. Ҳафизага ёқарми-кан? Ёқади. Унга нима ёқса, Ҳафизага ҳам шу ёқади. Бунга ишончи комил».

У шундай ўйлаб, ғурур билан хотинини эслади. Уни қаттиқ севарди. Йил ўтган сайин кўпроқ, кучлироқ севарди. Оила қурганларидан бери ўтган саккиз йил ичида Ҳафиза унинг энг яқин дўсти, сирдошига айланган эди. Ким билади, аёллар ўзи шундай бўладими, Ҳафиза ундан уч ёш кичкина бўлишига қарамай, унинг назарида ундан ақллироқ, тажрибалироқ эди. Усмонов ўзи сезмаган ҳолда кўпинча, айниқса, уй ишлари, қариндошуроф ташвиши масалаларида, ҳатто институт ишларида ҳам унинг измига тушиб қоларди. Лекин четдан қарағанда ҳамма нарса у ўйлагандек, у айтгандек қилинади. Иш қилиниб бўлингандан кейингина, масала Ҳафиза айтганидек ҳал бўлганини биларди. Лекин хафа бўлмасди. Бунга ҳожат ҳам йўқ эди. Ҳафиза айтгани, Ҳафиза қилгани доимо тўғри, кўнгилдагидек чиқарди. Балки бу уларнинг бир-бирларига ниҳоятда яқин бўлиб кетганиларидан, бир-бирларини яхши тушунишлариданdir? Ҳар ҳолда ҳаёт уни Ҳафиза билан учраштирганидан баҳтиёр эди. Улар пахтада учрашган эдилар. Усмонов институт комсомол комитетининг иккинчи секретари бўлгани

сабабли колхоз идораси қошидаги штабда ишларди. Бир куни у биринчи курсдагилар пахта тераётган бригадага борди. Кеч кираётган пайт эди. У отда пахтазор оралаб теримнинг сифатини текширар экан, пахта тўла қоп, әтакларини кўтариб, хирмонга чиқаётган биринчи курсдагиларнинг, айниқса қизларнинг унга ҳавас билан қараётганликларини кўрди. Ҳар куни шундай эди. Биринчидан у бешинчи курсда эди. Унинг даражасига етгунча уларга ҳали тўрт ярим йил бор эди. Йккинчидан, оти яхши эди. Колхоз раисининг ўринбосари унга ўзининг отини берган эди. Чиройли тўриқ от эди. Офтобда бадани тўқ-қизил духобадек ялт-ялт қиласарди. Қизлар кўпроқ отни яхши кўрибми ё уними: «Дамир ака, бизларни ям битта миндиринг, сизнинг ҳам нормангизни териб берамиз!» деб тегажоғлиқ қилишарди. Пахтада кўп қизлар унга хуштор бўлганини эшитарди, баъзан хат ҳам оларди улардан.

Ўша куни ҳам миндиришни илтимос қилганлар бўлди. У кулиб, хўп, хўп, деди-ю, хирмонга ўтди. Биринчи курсдагилар хирмонига келишни у яхши кўради. Чунки энг катта хирмон ҳали «айнимаган»ларники бўларди. Қўчма байроқ терим мавсуми тугаб, шаҳарга қайтгунларича уларнинг қўлидан тушмасди. Байроқни тортиб оладиганлар ҳам деярли бўлмасди. Курс қанчалик юқори бўлса, хирмон шунчалик кам кўтарилади. Энг кам терадиганлар, лекин ўзларини эрка тутадиганлар дипломантлар эди. Танқид ҳам, яхши гап ҳам уларга таъсир қилмасди. Икки гапнинг бирида қачонлардир улар ҳам биринчи курсда бўлишганини ва ҳозирги биринчи курсдагилардан кўп бўлса кўпки, кам термаганларини пеш қилишарди. Ҳақиқатда ҳам шундай эди. Шунинг учун ҳатто халқ мақолини ўзларича кенгайтириб, гимни қилиб олишган эди.

— Биз ҳам эдик сизлардек
Сиз ҳам бўлурсиз бизлардек.
Алпомиш йигитлару,

Барчин каби қизлардек...
Теринглар, ҳо теринглар,
Чаиногида қолмасин...

Биринчи курсдагилар қўшиқнинг асл маъносини тушунсалар ҳам, дипломантларнинг яхши ниятларидан бошлари осмонга етар, терим охиригача қўшиққа муносиб ишлашга ҳаракат қилишарди.

Уша куни ҳам биринчи курсдагилар яхши пахта теришган эди. Усмонов кўнгли тўлиб ҳаммадан кеч қишлоққа қайтаётган эди, олисдан:

— Амаки! — деган овоз эшитилди.

Усмонов тўхтади.

— Амаки! Буёққа келинг! — эшитилди яна ўша овоз.

«Ким бўлди экан? Мени чақиряптими?» — шундай ўйлаб, Усмонов бирпас аланглаб турди. Аммо ҳеч кимни кўрмади. Пахтазорга қоронғи тушган эди.

— Амаки!

Усмонов қўрқув ва жаҳл аралаш бу овоз пахтазор этагидан келётганини тушунди ва отини шу ёққа бурди. Картанинг ўртасига етганида кимнингдир қораси кўринди. Олдига бориб таниди, биринчи курсдаги қизлардан эди ў. Қиз уни кўриши билан орқага тисарилди.

— Вой, сизмисиз, Дамир ака? Мен табелчи амакими дебман!..

— Мунча кеч қолиб кетдингиз? — деб сўради Усмонов отдан тушар экан.

— Билмай қопман... — соддадиллик билан деди қиз.

У кичкина, нимжон эди. Қоронғида Усмонов уни яхши кўрлмади. Фақат кўзларигина иккита чўфдек ялтиради.

— Қани, мининг отга! — буюрди Усмонов.

— Раҳмат, пахтам бор. Кўтаролмаяпман... — деди уялиб қиз.

— Қани?

— Ана, ҳов жўякнинг этагида.

Усмонов у кўрсатган томонга отини етаклади.

Картанинг охирида икки этак пахта туради. Усмонов биттасини кўтармоқчи бўлиб энгашди.

— Оғир... — деди орқасидан қиз.

Усмонов эътибор бермай бир силтанган эди, этакни кўтариш ўрнига тиззалари билан ерга ўтириб қолди. Уялиб кетди.

— Тошми бу? — деди жаҳл билан.

— Йўқ, пахта... Ёрдам берайми?..

Қиз унинг ёнига келиб энгашди. Унинг иссиқ, ёқими нафаси Усмоновнинг димонига урилди. Пешона боғи остидан чиқиб турган соchlарининг бир-икки толаси пешонасига тегди. У бир оз юмшади.

— Ўзингиз тердингизми?

— Ўзим. Тушдан кейин топширганим йўқ эди...

— Барин бир кўп терибсиз. Анавиниси ҳам шунаقا оғирми?

— Иккалови бир хил...

Усмонов унинг хижолат бўлиб бошини эгганини кўрди.

— Яхши. Ҳозир бир амаллаб отга ортамиз. Нима де-дингиз?

— Яхши бўларди.

Қиз иккинчи этакни унга яқин судрай бошлади.

— Йўқ, йўқ! Сиз тегманг!

Усмонов шундай деб, унинг олдига борди ва қўлларини унинг қўллари устига қўйди. Илиқ, майин ва ниҳоятда кичкина эди унинг қўллари! Бир зумгина давом этди бу ҳол. Қиз ниманидир сезиб, шошиб қўлларини суғуриб олди.

— Иккаловини бир қилиб бойлаш керакмиди? — деди ўзини четга тортар экан.

— Ҳа, ҳа, шундай қиласиз.

Нимаси биландир қиз Усмоновга ёқиб қолган, ўшатобда ўзи ҳам унга ёқиши истаб қолган эди. Шунинг учун бор кучини тўплаб, этакларни бир-бирига боғлади. Энди кўтариб отга ортиш керак эди. Кўтаролмаса-чи?

— Мен бир ёғидан оламан,— деди қиз худди унинг фикрини уққандек.

Усмонов йўқ демади. Иккалови бир амаллаб этакларни отга ортишди. Ортгунча, оғирлигиданми, йўқ, кўпроқ ҳаяжондан бўлиши керак, Усмонов терлаб кетди. Буни сездирмаслик учун:

— Эртага бунақа кеч қолманг,— деди у.— Мен келмаслигим мумкин...

— Хўп,— деди қиз интизомли болалардек.

Лекин эртаси келди. Индинига ҳам. Кўп ўтмай бутун институт уларнинг «ошиб-маъшуқ» эканликларини билди. Лекин Усмонов бундан уялмади. Шундай қизни учратганидан чексиз хурсанд эди у. Ҳафизани чин юракдан бутун вужуди билан яхши кўриб қолди. Ҳафиза ҳам. Бир куни у ҳатто канал лабида ўтиришганда, Усмонов тушларига ҳам кирганини айтди. Қиз бола фақат севсагина йигитни тушида кўради.

Орадан икки йил ўтгач, шоша-пиша тўй қилишга тўғри келди. Бунинг сабаби уларнинг иккаловигагина аён эди. Лекин кутганларича бўлмади. Ҳафиза ҳомиласини сақлаёлмади. Бунга Усмонов ҳам, Ҳафиза ҳам, Мастира опа ҳам ортиқ қайфуришмади. Ҳафиза ҳали ёш, давлат билан боланинг кечи йўқ. Мастира опа шундай деб жиндек кўз ёш қилган Ҳафизани юпатди. У ҳам Ҳафизани жуда яхши кўриб қолган эди. Усмоновга баъзан Ҳафиза қизи-ю, у куёвдек туюлиб кетарди. Бундан у хурсанд эди. Онасининг қандай қийинчиликлар билан яшагани, уни шу ёшга етказганини яхши билар, кимдир уни ранжитадиган бўлса ниҳоятда хафа бўларди. Ўйланмасидан илгари қайнана билан келин кўп оиласларда тотув яшамаслигини, баъзи ўринларда уларнинг муносабати эр-хотиннинг ажralишига олиб келишини эшитган, кўрган эди. Ўз уйида ҳам шундай бўлиб қолишидан чўчирди. Онаси ҳам унга азиз, севимли, Ҳафиза ҳам. Иккалови ҳам оғир табиатли, ақлли. Бекорга бирорнинг дилини оғротишмайди, бекорга ўзларининг

ҳам диллари оғримайди. Шунинг учун Усмоновга бирон-тасининг ёнини олиш ниҳоятда қийин бўларди. Шу ҳолга келишнинг ўзини у истамас, ор қиласарди. Бахтига ташвишлари ўринсиз чиқди. Қайнана билан келин она билан ўғилдан ҳам яқин бўлиб кетишиди.

— Ая,— дерди баъзан тусмоллаб Усмонов.— Келингизни жуда эркалатиб юбордингизми?

Мастура опа уни тушуммай жавоб қиласарди.

— Нега энди эркалатмас эканман? У мени ая, деди, сенга ўхшаб, битта фарзанд билан колувдим. Энди иккита бўлдиларинг. У менга келинмас, болам.

Кечаси бу гапларни Усмонов Ҳафизага ғурур билан айтарди. Ҳазилни тушунадиган Ҳафиза ҳам худи онасидек жиддий жавоб берарди.

— Аямларни мен ҳам яхши кўраман. Кўзимга қараб туриб, дилимдагини биладилар. Биласизми, бир хиллар қайнаналаридан шунақангি шикоят қилишадики, асти қўйверинг. Менинг қайнанам йўқ. Аям борлар...

Хуллас, қайнана-келин муносабати Усмонов ўйлагандан ҳам аъло эди.

Бироқ учаловини ташвишга солган бир нарса бор эди. Бола турмасди. Уч-тўрт ойлик бўлиши билан нобуд бўларди. Тўрт марта шундай бўлган эди. Қаратмаган докторлари қолмади. Аввал Мастура опа, кейин Усмоновнинг ўзи бир неча марта Ҳафизани Тошкентга, Москвага олиб боришиди. Фойдаси бўлмади. Баъзилар сизларда бўлмайди дейишиди, резус фоктор дейишиди. Баъзилар эса ишонтиришиди. Бу гал бола омон туримишига умид катта эди. Ҳафиза врачлар ҳавотир олган кризисдан ўтган, севинчи ичига сифмас эди. Мастура опа унга ҳеч нарса қилдирмай қўйган, ҳар бир қадамини диққат ва эҳтиёт билан кузатарди.

«Түғунича буёққа келтирармикинлар?» — хаёлидан ўтказди Усмонов уйга яқинлашишганда.

Лекин янги уйда уни катта қувонч кутиб турарди.

Боя Рустамнинг айёrona кулганида гап бор экан. Онаси ҳам, Ҳафиза ҳам кўчиб келишган эди.

Эшикдан кириши билан машинанинг овозини эшитиб очиқ айвонга чиқиб турган Ҳафизани кўрди-ю, юраги ҳаприқиб кетди.

— Ҳафизал Қачон келдинг?

Ҳафизанинг ўрнига икки боғлам китоб кўтариб кира-ғтган Рустам жавоб берди.

— Кундузи олиб келганман!..

Усмонов чопиб айвонга кўтарилди-да, хотинини бағ-рига босди.

— Мен кетаверайми?

Рустамнинг саволи Усмоновни ўзига келтирди. У Ҳа-физани қўйиб юбориб, шофёрнинг қўлидан бўғчаларни олди.

— Ҳа,— деди ва ўзича уни уялтирган бўлди.— Бир оғиз ҳам айтмабсиз-да, Рустам?

Рустам Ҳафизага қараб қўйиб кулди.

— Сюрприз!

— Овқатга қолинг,— таклиф қилди Ҳафиза.

Аммо Рустам қолмади.

— Келинингиз кутиб қолди.

Ичкаридан қўлида кафир ушлаганича Мастура опа-
ди.

— Ўзим бораман, девди, Ҳафиза. Ёлғиз юбормадим,
қушилишиб келавердим.

Она-бала қучоқлашиб кўришиши.

— Озиб қолибсан. Чаккаларинг чиқиб қолибди.

Усмонов кулди.

— Нега хабар бермадиларинг?— таъна қилди у.—
Кейин мунча шошилдиларинг? Эрта-индин ўзим бориб
олиб келардим.

— Искандар аканинг гапларини иккита қилманг, де-
дик,— деди Ҳафиза ва қайнанасига маънодор қараб қўй-
ди.— Қудрат ака телефон қилувдилар, кела қолдик.

— Ҳамма нарса шундай қолди. Қуп-қуруқ келавер-

дик,— қўшимча қилди Мастура опа.— Қани ювина қол.
Ошидам еб қолди. Девзира олиб келганман.

— Хурсандмисиз?— сўради ёлғиз қолишганда Ҳа-
физа.

Усмонов яна уни бағрига босди.

— Мехмонхонадагӣ коса кимники?

— Қанақа коса?— ҳайрон бўлди Усмонов.

— Қизил гулли коса... Уям... ўша Пармонованик-
ми?

Усмонов шарақлаб кулиб юборди.

— Йўқ, уникимас. Чиройли... ёш... жуда келишгани
бир қизники.

— Исминиям биларсиз?— эркаланиб сўради Ҳафиза.

— Билмай-чи? Ўша куниёқ билиб олганман. Ис-
ми...— Усмонов беихтиёр «Холида» деб юбормоқчи
бўлди-ю, зўрға ўзини тийиб қолди.— Исми Муҳаббат!

— Чиройли исми бор экан,— ҳомиладор бўлиб тўли-
шиб кетган лабларини чўччайтириб деди Ҳафиза.

— Сеникичалик эмас,— деди ҳазилнинг чинга айла-
нишидан чўчиб Усмонов.— Соғиндим. Яхши қилдинг ке-
либ.

— Мен ҳам соғиндим.

Ҳафиза кичкина бошини унинг кўкрагига қўйди.
Усмонов бутун чарчоини, дилини ғаш қилган барча во-
қеаларни унуди.

Овқат маҳали Усмонов уйни сўради.

— Еқдими?

Ҳафиза биринчи марта кўраётгандек атрофига қа-
ради. Усмонов шундай бўлишини билган эди. Ҳафиза
учун уй эмас, уларнинг биргалиги муҳим эди.

— Бир хонани сизга кабинет қиласиз,— деди у.

— Унда чақалоқ уйсиз қолади,— эътиroz билдириди
Усмонов.

— У катта бўлгунича, ҳовли катта экан, бурчакка
менга хона қуриб берсанг, ҳаммамизга етади,— гапга
аралашди Мастура опа.

— Сизга эмас, ўзимга қураман,— деди Усмонов....—
Сиз бирга тураверасиз.

— Бўлмаса-чи!— уни қувватлади Ҳафиза.

Овқатдан сўнг эр-хотин кўчага чиқишиди.

Мастура опа мажбур қилди. Усмонов ҳам хотинини
қўлтиқлаб бирпас айланишни истар эди. Ҳафиза кенг
қилиб тикилган енгил пальтосини кийди.

Қоронғи кўча жимжит эди. Онда-сонда одамларнинг
қораси кўринар, кечқурунги осойишталикни бузиб ма-
шина ўтиб қоларди.

Улар катта кўчага чиқишиди. Усмонов тирсагига маҳ-
кам ёпишиб олган, ҳозирги ҳолати ва қалин кийимда
контокдек бўлиб ёнида оҳиста бораётган Ҳафизани рай-
он маркази томон бошлади. Райком биносига етишган-
да, Усмонов иккинчи қаватдаги бир деразада чироғ
ёқиғлигини кўрди. Бу қабулхона эди. «Навбатчи ўти-
рибди,— хаёлидан ўтказди Усмонов.— Яхши бўлди нав-
батчилик ташкил этилгани. Райкомда доим одам бор.
Истаган одам истаган пайтда мурожаат қилишин мум-
кин». У қабулхона ёнидаги иккита деразани хотинига
кўрсатди.

— Шу деразалар меники.

Ҳафиза уларга узоқ тикилиб қолди.

— Дамир ака...— деди у бир маҳал.— Ҳеч... чўчи-
майсизми?

— Нимадан?— тушунмай сўради Усмонов.

— Янги ишингиздан. Ахир катта бир район-а?.. Қан-
ча ер... Қанча одам... Ҳар бирининг ўз ғами, ташвиши
бор.

— Баъзан чўчийман,— деди ростгўйлик билан Усмо-
нов.— Ёлғиз қолганимда.

— Мен сизни ҳеч ёлғиз қолдирмайман!

Ҳафиза унинг қўлинин қисди. Усмонов жилмайди. Ҳа,
Ҳафизанинг келгани яхши бўлди. Қандайдир хотиржам-
лик пайдо бўлди, фикрлари ойдинлашди. У тўлқинланиб
Полвоне ҳақида, Носир Пўлатович, Ишимов ҳақида га-

пириб берди. Улар билан танишганидан, шундай одамларнинг борлигидан хурсандлигини ва қўлидан келганича уларга ёрдам беришини, улар билан бирга бўлишини айтди.

Марказ ёнидаги кичкина, бежирим истироҳат боғига киришганда, Ҳафиза чарчаб ўтирди.

— Биласизми... яқин қолди,— деди у сирли оҳангда.

— Қанча?— бирдан вужудини қоплагай ҳаяжон ва ҳавотир ичида сўради Усмонов.

— Ўн кун, адашмасам... ўғил бўлса отини нима қўяминз?

Ўсмонов буни ўйламаган эди.

— Улуғбек...— деди Ҳафиза.— Тарихчиларнинг ўғлида тарихий исм бўлиши керак. Кейин Улуғбек чиройли исм. Қандайдир салобат, мардлик бор унда.

— Қиз бўлса-чи?

— Қиз бўлса Иқбол. Сизнинг ҳам, менинг ҳам баҳтли кунларимиздан хотира.

Икқала исм ҳам Усмоновга ёқди, рози бўлди.

— Дамир ака!— нимадандир қўрқиб, эрининг кўлини тортди Ҳафиза.

Ўсмонов унга ўгирилди.

— Нима?

— Агар... агар тирик туғилмаса-чи?..

— Ундаи дема,— юпатди Усмонов.— Энди тирик туғилади. Ҳамма врачлар шундай дейишяпти.

— Агар... туғилмаса, бошқа туғмайман,— уни эшитмай деди Ҳафиза.— Чидолмайман.

У йифлаб юборди.

— Қўй, Ҳафиза.

Ўсмонов уни қучоқлади.

— Менга сен кераксан. Бола эмас. Иккаламиз ҳам bemalol яшайверамиз.

— Одамлар... Одамлар тинч қўйишмайди. Гап қилишади. Шундай одамнинг боласи йўқ, деб сизга ачини-

шади, бошқа хотин олишни маслаҳат беришади. Агар туғомасам шундай қиласиз. Хўпми?

Усмонов кулди.

— Нима деяпсан ўзи, Ҳафиза. Айтдим-ку, менга ҳеч ким керакмас, деб. Бола бўлса яхши. Бўлмаса ташвишимиз йўқ. Боласиз яшаётганлар битта биз эмас.

— Асраб оламиз,— таклиф қилди Ҳафиза.— Биласизми, эшиздим, бир врач айтди. Бир хил студент қизлар туғармиш-да, боласини олмасмиш. Ана шунақа болани оламиз. Хўпми?

— Хўп.

Усмонов уни қаттиқ бағрига босди. Шу тоб унинг Ҳафизага ниҳоятда раҳми келиб кетган эди. Кўз олдига касалхонада тиззаларини қучоқлаб ўтирган тракторчи-нинг хотини келди. Бечора бешта қизи билан уйида ёлгиз. Бир ўзи бўлганда ҳам бунчалик қийин бўлмасмиди? Ҳафизани ҳозир унга ўхшатди. Титраб турган елкалари-ни силаб, иссиқ юзига юзиниң қўйди. Ҳали қуrimаган кўз ёши лабига тегди. Қўллари билан кўзларини артиб, пенонасидан, қошлари, юзидан ўпа бошлади.

— Кўйинг, бирор кўриб қолса нима дейди?— Уялиб деди Ҳафиза. Аммо ўзи унга яқинроқ сурилди. Икки қўли билан бўйнидан қучоқлади.— Райком секретари кечаси қизлар билан ўпишиб юрибди, демайдими?

— Деса деяверсин! Райком секретари ҳам одам.

Улар уйга қайтишганда Мастура опа кутиб ўтиради.

— Энди хавотир ола бошловдим,— деди у.— Ӯзингни уринтириб қўясан бунақада, Ҳафиза!

Ҳафиза ер остидан эрига қаради. У ҳечқиси йўқ, чарчасам ҳам сиз билан бўлганимдан хурсандман, биз баҳтлимиз, дегандек эди.

Тунда уни тўлғоқ тутди. Усмонов уни касалхонага олиб кетди.

Бурҳонов чиндан ҳам ҳали бюро тугамасдан ўзини лоҳас ҳис қила бошлади. Оғриқ бирдан бошланди. Босини бирор исканжага олиб бурагандек бўлди. Аввал ўтиб кетар, деб ўйлади. Йўқ, ўтмади. Бир оздан сўнг ўз кабинетига кириб, аналгин ичди. Бирданига иккита таблаткани чайнаб ютди. Устидан кетма-кет икки пиёла ачиқ чой ичди. Фойда бермади. Оғриқ бошидан кўкрагига ҳам ўтди. Қаттиқ асабийлашса, шундай бўларди. Лекин тезда ўтиб кетарди. Бу гал бундай бўлмади.

Уйнга келиб, хотининг аччиқ мастава буюрди. Овқат пишишини кутмасдан ўз хонасига ўтиб, тўла бир пиёла конъяқ ичди ва диванга чўзилди. Чаккаларини оғриқ қўйиб юборгандек бўлди. Аммо юрак санчиши тўхтамади. Қани энди имкони бўлса пичоқ билан шу оғриётгани жойини бураб-бураб ташласа!

Нима бўлди ўзи? Нимадан бунча асаби бузилди? Бирода, ортиқча гап бўлмади. Албатта Султоновни ҳимоя қилгани сезилди. Лекин нима бўпти? Масалани у шундай тушунади. Унингча, Султоновни бутунлай айбдорга чиқариб қўйиш хато. Ҳар бир фожия учун, боринг, ўлим билан тугаса ҳам, раҳбарни жавобгар қиласерилса, уларда секин-аста ташаббус йўқолади, бирон масалани мустақил ҳал қилолмайдиган бўлиб қолишади. Бу билан хўжаликка, қолаверса районга путур етади. Хўп, бориб чоп, дебди. Борган одамнинг калласи бўлиши керак-ку, ахир. Ўзингни томдан ташла, деса ташлайвериш керакми? Албатта, Султонов бегуноҳ эмас, лекин асосий айб тракторчининг ўзида! У шундай ўйлайди ва ҳеч қаҷон бу фикридан қайтмайди. Унинг таклифи ўтмади. Бу ҳам юрак санчитадиган даражадаги воқеа эмас. Қара-ма-қарши фикрлар бўлмаса, ўсиш бўлмайди. Диалектика! Нима уни бунчалик ранжитди?

Бурҳонов кўзларини юмди. Юмди-ю, қовоқлари ҳам лўқиллаб оғриётганини сезди. Шошиб бошини кўтарди

ва қийналиб кўзларини очди. Шундай ҳолатда оғриқ камроқ сезилди. Боши тагига яна битта ёстиқ қўйиб, Қўлига диван суюнчиғи ёнида ётган китобни олди. Уильям Фолькнер. «Шовқин ва ғазаб». Уғлининг китоби бўлиши керак. Фолькнер. Таниш фамилия. Нимасини ўқиган эди унинг? Бурҳонов эслашга ҳаракат қилди. Аммо ғаломади. Умуман у кам ўқирди. Вақти йўқлигидан мас, ўқишни ёмон кўрарди. Ёшлигиде ҳам жуда камдан-кам китобни охиригача ўқиган эди. Ярмига зўрға бориб, давомини ўртоқларидан суриштириб оларди. Лекин ўқиб тугатган, ҳатто конспект қилиб олган китоблари ҳам бор эди. Масалан, «Пўлат қандай тобланди», «Сўнга», «Ёш гвардия», «Нима қилмоқ керак?».. «Ўтган кунлар»ни ҳам у охиригача ўзи ўқиган эди. Ана китоб! Ана роман! Шундай кўз олдида турибди Кумуш ҳам, Отабек ҳам... Бошқа китобларни у деярли билмасди. Билишга ҳам қизиқмасди. Лекин ашулани яхши кўрарди. Республикадаги ҳамма ашулачиларни биларди. Қўшиқчи шоирларни ҳам. Районга ёзувчилардан бригада келадиган бўлса ва улар орасида қўшиқчи шоирлар бўлмаса, ўзи тақлиф қилиб чақириарди. Бригада кетгунча бирга бўларди. Концерт пайтлари программани ўзи тузар ва концерт давомида қўшиқларнинг мазмуни, моҳияти, ким қандай айтади — ёнидагиларга тушунтириб ўтиради. Ўзи ҳам яхшигина дутор чертиб хиргойи қиласди. Энг яхши кўрган шоири Бобир, ашулачиси эса Фахриддин Умаров эди. Бошқаларни ҳам мароқ билан эштар, лекин ҳеч кимни шулардан юқори қўймасди. Кейин мультфильмларни яхши кўрарди. Маданият ҳақида гап кетса, албатта «Тошкентда мультфильмлар кўрсатадиган битта кинотеатр керак, албатта керак», дерди. Шунинг учун бўлса керак, республика бўйича фақат Бодомсойда ғилига икки марта мультфильмлар ҳафталиги ўтказиларди. Бурҳоновнинг актив иштирокида ҳафталиклар яхши ўтарди ва у бир неча марта кинематография комитетининг фахрий ёрлиги билан мукофотланган эди.

Ёзувчиларни ҳам у биларди, лекин шунчаки... билиш ке-
рак бўлгани учун биларди.

Фолькнерни эшитган эди, «Шовқин ва ғазаб»... Нима
ҳақида экан бу китоб? Мансурдан сўраш керак,— хаёли-
дан ўтказди Бурҳонов.— Балки катта ёзувчидир бу
Фолькнер. Билиб қўйиш керак. Худди бирор пармалаёт-
гандек, яна оғриқ тутди. У чаққаларини ушлаб, бошини
орқага ташлади. Дорӣ ичмоқчи бўлди, аммо ўрнидан
тургани эринди. Хотинини чақиргиси келмади. У ҳам-
мадан, ҳатто хотинидан ҳам касалини яширишга уринар-
ди. Шунинг учун камдан^{жам} одам унинг касал бўлгани-
ни билар ё эшитарди. Лекин Усмоновдан уялмади. Мен-
симадими уни? Шу фикр хаёлига келди-ю, нима уни
қаттиқ ранжитганини топгандек бўлди. Биринчиси ал-
батта Усмонов эди. Бугун ўзини у жуда эркин тутди. Гап-
ларни ҳам топиб, чертиб гапирди. Одамларга ёқди у бу-
гун. Ким билади, балки Султоновнинг ўзига ҳам ёққан-
дир, нуқул шогирд боладек бошини лиқиллатиб ўтиради у
гапираётгандা. Полвонов-чи? Унга мойдек ёқди Усмонов.
Бурҳоновнинг назарида битта Полвонов эмас, кўпчилик
Усмоновнинг гапларини яхши эшитди, ҳатто, ёд қилиб
олди. Содиқов-чи? Бўғун у жуда очилиб кетди. Пўлатов
пайтида ҳам шундай эди. У кетгандан кейин Бурҳонов
уни қўлга олган эди. Нима деса шуни бажарадиган қилиб
қўйган эди. Бугун у яна ўзини кўрсатди. Унга қарши чиқ-
ди. Ўз фикрини бошқача айтиши мумкин эди. Йўқ, буни-
дай қилмади. Рўйирост «Ўртоқ Буҳоновга қўшилмай-
ман», деди. Бурҳоновдан ҳам бошқа куч борлигини сез-
ган-да. Қачон сезди? Нимадан Бурҳонов ожизлик қил-
ди? Усмоновнинг ундан устунлиги қачон бошланди?

Бурҳонов чуқур ўйга толди. Усмоновни Бодомсойга
келганидан бери қилган ишларини бир бор кўз олдига
келтира бошлади. Унинг ишларида айтадиган бирон
янгилик йўқ эди. Шу ишлар усиз ҳам амалга ошарди.
Балки Бурҳонов билмаган ишлар бордир? Балки Бурҳо-
нов бирон нарсада хато қилгандир?

У шундай ўйлаб, Ишимов воқеасини эслади. Тўғри, унинг ҳужжатларини Бурҳонов ушлаб қолди. Ҳар қандай соғ виждонли одам шундай қиласарди. Юқоридан қайтгандан кўра шу ерда тўхтагани маъқул бундай ҳужжатларнинг. Яхши чўпон. Меҳнаткаш, тажрибали. Лекин биографияси тоза эмас. Асирга қандай тушганини ва у ёқларда нима қилганини ўзидан бошқа ҳеч ким билмайди. Биронта гувоҳ бўлганда бошқа гап эди. Бурҳонов ҳам одам. Ҳужжатларни ҳар гал олиб қолаётганда юраги ачишган, раҳми келган Ишимовга. Лекин ҳаётда, партия ишида унинг хоҳишидан, ачинишидан юқори нарсалар бор. «Нима қилияпсизлар?» дейнишмайдими обкомда, қоловерса Марказкомда. Олий советда? Йўқ, Бурҳонов ҳақ. Заргар масаласига келганда, бу энди майда нарса. Райком секретари энди тақинчоқларга ҳам аралашиб юрадмии? Хато бўлибди. Чол у билан учрашмай, Усмоновга дуч келибди. Бурҳонов билан учрашганда, бор гапни тушунириб айтганида, нима, уни тушунмасмиди? Тушунарди, ўз ҳолига қўйиб қўярди. Лекин у бир жойидан қўзғатиб ғалвирдан ўтказиб қўйилгани хато эмас. Бошқаларга ўрнак, шахсий савдо билан шуғулланәётгандар тортилиб қолади, баъзилар ҳатто «дўкони»ни ёпади. Йўқ, заргар масаласида ҳам Бурҳонов хато қилмади, бир оз қаттиқўллик қилди, холос. Катта хўжаликда шу ҳам керак. Бўлмаса район бебошвоқ бўлиб кетади. Кейин ким айбор? Бурҳонов. Чунки у «биринчи» бўлиб турган эди райкомда.

Ҳа, «биринчи» бўлиб турувди. Биринчи бўлиб қолиши мумкин эди. Нима бўлди? Бурҳонов Носир Пўлатов билан бўлган бир суҳбатни эслади. Пўлатов ҳали райкомда, ўз вазифасида, аммо аризаси обкомда муҳокама бўлаётган эди.

Одатicha иш кунининг охирида Бурҳонов унинг олдинга кирди. Пўлатов ўз соғлиги ва шу соғлиги оқибатида ишдан бўшамоқчилигини дардлашгандан бери, у тинчини йўқотиб қўйган эди. Ўзи сезмаган ҳолда иложи борича

Пўлатовга кўпроқ кўринадиган, арзимаган масалаларда ҳам унинг маслаҳатини оладиган бўлиб қолган эди. Тўғри, у Пўлатовга: «Чакки қиляпсиз, тузалиб кетасиз, шу масалани кўтарманг!» деди, лекин дилида негадир севинди. Пўлатовнинг ўрнига уни қўйишларини билмасди, янги одам юборишлари мумкин эди. Лекин «биринчи» ҳақида гап кетганда, уни ҳам тилга олишлари аниқ эди. Нега олишмасин? Олти йилдан бери шу районда. Емон ишламаяпти. У келганидан бери ҳар доим пахта планини бажаришди. Областнинг олди районларидан ҳисобланади Бодомсой. Обкомда, Тошкентда ҳам уни билишади, демак, «биринчи» бўлиши ҳақиқатдан йироқ эмас эди.

Бурҳонов интизорлик билан, юрагини қандайдир ҳаяжон қоплаб, сабрсизлик билан кута бошлади. Ҳар куни Пўлатовнинг олдига ишга келиши билан кирадиган, бирон хабар бормикан, деб унинг юзига тикиладиган бўлди. Обкомдан, Тошкентдан телефон бўлиб қолса, юраги ҳарапиқиб кетар, телефон сабабини билгунча тоқати тоқ бўларди. Орадан бир ойча ўтгач, ўзи ҳаракат қила бошлади. Арзимаган нарсаларни баҳона қилиб Фарғонага тушадиган, албатта обкомга кирадиган бўлиб қолди. Та ниш-билишларига ўзи телефон қилиб, янгилик бор-йўлигини суриштириб турди. Лекин ҳеч ким ҳеч нарса билмасди, ҳеч нарса айтмасди.

Ушанда ҳам Пўлатовнинг олдига кириб, баъзи бир ишларни маслаҳатлашган бўлди-да, гапни ўзини қизитирган масалага бурди.

— Носир Пўлатович... бу... аризангизни кўришдими? Мени тўғри тушунинг, шунчаки қизиқяпман-да...

Пўлатов жилмайди. Бурҳоновнинг кўзларига касалликдан салқиб сарғайган, ҳорғин кўзларини тикиб узоқ жим қолди. Бурҳонов унинг қарашига чидолмай кўзларини яширди.

— Ариза...— деди ниҳоят Пўлатов.— Кўриляпти. Биламан, илтимосимни қондиришади. Одам қидиришяпти

назаримда. Бодомсой кичкина район эмас, мураккаб, кўптармоқли... Одам топилади. Бугун бўлмаса, эртага...

— Албатта, албатта,— уни тасдиқлади Бурҳонов.— Одам топилади. Чиндан ҳам кетмоқчи бўлсангиз, биз албатта буни истамаймиз, яхши ишлашиб кетган эдик, ўзимиздан бўлгани ё районни яхши биладиган одам бўлгани яхши эди-да...

У шундай деди-ю, қизариб, пешонасидан тер чиқиб кетганини сезди. Пўлатовнинг жавоб бермаганини кўриб, қўшиб қўйди.

— Мени тўғри тушунинг... Районга... Районга яхши бўлсин дейман-да.

Пўлатов бу гал ҳам жавоб бермади. Бурҳонов унга ер остидан бир қараб қўйди-да, гап тамом шекилли, деб ўрнидан турди. Аммо михлаб қўйилгандек, жойидан қимирломмай қолди.

— Козим Бурҳонович!..— деди деразага тикилиб Пўлатов.— Иккаламиз очиқ... коммунистчасига гаплашиб олсак...

— Қулоғим сизда,— деди шошиб Бурҳонов, лекин ичидан нимадир узилиб кетгандек бўлди.

— Ўтиринг,— таклиф қилди Пўлатов.

Бурҳонов ўтирди.

— Мен сизни ҳурмат қиласман,— гапида давом этди Пўлатов, нафаси қисилаётганиданми — унинг юрак касалидан ташқари, астмаси ҳам бор эди — ё ҳар бир сўзни қидириб топаётганиданми, қийналиб гапираётгани сезилиб турарди.— Ишни яхши биласиз. Районни, одамларни ҳам. Агар сидқидилдан ишласангиз, сиз жуда яхши иккинчи секретарсиз. Бу катта лавозим. Қатта иш. Биринчи секретарь даражасига етиш учун яна баъзи бир фазилатлар керак. Масалан, кўнгил кенгроқ бўлиши керак. Эртани фақатгина ўйлаш эмас, тасаввур қилиш керак. Бошқаларга қараганда кўпроқ одамларга ҳурмат, эътибор, меҳр бўлиши керак. Бу фазилатлар менда бор, деб айта олмайман. Балки менда ҳам йўқлигидан шундай деяёт-

гандирман. Ўзингизнинг таъбириңиз бўйича, мени тўғри тушунинг. Биринчи секретарь ҳеч кимдан хафа бўлиши керак эмас. Демак, кек сақламаслиги, ҳаммага баравар қараши керак. Унинг учун йирик, майда иш йўқ. Ҳамма иш муҳим. Ҳар бир ишнинг орқасида одам турибди. Мехнаткаш қўл, меҳнаткаш юрак. Шу фазилатларсиз биринчи секретарь бўлиш қийин. Миңг тажрибали, маълумотли, олий партия мактабини битириб келган бўлсин, бари бир. Шоир Пўлкандан, ўғиллариңиздан қайси бири сизнинг йўлингиздан боради, шоир бўлади, деб сўрашганда, у болаларидан биттасини кўрсатиб деган экан: «Ҳов ановиси! Кўп ёлғон гапиради. Лекин ростдек қилиб гапиради!»

Пўлатов кулди. Бурҳонов ҳам гапнинг нимага бориб тўхташини ҳали аниқ англамай, мажбуран жилмайди.

— Мендан агар партия ходими, айниқса, райкомнинг бирийчи секретари ким бўлиши керак, деб сўрашса,— гапнини давом эттириб Пўлатов,— ким одамларни яхши кўрса, ўша бўлади, дердим. Бу албатта примитив жавоб. Лекин тўғри жавоб. Ёзувчиларни Горький киши рӯҳининг инженерлари, деган. Партия ходимига ҳам шу ном тўғри келади. Менимча кўпроқ партия ходимлари ҳақида шундай дейиш мумкин. Одамни билмасдан, унинг ташвиши, ғам-гуссасини билмасдан ишлатиш қийин. Фақат буйруқ, дўқ билан ишлатиб бўлмайди. Кечирасиз, Козим Бурҳонович... Мен сизни биринчи секретарликка тавсия қилолмайман. Ҳозирча... бўлмайди.

— Мен... ўзим ҳақимда гапирганим йўқ...

Бурҳонов қандай куч тўплаб, шу гапни айта олди, билмайди. У бўшашиб, бутун вужуди муз бўлиб кетган эди.

— Биламан, биламан!— шошиб деди Пўлатов.— Сиз ўзингизни таклиф қилганингиз йўқ. Қилмайсиз ҳам. Сиз бундай одамлардан эмассиз. Қейин... хунук бўларди ҳам. Лекин вақт ўтиб, сиздан яхши биринчи секретарь чиқиши мумкин. Кўп нарса одамнинг ўзига боғлиқ.

Вурхонов ўшанда қандай қилиб Пўлатов ҳузуридан чиқди, уйига келди, эслолмайди. Лекин бир нарсани билади. Ҳеч маҳал у бунчалик ноқулай аҳволга тушмаган эди Биринчи секретарлик у ёқда турсин, ҳозирги ишида ҳам ўзини омонат, қилтиллаб тургандек сезди. Пўлатовдан қаттиқ хафа бўлди. Бу одам унинг ниятларини чиппакка чиқарган эди. Наҳотки у энди ҳаётини янгидаи ўашлаши керак? Пўлатов кетгунча у зўрга ишлади, қарахт одамдек юрди. Пўлатов ётиб қолиб, кейин бутунлай қшга чиқмаслиги ойдинлашганда, бир оз ўзига келди. Обкомга чақириб, энди биринчи секретарь вазифасида ишлаб турасиз, дейишганда эса ўзини бутунлай ушлаб олди, олдинги орзулари яна юрагида тўлқин уриб кетди. «Пўлатов ким бўлибди?— хаёлидан ўтказди унинг гапларини.— Масалани обком ҳал қиласди. Синааб кўришмоқчи. Синашсин. Бурхонов нимага қодирлигини кўрсатади!» У шундай деб ўзини овутди. Лекин дилдида Пўлатовнинг гаплари доғ бўлиб қолди. Қанча ҳаракат қилмасин, уннотолмади бу гапларни. Ўқтин-ўқтин ёдига тушадиган, уни кемирадиган бўлиб қолди. Бугун ҳам ёдига тушди. Наҳотки, ўша Пўлатов айтган фазилатлар унда бўлмаса? Наҳотки у фақат буйруқ билан одамларни ишлатса? Одамларга меҳри бўлмаса? Ўтган йилги сел-чи? Улиб кетишига оз қолди-ку, одамларни қутқараман, деб. Искандар Фойивович уни ҳатто уришди, кейин табриклади. Ҳа, ўлиб кетиши ҳеч гап эмас эди ўшанда.

Мартнинг ўрталари эди. Бирдан кун исиб, тоғдаги қорлар эриб кетди. Бодомсой тоша бошлади. Лекин сиҳолтиклар бу тошқин хавфли эмас, кечга яқин тўхтайди, дейишиди. Шунга қарамай баъзи бир эҳтиёт чоралари кўрилди. Аммо тонгга яқин Бурхоновга Бодомсой лабидаги Селкетди қишлоғини сув босганлигини, уч-тўртта уйни сув олиб кетганини хабар қилишди. Бурхонов шу заҳоти-ബек йўлга тушди. Қишлоққа ётиб келганида даҳнатли манзарани кўрди. Қишлоқнинг олди қалқиб турган дең-

гизни эслатарди. Эшиклар, ромлар сузиб юрарди. Шудай улар рўпарасидан бир бузоқ қалқиб ўтиб кетди.

— Одам нобуд бўлмадими ишқилиб?— сўради Бурҳонов.

— Ҳозирча йўқ, лекин ким билади тағин, қишлоқка ўтиб бўлмаяпти бу ёқдан...— жавоб беришди унга.

Шу тоб сойнинг ўртасида бешик кўринди. У бир томонга қийшайиб оқиб бораради. Бурҳонов унинг бўш-бўшамаслигини ўйлаб улгурмаган ҳам эдики, қишлоқ томондан аёл кишининг дод соглани эшитилди. Кейин ўзи кўринди. Тўғрироғи, сув ичидаги боши ва қўллари кўринди.

— Болам! Алишер!— қичқиравди у бешик томон таллиниб.

Бурҳонов ўзини сувга ташлади. Зум ўтмай бешикка етди ва беихтиёр ичига қаради. Семза, қип-қизил чақалоқ думалоқ кўзларини осмонга тикканича, бошмолдогини сўриб ётарди. Кийимлари сув шимиб оғирлашган Бурҳонов бир амаллаб бешикни қирғоққа судради.

Унинг кетидан сувга тушган одамлар етиб келиб уларни олиб чиқишиди.

— Онаси! Онасига қаранглар!— деди қирғоққа чиқиши билан Бурҳонов.

Онаси аллақачон чиққан ва бешик атрофида гирдика-палак эди.

Бу воқеа ҳамманинг оғзида гап бўлиб кетди. Шу куни Селкетдида Бурҳоновга тўн кийдиришиди. Боланинг онаси, эри армияда хизмат қилаётган жувон ўзи унга кийдириди. Иўқ деганига қўймади.

— Тўйида албатта келасиз! Алишер энди Сизнинг ҳам ўғлингиз!— деди.

«Правда»даги воқеа-чи? Уч-тўрт йил бўлиб қолди бунга. Нима иш биландир борган эди Бурҳонов. Колхознинг партия мажлисига борганими, ҳозир эсида йўқ. Колхозга кираверишда Бодомсойнинг устидан ўтган кўпrik бор. Ҳозир жуда кенг, цемент ётқизилган бетон кўп-

рик. Унда тахта кўприк эди. Шу кўприкка етганида, пастда, сувнинг ичидаги беда ортилган эшак-арава ағдарилиб ётганини кўрди. Эшакнинг боши билан араванинг бир гилдирагигина сувнинг ичидан чиқиб туради.

Бурҳонов машинани тўхтатишни буюрди. Машинадан тушиб, араванинг эгасини қидирди. «Ҳой, ким бор?» қичқирди у арава томонга. Арава орқасида белигача жиққа ҳўйл бўлган бир кампир кўринди.

— Чуқурни билмай қолдим! — қичқирди у.

Бурҳонов шофёрига қаради. Ундан бошқа бирон одам йўқ эди атрофда.

— Олиб чиқайлик!..

Кўп ўтмай иккалово белларигача сувга ботиб, арава ёнига келишди. Беданинг ярми сув шимган эди. Кўтариш орир бўлди. Лекин кўтаришди. Эшак ҳам оёғига турди. Уч киши ҳай-ҳайлаб, аравани бедаси билан қирғоқча олиб чиқишиди.

— Ер юткур кўприкдан қўрқади! — қарғади эшагини кампир ва уларни уйига таклиф қилди. — Жуда бўлмаса чой ичиб кетинглар,— деди.

Бурҳонов рози бўлмади. Машинани тўппа-тўғри раиснинг уйига ҳайдашни буюрди. Кийимларни қуритиш керак эди.

Бу воқеа ҳам районда Бурҳоновнинг обрўйини анчамунча оширадиган гап бўлди.

Шу воқеалар унинг одамларга беоқибатлигини кўрсатадими? Ё бўлмаса Наримонов номидаги совхоз директори Муқимов билан куни кеча бўлган жанжал нимани билдиради? Унинг одамларга ғамхўрлигини эмасми? Ғамхўр бўлмагандаги жанжаллашиб, асабини бузиб ўтирамасди.

Жўра Муқимов янги типда, кўп жойни бориб кўриб, янги посёлка қурди. Ўттизта икки қаватли уй. Тепасида очиқ шийпони билан. Яхши уйлар. Бурҳонов бориб кўрди. Шипи баланд, қўйл тегмайди узатсангиз шаҳардаги уйларга ўхшаб. Одди ҳовли. Олти сотихдан.

Лекин кеча шу уйлар масаласида Муқимов билан у тортишиб қолди. Муқимов янги уйларга Найманчада и ҳамма одамларни кўчириш, эски қишлоқни эса бузиб ташлашни, ўрнини экин қилишни ўйлаб юрган экан, совхозда бир-иккиталар қарши чиқишибди. Бурҳонов тўғри, деди. Бутун қишлоқни кўчириб бўлмайди, деди.

— Нега?— ҳайрон бўлди Муқимов.

— Чунки Найманча уларнинг она қишлоғи. Шу ерда туғилишган. Шу ерда катта бўлишган, шу ерда яшашипти.— Тушунтириди Бурҳонов.— Шу ерда оталари, боболари туғилган. Уларнинг қабри шу ерда. Ёшлилар майли, лекин кексаларга тегиш керак эмас. Найманча жойида қолаверсин.

— Унақада қишлоқ маданиятини кўтариб бўлмайди!— хуноб бўлди Муқимов.— Кексаларни деб, уни қилиб бўлмайди деймиз, буни қилиб бўлмайди, деймиз. Нимани қилиб бўлади?

— Тутоқманг, Жўра Муқимович,— уни тинчитган бўлди Бурҳонов.— Соҳ ўсдириш, калта кўйлак кийиш билан маданиятни ривожлантириб бўлмайди. Эски урфодатларни супуриб ташлаб, янгисини яратиш қийин, тўғри ҳам эмас. Кексалар ўша жойга ўрганишган. Жойларида қолаверишсан. Сиз ҳамма қишлоқдан, тўртта қишлоқни бирлаштирганми совхоз — шу тўртталовидан ёшларни кўчиринг. Янги жойга улар тез ўрганишади.

Аммо Муқимов қулоқ солмади.

— Йўқ бари бир кўчирамиз,— деди у.— Найманчага одам киргани уялади. Етмишинчи йилда шунаقا қишлоқнинг бўлиши уят. На газ, на сув! Клуб ҳам йўқ. Битта ёзги кинотеатр бор. Кўчирамиз.

— Бундай қилмайсиз,— деди вазминлик билан Бурҳонов.— Райком рухсат бермайди. Агар ўзбошимчалик қиласангиз, бюорода муҳокама қиласиз. Кексаларни тинч қўйининг!

Муқимов индамай чиқиб кетди. Бурҳонов ўзининг ҳақлигини биларди.

Мана шу воқеа ҳам Пўлатовнинг у ҳақда нотўғри фикрдалигини кўрсатмайдими? Иўқ, у бошқалардан кам эмас.

Бурҳонов анча ўзига келди. Бош оғриғи тарқалгандек бўлди. Хотини Қарима овқат олиб кирди.

— Тузукмисиз?— сўради у косани стол устига қўяр экан.

— Мансур уйдами?— жавоб бермай сўради Бурҳонов.

Мансур үларнинг кичкина ўғли эди. Бу йил мактабни битирарди. Катта ўғиллари Элиур эса Тошкентда, медицина институтида ўқирди. Бу йил бешинчи курсга ўтган эди.

— Мактабда. Практикалари бор экан бугун.

Бурҳонов Фолькнерни суриштирмоқчи. «Фолькнер... Ҳар ҳолда бизники бўлмаса керак, чет эллик ёзувчи бўлса керак...»— хаёлидан ўтказди у.

— Анавини ол.

Бурҳонов буфет устида турган конъяк шишасига ишора қилди.

— Ўзинг овқатланмайсанми?— сўради у хотинидан.

— Ўғлингиз билан ичарман,— деди хотини.— Озиб кетди кейинги пайтда.

Бурҳонов индамади. Ярим пиёла конъякни шошиб симирди-да, шундай шошиб маставани ича бошлиди. У яхши ва тез овқатланарди. Кўпчилик орасида баъзан уялиб ҳам кетарди шундай тез овқатланишидан. Бу болалигидан қолган одат эди. Отаси ҳам шундай тез ва кўн овқат ерди.

— Усмоновингизни хотини кўчиб келибди,— деди Қарима.

Бурҳонов учун бу янгилик эди. Лекин бу хабар уни ҳайрон қолдиргани йўқ. Унинг ҳайрон қолдирган нарса хотинининг «Усмоновингиз» дегани бўлди. Унинг Усмоновга муносабатини хотини қаердан билди экан?

У шундай ўйлаб, овқатдан бошини кўтардни. Қўлидаги

Еточ қошиқни оғзига олиб бориб, тўхтади-да, косага ташлади. Аммо дилидан ўтган саволни бермади, нимадир уни ишлаб қолди.

— Қачон?

— Бугун.

Эрини бу хабар қизиқтириб қўйганини кўриб, Карима гапини давом эттириди.

— Куни етиб қолган экан. Онаси ҳам келибди. Ёлриз юбормай.

«Ҳа, Усмонов маҳкам ўрнашяпти районга», — ўйлади Бурҳонов.

— Бориб келгин эрта-перта,— деди у хотинига ва яна овқат ейишга тушди.

— Узим ҳам шуни ўйлаб турувдим. Сиздан сўрамоқчи эдим.

— Хўш?

— Бир нарса қилиб борсаммикан ё қуруқ... бораверайми? Улар ёш, тагин уялиб қолмайлик.

Бурҳонов нима дейишини билмай қолди. Лекин бир нарса дейиш керак эди.

— Ўзинг биласан. Хотинларнинг ишини мен қаердан билай!?

У овқатини еб бўлиб яна диванга чўзилди. Ҳа, Усмонов ёш эди, ундан анча ёш. Ундан ўқимишли, ундан маданиятли ҳамдир. Ҳа, бу кўриниб турибди ҳар бир қадамида, ҳар бир гапида. Лекин унинг Усмоновдан ҳеч қандай гинаси йўқ эди. Беш панжа баравар эмас. Одам одамга ўхшамайди.

— Бир талаӣ китоб олиб келдим кутубхонадан,— унинг хаёлини бўлди хотини.

— Нима, қариганингда саводингни чиқармоқчимисан? — сўради Бурҳонов.

Карима ҳеч қаерда ишламас эди. Ёшлигида медицина техникумини битириб, ҳамширалик қилган, Бурҳоновга текканидан бери уйда ўтириб қолган эди. Бир-икки марға ишламоқчи бўлганида Бурҳонов жеркиб берган. «Оч

қоляпсанми, ишга кетадиган вақтингни болаларингга сарфла!»— деган эди.

— Сизниям,— деди хотини ер остидан жилмайиб.

— Нима?— тушунмади Бурҳонов.

— Сизниям саводингизни чиқармоқчиман. Усмонов ким қанча китоб ўқиди, суриштираётганмишлар. Биз ҳам бормишия рўйхатларида.

Бурҳонов ичида тутоқиб кетди. Аммо хотини жавоб кутаётганини кўриб, ўзини босди.

— Яхши қилибсан,— деди хотиржамлик билан.— Фолькнер ҳам борми?

— У ким бўлди?— сўради хотини.

— Ёзувчи. «Шовқин ва газаб» деган китоби бор. Бўпти... Мен бир оз мизгиб олай. Телевизорда кино бўлса чақиравсан.

Бурҳонов шундай деб, девор томонга ўгирилиб, кўзларини юмди.

Шу ётганича ярим кечада ўрнидан турди. Уни фалати бир фикр қамраб олган эди. Шу фикр билан ёзув столи ёнига ўтириди ва ёза бошлади: «Биз Бодомсойлик бир гурӯғ меҳнаткашлар, сўнгги йилларда районимизда юз бераётган воқеалардан ташвишга тушиб, қўлнимизга қалам олишга мажбур бўлдик. Район партия комитетининг биринчи секретари ўртоқ Усмонов...»

Бурҳонов ўйланиб қолди. У қаттиқ ҳаяжонга тушган, ручка ушлаган қўли титрарди. Ў биринчи марта умрида қилмаган ишни қилаётган эди. Бу фикр қачон келди миясига? Нега шундай қилишга қарор қилди? Билмасди. Лекин Усмонов ҳақида ёзишга иккинчи марта ўтираётган эди. Биринчи марта ўзини мажбур қилиб, бу фикрдан қайтди. Лекин ҳозир қарори қатъий эди. Ҳатто хатни қандай жўнатишни ҳам ўйлаб қўйган эди. Хат албатта Бодомсойдан бориши керак. Эртага у «Максим Горький»-да бўлади. Ана ўша ердан жўнатади. Султоновнинг тарафдорлари юборган бўлади хатни. Хўп, нима деб ёзиш керак? Хат содда, юмшоқ, қисқа, аммо фактларга бой бўй

лиши керак. Албатта шу битта хат билан Усмонов ишдан олиб ташланмайди. Аноним хатларга ҳозир аҳамият берилмайди. Лекин ўрганилади. Текширилади. Усмонов ҳақида гап пайдо бўлади. Шунинг ўзи ҳозирча катта гап.

Бурҳонов ёза бошлади.

«...Ўртоқ Усмонов ёшликлари натижасида бўлса кепрак, бирмунча нотўғри ишлар қиляптилар. Биз у кишини маънавий бузуқликда айблолмаймиз. Лекин «Шаэрқ юлдзузи» колхозининг агрономи билан ниҳоятда яқин муносабатда эканликларини бутун район гапириб юрибди. Партия ва ҳукуматимиз савдогарчилик, чайқовчиликка қарши курашяпти, ўртоқ Усмонов райондаги чайқовчиларни ўз ҳимояларига оляптилар. Ҳаттоқи бир одамни терговдан чиқариб олдилар. Улуг Ватан уруши йиллари қаерларда нима қилиб юргани номаълум бўлган шахслар ҳам у кишининг ёнидан паноҳ топишяпти.

Биз узоқ мулоҳазадан сўнг, ўртоқ Усмоновга ачинганимиздан районимиз шаънига доғ тушиб қолмаслигини ўйлаб шу хатни ёзишга мажбур бўлдик...»

Бурҳонов шу ерга келганда хатни тугатди. Шунинг ўзи қифоя эди. Учта жиддий айб қўйилди унда Усмоновга. Ҳар бири чуқур ўрганишни талаб қиласди. Бу эса Усмонов ёмон томондан тилга тушади, деган сўз.

У хатни қайтадан ўқиб чиқди. Кўнгилдагидек содда, юмшоқ, қисқа ёзилган эди. Конверт олиб, ичига солди. Лаби билан конвертнинг очиқ варагини ҳўллаб, ёпиштириди. Адресини ёзишга келганда ўйланиб қолди. Искандар Фойивович номига ёзилса, хат текширилмай қолиши мумкин. У одам кўпни кўрган одам. Ишонмайди. Жуда бўлмаганда Усмоновнинг ўзини чақириб, ўқитади-да, йиртиб ташлайди. Бўлимга ёзиш керак эди. У ерда хат қўлдан-қўлга ўтади. Кўпчилик ўқииди. Бурҳоновга шу керак эди. Мулоҳаза қилиб, бу фикрдан ҳам қайтди. Биронта ходим номига шахсий хат қилиб юбориш керак. Шундай қилганида, хатлар бўлимидағилар ўқимайди. Хат эгасининг ўзига олиб чиқиб беришади. Хат эгаси

эса бундай хатни ўқиб йиртиб ташлолмайди, бошлиқла-рига кўрсатади. Шундан кейин хат ўзидан-ўзи ўрганила-ди. Бурҳонов шу фикрда тўхтаб, обкомдаги масъул хо-димларни эслай бошлади. Ниҳоят Долимов фамилиясида тўхтади. Бурҳоновнинг у билан салом-алиги бор эди. Лекин яхши билмасди. Одамлардан аппаратда узоқ ўти-риб қолди, хати, мулоҳазаси яхши, деб эшигтан эди. Бун-дан ташқари, бир куни у билан обкомда учрашиб қолди. Долимов у билан кўп йиллик қадрдонлардек сўрашди. Гап орасида:

— Хўш, янги шеф қалайлар? — деб сўради.

Бурҳонов унинг гапи оҳангидага киноя борлигини сез-ди. Шу учрашув ҳозир эсига тушди. Хат ташкилий бў-лимга алоқадор бўлса ҳам Долимовнинг номига юбориш-га қарор қилди.

Адресни ёзиб бўлиб, оғир ишидан қутулган одамдек қўлларини орқата ташлади ва анчагача қоронғи дераза-га тикилиб ўтирди. У қабиҳ иш қылғанини, кейин бир умр шу ишидан азоб чекишини биларди. Шунинг учун ҳам хатни ёзиб бўлиб, енгил тортмаган, аксинча азоби кучай-ган эди. Хатни йиртиб ташламоқчи ҳам бўлди, аммо ни-мадир ушлаб қолди.

У эшик ёнинда осиғлиқ турган бандорас тўкини елкага ташлаб ҳовлига чиқди. Бўрибосар ити эркаланиб, «ув-в» деди-да, оғир занжирнини шиқирлатиб унга талпинди. Бурҳонов эътибор бермай, кўча томон юрди.

Бодомсойда унинг яхши қўрган жойи бор эди. Чарча-ганди, кайфи бузилганди ё бирон нарсанни ўйлаб олиш зарурати пайдо бўлганди шу жойга борарди, бирон соат айланиб қайтарди. Бу жой уйидан юз қадамча нари бў-либ, икки томонга бир текисда қатор қилиб тераклар ўтқазилган катта йўл эди. Бодомсойнинг шимол томони-га фақат шу йўл орқали ўтиларди. Бурҳонов қай маҳал шу йўлдан ўтмасин, осмонга бўй чўзган типпа-тиқ терак-ларга ҳавас билан бир қараб қўярди. Қачон ўтқазилган бу тераклар? Буни у билмасди. Бодомсойга келганида

улар бор эди. Бодомсойликлар ҳам теракларни ким, қа-
чон ўтқазганини билишмасди. Теракнинг умри қисқа
бўлади. Лекин бу ерда улар кўп асрлардан бери бордек
эди. Кўпаймасди ҳам, камаймасди ҳам. Кимнингдир меҳ-
рибон қўллари қўриётган теракни қирқиб ташлаб ёнига
ёш ниҳол экиб кетар, кўп ўтмай у гуркираб ўсиб, ёни-
веридагиларга етиб оларди. Бу меҳрибон ким — ҳеч ким
айтиб беролмасди. Бунга ҳеч ким қизиқмасди ҳам. Тे-
ракларни асраш, уларни парвариш қилиш ҳар бир бо-
домсойликнинг одатига кириб қолган эди. Қайси бир
йили Бурҳоновнинг ўзи ҳам, учидан саргайиб тушаётган
бир теракни кўриб шоғёрига айтган эди, келгуси йили
шу терак ўрнида янгисини, ёшини кўрди.

Бурҳонов шу ерга келиб, ариқнинг нариги лабида
экинзорга туташиб кетган ёлғизоёқ йўлга ўтиб олди. Бу
томон тиич эди, шу томонда хаёлга эрк бериш мумкин
эди. Қоп-қоронғи осуда тун қўйнига ғарқ бўлган терак-
ларнинг майнин шитирлаши, ариқ тўла зулукдек ялтираб
оқаётган сувнинг оҳиста жилдираши унинг руҳини бир оз
кўтарди. Фақат угина шу ерга келмаган бўлса керак,
хаёлидан ўтди унинг, фақат угина шу тераклар остида
ўйини ўйламаган, режалар тузмаган бўлса керак?..
Тераклар кўпни кўрган, баъзилар улар остидан шодлиги-
ни кўз-кўз қилиб, кўкрак кериб ўтган, баъзилар эса юзи-
ни кўрсатмай, ғам тўла дилини ҳовучлаб ўтгандир?..
Одамларнинг баҳтини ҳам кўрган бу тераклар, фожиа-
сини ҳам. У бу ерга нима билан келди? Режаси тўғрими?
Тўғри бўлса, нега дили ғаш, тинчи бузилган?..

Бурҳонов қоронғи осмонда кўзмунчоқдек милтилла-
ган юлдузлар, шамолсиз тунда соқчилардек тек турган
қадим, ҳамиша навқирон теракларга тикилиб анча юрди.
Аммо ўйининг ниҳоясига етолмади.

Усмонов ҳар галгидек ҳаммадан эрта ишга келди. Үнинг кайфи чоғ эди. Ҳафизанинг Бодомсойга кўчиб келгани яхши бўлди. Болалари Бодомсойда туғилиб ўсади, шу ерда ўқийди. Институтни битириб, балки шу ерга ишга келади. Балки эмас, албатта келади. Усмонов шундай эллик уч — эллик тўртга кирган бўлади. Демак ҳали фарзандини ўз районида ишлатишга қурби етади, пенсионер бўлмайди. Бодомсой у пайтларгача эҳ-ҳа, таниб бўлмайдиган даражада ўзгариб кетади. Балки шаҳар бўлиб қолар? Ҳозирнинг ўзидаёқ аҳолиси етти мингдан ортиқ. Ўнгача икки баробар кўпайиши мумкин. Бир ҳисоблаш керак экан,— хаёлидан ўтказди Усмонов.— Умуман ўн беш — йигирма йиллик перспектив план ишлаб чиқиши керак. Ўн беш йиллик план бўлса керак. Уни қайтадан кўриб чиқилса ёмон бўлмайди. План саксон биринчи йилгача тузилган эди адашмаса. Анча нарса ўзгариб кетди. Бодомсой мармари ҳозир бутун иттифоққа машҳур бўлиб кетди. Икки йил олдин уни ишлаб чиқариш ҳам мавҳум эди. Балиқчилик совхози-чи? Бу ҳам мўлжалда йўқ эди. Ўтган йили совхоз ташкил этилди. Бир йилда шу совхоз тирик балиқ билан областни таъминлайдиган бўлиб қолди.

Усмонов шу хаёллар билан ёш боладек завқи тошиб қабулхонага кирди. Малоҳатнинг ўрнида деразага тикилганича Носир Пўлатович ўтиради.

— Эрта келишингизни билиб келдим,— деди у ўрнидан турар экан.

— Жуда яхши. Қелинг.

Улар сўрашишди. Усмонов кабинетини очиб, Носир Пўлатовични ичкарига таклиф қилди.

— Хўш, Носир Пўлатович, ишлар қалай?

— Дуруст. Құдрат Саимович билан анча нарсанни ҳал қилдик. «Сельхозтехника»дан иккита Қ-700, битта

бульдозер, тўртта юк машинаси ажратилди. Раҳмат. Айтиб қўйган экансиз. Назаримда ҳозир ҳеч қандай ташвишимиш, қийинчилик йўқ. Мен хайрлашгани кирдим. Эртага келинойингиз билан кўчиб кетяпмиз. Сотиволди иккита ўтов берди. Шуни қуриб турамиз вақтинча. Султонов ҳам саҳиyllик қилди. Учта фин уйи бор экан, ўрнатилмаган. Шуни инъом қилди. Ҳозир боринг, демайман, бир ойлардан кейин бир биз томонга ўтсангиз ёмон бўлмас эди. Одамларнинг руҳи кўтарилар эди.

— Албатта бораман,— деди Усмонов.— Бирон қийинчилик туғилса, дарҳол хабар қилинг...

— Бир илтимос бор эди...

— Эши таман...

Усмонов бу одам билан гаплашишни яхши кўрарди. Гаплари доим қисқа, равон. Ўзи сезмаган ҳолда у ҳам шундай қисқа ва аниқ гапиришга интиларди.

— Назиржонни менга берсангиз...

Усмонов аввал гап ким ҳақида кетаётганини тушунмади.

— Назиржон?..

— Ҳа, Назиржон Каримов,— қайтарди Пўлатов.

— Бўлим бошлиғини?

— Ҳа. Мен уни кўпдан бери биламан. Боғдорчиликни яхши кўради. Яхши билади ҳам.

Усмонов ўйланиб қолди. Райком бюросининг аъзоси, пропаганда ва агитация бўлмининг мудири Назир Каримов обком номенклатурасидаги одам эди. Шундай одамнинг совхоз агрономи бўлиб бориши тўғриликан? У каттароқ ишга, мустақил ишга лойиқ эди, жуда бўлмаганда бирон колхоз, бирон совхозга раҳбарлик қилиши мумкин эди. Усмонов кўнглида Пўлатовдан ранжигандек бўлди. Наҳотки шундай тажрибали одам партиянинг кадрлар масаласидаги сиёсатини унуглан бўлса? Бир одамни партия аппаратида тарбиялаш, иш ўргатиш осонми? Каримов уч йилдан бери райкомда ишлайди. Усмонов келганидан бери у ҳақда бирон ножӯя гап эшигтгани

йўқ. Ўзи ҳам Усмоновга маъқул тушди. Оғир, жиддий, сёрфикр йигит.

Унинг иккиланиб турганини кўрган Пўлатов, тушунтира бошлади.

— Бу ният менда йўқ эди. Уни райкомга олишни Коғим Бурҳонович таклиф қилган эди бир пайтлари. Султонов билан келишолмай қолган экан. Менимча ёмон ишламаяпти аппаратда.

— Яхши ишлалапти,— деди Усмонов.

— Кеча ўзи келди уйга,— гапида давом этди Пўлатов.— Ишидан рози.— Кўп нарса ўргандим аппаратда, дейди. Лекин мен агрономман. Студентлигимдан ўз қўлим, ўз меҳнатим билан янги ер очишни, боғ қилишни орзу қиласардим. Ҳайитвой акага айтганман, буни. Рози бўлмаганлар, дейди. Янги совхозни биргалашиб ташкил этсан, дейди. Мен фақат хурсанд бўлдим бу гапдан, Дамир Усманович. У менга ўн мингчиларни эслатди.

Усмонов бу фактни яхши биларди. Ўттизинчи йилларнинг бошида партия ташаббуси билан минглаб масъул партия ходимлари қишлоққа ишга жўнаган эдилар. Шулар орасида унинг отаси ҳам бор эди. Уни ўз хоҳиши билан шаҳар партия комитети Бодомсойга, Сталин номли колхозга йигирма тўққизинчи йили раисликка тавсия қилган эди.

Усмонов селектор тугмасини босди.

Малоҳат кирди.

— Эшитаман, Дамир Усмонович?

— Ўртоқ Каримов шу ерда бўлсалар кирсинлар.

Худди шу таклифни кутиб тургандек, эшг’кда Қаримов пайдо бўлди. У нима учун чақирилганини билганидан уялиб турарди.

— Келинг, Назир Қаримович...— таклиф қилди Усмонов ва Пўлатов рўпарасидаги креслога ишора қилди.— Фикрингиз қатъийми?

— Ҳа,— деди Қаримов ўтирас экан.— Агар рухсат берсангиз, борардим. Боғдорчилик ота касбим, Дамир

Усмонович. Яхши мўраман. Носир Пўлатовичнинг ташаб-бусларини эшитиб, жуда қувониб кетдим. У жойларни мен яхши биламан. Ажойиб боф қилиш мумкин. Қейин, биласизми...

Усмонов уни эшитар экан, хурсанд эди. Ҳа, бу одамлар чиндан ҳам ажойиб боф яратишлари мумкин. Уларни амал ҳам қизиқтиришмайди, фаровон, тўқ турмуш ҳам. Улар ўз орзуладарининг фидойилари. Шундай экан, уларнинг раъйини қайтариб бўлармиди?!

— Майли,— деди Усмонов эшитиб бўлиб.— Келгуси бюореда ҳал қиласиз.

— Раҳмат!— Каримовнинг кўзлари чақнаб қетди.— Кетаверайми?

— Ҳа. Ҳозирча ишларингизни қилиб туринг.

Каримов яна бир марта миннатдорчилик билдириб, чиқиб қетди.

— Унинг режаларни катта,— деди Носир Пўлатович,— Вақти келиб боф ёнида санаторий қилиш мумкин, дейди. Фақат мева билан даволайдиган.

Пўлатов кетиши билан Усмонов туғруқхонага телефон қилди.

— Тинчликми?

— Ҳали тинчлик,— жавоб қилди туғруқхона бош врачи.

Усмонов тўладан келган, ўрта ёшли бу аёл билан қе-ча, Ҳафизани олиб борганда танишган эди. Унинг ҳам фамилияси Усмонова эди. Ҳамида Усмонова.

— Онаси қалай?

Усмонов биринчи марта Ҳафизани шундай атаган эди, Бу сўз қандай қилиб оғзидан чиқиб кетганини ўзи билмай қолди.

— Кулиб ётибдилар,— деди врач.— Дамир Усмонович, сиз ҳавотир олманг, ҳаммаси жойида бўлади. Биласизми, Дамир Усмонович, ўғлингиз бугун туғилса, бизда туғилган иккимингинчи бола бўлади. Юбилей бола бўлади.

— Яхши, табриклайман,— деди Усмонов.— Неча йил бўлади түғруқхона очилганига шунда?

— Тўққиз йил,— деди врач.— Тажрибамиз кичкина эмас.

— Ўғил дедингиз, қаердан биласиз?— сўради Усмонов. Унга ким туғилиши барни бир бўлса ҳам дилида ҳар ҳолда ўғил бўлишини истарди.

Врач кулди.

— Бу сир. Мен ўзим телефон қиласман. Хавотир олманг.

Усмонов трубкани қўйди. Малоҳат кирди. У ҳам неғадир бугун қувноқ. Кўзлари чақнарди.

— Суюнчини менга берасиз,— деди у.— Биринчи мен эшитаман.

— Хўп бўлади,— деб кулди Усмонов.

— Бугун «Олға» соат саккизда тарқатилди!— деди Малоҳат ва унга икки нусха газетанинг янги сонини узатди.

Усмонов уни олар экан, Бурҳонов билан ўтган куни бўлган суҳбатини эслади. Бурҳоновни у маҳсус чақиргани йўқ. Бир иш билан кирганида:

— «Олға» билан, Козим Бурҳонович, Собир Алиевич шуғулланмай қўйибдилар,— деди.— Сизнинг бошқа ишларингиз ҳам етарли. Ўзларига беринг. Газетага тегишли гапимиз бўлса у киши орқали қиласман. Сиз ҳам, мен ҳам.

Бурҳоновга бу гап ёқмади. Қошлари чимирилди. Лекин қаршилик қилмади.

— Майли. Лекин кейинги пайтда сифати тушиб кетганди газетанинг,— деди.— Итирифчи материаллар ҳам чиқиб кетди.

— Хотин-қизлар ҳақидаги фельетонми?— сўради Усмонов.

— У ҳам, яна бошқа материаллар ҳам бор.

— Фельетонни ўқиб чиқдим,— деди Усмонов. У чиндан ҳам навбатчилик қилиб қолган кунларидан бирида

газета подшивкасини варақлаб чиққан, фельетонни ўқи-
ган эди. Фельетон ёмон ёзилган эмас, тили ўткир, факт-
лар жиддий. Автор қачонлардир ўқиб, әнди ҳеч қаерда
ишламаётгандын «үй бекалари»ни қаттиқ танқид қилган
эди.— Фактлари түғри бўлса, жиддий масала кўтарили-
ган.

— Қечирасиз, бу масалада сизга қўшилолмайман,—
эътироуз билдири Бурҳонов.— Мени түғри тушунинг.
Фельетонда кўпгина обрўли одамлар камситилган. Бун-
га йўл қўйиб бўлмайди.

— Обрўли одамларнинг ўзлари танқидга имконият
яратиб берган бўлсалар-чи?— деди Усмонов.— Адаш-
масам, фельетон нотўғри, деб топилган бўлса ҳам, ўз
ишини қилган. Баъзи сиз айтган обрўли одамларнинг
хотинлари ишга киришган. Тўғрими? Ҳаммаси эмас,
баъзилари.

Бурҳонов жавоб бермади. Гапни бошқа ёқса бурди.

— Майли, Собир Алиевичга айтаман, ўзи шуғуллан-
син.

Демак, айтибди. Усмонов газетани очди. Бош мақола
берилибди. «Мўл ҳосил гарови». Актив материаллари
асосида бўлса керак, тахмин қилди Усмонов. «Маданий
хроника». Беш-олтита хабар босилибди, шу сарлавҳа ос-
тида. «Районимиз ижодкорлари». Бу нима экан? «Ёз
кунларининг бирида». Ҳикоя. Кимники экан? Усмонов
материал охирига назар ташлади. Мирҳайдар Барат. У
жилмайди. Ёшлар қизиқ. Битта шеър ёёсалар ҳам дар-
ҳол фамилияларига шоирона тус берадилар. Баратов
эмас, Барат. Ўқиб чиқиш керак, хаёлидан ўтказди Ус-
монов, фельетонга қараганда, истеъдоли йигитга ўх-
шайди.

Усмонов бош мақолани ўқиб бошлаганда, Малоҳат
унинг диққатини бўлди.

— Дамир Усмонович! Үртоқ Муқимов кирмоқчилар,
мумкинми?

— Марҳамат.

Усмонов газетани буклаб, уйга олиб кетиш ниятида
шига олиб қўйди. Қабинетга Муқимов кирди.

— Салом.

— Келниг, Жўра Муқимович!

— Маслаҳатга келдим,— деди Муқимов унга қўлини
узатиб.

— Бемалол.

Усмонов жой кўрсатди.

— Кеча Қозим Бурҳоновичда бўлган эдим. Иш бит-
мади. Тўғрироғи, мен ўйлаганча бўлмади.

Муқимов новча бўйи, йирик, илгакдек буралиб туш-
ган гўштдор бурни билан Полвоновга ўхшаб кетарди.
Овози ҳам йўғон, аммо майин, сўзлар оғзидан мойлан-
ган ҳалқалардек думалаб чиқарди.

— Гап шундаки, шунча йилдан бери ҳаракат қилиб
курган посёлкамиз битди. Болалар боғчаси ҳам қурдик
Вэги кинотеатр. Кутубхона, магазин... Хуллас, маданий
яшаш учун лозим бўлган ҳамма нарса бор. Шу ойниг
ичи табиий газ ҳам келади.

— Табриклийман. Муборак бўлсин,— деди Усмонов.

— Раҳмат,— деди Муқимов. Аммо унинг овозида хур-
сандчиликдан кўра, ташвиш кўпроқ эди.— Энди одамлар,
совхоз ишчилари кўчиб ўтса, тамом. Шу масалада қий-
налиб қолдик. Посёлка асосан Найманчадагиларга мўл-
жигъланган эди. Найманчани билсангиз керак?

Усмонов ҳа, дегандек бошини қимирлатди.

— Шу қишлоқ худди ошига тушган пашшадек одам-
чининг энсасини қотиради,—гапида давом этди Муқимов.—
Ҳеч нарса йўқ. На кино, на кутубхона. Ўйлар хароб.
Сув, водопровод суви ўтмаган... Одамлар қандай яшаб
келишади, билмайман. Ниятим шу қишлоқдагиларни
шундай янги посёлкага кўчириш эди. Номиям қолавер-
син, майли, Найманча бўлиб. Йўқ, баъзилар кўчмаймиз,
лейди. Нега, дейман. Негалигининг тагига етолмайман.
Кече ўртоқ Бурҳоновга кирсам, у киши ҳам кексаларга
тегманг, дедилар. Кексалар кўчмаса, оиласларнинг кўпи

бузилади. Ёшлар посёлкада, кексалар шу ташландиқ қишилоқда! Ҳаёт-ҳаёт бўладими унда? Кейин, Дамир Усмонович, қачонгча урф-одат, урф-одат, деб юрамиз? Совхоз қанчадан-қанча пул ажратиб, ишини ташлааб, қулинг ўргилсин уйлар қурса-да, бир-иккита қолоқ одамлар, деб ҳаммани янги жойдан маҳрум қилсан? Менимча бу тўғри эмас. Ҳаммани кўчириш керак! Шунда бутун Найманча аҳолиси янга бир жойда бўлади-кўяди. Биринки ҳафта ўтиши билан кўчишга чўчиётганлар ҳам ўрганиб кетади янги жойга.

— Ёшлар-чи? Ёшлар нима дейди? — сўради Усмонов.

— Ёшлар нима дерди? Ёшлар ҳозироқ кўчамиз деб турибди. Фақат кўпчилигининг ота-онаси бор, баъзиларнинг бувалари ҳам бор. Шу масала уларни қийнаб турибди. Бизнинг гапимизга қулоқ солишмаяпти, дейишяпти, маъмурият аралашса ёмон бўлмасди, дейишяпти.

— Ўртоқ Содиқовга учрадингизми?

— Учрадим. Қудрат ака қизиқ одамлар, — кулди Муқимов. — Менга қолса, дейдилар, эски Найманчани буздириб ташлардим. Чолларни кўндиринг, шикоят қилиб юришмасин, дейдилар. Дамир Усмонович, шикоят қилиб нима қилишарди? Ҳозирги турган уйлари қаёқда-ю, янги уйлар қаёқда!

— Бўпти. Кўчиринг, — деди Усмонов. — Шикоят қилинса, иккаламиз бир амаллаб жавоб топармиз. Топамизми?

— Бўлмаса-чи! — севиниб кетди Муқимов. — Раҳмат. Сиз мени тушунарсиз, деб ўйловдим, Дамир Усмонович. Ҳозироқ бориб Найманчада мажлис ўтказаман. Сизнинг розилигингизни айтаман. Раҳмат.

Муқимов ҳовлиқиб чиқиб кетди.

Усмонов Содиқовга телефон қилди.

— Қудрат Саймович, Муқимовнинг ишини районга ёйиш керак. Назаримда катта иш бошлаган.

— Яхши иш, тўғри, — деди Содиқов. — «Правда»даям шундай қилинняпти. «Шарқ юлдузи»да ҳам. Кўргандир-

сиз. Шундай йўлнинг устида. Лекин Сотиволди ака шошмаяптилар одамларни кўчиргани.

— У кишини ҳам шошириш керак,— таклиф қилди Усмонов.— Қанча тез янги жойларга кўчишса одамлар, ۋайон шунчалик обод бўлади.

— Бу тўғри,— қўшилди яна унинг фикрига Содиков.— Лекин кўчириш осон бўлмайди, Дамир Усмонович. Ҳар ҳолда киндик қони тўкилган жойдан одамларнинг кетиши қийин. Айниқса кексалар...

Бу гаъ Усмоновни ўйлатиб қўйди. Чиндан ҳам қийин бўлса-чи? Муқимов иккалови ҳозир шошқалоқлик қилиб қўйнишмадимикан? Лекин бари бир Усмонов ўз фикрида қолди. Чумчуқдан қўрқсан тариқ сепмайди!

— Қани, Муқимов бир уриниб кўрсин-чи!— деди Содиковга ва трубкани қўйди.

Тушлик овқат пайти у Мамашариф отанинг уйига борди. Заргар чолни биринчи марта кўрганидаёқ, Ҳафиzagа илоннусха билагузук олиб беришни дилига тугиб қўйган эди. Ҳозир айни вақти. Албатта бу қимматбаҳо нарса эмас, кейин Ҳафиза турли тақинчоқларга ўч эмас эди. Аммо ўша билагузук Усмоновга ёқиб қолди. Далварзин тепадаги қазилмалар ичидан худди шундай жез билагузук чиқсан, унинг суратини Пугаченкованинг китобида кўрган эди. Чол ясаган билагузук ана шу узоқ ўтмишни унга эслатган, кўзига худди ўша суратдагига ўхшаб кўринган эди.

Мамашариф ота ўзи каби нураб қолган тор кўчанинг ичидаги тураг экан. Уйи ҳам эски. Олди айвон, икки хоналик уй. Аммо яхши қаралган, озода. Айвонининг бурчагида одам белидан келадиган иккита хум турарди. Уларнинг ёнида мис жом ва қадимий обдаста. Усмонов айвонга кўтарилилар экан, беихтиёр ўймагуллик эшикка кўзи тушди. «Ҳавасли одамга ўхшайди».— Хаёлидан ўтказди у.

Мамашариф ота уйда ёлғиз эди. Усмоновни дарҳол таниди.

— Мана ўғлим, сизнинг бир оғиз гапингиз билан тинчишим, қўйдим,— деди у Усмоновни янги кўрпачага ўтқизар экан.— Ишимам юришиб кетди. Шовутларам беришди. Унта шовутим бор. Ҳаммаси эслик боллар.

Усмонов илтимосини айтди. Чол бошини қимирлатиб қолди.

— Аттанг! Аттанг! Уни бериб юборувдим. Ҳалиги бир раққоса бор. Ўзи фаргоналик, опирбалетда ишлайди. Оти эсимдан чиқди. Шу олиб кетувди. Майли, ўғлим, келинимга мен ундан яхшисини ясад бераман. Уч ўрам бўлсинми, тўртта?

— Одмироқ бўлаверсин,— деди Усмонов.

— Майли. Уч ўрам ясад бераман. Қўзига ёқут соламан. Қоронғуда ёниб туради. Илоннусха тақинчоқлар қаердан келиб чиқсан, биласизми?

Усмонов йўқ, деди.

— Бунинг тарихи бор. Искандар Маворауннаҳри, Сўғдни босиб олгандан кейин халқ кўп қўзғолган. Қўзғолон устига қўзғолон бўлаверган. Бир қўзғолонга Аспириұҳ деган паҳлавон бошчилик қилган. Румлиларни кўп тинкасини қуритган. Шу паҳлавоннинг Зебонасаб дегани хотини бўлган. Ҳусн бобида етти иқлимда унга тенг келадиган гўзал бўлмаган. Бир жангда Аспириұҳ енгилиб, эр-хотин бир отга мinggaшиб қочишади. Бир чўлу-биёбонга етишгандан от чарчайди. Душман етиб келади. Уларни ўраб олади. Яна қаттиқ жанг бўлади. Аспириұҳ хотинининг қўлида жон беради. Шунда Зебонасаб эрининг қиличини қўлига олиб душманга ташланади. Қанчадан-қанчасини ер билан яксон қилади. Душман бўлса кўп, ёнирилиб келаверади. Зебонасабнинг қўлидаги қиличи синади. Бечора нима қилишни билмай, ерга бош эгганда, эрининг кўкрагида кулча бўлиб ётган илонга қўзи тушади. Уни думидан ушлаб қўлига ўрайди-ю, яна душманга ташланади. Ўшандан бери аёллар илоннусха зирақ, тумор тақиб келишади, билагузук тақишади. Илгари бу-

лар Зебонаасаб дейиларди. Ҳозир уннутилиб кетди. Тўрт кун, узоги билан беш кунда битади. Бўладими, ўғлим?

Усмонов афсонага ҳам, чолнинг ўзига ҳам қойил қолган эди. Бу одамлар табаррук, уларни эҳтиёт қилиш керак, ўйлади у, гап кўп уларда. Қанча нарса уларнинг ичидаги кетди экан, ҳеч ким билмай?

Чол, элтиб бераман, деса ҳам беш кундан сўнг ўзи киришини, балки хотинини олиб келишини айтиб, Усмонов ўрнидан турди. Райкомга қайтар экан, нимадир юрагининг бир четини тимдалаётганини сезди. Нима бўлиши мумкин? Ётуиги ишларини у бирма-бир ўйлаб чиқди. Ниҳоят топди. Муқимов иккалови Найманчалик қарияларни кўчириб, дилларини оғротиб қўйишмасмикан? Усмонов уларни билмаса ҳам, ҳар бирида заргар чолни кўргандек бўлди. Лекин ўзини тинчиди. Ҳеч ким уларга ёмонлик истамаяпти-ку? Қайтаnga уларнинг фароғатини ўйлашяпти. Муқимов ҳам, Усмонов ҳам. У шундай хуласага келиб, ўзини тинчиди.

Райком эшиги олдида, Малоҳат кўринди. Усмоновни юраги дукиллаб уриб кетди. Қадамини тезлатди. Уни кўриб, Малоҳат ҳам қаршисига югурди.

— Суюнчи беринг! Ҳафиза опам туғдилар. Үғил!— қичқирди у.

Йўловчилар тўхтаб, уларга қарашаётганига эътибор бермай, Усмонов уни қучоқлаб олди.

— Қачон?

— Ярим соат бўлди. Ҳамида опам телефон қилдилар!

— Рустамни чақиринг. Мен бориб келаман!

Туғруқхонага келганида Ҳамида Усмоновна билан онаси чиқди.

— Муборак бўлсин ўғил!— деди Ҳамида Усмоновна.

Мастура опа ўғлини қучоқлади.

— Худди ўзинг, болам! Паҳлавондай!.. Уч кило тўрт юз грамм!

— Шунаقا кичкинами?— деб юборди Усмонов.

— Бу жуда яхши тош,— деди Ҳамида Усмоновна.—
Ҳафижахонга оғирлик ҳам қилди.

— Онаси қалай? Ҳафиза?— сўради Усмонов.

— Анча чарчадилар. Қийин бўлди уларга.

→ Кўрсам бўладими?

Ҳамида Усмоновна жилмайди.

— Иўқ. Ҳозир мумкин эмас. Эртага кечқурун балки ўзлари дераза олдига келарлар.

Аммо Ҳафиза ўша куни кечаси оламдан ўтди. Врачлар инфаркт дейишди.

Усмонов тўсатдан бошига тушган оғир мусибатга аввал ишонмади, яни касалдан турган одамдек карахт бўлиб юрди. Искандар Фойибович, Пўлатов, Муслим ака, Солиевларнинг қабристонда юришганига ҳам эътибор бермади. Эргаснга оқшом пайти Ҳафизани кўмиб келиб, мотамсаро уйга кирганда нима бўлганини англади ва доддлаб юборди.

— Ая! Нима бўлди ўзи, ая?! Мингта боланиям Ҳафилага алмашмасдим-ку, ая!

Мастура опа ўғлининг бошини бағрига босар экан, юпатган бўлди.

— Кўй, ундей дема. Бахтингта болангнинг умри узоқ бўлсин.

У шундай деди-ю, тўлиб турган ўпкасини тутолмади, ҳўнграб йиғлаб юборди.

XVI

Область партия комитети бюросининг кенгайтирилган йиғилишига қатнашган Бурҳонов, тушдан сўнг қайтмоқчи бўлиб, машинасига ўтираётганда, кимдир чақириб қолди. Үгирилганда, унинг қаршиисига шошиб келаётган обком инструктори Тешавой Долимовни кўрди.

— Безовта қилганим учун узр, Козим Бурҳонович!

деди у.— Сизда маслаҳатли ишим бор эди. Бир минутгә менинг хонамга кўтариолмайсизми?

— Бемалол.

Бурҳонов Долимовнинг орқасидан ичкарига кирди. Долимов кабинети томон беданадек пилдираб борар экан, ўқтин-ўқтин орқасига қараб қўяр, Бурҳоновнинг кўзига кўзи тушганда ғалати жилмаярди. Бурҳонов унинг жилмайганини кўрганда, доим ўзини кулгидан тўхтата олмасди. Чунки жилмайганида бутун башараси семиз бўйни аралаш қип-қизил лавлагидек бўлиб кетарди. Аммо ҳозир у кулмади. Нима иши бор экан? Хаёлидан ўтди унинг. Нимадандир Долимовни кўриши билан дили гаш бўлиб кетган эди. Наҳотки, хат бўлса? Ўқиганми кан? Ўқиган, шунча кун ўтиб кетди орадан. Бурҳоновнинг тиззаларигача титраб кетди. У хатни юборишга юборди-ю, кейин пушаймонга тушган эди. Айниқса Усмонов бошига тушган кулфатдан сўнг ўзини қаёққа қўйиши билмай қолган эди. Қариялар димоғи шишиб кетган одамга қабристонга бор, дейишади. Шу гапда жон бор экан. Усмоновнинг хотинини кўмиш маросимида кўпчилик қатори — одам эса ўшанда кўп бўлди — қабристонга кирганида ғалати бўлиб кетди. Усмоновга чин юракдан ачинди. Қабрга тупроқ тортишаётгандага эса, ёнига бориб унинг қўлтиғидан олди, юраги тўлқинлакиб, кўзларидаи ёш чиқиб кетди. Шу пайтгача, вужудини кемириб келган ғам, гиналарини унутди-да: «Мени кечиринг, Дамир Усмонович, сизга хиёнат қилдим»,— деб юбормоқчи бўлди. Аммо ўзини ушлаб қолди. Шу тобда, кечагина тирик бўлган, орзулари ҳали рӯёбга чиқмаган, эндигина чинакам ҳаёт бошлаган одам қабри устида у ўз ҳаётини кўз олдига келтирган ва ўзининг баҳтли эканига ишонч ҳосил қилган эди. Дунё қизиқ, хаёлидан ўтди ўшанда унинг, бир одам ўзини тушуниш учун иккинчи бир одам ўлиши керак. Бурҳоновга ўзини тушуниши, ҳаётини тарозидан ўтказниши учун Ҳафизанинг ўлеми керак бўлди. Қабристондан чиқар экан, почтага юргиси, хатни олиб бурда-

бурда қилиб ташлагиси келди, аммо кечлигини биларди. Хат аллақачон адресига бориб тушган эди.

Шу хаёллар билан у Долимовнинг хонасига кирганини, рўпарасига ўтирганини сезмади. Долимов унга тикилиб яна қулоқларигача қизариб жилмайди. Кейин юзига жиддийлик юбориб, сўради:

— Дамир Усмонович қалайлар? Жабр бўлди у кишига. Ишга чиқяптиларми?

Бурҳонов ўзини тутиб олди. Бояги хаёллари таъсирида бутун вужуди билан Усмоновни ҳимоя қилгиси келиб кетди.

— Ишлайтилар. Эртасига чиқиб кетганлар ишга. Улим, Тешавой Долимович, ҳар бир кишининг бошида бор. Бирор бир кун олдин, бирор бир кун кейин. Ишлари яхши. Район экишини тугатди. Қўшимча мажбурият олдик. Саккиз минг тонна.

— Эшитдим, яхши, жуда яхши,— деди Долимов ва яна Бурҳоновга тикилиб, жилмайди.

«Нима демоқчи бу одам?»— ўйлади ўзича Бурҳонов унинг қип-қизил қулоқларига қараб.

Долимов жилмайганча, бир оз ўйланиб турди-да, эшикка қаради. Ёпиқлигига ишонч ҳосил қилгач, Бурҳоновга ўгирилди.

— Козим Бурҳонович, мени сизга ҳурматим баланд. Кейин сиз эски партия ходимларидансиз. Бир маслаҳатингиз керак. Албатта бу ўзаро гап.

— Бемалол. Қулоғим сизда,— деди Бурҳонов сабрсизлик билан.

Долимов яна бир эшикка қараб қўйиб, столи тортмасига қўл узатди.

— Менинг номимга ғалати бир хат келди.

Бурҳонов оқариб кетганини сезди.

— Қандай хат?— овозини қалтироқ босиб сўради у.

— Мана, ўқиб чиқинг...

Долимов хатни унга узатди. Бу ўша, Бурҳоновнинг ўзи юборган аноним хат эди. «Наҳотки менлигимни бил-

ган бўлса? Йўқ! Билиши мумкин эмас». Хаёлидан ўтди яшин тезлигига унинг.

У қўли титраб кетмаслиги учун стол зиҳига тирсакларини қўйиб, конвертни очди ва ихтиёrsиз равишда ўқий бошлади. Ўқир экан, Долимовнинг унга тишларининг оқини кўрсатиб жилмайганича тикилиб турганини сезди.

— Авторини билмадингизми?— сўради Бурҳонов хатнинг охирига етгач.

Қулогига эса ўз саволи: «Аблаҳлик бу! Аблаҳлик!» дегандек эшитилди.

— Ҳамма гап шунда-да,— деди Долимов.— Авторини билмадим. Билиб ҳам бўлмайди.

Бурҳонов енгил тортгандек бўлди.

— Кейин қизиқ,— ҳайрон бўлди Долимов.— Нега энди менга юборишди экан? Райком секретарига, биринчи секретарига тағин, менинг нима даҳлим бор? Ташкилий Сўлимга юборишлари керак эди. Ё бўлмаса секретардарнинг номига.

— Хат регистрация қилинганми?— сўради Бурҳонов.

— Йўқ, тўғри қўллимга олиб келиб беришди. Уч кундан бери нима қилишимни билмайман.

— Демак ҳеч ким кўргани йўқ?

— Йўқ, лекин бугун Нодирхон Солиевичга кўрсатмоқчиман.

— Менимча...— деди ўйланиб Бурҳонов. У анча ўзига келган эди.— Ҳожати йўқ. Биринчидан, менга ишонинг, хат бошидан охиригача бўғтон, туҳмат. Иккинчидан, расмий хат эмас. Шахсий хат.

— Мен ҳам шундай ўйлаяпман,— унга қўшилди Долимов.— Дамир Усмоновични биламан. Шишадек тоза одам. Кейин бирорни хафа қилишига, ножӯя хафа қилишига ақлим етмайди. У киши ҳақида бу ерда фикрлар жуда яхши. Лекин бир нарса мени қийнаяпти... Хат эгалари маълум фурсат ўтгандан кейин расмий хат ёзишсанчи? Ўз вақтида сигнал қилувдик, ўртоқ Долимовнинг номларига ёзувдик, дейишса-чи?

Долимовнинг бу тахмини ҳақиқатга яқин эди. Шундай бўлиши мумкин эди. Унда албатта Долимовга гап тегиб қоларди. Лекин Бурҳонов шундай хат келмаслигини, хат автори иккинчи бундай қабиҳлик қилмаслигини, қандай айтади? Ё хат автори мана, олдингизда ўтирибди, менман, дейдими? Йўқ, бундай дейишга унинг кучи етмасди. Ким билади, балки бир кун келиб айтар, лекин ҳозир ожизлик қиласарди.

— Менимча бундай қилишмайди,— деди иложи бори-ча вазминлик билан Бурҳонов.— Дамир Усмонович келган кунлари кимгадир ёқмаган бўлишлари мумкин. Лекин кун ўтган сари ҳалқ у кишининг қандай одам эканликларини яхшироқ биляпти. У кишига ҳурмати ошяпти. Йўқ, мен аминман, бундай аҳмоқликни иккинчи қилишмайди. Ким билади, балки ҳозир ҳам пушаймон бўлишаётгандир?.. Сизга ёзишганига келганда, менимча бу ҳам тушунарли. Сиз у кишининг дўстисиз. Бирга, бир хонада ишлашгансиз. Буни одамлар билмайди, дейсизми? Билади.

— Шундай деб ўйлайсизми?— ишонқирамай сўради Долимов.— Бирга ишлашганимиз рост. Дўстлигимиз ҳам... тўғри. Демак, бошқа ёзишмайди.

— Ёзишмайди!— қатъий равишда деди Бурҳонов.— Мен сизнинг ўрнингизда бўлсан, дўстлигимиз қадри, йиртиб ташлардим.

— Раҳмат, Козим Бурҳонович

Долимов ўрнидан турди. Бурҳонов ҳам туриб, унга қўлини узатди ва елкасидан тоғ ағдарилгандек хонадан чиқди.

Аммо ўша куни Долимов хатни йиртиб ташламади. Нодирхон Солиевичга олиб чиқиб кўрсатди. Солиев хатни ўқиб бўлиб, жирканиш билан Долимовнинг олдига ташлади.

— Қандай паст одамлар бор-а, ҳали ҳам! Усмоновни ҷақиринг, ўқисин. Зиён қилмайди. Ким билади, бу ҳаётни-

да биринчи хатдир устидан тушган? Қейин жавоб ёзиб, ҳисобдан чиқариб ташланг.

— Ҳисобда йўқ бу хат.

— Ундай бўлса бўлимнинг жавоби билан ўзига бериб юборинг.

Долимов Нодирхон Солиевич айтганидек қилди. Эртаси куни Бодомсойга телефон қилиб, Усмоновни вақти бўлганида обкомга келиб, у билан учрашиб кетишини сўради.

Усмонов кечга яқин келди. У Искандар Фойивович билан учрашмоқчи эди. Исломлжон унинг илтимосини бажарган, «Совет Узбекистони»да Султонмурод Ишимов ҳақида унинг Мирҳайдар Барат билан бирга ёзган каттагина очерки чиққан эди. «Жасорат биографияси» дейилган бу очеркда Ишимовнинг бутун ҳаёти, уруш йилларидаги қаҳрамонлиги ва ҳозирги меҳнати ўз аксини топган эди. Исломлжон уруш ветеранлари жамияти билан боғланиб, Югослав партизанлари ва шу партизанлик ҳаракатида совет жангчиларининг иштироки ҳақида талайгина материаллар йиққан, ҳатто Ишимовнинг Черногориядаги собиқ командири, генерал-лейтенант Антонов—Ристичдан Ишимов ҳақида, унинг отряддаги ишлари ҳақида хат ҳам олишга улгурган эди.

Усмонов шу очеркни ва Ишимовни мукофотга тақдим этилган қофозларини Искандар Фойивовичга кўрсатмоқчи эди.

Долимов уни эски қадрдонлардек кутиб олди.

— Яна бир марта таъзиямни қабул қилинг, Дамир Усмонович,— деди унинг қўлини қаттиқ қисиб.

Усмонов бош қимирлатди ва савол назари билан унга қаради.

— Арзимаган бир нарса,— деди Долимов.— Нодирхон Солиевич билан маслаҳатлашиб, сизга бериб қўйишни лозим топдик.

— Нима экан?— сўради Усмонов.

— Хат. Чақага арзимайдиган бир хат. Эътибор ҳам берманг, куюнманг ҳам.

Долимов юракдан айтди бу гапни. Усмонов бошига тушган мусибат Бурхонов каби, уни ҳам Усмоновга низбатан муносабатини ўзгартириб юборган эди. Усмоновнинг озиб кетганини, соchlарига оқ тушганини кўриб, баттар ачиниб кетди. Усмоновнинг ўрнида бўлишни у истамасди энди. Аноним хат, мусибат, бутун бир районнинг ташвиши, ҳар бир қадамнингда одамлар назари... йўқ, унга тўғри келмайди. Унинг ҳаёти тинч, спилиқ. Диссертацияси битай деб қолди. Ҳимоя қилиб олса, марра уник.

— Бўлимнинг жавоби ҳам бор.

У шундай деб, жавоб тиркаланган хатни Усмоновга ўватди.

Усмонов ўқиб чиқиб, оғир жилмайди.

— Виринчи марта шундай хат ўқишим ўзим ҳақимда.

— Менимча охиргиси ҳам бўлса керак,— деди Долимов.— Ҳали паст одамлар бор орамизда. Мен кўрсан-моқчи эмасдим сизга. Нодирхон Солиевич кўрсин, дедилар. Назаримда у киши ҳақ. Бундай хатлар оз бўлса ҳам сергак қиласи одамни. Албатта сиз бунга мұжтоғ өмассиз.

— Жавобни ким тайёрлади?— сўради Усмонов.

— Мен.

— Раҳмат,— Усмонов ўрнидан турди.— Ҳеч эсимдан чиқмайди... Партиконференциясида икки киши менга қарши овоз берди. Нега? Ким улар? Билмайман.

— Хатни ҳам балки ўшалар ёзғандир?— тахмин қилиди Долимов.

— Ким билади?— елкаларини қисди Усмонов.

— Эътибор берманг,— уни юпатишга интилиб деди Долимов.— Ишларингиз яхши. Яхши бошладингиз. Тез, щиддат билан. Бу ерда ҳамма яхши фикрда. Ҳатга эътибор берманг. Ит ҳуарар, карвон ўтар!..

Усмонов Долимов билан хайрлашиб, Искандар Фойи-

бовичнинг қабулхонасига кўтарилганда, қабулхона секретаридан бошқа ҳеч ким йўқ эди.

— Салом, Валентина Ивановна! — деди у.

Валентина Ивановна ўрнидан туриб, унга қўлини узатди.

— Салом, Дамир Усмонович! Чин кўнгилдан таъзия изҳор қиласман. Эшишиб жуда хафа бўлдим. Искандар Гойибович ҳам қаттиқ хафа бўлдилар. Бардам бўлинг.

— Раҳмат,— деди Усмонов миннатдор бўлиб.

Валентина Ивановна унга доим ўз укасиdek ҳурмат билан қаарди. Буни у яхши биларди.

— Бормилар?

— Ҳа,— деди Валентина Ивановна.— Тошкентдац келган бир одам бор. Минводхоздан. Анча бўлди кирганига. Ўтира туринг.

Лекин ўтиришга ҳожат бўлмади. Тошкентлик меҳмон чиқди.

— Киринг,— таклиф қилди Валентина Ивановна.

Усмонов таниш кабинетга оҳиста кирди. Ҳеч нарса ўзгармаган эди кабинетда. Ўша портретлар, одам бўйи келадиган ўша соат... Искандар Гойибович ҳар доимгидек ёзув столи ёнида эмас, бутун шаҳар кўзга ташлапиб турадиган қатор деразалар ёнидаги узун стол тўрида ўтиради.

— Келинг, Дамир Усмонович!

Искандар Гойибович ўрнидан турди. Усмонов ёнига келгач, у билан кўришар экан, деди:

— Қўшимча мажбуриятни катта олиб юборибсизларку!

— Ҳисоблаб чиқдик! — Усмонов Гойибов ёнидаги биринчи стулга ўтирди.— Бажаришга ҳаракат қиласмиш.

— Район ишлари умуман ёмон эмас... — деди Гойибов узун қизил қаламни кафтлари орасида ишқалар экан.— Раҳмат. Пўлатовни қўллаб жуда яхши қилибсиз. Хурсанд. Ҳалиги... Қаримов ҳақидаги илтимосини ҳам, майли, бажаринг. У йигитни биласман. Ўз хоҳиши билан шу

қарорга келибдими, бөрсин. Лекин унутманг уни. Яхши масъул ходим чиқади ундан.

Кўнгли анча ёришган Усмонов нима иш билан келганини айтди. Очеркни, Ишимов ҳужжатларини кўрсатди. Фойибов диққат билан танишиб чиқди.

— Яхши ўйлабсиз. Бу йилги ишларини ҳам қўшиб, таклиф киритинг. Қувватлаймиз. Бу одам мөҳнат қаҳрамонлигига арзиди.

Усмонов унинг шундай дейишини кутган эди, севиниб кетди.

— Хўш, яна нима гап?— сўради Фойибов.

— Йўқ, бошқа гап йўқ...— Усмоновинг хаёлига аноним хат келди.

— Айтаверинг!— жилмайди Фойибов.

— Обкомга менинг устимдан хат тушибди...— деди Усмонов қизариб.

— Хат? Қандай хат?

Усмонов чўнтағидан хатни олиб обком жавоби билан бирга узатди.

Фойибов хатни ҳам, жавобни ҳам шошмасдан ўқиб чиқди-да, Усмонов олдига сурниб қўйиб, хаёлга толди.

— Биз ҳали ишёқмас, ғийбатчи, амалпараст, шахсиятпараст одамлардан қутулганимиз йўқ,— деди бошани кўтариб.— Улар ҳали кўп бошимизни оғритишади, ишнимизга халал беришади, вақтимизни олишади. Лекин... ҳалиги бир қўшиқ бор-ку: «Ҳеч қандай тўлқин, бўрон ҳам кемамизни тўхтатолмайди», деган сўзлар бор унда. Яхши қўшиқ. Ана шундай, бизни ҳеч ким тўғри йўлдан адаштиrolмайди, иккилантириб қўёлмайди. Хафа бўлманг, ука. Сиз биринчى эмассиз шундай хатга тушган...— Фойибов кулди.— Менинг устимдан ҳам ёзишган.

— Сизнинг устингиздан?— ҳайрон бўлди Усмонов.

У ҳеч маҳал буни кутмаган, хаёлига ҳам келтирмаган эди. Искандар Фойибовичдек, ҳамманинг ҳурматига сазовор бўлган, донғи Бутун Иттифоққа кетган машҳур одами ким ёмон кўриши мумкин?

— Ёзишган,— қайтарди Искандар Фойибович.— Кўн ёзишган. Ҳатто Москвага юборишган хатларни. Эҳ-ҳа... нималарда мени айблашмаган... Лекин одам тўғри йўлда бўлса, партия йўлида бўлса бу хатлар ҳаммаси беҳуда гап. Яхши жавоб қилишибди бўлимдаги ўртоқлар.

— Раҳмат, Искандар Фойибович!

Усмонов ўрнидан турди. Хайрлашиб, эшикка йўл олганда, Фойибов уни тўхтатди.

— Найманчадаги қарияларни ўз ихтиёларига қўйиб қўйинг, Дамир Усмонович. Ёшлар кўчсин. Бу ишни буйруқ билан қилиб бўлмайди.

Усмонов уялиб кетди. Ўшанда у шошилди, хато қилди. Бурҳонов ҳақ эди.

— Хўп бўлади, Искандар Фойибович!— деди у.— Ҳозироқ бориб айтаман.

— Яхши,— бошини қимирлатди Фойибов,— Ўғилча, Улуғбек қалай. Катта бўляптими?

— Раҳмат.

Усмонов яна уялиб кетди. Ҳафиза вафот этгандан бери ўтган бир ой ичида ўғлининг юзига қарамаган ҳам эди. Унинг назарида Ҳафиззанинг ўлимига у сабабчидек эди. Дилицаги фикрларини билгандек Фойибов самимий маслаҳат бериб, деди:

— Ҳаётда хурсандчилик ҳам кўп, хафагарчилик ҳам. Бунга кўникиш керак. Бўлмаса яшаш ҳам, ишлаш ҳам қийин бўлиб қолади. Ҳеч кимни айблаш ҳам керак эмас. Аянгизга салом айтинг. Ўғилни ўпиб қўйинг.

XVII

Усмонов Бодомсойга яхши кайфиятда қайтди. Марказга яқинлашганда, ҳали қўёш ботмаган, кўм-кўк тераклар ортида баркашдек қизарив турарди. Райкомга кириб Муқимовга телефон қилмоқчи бўлди, лекин шу заҳотиёқ

Бу фикрдан қайтди. Найманчага ўзи бориб келади. Қариялар қаттиқ ранжишган бўлса, узр сўрайди. Бошидаёқ негадир бу ишга кўнгли чопмаган эди. Мана, хато чиқдя. У Муқимовни, янгиликни қўлламоқчи эди. Демак, шошибди. Буйруқ билан, мажбурий чоралар билан маданиятни ривожлантириб бўлмайди. Тўғрироғи, бунга ҳожат йўқ эди. Қарияларнинг асрлар бўйи давом этиб келаётган ўз маданиятлари бор. Ҳурматга, ҳали кўп ўрганишга лойиқ бўлган маданият. Туғилган жойларига боғлаб турган одатлари бор. Булардан бир кунда Усмонов ёки Муқимовнинг хоҳиши билан воз кечиб бўлмайди. Нега шу фикрлар ўшанда миясига келмади? Нега чуқурроқ мулоҳаза қилмади? Заргар чол билан суҳбатлашганида ҳам шу, жуда бўлмаганда шунга яқин фикрлар хаёлидан ўтган эди-ку?

— Рустам! Найманчага ҳайданг,— деди у.

Рустам шу заҳотиёқ машинасини секинлатиб, орқага бурди.

— «Максим Горький» орқали борсак майлими? Яқинроқ.

— Майли.

Усмонов шундай деб, эшик деразасига қаради. Фувалар қийғос гуллаган эди.

— Кўз тегмасин ишқилиб, бу йил пахта яхши,— деди Рустам.

— Айтгандек, Рустам...— сўради Усмонов қўпдан бери юрагига туғиб қўйган нарсасини билмоқчи бўлиб. Ишингиз ёқадими сизга?

— Еқади,— Рустам шундай деб, унга «ялт» этиб қаради....

Усмоновнинг нима демоқчи эканини у тушунди шекилли, бир оз ўйланиб туриб, гапида давом этди:

— Армиядан қайтганимда чап оёғимни трактор маҷақлаб кетган. Армияда шофёрлик қилган эдим. Носир Пўлатович билиб қолиб, ўзларига шофёр қилиб олдилар.

Протез тақаман. Тиззамгача. Тормозни қўлга ўтказиб олганиман. Мана. Цеплениенинг ёнида.

— Мени кечиринг, Рустам,— деди Усмонов унинг еласига қўлини қўйиб.

— Ҳечқиси йўқ.

— Менга ёқиб қолдингиз.

— Раҳмат...

Йўлнинг чап томонида уйлар бошланди.

— Колхозга етиб келдик,— деди Рустам.— Буёғи ўн беш минутлий йўл.

Олдинда, шундай йўлнинг ўртасида трактор кўринди. Рустам машинани секинлатди.

— Бир нарсани тортятпи,— деди Рустам.

Тракторга яқинлашганда, у машинани тўхтатди. Тракторчи, ёш йигит қўлини пахса қилиб кимгадир ўшқирап, тракторини бир олдинга, бир орқага тисартиради. Трактор тумшуғига боғланган темир трасс дам бўшаб, асфальт йўл устига тушар, дам тараңг тортилиб, ниманидир сургарди.

Усмонов трасс тортилган томонга қаради. У қатор ўсган баланд теракларнинг биттасига одам бўйи кела-диган жойидан юғлаинган эди. Унинг тагида эса теракка кўкрагини тираб, қўлларини ёзганича оқ яхтак, оқ иштон кийган бир ялангоёқ чол туради. Усмонов бу манзарани кўрди-ю, нима бўлаётганини тушунди ва шошиб машинадан тушди.

— Тўхтанг! Тўхтанг!— қичқирди у тракторчига.

Аммо у кечиккан эди. Тракторчи машинани тезроқ ўтказиб юбормоқчи бўлдими, чунки Рустам уч-тўрт марта босим сигнал берган эди, ё иш жонига тегдими, тракторни олдинроққа юргизиб зарб билан трассни тортиб юборди. Терак қарсилаб кетди. Орқасида турган уй томидан икки баравар баланд шохлари тебраниб, йўл томонга эгила бошлади.

— Қочинг! Қочинг, ота!— қичқирди Усмонов ва ҳеч нарсага парво қилмай, теракка ёпишиб олган чол томон

югурди. Зум ўтмай, илдизлари синиб, қўпорилган баҳай-
бат терак ағдарилди. Рустам нима бўлганига тушуниб,
етиб келгунча, чол ҳам, Усмонов ҳам терак шохлари та-
гида қолиб кетишиди.

— Дамир ака! Дамир ака!— қичқирди Рустам шох-
ларни қайирар экан.

Аммо Усмонов ҳам, чол ҳам кўринмасди.

— Буёққа келинг, Рустам!

Ниҳоят Усмоновнинг бўғиқ овози эшитилди қаёқ-
дандир.

— Буёқдалар!— деди кимдир.

Бу — тракторчи эди. Унинг рангида ранг қолмаган,
тишлари так-так тикилларди.

— Ҳа, даюс!— ўшқирди Рустам ва у кўрсатган то-
монга ташланди.

Усмонов қалин шохлар остида қўллари билан ерга ти-
ралиб ётарди.

— Тез бўлинг, чол остимда!— деди у Рустамии кўриб.

— Бу ёққа кел!— қичқирди Рустам тракторчига.

Бусиз ҳам тракторчи унинг ёнида эди. Иккалови шох-
ларни қайириб Усмоновга қўл узатишиди.

— Чолни олинглар! Мен ўзим тураман!— деди Усмо-
нов.

Улар бир амаллаб, Усмоновнинг қўллари орасидан
хушидан кетган, юз-кўзи қонга бўялган чолни тортиб
олишди. Усмонов бир силтаниб ўрнидан турди. Терак-
нинг оғир бир шохи шу томонга ағдарилди.

— Ҳеч нарса қилмадими?— югуриб келиб сўради
Рустам.

— Йўқ шекилли,— жилмайди Усмонов кийимларини
коқар экан.

— Бурнингиз сал тилинибди.

— Чол қалай?— унга жавоб бермай сўради Усмонов.

— Тирик шекилли?— Рустам ариқ томонга югуриб
кетди. Тракторчи шу ерга чолни ётқизиб, кўкрагига **сув**
сепаётган эди.

— Тирикми? — сўради Рустам.

— Тирик... Нафас оляпти! Жинни чол! — деди тракторчи.

— Сен ўзинг жинни! — ўшқирди Рустам. — Одамни кўриб туриб ағдарасанми?

— Кетмаса нима қилай? Минг марта ҳайдадим. Ўрлим, ўғлим, деб теракка ёпиши. Қўлимда буйруқ бор, бажармасам бўлмайди!

— Кимнинг буйруғи? — сўради улар ёнига етиб келган Усмонов.

— Раиснинг буйруғи! Мен нима қилай? — йиғламоқдан бери бўлиб деди тракторчи.

— Қани! Қўтариғлар! Машинага соламиз... — Усмонов шундай деб чолнинг қўлтиғидан олди. — Зудлик билан касалхонага олиб боринг! Усмонов айтди, денг. Яхши қарашсин! Мен шу ерда бўламан.

Рустам машинасини орқага қайриб, учирганича районга жўнади. Одамлар йигила бошлади. Қимдир узоқдан дарахтнинг ағдарилаётганини кўриб, шу томонга юргурган, баъзилар шовқинни эшитиб, уйларидан чиқишиган эди. «Шокир отани терак босиб қолибди!» деган гап бирпастда қишлоққа тарқалди. Йиқилган терак атрофига одам тўлиб кетди. Қўпчилик Усмоновни таниди. Қимдир уйидан йод олиб келиб, унинг бурнига сурди. Тракторчи ўзини йўқотиб қўйганидан ҳаммага олазарак бўлиб қарар, нима қилишини, нима дейишини билмасди.

— Шокир отанинг кимлари бор? — сўради Усмонов атрофидаги одамлардан.

— Қизлари бор, — деди кимдир. — Ўқитувчи. Бугун болаларни олиб шаҳарга кетганди. Экскурсияга.

— Бешта ўғиллари бор эди, — қўшилди яна кимдир гапга. — Ҳаммаси ҳалок бўлган урушда. Шу теракларни уларнинг хотирасига эккан эдилар. Бу терак тўнғичлари, Мирбилолга атаб экканлари.

— Тўнғичлари Мирбилол эмас, Миржалол! — деди аёл кишишиниң бўғиқ овози.

Усмонов катта йўлга туртилиб чиққан ариқ лабидаги теракларга қаради. Тўртта баҳайбат, кўкка бўй чўзган терак шохлари енгил шамолдан титрар, тагларида турган одамлар билан сўрашгандек гоҳ у, гоҳ бу томонга эгилиб тебранарди.

Усмоновнинг ўпкаси тўлиб, лаблари титраб кетди, кўзлари ёшланди. Одамларга буни сездирмаслик учун тераклар қаршисидаги очиқ эшик томон юрди. Бу — Шоқир отанинг уйи эди. Усмонов ҳовлига кирди. Эшикнинг ўнг томонидаги оғзига баркаш ёпилган тандир остида ётган кичкина лайча кучук югуриб келиб туфлисининг учини ялай бошлади. Ҳовли каттагина эди. Олди сўри, орқаси боғ. Сўрининг ёғочлари ток поялари билан айвон томига чирмашиб кетган эди.

— Қоч, жонивор.

Усмонов итни оёғи билан оҳиста суриб айвонга кўтарилди. Уйнинг бир хонаси ланг очиқ эди. Ҳовлига қараган пастак дераза ёнида хонтахта турарди. Устида дастурхон ёзиғлиқ. Пиёлада ичилмаган чой. «Чой ичиб ўтирган бўлса керак,— хаёлидан ўтказди Усмонов.— Тракторнинг келиб тўхтаганини эшитган-у, югуриб чиққан».

Хонада ошиқча безак йўқ эди. Тўрдаги деворга қизил гилам қоқилган эди. Усмонов шу ёққа қаради. Гиламнинг тепасида тунука рамкага солинган бешта сурат осиғлиқ турарди. Усмонов яқин бориб тикилди. Үғиллари бўлса керак, ўйлади Усмонов. Ҳаммаси гимнастёркада. Ҳаммаси бир-бирига ўхшаш. Қош-кўзи ҳам, қарашлари ҳам... Фақат каттаси соч қўймаган, қолганлари соч қўйган. Биттасининг қўнғиздек мўйлаби ҳам бор эди.

Хонада оёқ товушлари эшитилди. Усмонов ўгирилди. Султонов билан Қобулов кириб келишган эди. Усмонов ўзини тутолмади:

— Қачонгача одам ўлдирасизлар?

Қобулов бошини эгди.

— Йўлни кенгайтирмоқчи эдик, Дамир Усмоно-

вич...— деди бўғилиб Султонов. Унинг боши, пешонасини тер босган, сочиқдек келадиган рўмолча билан артишга ҳаракат қилас, аммо тер тўхтамасди, артиб бўлиши билан яна қуя бошларди.— Қўнгандек бўлувди, бобой... Үғилларини суратини музейга қўйганмиз... Терак ҳам матаҳ бўлдими?!

Усмонов индамай эшикка йўл олди. Айвондан тушаётib, тўхтади:

— Эртага бюро. Икковингиз боринг.

Уша куни у Найманчага бормади. Райкомдан Муқимовга телефон қилиб, Фойибов билан бўлган гапни айтди, кейин касалхонага борди. Шокир ота омон эди. Касалхона бош врачи унинг қаттиқ лат еганини, аммо суюклари бутунлигини айтиб, тинчиди. Аммо Усмоновнинг аччиғи тарқамади. У Султоновдан қаттиқ ранжиган эди. Эртасига райком бюросида унинг бу гал ҳам правление аъзоларининг маслаҳатига кирмагани маълум бўлди. Усмоновнинг таклифи билан Султонов ишдан бўшатилди. Ҳайдарали Қобулов колхоз раислигига тавсия этилди.

Кечқурун «Максим Горький» номидаги колхознинг ҳашаматли клубида колхоз аъзоларининг умумий мажлиси бўлди. Мажлис бир овоздан райком бюросининг таклифини маъқуллади.

Усмонов ярим кечада уйига қайтди. Мастура опа неварасининг олдида ўтиради. Усмонов Ҳафиза ўлгандан бери биринчи марта ишдан келиб ўз хонасига эмас, шу, ўғли ётган онасининг хонасига кирди.

— Ухлаятими?— сўради секин.

— Ҳозиргина кўзини юмди.

Усмонов биринчи марта каравотда пишиллаб ухлаётган ўғлига қаради. Дум-думалоқ, семиз юзи худди Ҳафизаникidek оппоқ эди. Қошлиари йўқ ҳали, аммо киприклари бор эди. Худди Ҳафизаникidek қора, узун. Кўзлари юмуқлигидан бир-бирига ёпишиб ётарди. Улуғбек остки, семизлигидан пастга осилиб тушган лабини қимирлатиб, тамшанди. Усмонов унинг илиқ пешонасига қў-

лини қўйиб, жилмайди. Чиндан ҳам нега энди у болани айлаши керак? У жўрттага қилибдими?

— Кундуз куни бир қиз келиб кетди,— Мастура опа унинг хаёлини бўлди.— Улуғбек билан анча ўйнаб ўтириди. Алламбало ўйинчоқ олиб келибди. Ўғил бола-да, ҳалигини юргазса, қиқир-қиқир кулади...

— Ким экан?— ҳайрон бўлиб сўради Усмонов.

— Холида. Дамир акамлар биладилар, деди.

Усмонов индамай ерга қаради. Ҳа, болада айб йўқ. Кейин Улуғбек унинг боласи, Ҳафиззанинг боласи.

XVIII

Куз яхши келди. Бутун сентябрь ойи, октябрнинг ўрталари гача ҳаво иссиқ бўлди, пахта қийғос очилди. Бодомсойда теримни биринчи бўлиб, «Правда» колхози бошлаб берди. Ўн кунлардан сўнг бутун район бўйлаб теримга тушилди. Райкомда таҳминан мўлжаллаб чиқишиди, агар ҳаво ойнинг охирида ҳам шундай туриб берса, биринчи ноябрга мажбурият ҳам бажарилиши мумкин. Кечи билан октябрь байрамига терим тугаши керак. Сотиволди Польвонов, Ҳайдарали Қобулов, яна бир-иккита раислар теримни сифатли тугатиш, об-ҳаво айниб қолиши баҳонасини қилиб, жуда бўлмаганди юқори синф ўқувчиларини йигирма кунга теримга олишни илтимос қилишиди. Райком кўнмади. Ийлнинг бошида бир овоздан қабул қилинган пленум қарорини сўзсиз бажарини лозимлигини айтишиди. Тўғрироғи, Усмонов қаттиқ турди. Бурҳонов аввал уларни қўллаган бўлди. Фақатгина область эмас, республикада ҳам биринчилар қаторига чиқиб олиш мумкинлигини айтиб, Усмоновни юмшатмоқчи бўлди. Кейин у ҳам Усмонов томонига ўтди.

Лекин дам олиш кунлари район ишчилари, хизматчилар ўз ихтиёрлари билан теримга чиқишиди. Райком хо-

димлари бошлаб берди. Улар қўл терими мавжуд колхозларга икки кун, икки кундан бориб туришди.

«Шарқ юлдузи» колхозида бу йил терим ўн кун кеч бошланди. Чўзилиб кетган баҳорнинг таъсири шу колхозда кўпроқ сезилди. Баъзи ерларда чигит икки марта-лаб экилди. Шунга қарамай, пахта яхши бўлди. Теримнинг ўрталарига келиб, колхоз бошқа хўжаликларга етиб олди. Райком ходимлари кўпроқ шу колхозда бўлди.

— Ўқувчиларни сўраб юрибсиз, Сотиволди ака!— ҳазиллашиб бир куни Усмонов.— Райком ходимларининг ҳар бири ўнта ўқувчининг ўрнини босади.

— Райком ходимларига қулоқ солган яхши, ишлатгандан кўра,— ҳазилга ҳазил билан жавоб берди Полвонов.— Ҳамма эркаклар кўзғолон қилмоқчи бўлиб юришибди.

— Нега?— ҳайрон бўлди Усмонов.

— Сизлар келгандан бери бирон хонадонда овқат қиласидиган одам қолмади. Ҳамма қоронги тушгунча дала. Келинайнинг ҳам юрибдилар, ҳов, ана, сой бўйида.

Усмонов кулди. Кўпдан бери энди унинг чехраси ёришган, ғам-ғусса ичидан ҳаёт уни ўз бағрига олган эди. Албатта Ҳафизани у унотолмасди. Уйидами, кўчадами, қаерда бўлмасин, бирон нарса лоп этиб, уни эсига солар, ҳар бир нарсада Ҳафизани кўрар, унинг овозини эшитарди. Бир пайтлар Усмонов ўзини шу қадар баҳтсиз, ожиз, паришон сездики, ҳатто Бодомсойдан кетиш нияти ҳам пайдо бўлб қолди дилида. Аммо буни ўзидан бошқа ҳеч ким билгани йўқ. Ҳатто онаси ҳам. Кейин ўзини тутиб олди. Яшаш керак эди. Онаси учун, Улуғбек учун. Одамлар учун. Яшаш ва ишлаш керак эди. Ҳафизанинг хотираси учун ҳам шундай қилиш керак эди. Одамлардан узоқлашиш, орзуладардан воз кечиш, ҳаёт измига тушиб олиб кун кечириш жуда осон. Шундай қилиш — ҳаётдан кўз юмиш билан баробар. Усмонов бундай қила олмас эди. Биринчидан ўзи истамас эди, иккинчидан ҳаққи йўқ эди. Яшаш ва ишлаш керак. Халқ учун. Келажак учун.

Тиним билмай ишлаш керак. Шунда ўзининг ҳам кўнгли тўллади бу дунёга келганидан. Ҳафиза ҳам хурсанд бўлади. Унинг хурсанд бўлиши турган гап. Чунки у энди Ҳафиза учун ҳам яشاши, ишлаши керак. Аммо унинг ўзига келиши, оғир йўқотишга кўнигиши қийин бўлди. Ҳали ҳам кечалари уйқусиз ўтар, ёлғиз қолиши билан хаёлини Ҳафиза ва у билан боғлиқ хотиралар ўраб оларди.

«Шарқ юлдузи» колхозининг плани тўладиган куни Полвонов унинг ёнига келди.

— Дамир Усмонович, бугун теримдан кейин ҳаммаларинг қоласизлар.

— Нега? Бугун эртароқ кетмоқчи эдик-ку, эркаклар қўзғолон қилмасин, деб,— деди Усмонов.

— Бугун уларнинг ошиғи олчи. Зиёфат катта бўлади. Машрабхонни биласиз. Механизатор қизимиз. Бу йил ҳам яхши терди пахтани. Ҳозир икки юз тоннага етди. Яна етмиш тонна термоқчи. Шунинг тўйи. План тўлиши билан қиласиз, девдим тўйини. Қуёв бола ҳиқиллаб юрибди.

— Табриклайман,— деди Усмонов.— Қуёв ким?

— Қуёв ўзимиздан. Мирзагани. Ветврачимиз.

Усмоновнинг эсига тушди. Холида шу тўй ҳақида гапирганди колхозга келишаётганда.

— Янги уйда бўлади шекилли тўй?— сўради у раисдан.

— Ҳа. Эшитганмидингиз?— ҳайрон бўлди Полвонов.

— Холида айтувдилар,— деди Усмонов.— Эсингиздами, сиздан аразлаб кетган маҳали... Сотиволди акада ҳамма нарса ҳисоблоглик, деган эди. Ҳаттоки Машрабхонни тўйи қачон бўлади, шуниям белгилаб қўйганлар!

Полвонов кулди.

— Ўзиям ҳозир беҳисоб қадам босмайди. Қўлида чўт, блокнот... Мен сизга ўшанда айтдим, келади, деб. Лекин сиз олиб келганингиз яхши бўлди. Қадрини билди. Сирасини айтганда, менгаям қадрини кўрсатиб қўйдингиз ўшанда. Баъзан қўрқаман, яна сизга шикоят қиласиди.

ми, деб.— Пөлвонов қулги аралаш шундай деди-да, жерин жиддий қўшиб қўйди.— Яхши қиз. Ишни билади. Ташибим йўқ колхоздан. Менсиз ҳам эплаб кетаверади.

Бу гап Усмоновни хурсанд қилди. Кейинги кунларда у Холида ҳақида одатдагидан кўпроқ ўйлайдиган бўлиб қолган эди. Ёзинг ўрталарида унинг ҳузурига «Партия йигирманчи съезди» номидаги колхоз раиси келди. Бир пайтлари бу одамнинг номи газета саҳифаларидан тушмасди. Фарғонадаги биринчи раис, биринчи марта икки марта Ленин ордени олган одам, гражданлар урушининг ветерани... Сўнгги йилларда у анча жимиб қолди, тўғрироғи у ҳақдаги гаплар камайди. Сулаймон ота Йўлдошев анчагача гапни нимадан бошлишни билмай ўтириди-ю, кейин бирдан мақсадга кўчди-қўйди.

— Мени бўшатсаларинг...— деди у.

— Тинчликми?— сўради Усмонов.

— Тинчлик!— ҳафсаласизлик билан гапирди Йўлдошев.— Ҳозирча тинчлик. Лекин бир кунмас, бир кун колхоз портлаб кетади, деб қўрқаман.

Усмонов ҳайрон бўлиб унга тикилди.

Сулаймон ота гапиришга қийналди шекилли, дўппишини анчагача буришган қўллари билан ғижимлаб ўтириди, кейин деди:

— Қаришни ўйламабман, Дамиржон, ўғлим. Қариллик эшик қоқиб келиб қолибди, билмабман. Қўлим калталиқ қилиб қолди. Илгариги мадор йўқ. Эрта-мертсан саҳарлаб ҳали хўроз қичқирмасдан турардим, қишлоқ тинчимасдан, бирон уйда чироқ ўчмагунча ётмасдим. Қирқ йил шундай ишлаб келдим. Уй нималигини, касал нималигини билмадим. Энди қарибман. Тунов куни мажлиисда гапимни йўқотиб қўйдим. Нима деяётганимни билмай соқов одамдай тўхтаб қолдим. Одамларим сезди назаримда. Лекин ҳеч ким кулгани йўқ. Товуш чиқармай гапимни топиб олгунимча ўтиришди. Бу аҳволда колхозни жувонмарг қилиб қўйман. Туззукроқ бир одам бўлса, мени алмаштирасаларинг. Бўлди, буёғига энди узр.

— Қўйинг бунақа гапларни, Сулаймон ота,— деди Усмонов унинг кўнлгини кўтармоқчи бўлиб. — Ҳали ба-қувватсан. Бўшашни ўйламанг.

Сулаймон ота қўлинни силтади.

— Жуда кўп мулоҳаза қилиб келяпман,— деди у.— Қарилликни тан олиш осон эмас. Юрагим ачиб турибди. Лекин бошқа иложим йўқ.

— Хўп...— унга қўшилди Усмонов баҳс қилиш фой-дасизлигини кўриб.— Мўлжалингиз борми?

— Шу гапни кутган эдим,— деди Сулаймон ота.— Бор. Биттамас, тўрт-бешта. Муовиним ҳам эплаб кетади, агроном ҳам, партком ҳам. Яна бор. Лекин четдан бўл-гани маъқул назаримда. Булардан биттаси раис бўлса. қолганларининг ишидан птур кетадими, деб қўрқаман. Ҳаммаси ўз ишида қолгани маъқул. Раис топилади. Уларнинг ишини қиладиган топилмайди.

Усмонов ўзича бу гапда жон бор, деб қўйди.

— Майли,— деди у.— Куз ўтсин. Кейин қайтамиз бу гапга.

Сулаймон ота рози бўлди. Ўшандан бери Усмонов Ҳолидани ўйлайдиган бўлиб қолди. Бошқа одамлар ҳам бор эди. Лекин Усмоновнинг назарида Ҳолида ҳам эплаб кетади. Маълумоти бор, ерни билади, яхши кўради ерни, орзулари ер билан боғлиқ, ғайратли. Озгина чўртке-сарлиги, ўжарлиги бор. Нима бўпти? Кўпчилик билан мустақил ишлагандан кейин бу одатларидан воз кечиши мумкин.

Бу ўйини у ҳали ҳеч кимга айтмаган эди. Бурҳонов билан маслаҳатлашмоқчи бўлди, лекин айниди. Бурҳонов негадир Ҳолидани хушламай қолган эди. Бир куни ҳатто Полвоновнинг олдида:

— Бу тўтиқушдан иш чиқмайди. Бари бир бир кун шаҳарга кетиб қолади,— деди.— Ҳаёлида безак, ҳаёлида кийим.

Полвоновнинг жаҳли чиқди.

— Биринчидан қиз бола, ҳали турмуш қурмаган,—

деди у.— Иккинчидан қайси аёл яхши кийим, безакдан воз көчади? Кийсин, безансин. Ишга бўнинг зарари йўқ. Кичкина қизимни кўрдим шаҳарда. Кўйнаги белидан келади. Модамиш ҳозир. Нима дейман?..

Усмонов ичида Полвоновга қойил қолди ўшанда. Ҳозир ҳам унинг Холида ҳақидаги гапини эштиб, режасини маслаҳатлашмоқчи бўлди. Лекин ўзини ушлаб қолди. Албатта Полвонов йўқ, дерди, Холидани ўзидан кегизмасди.

Тўй яхши бўлди. Кўпчилик тўғри даладан боргани учунми, ҳеч ким стол ёнида сипо бўлиб ўтирамди. Ҳамма қўлидан келганча тўйнинг завқли, шўх ўтишига ҳаракат қилди. Сотиволди ака, Холида айтганидек, ўзи бошқарди. Қелин билан куёвни ҳазил-мутойиба аралаш табриклиб, тўйни очгач, биринчи сўзни Усмоновга берди. Усмонов чин юракдан ёшларни табриклади, баҳт, энг муҳими соғлиқ ва узоқ умр тилади. У гапирап экан, кўз олдига яна Ҳафиза келди. Тирик бўлганида ҳозир ёнида ўтиради. Одамларнинг, эрининг хурсандчилигини кўрарди. Кўп ўтмай Усмонов турди. Полвонов, куёв зўрласа ҳам қолмади.

— Козим Бурҳонович қоладилар, менинг ишим бор,— деди.

Холида ҳам илтимос қилди.

— Боя кириб келдим. Аямлар биладилар,— деди у.

Лекин Усмонов қолмади. Эшикка чиқишда Бурҳонов у билан хайрлашар экан:

— Сизга гапим бор эди, анчадан бери айтмоқчи эдим... Шахсий гап...— деди.— Майли, пайти келиб қолар...

— Айтаверинг!— деди Усмонов.

Бурҳонов бошини лиқиллатди.

— Қейин... Майли... Шошилинч гап эмас.

Усмонов зўрламади. Аммо йўлда ўйлади. Нима гапи бор экан Бурҳоновнинг унда? Қейинги пайтлари у ўзини анча ғалати тутарди. Илгариги кибр-ҳаво йўқ. Усмоновга ҳам муносабати ўзгариб қолган эди. Тез-тез олдига ки-

риб турар, маслаҳатлашарди. Нима бўлди экан унга? Аммо Усмонов қанча ўйламасин, ўйининг тагига етолмади.

Марказга етишганда, Усмонов машинани Пўлатовнинг уйи томон буришни илтимос қилди. Бир ҳафтадан берি Пўлатов врачларнинг талаби билан уйда, кўрпа-естиқ қилиб ётарди. Ўрнида Каримов қолгақ эди.

Усмоновни кўриб, у ўрнидан турмоқчи бўлди.

— Йўқ, йўқ, турманг! — буюрди Усмонов ва каравот рўпарасига стул қўйиб ўтирди.

— «Шарқ юлдузи»дан келяпман, кириб ўтай, дедим,— деди у.

— Раҳмат,— Пўлатов миннатдор оҳангда унга қарди. Унинг кўзлари сарғайиб кетган, рангини ҳам анча олдириб қўйган эди.— Қалай, план тўладими?

— План тўлди бугун. Икки кундан кейин район ҳам бажаради.

— Дуруст. Табриклайман,— Пўлатов жилмайди.— Фақат мен уялтириб қўйдим сизни. Бемоврут ётиб олдим.

— Қўйинг, Носир Пўлатович! — уни юпатди Усмонов.— Кўп уриниб қўйдингиз-да. Бунинг устига иссиқ. Тез туриб кетасиз.

— Ҳа,— деди Пўлатов.— Врачлар ҳам шундай де-йишияпти. Узоғи билан яна ўн кун. Ўзим ҳам сезиб турибман. Кеча бошимни кўтаролмовдим. Бугун яхши. Боя айвонгача чиқиб келдим ўзим. Ўн кун эмас, уч-тўрт кунда туриб кетаман!..

Улар анча гаплашиб ўтиришди. Усмонов уни уринтири-маслик учун бир неча марта турмоқчи бўлди, Пўлатов қўймади. Завқ билан совхоз келажаги ҳақида, умуман у билан ишлаётган одамлар ҳақида гапирди. Унинг орзу-лари катта эди. Совхоз уч йилда ўзини оқлайди. Катта-катта олимлар билан гаплашибди. Совхознинг биқинига санаторий қуради. Ўша, Каримов айтган санаторийни. Ошқозон, буйрак, жигар касалликларини даволайдиган санаторий бўлади бу. Қасаллар асосан мева билан даво-

ланади, айниқса олхўри, шофтоли билан. Тўрт гектарча жойга тарвуз экишади. Ҳатто қишида ҳам ўстирилади тарвуз. Олхўри билан тарвуз машҳур Трусковецниккага сувидан қолишмас экан. Одамлар Лъвовга, ундан Трусковецга бориб юришмайди, тўғри бу ёққа, Бодомсойга келаверишади. Консерва заводи қурилганидан кейин совхоз миллионер совхоз бўлиб кетади.

Усмонов уни ҳавас билан эшитди ва чин кўнгилдан тезроқ соғайиб кетишини тилади. Бундай одамнинг уйда ётиши гуноҳ эди. У юриши керак, одамлар ичида бўлиши керак. Қани энди ҳамма уига ўхшаса, у каби қариса!

У хайрлашиб, ўрнидан турганда, Саида опа сўради:

— Сизда гаплари бор эди, айтдиларми?

— Билмадим, нима гап эди?

Саида опа эрига қаради.

— Султоновни айтаман девдингиз Дамир Усмоновичга, айтдингизми?

— Яхши эсга солдинг,— деди бошини кўтариб Пўлатов.— Дамир Усмонович, ўтиринг бирпас.

Усмонов яна жойига ўтирди.

— Ҳайитвой ишдан тўғри олинди,— деди Пўлатов.— Менинг ҳеч қаршилигим йўқ. У айниб қолувди, ўзига бино қўйиб юборувди... Лекин унинг Бодомсойга, қолаверса бутун Фарғонага хизмати синган. Уни колхозлар ташкил бўлаётган йиллари Ҳайитвой кофир дейишарди. Колхозчи тушунмаганлар, болаларини у билан чўчтишарди. Эс-эс биламан, биринчи колхоз тузилганда анор яхши бўлган. Колхоз нима қилишини билмаган. Шунда ўртоқ Охунбобоев келиб қолганлар Бодомсойга. Ер билан битта бўлиб ётган анорни кўриб, бунга зор қанчадан-қанча одамлар бор, деганлар. Ленинградга олиб бориб бермайсизларми, деганлар. У кишининг гаплари билан икки киши — колхознинг раиси билан, оти ҳозир эсимдан чиқди. Фамилияси Исмоилов, Ҳайитвой яхши билади, шу Ҳайитвой бир вагон анорни Ленинградга олиб боришган. Ҳозирги Киров номидаги трактор заводи у пайтда «Крас-

ний путниковец» деб аталарди. Олиб бориб шу заводга беришган. Иккаловини Сергей Миронович қабул қилған. Бир ҳафта Ленинградда меҳмон бўлишган. Қайтишаётганида Кировнинг таклифи билан завод ишчилари уларга иккита «фордзон» беришган. Заводдан бир одам Бодомсойга келиб, трактор ҳайдашни ўргатган. Ҳайитвой биринчи бўлиб тракторга минган. Неча марта уни ўлдирмоқчи бўлишган душманлар. Ўша трактор ҳали ҳам бор. Ҳайитвой асраб қўйибди. Завод билан унинг алоқаси ҳозир ҳам яхши. Шуларни назарга олиб, унга республика пенсияси олиб берсангиз тузук бўларди. Шунни айтмоқчи эдим сизга.

Усмонов ваъда қилди. Ўйга қайтар экан, Султонов Силан учрашишни, бу ажойиб воқеани унинг ўз оғзидаи эшитишни юрагига туғиб қўйди. Ўша куни унинг доим энсасини қотириб келган Султонов бутунлай янги томондан очилган, ҳатто унинг меҳрини уйғотган эди. Бирдан унинг миясига бир фикр келди. Ўша «фордзон»ни Бодомсойга кираверишда баланд посадмент қуриб, устига қўйиш керак. Фарғонада биринчи пайдо бўлгай трактор. Хотира учун. Кейин у бу фикридан айниди. Яхшиси музей қилиш керак. Қишлоқ хўжалик техникаси музейни. Музей олдига шу тракторни қўйиш керак. Аммо бу фикр ҳам уни қониқтирмади. Бундай музей республика ёки область миқёсида бўлгани маъқул. Район учун катталик қиласди.

Шу хаёллар билан бўлиб, районга етиб келганини билмай қолди. Алиев навбатчилик қилиб ўтиради.

— Табриклайман, Дамир Усмонович, «Шарқ юлдузи»нинг планини бажариб келибсизлар!— деди у ҳазил аラлаш.

— Ҳа, тўй ҳам ўтказиб келдик,— деди Усмонов.— Тинчликми?

— Тинчлик,— жавоб қилди Алиев ғалати жилмайиб.

— Ҳа?— ҳайрон бўлди Усмонов.

— Бир хотин сизни жуда кўп кутди. Яқиндагина жў-

натдим,— Алиев ўзини тутолмай кулиб юборди.— Эри ўрикка боғлаб кетиб қолибди.

— Нега боғлабди?

— Ичиб келган экан...

— Аёл киши-я?

— Йўқ, эри!— тушунтириди Алиев.— Кечқурун эри ичиб келиб тўполон қилибди. Эрталаб хотини кетаман, сиз билан турмайман, деб қўрқитибди. Эри ишонган бўлса керак, алдаб-сулдаб ўрикнинг олдинга олиб келибдида, кир осадиган арқон билан маҳкам ўраб ташлабди. Арқонни кўрмай қолибди аёл. Кўрсам, қараб турармидим, ўзларини боғлаб қўярдим, дейди. Эри боғлабди-ю, ишга кетибди. Аёл ўғли мактабдан келиб ечмагунча боғлоқлик турибди. Кўшниларини чақиргани уялибди. Эрини уришади-ю, нуқул сизлаб гапиради. Списалисла, дейди.

Усмонов таниди. Бу Фармонова эди.

— Келадими?

— Эрталаб келади. Сиз танир экансиз. Фақат ўртоқ Усмоновнинг гаплари ўтади, у кишига дейди. Бир марта гаплашган экансиз. «Списалис бўлсаларам энди кичикроқ бир ишга ўтказиб қўйсалар, текин пуллари кўпайиб қолди», дейди.

«Эри билан албатта гаплашиш керак»,— дилидан ўтказди Усмонов ва овозини чиқариб деди:

— Ваъда берган эдим. Лекин гаплашмовдим. Афтидан энди гаплашиш керак. Эрини яхши кўради бу аёл.

Усмонов шундай деб, Алиевга ҳозиргина Носир Пўлатовичдан эшитган воқеасини айтиб берди.

— Бир нарса ўйлаш керак. Бу катта гап. Бир ҳайкалми? Билмадим. Ҳар ҳолда путиловчилар билан пахтакорларнинг дўстлигини билдирадиган бир нарса тошиш керак.

Алиев ўйлаб кўришни, албатта бир нарса топишларини айтди.

...Мастура опа қанча уринмасин, Улуғбек ҳали ухла-

маган эди. Дадасини кўриб, унга талпинди. Усмонов уни қўлига олди.

— Нега ухламайсан-а? — уришган бўлди лўппи қўлларидан ўпар экан.

— Нега ухлар экан? — ҳазиллашиб дўқ қилди тинкаси қуриган Мастира опа. — Ўйинчоқдан қўли бўшамайди! Биттасидан зерикса, иккинчиси тайёр, уй ўйинчоққа тўлиб кетди. Холида бугун яна биттасини ташлаб қетди. Пулимўт. Кошки тушунса, десам, йўқ, балодек қўлига олди. Холида келса, бошқача бўлиб кетади ўзи ўғлинг. Оғзи қулоғига етиб илжаяди. Қиқирлаб қулади қўлига олса.

Усмонов онаси гапларининг маъносини англади. Лекин эътибор бермади. Бу гаплар уни ҳаяжонга солмас, ўйлатмас ҳам эди. Холида яхши қиз. Лекин унга нисбатан Усмоновда ҳеч қандай қизиқиш йўқ эди. Уни бир синглиси сифатида ҳурмат қиласарди. Ҳафиза вафот этган кундан бир ҳафтача ўтиб, Мастира опа Улуғбекни уйга олиб келганда, Холида Усмоновнинг ҳузурига киради.

— Менинг опам қизи бир ойлигида вафот этган,— деди у.— Жияним менинг қўлимда катта бўлди. Бунақа воқеалар бўлиб туради. Рухсат берсангиз, аянгизга вақт-бевақт қарашиб турсам...

Бола ўстириш нималигини билмаган Усмонов унга миннатдорлик билдириди. Шу-шу Холида унинг оиласига яқин бўлиб қолди. «Айтиб қўйиш керак экан,— хаёлидан ўtkазди Усмонов. — Ҳадеб, гапиравермасинлар уни». Бунинг устига у янги турмуш қуришни хаёлига ҳам қелтирмаган эди. Қелтиришни истамасди ҳам. Ҳафиза унинг қалбida ҳамон тирик, овози қулоғида, нигоҳи кўз олдиди эди. Умр бўйин шундай бўлишини у биларди.

Шуни айтмоқчи бўлиб, энди оғиз жуфтлаган эди, телефон жиринглаб қолди. Ўғлини қўлидан қўймай, ўтрубкани олди. Телефон қилаётган Исмоил эди.

— Дамир! Сенинг номингдан бир иш қилиб қўйдим,—
деди у.— Хафа бўлмассан дейман.

— Нима иш?— сўради Усмонов.

— Уруш ветеранлари Бутуниттифоқ жамияти Югославия партизанлари ҳаракатининг қатнашчиларидан бир группасини Совет Иттифоқига таклиф қилибди. Улар орасида Антонов — Ристич ҳам бор экан. Мен уларнинг программасига Бодомсойга келишини киритдим. Сенинг номингдан. Эшитяпсанми?

— Ҳа,— деди Усмонов.— Яхши қилибсан. Қачон келишади?

— Ойнинг охирида.

— Яхши. Жуда яхши,— деди Усмонов.— Менга қара! Султонов ҳақида бирон нарса эшитганмисан? Ҳа, ўша, «Максим Горький»нинг собиқ раиси. Йўқ, йўқ, тинчлик. Нима? Эшитмаяпман? У яхши одам! Эшитяпсанми, яхши одам, деяпман. Илтимос, у билан бир учраш. Ўзинг, ўзинг!

— Райком заказими?— сўради Исмоилжон.

— Шундай деса ҳам бўлади. Айниқса ўтмиши қизиқ. Албатта учраш. Қачон келасан?

— Бирон ҳафтадан кейин. Ҳозир иш кўп. Улуғбек қалай? Улувбек?

— Қўлимда,— Усмонов трубкага ёпишиб олган ўғлиниг юзидан «чўлп» этиб ўпди.— Кун сайин эмас, соат сайин ўсялти. Гвидонга ўхшаб. Яқинда йигит бўлиб қолади. Фақат ухламайди. Аямни қийнаб қўйди.

— Бола-да ҳали,— деди Исмоилжон,— ўзимизни эслла. Ўзимиз ҳам бола эдик. Фақат энди...

— Фақат энди,— уни бўлди Усмонов.— Фақат энди... Йигит бўлдик... энди чўпчак болалик қилмишлари...

Исмоилжон уни илиб кетди.

— Энди бизнинг бошда, дўстим, бу дунё ташвишлари.

— Келишинг аниқ-а?— сўради Усмонов.

— Албатта бораман!— ишонтирди Исмоилжон.

Усмонов трубкани қўйди. У анчагача ўғли билан ўй-

наб ўтирди. Кейин ўзи ҳам ўйинга берилиб кетиб, ўғли қўлида ухлаб қолганини билмай қолди. Мастура опа келиб қўлидан олди. У Ҳафизиздан сўнг бўм-бўш ҳувиллаб қолган ётоқхонага кириб ётар экан, қулоги тагида ҳамои машҳур шеър жарангларди:

Пингит бўлдик, энди ҷўпчак болалик қилмишлари,
Энди бизнинг бошда, дўстим, бу дунё ташвишлари...

Тошкент — Қоктебель — Малеевка
1975—77 йиллар.

У 47

Дамир Усмоновнинг икки баҳори. Қисса. — Т., Ёш гвардия, 1978 С. — 204 б.

Умарбеков Ульмас. Две весны Дамира Усманова. Повесть.

Ўз2

На узбекском языке
Умарбеков Ульмас
ДВЕ ВЕСНЫ ДАМИРА УСМАНОВА

Повесть

Издательство „Ёш гвардия“, Ташкент — 1978

Редакторлар Эмин Усмонов, Тўлқин
Рассом В. Валиев
Расмлар редактори Қ. Алиев
Техн. редактор Л. Буркина
Корректорлар М. Ортиқова М. Юнусова

ИБ — 334

Босмахонага берилди 23/VI-1978 й. Босишга рух-
сат этилди 13.XII-1978 й. Қоғоз № 1. Формати
70×108^{1/32}. Босма листи 6,375. Шартли босма
листи 8,92. Нашр листи 9,21. Тиражи 30000
Р 18506. Шартнома № 81—78 Баҳоси 75 т.
Заказ № 553

Ўзбекистон ЛКСМ Марказий Комитети „Ёш
гвардия“ нашриёти, Тошкент, 700129, Навоий кў-
часи, 30.

Ўзбекистон ССР Нашриёт, полиграфия ва китоб
савдоси ишлари бўйича давлат комитети Тошкент
„Матбуот“ полиграфия ишлаб чиқариш бир-
лашмасининг 1-босмахонаси, Тошкент, Ҳамза кў-
часи, 21.

143